

16910.18

L x


I O A N N

ADAMVS ELIAS SCHMIDT,

Heilbronnensis Medicinae Stud.

d. II^{do} Cal. Dec. 1782.

Erlangae.



Digitized by the Internet Archive
in 2018 with funding from
Wellcome Library

https://archive.org/details/b30551195_0002

IO. FRIDERICI CARTHEVSE
MEDICIN. DOCT. ET PROFESSORIS PVBL. ORD.
ACADEMIAE REGIAE BORVSS. SODALIS ET ACADEMIAE
ELECTORALIS MOGVNTINAE SCIENT. VTIL.
ASSESSORIS

FVNDAMENTA
MATERIAE
MEDICAE

TAM
GENERALIS QVAM SPECIALIS.

TOMVS II.



EDITIO NOVA, PRAECEDENTE EMENDATIO
AC LONGE AVCTIOR.

FRANCOFVRTI AD VIADRVN,
APVD ANTON. GODOFREDVM BRAVN. MDCCLXVII.

THE UNIVERSITY OF CHICAGO

LIBRARY

520 EAST 58TH STREET, CHICAGO, ILL. 60637

TEL. 733-4331

1968

LIBRARY

520 EAST 58TH STREET

CHICAGO, ILL. 60637

TEL. 733-4331

1968



1968

LIBRARY

520 EAST 58TH STREET, CHICAGO, ILL. 60637

TEL. 733-4331

1968

T O M V S I I .

II 2 V M O T





SECTIO XIII.

DE

VAPOROSIS, INEBRIANTIBVS ET NARCOTICIS.

CAP. I.

De natura et principiis Vaporosorum, Inebriantium et Narcoticorum.



§. I.

VAPOROSA, quae ob praecipuos effectus suos *Inebriantia*, *Narcotica* sive *stupefactiva*, *Soporifera*, *Anodyna* ac *Sedativa* vocantur, commode pro meo iudicio in *virosa*, quibus opium v. g. hyoscyamus etc. accenseri merentur, *balsamica*, quorsum crocus, flores sambuci et liliorum alborum recentes etc. pertinent, et *aqueo-spirituosa inflammabilia*, cuius census spiritus vini, vinum, aliaque eiusdem naturae

turae liquida sunt, dividi possunt. Virofa et balsamica, de quibus hoc loco praecipue agendum est, exhalatione continua, accedente imprimis calore, effluvia subtilissima, mobilissima, expansiva ac summe activa, odoris, in prioribus ingrati virosi et obnubilantis, in posterioribus balsamici, emittunt, quibus eminens et singularis omnino eorum virtus narcotica aut inebrians etc. unice adscribenda venit.

§. II.

Memoratum principium mobilissimum substantiae fixiori, unde sensim evolvitur, magis minusve immersum haeret. Substantia haec in aliis, opio v. g. herba Nicotiana etc. *resinoso-gummeae*, in aliis, v. g. nucibus iuglandium (a), *resinoso-gummeo-oleosae*, et in aliis denique, v. g. croco, tam *singularis naturae* est, ut neque resinosis, neque gummeis, neque oleosis corporibus stricte accenseri possit, sed de horum omnium indole participare videatur. Tota enim aqua simplici, ac tota pariter spiritu vini rectificatissimo solvitur, et solutio utraque, seorsim in cucurbita destillationis opé ad consistentiam spissiore redacta, habitu externo oleum pingue balsamicum, cum aqua tamen, spiritu vini et oleo miscibile, refert.

§. III.

(a) Oleum, e nucibus iuglandium recentibus, post praeviam tostionem lenissimam atque trituram, vel etiam citra priorem, ope torcularis expressum, non tantum grata dulcedine sua sese commendat, sed ebriositatem quoque, si largius hauriatur, inducit. Conf. KEYSLEERS *neueste Reise durch Teutschland, Böhmen, Ungarn etc.* P. I. p. 166.

§. III.

De vera atque specifica principii vaporosi, inebriantis, exhilarantis, narcotici natura multae praeteritis seculis, eaeque valde discrepantes, Medicorum opiniones innotuerunt. Alii nimirum istud *sulphur volatile* aut *oleum completum*, alii *sal volatile urinosum*, aut *aliam substantiam incognitae prorsus naturae halituosam* esse, opinati sunt, idemque proinde modo *sulphur vaporosum*, *narcoticum*, *stupefactivum*, *coagulans*, *anodynum*, *mitigativum*, *resolubile*, *immaturum* etc. modo *oleum narcoticum*, modo *Mercurium*, *Gas sylvestre* et sic porro, vocarunt. Verum enim vero, a tramite veritatis longe, me sentiente, recedunt, qui illud *Mercurium* nominant, aut *sal alcalicum volatile* sive *urinosum* aestimant, quoniam sal huiusmodi, nisi prius igne sicco aut putrefactione producat, in subiectis hisce demonstrari nequit, et *Mercurius* merum hoc loco ens imaginarium existit, nullibi, nisi in cerebro fautorum, reperibile. Reliqui, qui istud *oleum* aut *sulphur volatile* esse iudicant, propius quidem ad veritatem accedunt, nullo tamen experimento unquam probare poterunt, quod *oleum* aut *sulphur completum* sit.

§. IV.

Pro mea igitur sententia nihil aliud est, seorsim scilicet consideratum ac liberum prorsus ab aliarum exhalationum consortio, nisi *substantia halituosa*, vel *mere phlogista* sive *simplicior inflammabilis*, vel *oleoso-phlogista*, quae tanta subtilitate, tantaque mobilitate ac vi expansiva pollet, ut vix, aut ne vix, post plenariam e fixiori sua matrice separationem, coërceri, et in visibile atque tangibile aggregatum cogi possit ac con-

densari. Absolute caeteroquin adfirmare non audeo, halitum memoratum, e fixiori matrice prodeuntem, semper ex meris corpusculis naturae inflammabilis purissimis constare; sed facile largior defendentibus, alterius quoque generis moleculas, aqueae scilicet et salinae, praesertim acidulae, indolis, partibus tenerrimis inflammabilibus fociari, turmisque earum sese copiosissime nonnunquam immiscere. Inde tamen minime sequitur, adventitias hasce simul verum principium vaporosum, καὶ ἐξοχὴν inebrians et narcoticum dicendum, constituere, sed illud unice inflammabilis profapiae est.

§. V.

Sententiam meam varia argumenta, a ratione non minus, quam experientia desumta, sufficienter, confirmant. Halitus v. g. puri narcotici, hoc est, nullis particulis salinis adventitiis remixti, acredine penitus destituuntur, et insensibili inhalatione nerveos aliosque corporis tubulos minutissimos ingrediuntur, eosdemque velocissime pervadunt, quod ab effluviis salinis urinosi, et complete oleosi, minime expectandum est. sed priores sub introitu suo per nares vividae morficationis, posteriores lenissimi quasi ardoris sensum imprimunt. Quando hepar sulphuris, ut speciale exemplum adducam, in pulverem redigitur, et hic, tenuiter prius in fundi latioris tigillo expansus, subdito prunarum igne moderatissimo, leni calcinationi submittitur, vapores conspicui (si sulphuris incensio praecaveatur et materia bacillo ligneo constanter agitetur) adsurgunt, ex flavo-viridescetes, siccissimi, inflammabiles, ab acido vitriolico, antea ligante, salis tartari ope liberati, qui, naribus atque pul-

moni-

monibus excepti, nullum plane acredinis sensum excitant, sed, insensibiliter intrantes, aliquam duntaxat capitis temulentiam producunt. Fortuito autem incensa materia pulverulenta, confestim fumi crassiores sulphureo - acidi adscendunt, qui vellicatione sua fortem in pulmonibus constrictionem, cum tussi ac respiratione difficili, suscitant.

§. VI.

Memorato vaporis analogia etiam sulphurea illa exhalatio existit, quae in *Spelunca Italiae canina*, vulgo *Grotta del cane* dicta, faces accensas extinguit, et canes iniectos, aliaeque animantia, diutius paullo in specu detenta, suffocat, et in lethales adfectus soporoso - apoplecticos praecipitat (b). Convenit pariter cum illo halitus carbonum ligneorum, lithantracum et pyritarum pinguium, sub terra post humectationem valde incalescentium. Prior enim, si lithantraces nempe et carbones lignei duriores (*Schmiedekohlen*) in conclavi clauso et angusto accenduntur, tragicos per saepe effectus provocat, homi-

A 3

nesque,

(b) Spelunca haec, quae in regno Neapolitano prope *Puteolos* reperitur, valde angusta est, ac longitudine sua circiter duodecim, latitudine quinque, et altitudine sex pedes aequat. Propter angustiam hanc halitus subtilissimus ac mobilissimus sulphureus, e terra constanter adsurgens, aërem, licet ostium antri plerumque apertum sit, tantopere simul expandit, et tam tenuem rarumque reddit, ut animalium respirationi amplius inservire nequeat: Vnde constat, halitum hunc immediatam aequae ac mediatam effectuum praedictorum causam existere. Conf. KEYSLERI *Reisen*, P. II. pag. 343. sequ.

nesque, gravissimo inducto sopore apoplectico, cito perimit; posterior autem alibi aquas subterraneas, mobilissimis tamen corpusculis acidis adhuc sociatus, impraegnat, iisdemque eximias vires medicas largitur; alibi, circa thermarum v. g. et acidularum scaturigines prorumpens, et pulmonibus naribusque copiose exceptus, temulentiam inducit (c), et ipsam quandoque suffocationem provocat; alibi, in fodinis scilicet metallicis, lampades extinguit, metalli fossiores repentina strangulatione necat, et fabulae plebeiae de Spiritu seu Virunculo subterraneo (*Berggeist*) occasionem praebet. Non nego quidem, perniciosum hunc halitum, quem metallicolae *den Bergschwaden, das böse Wetter* vocant, arsenicalibus etiam, nec non acidis corrosivis aliisque effluviis mineralium nocivis remixtum esse; eundem maxime tamen naturae inflammabilis existere, credo.

§. VII.

Multum denique lucis circa cognoscendam vaporosi principii indolem spiritus vini dephlegmatissimus, vulgo Acohol dictus, et adhuc magis vapor seu spiritus ille sylvestris foeneratur, quem liquores fermentantes emittunt. Ille totus inflammabilis est, ac cito homines inebriat, temulentosque reddit; hic autem, qui potissimam quoque partem ex corpusculis tenerrimis agilissimisque inflammabilibus constat, actione sua opii aliorumque narcoticorum exhalationes aemulatur, et tam potens est, ut animalibus funestam subinde narcosin inducat. Siquidem crebriori dudum experientia comprobatum est, homines

(c) Vid. SEIPPI *Beschreibung der Pyrmontischen Stahlbrunnen*, Cap. III. et IV.

mines in cellis subterraneis, in quibus multa dolia, vino novello aut cerevisia recentiori ac vivide adhuc fermentante repleta, collocata sunt, apoplexia extingui, quando ibi diutius paullo, praesertim spiraculis et ostio clausis, commorari coguntur. Vehementi confestim cephalalgia, vertigine, respiratione anxia et capitis obnubilatione corripiuntur, et deinde, nisi mature exitum quaerant, in praedictum soporem apoplecticum incidunt. Ratio etiam inde clare intelligitur, cur vina recentia, ac cerevisia, in motu fermentativo adhuc constituta, ut et fructus dulces ac succulenti horaei, largius ingesti, praeter flatulentias, etiam temulentiam aliquam, dolorem capitis vertiginosum, somnum turbulentum et ebullitionem sanguinis, quibus tandem maior aut minor corporis universi debilitas succedit, producant.

§. VIII.

Quemadmodum haecenus recensita phlogistam halitus inebriantis atque narcotici naturam satis probant, sic multae pariter observationes de insigni eius subtilitate, mobilitate et vi expansiva, plana testimonia adferunt. Flores v.g. liliorum alborum et sambuci, effluvia soporifera longe interdum lateque per aërem spargunt: Folia iuglandium hominibus, sub umbra earum paullo diutius requiescentibus, somnolentiam, cum temulento atque vertiginoso capitis dolore, exhalationibus suis inducunt: Croci halitus ad somnum invitat; hinc sacculus, cui pauxillum croci inditum est, interdum a mulierculis capiti infantum, agrypnia laborantium, supponitur. Circumspectione tamen hic opus est: nam, si maior croci quantitas adsit, et nimia igitur hali-

tuum copia evolvatur, homo, fortem hunc odorem iusto diutius sentiens, facile, confirmantibus id Medicorum observationibus, praeternaturali, et nonnunquam funesto, sopore corripitur. De eminenti quoque vi expansiva nullo prorsus modo dubitandum est: Infusum enim opii crudi aquosum, admoto leni tantum igne, intra breve tempus ad ebullitionis motum redigitur, decoctum valde spumescit, ac subito, nisi citissime ab igne removeatur, vasculi, quoad dimidiam etiam partem duntaxat repleti, oras transcendit, ita ut interdum in eo exigua saltem quantitas remaneat; et spiritus sylvestris, do-
liis ligneis atque lagenis vitreis copiose cum potulentis fermentantibus inclusus, calore subito intrante, aut motu saltem atque iterata concussione accedente, tantopere expanditur, ut vasa ista subinde, aequae fere, ac pulvis pyrius accensus, vi maxima disrumpat: Vt nihil denique de repentina sanguinis, praesertim apud subiecta plethorica, rarefactione dicam, quae nonnunquam post largiorem opii similiumque vaporosorum adsumptionem tanta evasit, ut eam, teste experientia, vasculorum quorundam sanguiferorum in cerebro aut pulmonibus ruptura insecuta fuerit.

§. IX.

Salina acida mobilissimae ac summe expansivae huius substantiae halituosae corrigentia optima sunt, eamque ita mutant atque refrenant, ut tam impetuosam, quam antea, actionem exercere nequeat. Siquidem satis compertum habemus, somnum profundum, ab opio et liquoribus vinosis inductum, per liquida acida, acetum v. g. succum citri, limoniorum etc. rursus
discuti,

discuti, et opiata ac crocata, acidulis menstruis extracta, aut spiritibus acidulis nitri ac salis dulcificatis etc. addita, longe mitiores in corpore effectus edere. Nam acida quaevis, uti alibi dudum retuli, corpora inflammabilia, expansa, resoluta nimis, rarefacta, coërcent, figunt, et ita haud raro cum iis in mutuos amplexus ruunt, ut ex unione hac vera sulphura aut olea nascantur. Oleum vitrioli v. g. observante FRIDERICO HOFFMANNO (d), opio crudo, in frustula dissecto, superfusum, ea quantitate, ut ambo ad minimum sex uncias expleant, sub destillatione ex retorta vitrea liquorem transmittit foetidissimum, pellucidum, saporis acidi ingrati, circiter ad uncias duas. In retorta caput mortuum remanet nigrum, leve ac spongiosum, quod, flammae admotum, sulphuris vulgaris odorem spirat. Nulla interim, quod notatu utique dignum est, acrimonia corrosiva vitrioli, neque odor vaporosus, virosus, graveolens opii, in liquore et capite mortuo amplius sentiuntur.

§. X.

Ex memoratis clare patescere opinor, quod salia alcalia, tam fixa, quam volatilia, nec mi-

A 5

nus

(d) „Hinc constat, ALEXANDER THOMSON „in *Dissertat. de Opio*, pag. 121. scribit, quam „inepta encheiresi opium corrigant Medici antiqui „aromatis calidioribus, hodie vero castoreo et „croco. Enim vero contra omnem sensum, „imaginati, opium veneni quidpiam continere „frigidissimi, idem calidioribus admixtis debellare „aggressi sunt. Verum constat, opium medica- „mentum esse omnium calidissimum (idiomate „loquor Medicis proprio); viribus igitur nimis ca- „lidis quodammodo augetur, nedum fit mitius etc.

nus succus hyoscyami, myrrha, piper, zedoaria, crocus, cinnamomum, caryophylli, castoreum et similia, opiatum, ceu narcoticorum praecipuis, addita, vim eorum narcoticam, quod multi tamen crediderunt, nullo prorsus modo infringant, sed vim potius expansivam ac commoventem intendant. Parum quoque utilitatis tostio habet, quoniam ea mediante principia activa nimium expelluntur, nec vera proinde correctio, sed mera castratio suscipitur. Optima praeparata, me sentiente, erunt extracta, cum aqua simplici, aut menstruis aqueo-spirituoso-acidulis vegetabilis profapiae, v. g. succo citri, limoniorum, cydoniorum depurato, spiritu aceti, vel minerali etiam nitri ac salis spiritu dulcificato, blandae digestionis beneficio parata, ac spumida materia supernatante, quantum fieri potest, liberata. In hac postrema enim, uti in antecedentibus pridem monui, Gas Helmontii sylvestre copiosius latet, eademque virulentissima indolis est. Fermentatio denique cum aqua simplici aut succo cydoniorum, blanda tamen ac lenta, non penitus spernenda est, dum leniori atque protracto motu fermentativo notabilis principii vaporosi impetuosioris portio extruditur.

CAP. II.

De modo operandi et virtutibus Vaporosorum.

§. I.

Substantia vaporosa, sicuti considerato genio eius confestim enitescere credo, post inebriantium et narcoticorum ingestionem in prima culina non adeo diu commoratur, nec diu etiam in

in illa, ob ingentem subtilitatem, mobilitatem ac volatilitatem suam, morari potest, sed, a fixa aut comparative tamen immobiliori matrice sua intra breve tempus calore adiuvante separata, per innumeras venas bibulas, in ventriculi et intestinorum superficie interna patulas, ad humores circulantes transit, eosdemque, praesertim sanguinem, sub velocissima sua per maiores minoresve machinae universae canales distributione, non expandit solum, sed valide etiam ad celeriores circuitum impellit, adeoque initio motuum plerorumque augmentum procurat.

§. II.

Veritatem dictorum *hilaritas*, quam opium ceteraque huius commatis, modice usurpantibus, in principio conciliant, egregie probat. Gentes pene omnes in Turcia, Persia, Aegypto, India et Iaponia opio, et variis inde praeparatis, nec minus inebriantibus atque narcoticis aliis frequentissime in conviviis, et extra illa, ad hilaritatem excitandam, moeroremque discutiendum, utuntur, et adeo eorum adsumptioni adsuescunt, ut prorsus iisdem carere nequeant, aequae, ac heluones vini, cerevisiae, ac vini adusti, aut ii, qui toto die tabaci fumum hauriunt. Turcae suum *Maslach* quoque amant, quod ex opio, feminibus lolii, cannabis ac daturae, nec non radice mandragorae ac filicis, in pulverem, aut, melle addito, in electuarium redactis, constare dicitur. Inde divites opium purius et excellentius, *Affion* dictum, pauperes saltem *meconium* seu opium impurius, ignobilius, vilius, *Poust* nuncupatum, deglutunt; hinc divites etiam proverbialiter *Affionii*, pauperes *Poustii* vocantur

tur (e). Omnes praeterea, aut tamen plerique, toto die usitatissimo masticatorio, ex frustulo nucis *Arecae* ac foliis *Betele*, in trochi formam post enervationem convolutis, calcisque ostrearum pauxillo leviter obductis, composito, et vulgo *Pinangue* dicto, delectantur. Pertinet hoc non solum ad moderata exhilarantia, leviterque inebriantia, sed copiosam quoque salivam, sub volutatione in ore ac manducatione, elicit, et gingivis robur, labiis colorem rubrum, ac gratum ori halitum conciliat.

§. III.

Notatu etiam hoc loco dignissimum censeo singulare quoddam Electuarium opiatum, teste KAEMPFFERO, in India pariter ac Persia venale, cuius mirandam prorsus exhilarandi virtutem ipse KAEMPFFERVS aliique comites Europaei in convivio apud hospitem Benianum experti fuerunt: „Perfusi atque repleti sumus, *Auctor laudatus scribit* (f), quotquot Nepenthe lactati, „gaudio quodam inexplicabili, quali me nunquam in vita affectum memini. Nec aliud toxico illo delibutis licuit, quam amplexus miscere, loqui parcissime, arridere alloquentibus, „et cachinnis se invicem laceffere. Soluta sub „noctem convivio, ubi equos conscenderamus, „virtus pharmaci, quasi mutata scena, alia cerebris nostris creavit phantasmata. Haud enim „aliter nobis visi fuimus, quam cum Pegaso volatu per nubes ac irides ferri, lucida elegantissimorum colorum specie undiquaque obversante „oculis

(e) Conf. LINDESTOLPE in *Tract. de Venenis*, pag. 588.

(f) In *Amoenitat. exot. Fasc. III. pag. 652.*

„oculis nostris. Appulsi domum, et coenae,
 „quae nos exspectaverat, accumbere iussi, quic-
 „quid quisque ante se invenit, capimus adpetitu
 „lupino, et ciborum qualiumcunque sapore ita
 „oblectamur, ut cum Diis ipsis nos coenare vi-
 „deremur. Postridie gravedo, qualiter solet
 „post crapulam, nulla cerebrum infestavit, sed
 „discussis somno vaporibus, in statum suum re-
 „stituta est ratio, et optime habuimus. Oblite-
 „rata pridem gestorum memoria, minime gau-
 „diorum et incomparabilis, quae nos foverat,
 „laetitiae immemores fuimus; recordati etiam
 „(quod singulare noto) metus ruendi versus la-
 „tus dextrum, quo equitantes et euntes conti-
 „nuo angebamur, cuius idea tam fortiter im-
 „pressa, non poterat etiam mente excidisse etc. „
 Cum singulari hoc pharmaco exhilarante istud
 pariter Electuarium opiatum nonnihil convenit,
 quod, narrante PROSPERO ALPINO (g), *Ber-*
navi appellatur, et ab Indiae orientalis et Aegy-
 pti incolis saepissime quoque in usum trahitur.
 Nam omnes, qui portionem eius adsumserunt,
 non adeo diu post ingestionem hilares evadunt
 atque loquaces, canunt, rident, delirantque,
 deinde, elapso circiter horae spatio, irascuntur,
 effrenesque fiunt, tandemque contristantur, ti-
 ment, plorant, lamentantur, donec in somnum
 profundum incidant, quo aliquamdiu durante,
 principium vaporosum, quod turbas praedictas
 concitaverat, paullatina exhalatione consumitur,
 et mentis sanitas redit.

§. IV.

Non tantum ad hilaritatem ac grata in ani-
 ma phantasmata suscitanda, sed ad vires quoque
 corpo-

(g) *Libr. de Medicina Aegyptiorum, Libr. IV. Cap. I.*

corporis augendas, et furiosam quasi audaciam menti inspirandam, memoratae gentes orientales opiatibus utuntur; hinc saepe a vesanis eiusmodi hominibus, sicuti ex peregrinantium relationibus abunde constat, homicidia et alia delicta perpetrantur. Nec destituitur etiam probabilitate, mulieres Banianorum, cum defuncto marito sese comburere volentes, opiata adsumere. Hilares enim fiunt earum quamplurimae, rogi sine cunctatione conscendunt, ac terribilem hanc mortem violentam nullo prorsus modo reformidare videntur. Multi denique, nec sine ratione, credunt, milites Turcicos, in praelia ituros, Maslac adsumptione largiori furiosam sibi audaciam conciliare, adeoque initio conflictus hostes suos semper impetuosius adoriri; qui impetus tamen valde remittit, quamprimum, conflictu ad tempus continuato, commovens atque expandens principium exhalatione paulatim auferitur, et toti corpori torpor quidam inducitur.

§. V.

Binis hisce argumentis adhuc tertium, a virtute *sudorifera et aphrodisiaca* desumptum, adiungo. Opiata nimirum et quaevis alia vaporosa inebriantia selectiora, decenti quantitate adsumpta, fortem sudorem movent, et stimulos venereos in sexus utriusque hominibus excitant, quae sane absque motuum augmento, et aliqua humorum rarefactione, fieri nequeunt; immo, si iusto maiori copia adhibita fuerint, subinde, sicuti supra pridem retuli, periculosum aut plane lethalem sanguinis orgasmum producant. Observante enim BORELLO (h), opium tantam aliquan-

(h) Cent. IV. Observat. 97.

quando cruoris expansionem in subiecto quodam concitavit, ut vasorum ruptura et lethalis haemorrhagia superveniret. Non mirum profecto nec plane infolitum mihi hoc videtur; nam si spiritus fermentans dolia, ligaculis ligneis probe firmata, nec non lagenas vitreas disrumpere valet, accedente nimirum calore aut vasis agitatione, non impossibile pariter futurum censeo, similem materiam vaporosam ac summe elasticam, per corporis vivi maeandros cursu velocissimo distributam, interveniente maiori rarefactione, violentas nonnunquam vasorum rupturas efficere posse, praesertim apud subiecta plethorica et in iis visceribus ac partibus, quae vasculis tenerioribus gaudent, vel sanguini circulanti, propter obstructions iam praesentes, viam liberiores magis minusve praeccludunt.

§. VI.

Firmo igitur, pro meo iudicio, fundamento nititur, vaporosa initio insigne motuum augmentum in corpore, maxime autem in sanguine, procreare, ac vi naturae suae necessario etiam producere debere, adeoque operationem suam vehementer expandendo ac commovendo potissimum absolvere. In gravi igitur errore versantur, et confectaria quaedam a prima inebriantium et narcoticorum actione, prout decet, discernere vel nesciunt, vel negligunt, qui statuere atque defendere sustinent, subtile ac mobilissimum hoc elementum sulphureum frigidae naturae esse, ramosisque particulis suis in sanguine iterum coire, et huius atque spirituum meatus directe obstruere, spiritus animales addensare quasi ac coagulare, adeoque hoc et priori modo liberum eorum vegetumque in cerebro

bro ac toto systemate nervoso progressum atque influxum impedire.

§. VII.

Nullum opinionibus hisce patrocinium argumenta, ab insequente ut plurimum temulentia, torpore corporis, hebetudine sensuum et somno profundiori desumta, largiuntur. Nam probe effectus primi ab iis, qui iterum ex hisce resultant, quique succedere quidem possunt, non semper tamen succedunt, distinguendi sunt, et diversa pariter intrantis principii vaporosi copia, differens itemque puritas eius, subtilitas ac mobilitas, et discrepantes ideo operationis gradus, attentam considerationem merentur. Quae autem ut clariora evadant, sequentia notanda veniunt. Primo nimirum, quando vaporosa puriora ac debite praeparata, minori quantitate ac iusto tempore adsumuntur, vegetiorem duntaxat sanguinis, lymphae ac fluidi nervei circuitum, moderatamque eorum resolutionem ac rarefactionem, efficiunt, et hilaritas proinde, tandemque, principio mobili per exhalationem cutaneam sensim abeunte, largior transpiratio, immo lenior sudatio et modica tantum, nec corpori nociva, tubulorum aliarumque partium solidarum relaxatio, cum somno placido, ab ordinario parum vel nihil distincto, succedunt: Sin dosi vero paullulum largiori ingesta fuerint, vehementiorem quoque cruoris caeterorumque humorum rarefactionem ac commotionem provocant; hinc non mirandum, quod gaudium effusius, aut varia phantasiae ludibria, quin furiosa nonnunquam audacia, cum rixandi desiderio, et in corpore postmodum insignior tubulorum relaxatio ac partium solidarum plerarumque flacciditas,

ditas, cum sudore largo et somno profundiori ac diuturniori, superveniant. Canales enim, praesertim in cerebro, vehementi sanguinis ac fluidi nervei expansione tantopere distenduntur, ut tunicae eorum elaterem ac tonum suum naturalem plus minusve amittant, et decens igitur aequilibrium, vel, si dicere mavis, iusta proportio inter nismum et renismum partium solidarum ac fluidarum, aliquamdiu tolli debeat.

§. VIII.

Aliter porro comparatum est, et consecutaria, praecedentibus violentiora, notantur, quoties eadem pharmaca quantitate iusto maiori adsumuntur. Brevi nimirum elapso tempore ingens sanguinis commotio tantaque expansio, praesertim in substantia cerebri corticali, ubi vascula sanguifera arteriosa ac venosa tunicis longe tenerioribus ac debilioribus, quam alibi, gaudent, producit, ut tubuli substantiae medullaris exilissimi et ipsi nervi, circa suam imprimis originem, comprimantur, et magis igitur minusve sufflaminato laticis spirituosus influxu atque progressu, temporaria mentis ac sensuum perturbatio, vertigo, aliaque prava pathemata, et tandem ingens partium solidarum relaxatio, quin status quasi semiparalyticus, cum profundo, diuturno et nonnunquam lethali, sopore, sequantur. Quidam, uti SCHELHAMMERVS refert (i), pilulas deglutiebat, quae tria grana cum dimidio opii, totidemque croci continebant. Inde sequentia orta symptomata: „Pri-
mo somnus insomniis gravis ac turbulentus,
„dein-

(i) In *Ephem. A. N. C. G. Dec. II. Ann. 5. Obs. 12.*
Carth. Mar. M. II. Tom.

„deinde, elapso horae quadrante, linguae motus impeditus, et tanta oris siccitas, ut verba vix proferre posset. Post horam, cum semper interea excitaretur, supervenit vertigo et circumgyratio, coepitque caput turbari; retulitque postea, se cum lecto in aëre suspensum fuisse, sibi visum, et quasi volitare, omniaque cum ipso circumgyrari. Surgere iussus coepit ambulare, primum non sine titubatione, mox tamen et turbatio illa cessavit nonnihil, et incessus firmior fuit, non tamen omnimode: nam motus musculorum iam tum imminuebantur, sed obtusus animus ac sibi nescius perstitit. Non tamen incongrua loquebatur, sed interrogatus recte respondebat. Inde horae dimidia spatio sensus omnes, praeter auditum et visum, cessarunt. Acerrimum acetum, initio iam propinatum, nihil acredinis habere dicebat. Tum nec spiritum salis ammoniaci, nec sal volatile percipiebat nares titillare, immo odore destitui pronunciabat. Post horae dimidium liberatus iterum est, et post sex horas recorderbatur iterum actorum, et dicebat, antea se nullius rei perfectam habuisse notitiam.,

§. IX.

Ex memorata universali partium solidarum relaxatione, quam vaporosa remedia, pro moderatiori, aut violentiori operatione sua, vel sola canalium, tam sanguiferorum, quam nerveorum distensione, vel sanguiferorum distensione et nerveorum compressionem producant, non tantum, uti praecedentia pridem monstrant, virtus hypnotica, sed anodyna pariter ac sedativa, in doloribus atrocissimis, convulsionibus, immodicis excretionibus serosis, immo ipsis quan-

quandoque haemorrhagiis exorbitantibus decantatissima, praecipue deducenda est. Quaecunque enim humores crassos commovendo resolvere et attenuare, stagnantes ac quiescentes ad progressum liberiores reducere, impuritates acres, passim ad- et inhaerentes, excutere, resoluta ac mobilia heterogenea per poros cutaneos expellere, tandemque, quod praecipuum in hac parte momentum est, exilibus funiculis nerveis aliisque partibus solidis, antea plus minusve strictis ac tensis, maiorem vel minorem flacciditatem, adeoque maiorem etiam vel minorem sentiendi ac movendi impotentiam temporariam, inducere valent, doloribus quoque ac violentis partium solidarum contractionibus minuendis aut plane compescendis apta existunt:

„Dum opium, LINDESTOLPIVS *Lib. cit. pag. 697. scribit*, laxat partes, spasmo contractas, facit acria spicula solidis partibus excidere. Sic si in manu cultrum acutum tenuerim, et com-
 „prefferim manum, mihi nocebit. Si vero somnus supervenit et inducit flacciditatem manui spontaneam, excidit culter manu. Ita cum solidis, interius in acria agentibus, comparatum est. Dum enim homo sopitur, totum corpus laxatur et flaccescit, uti cuivis patet. Sic, dum calculus ex pelvi renali in ureterem emotus est, ibi saepe haeret, maximosque dolores facit, uretere per spasmum ad latera calculi fortiter se contrahente. Opium tum datum, calculum optime pellit, sicut et infusus in semicupio calido, et quaecunque potentiam habent, partes spasmodice strangulatas laxandi et resistentiam minuendi etc. *et p. 605.* Hinc opium interdum in dolore vehemente, ab acribus, canali alicui impactis, orto, profuit. Quamdiu enim

„cor agit valide in spiculum, dolor perennat,
 „sed, dum cordis impetus sistitur aliquantulum,
 „flaccescitque per somnum corpus totum, deci-
 „dit spiculum loco suo; non aliter ac culter ma-
 „nu dormientis et suapte sponte flaccescentis
 „excidit etc.,

§. X.

Facillime etiam ex imminuta praedicta sentiendi ac movendi potestate ratio, uti ego quidem opinor, intelligitur, cur vaporosa haec pharmaca haemorrhagias immodicas et excedentes excretiones serosas, sola halituosa cutanea excepta (quam ob vehementem sanguinis commotionem largiorem reddunt), minuant, aut penitus sistant. Fluida enim corporis nostri, quod Medicorum singulis notissimum est, propria vi neque moventur per vasa, neque se-et excernuntur, sed motus eorum, cum quo se-et excretiones pari passu ambulant, a partium solidarum contractione, pressione et iterato impulsu praecipue pendet: Vnde etiam haud mirum est, quod magna, immo interdum fere paralytica, flacciditate, solidis moventibus per narcotica inducitur, ac debili inde orta, et passim penitus propemodum cessante, tensione ac contractione, se-et excretiones languidius succedant, profluvia excedentia minuantur, aut plane sistantur ac supprimantur. In mortuis enim, ubi solidorum contractio plene planeque cessat, confestim etiam sistitur circulus sanguinis, sistuntur omnes se-et excretiones, et apud syncopiticos, in quibus torpidissimae solidorum contractiones adsunt, quaelibet se-et excretiones, si sudorem nonnunquam exceperis, cum languido humorum circuitu, valde pariter languidae evadunt, quid? quod, enormes vulnerum haemorrh-

rhagiae, superveniente lipothymia, vel penitus cessant, vel protinus tamen minuuntur; quemadmodum idem saepissime etiam observamus, quando homines, vena secta, animi deliquio corripiuntur.

§. XI.

Quamvis pharmaca vaporosa, debite tamen praeparata ac iusta dosi exhibita, inter heroica variarum aegritudinum remedia militent, et in doloribus imprimis, convulsionibus, profluviiis ferosis et haemorrhagiis citum per saepe validumque auxilium ferant, non promiscue tamen in morbis memoratis usurpanda sunt. Pro mea enim sententia minime conducunt, ac facile nociva evadunt, quando *vigiliae*, praesertim apud senes, aut aegros, febre acuta vel mania laborantes, a feri penuria et vehementiori pridem humorum exagitatione, ingenti rarefactione et velociori circuitu, *convulsiones* a nimia vasorum repletione aut nimia etiam exinanitione, et *haemorrhagiae* a cruore abundante et orgastice expanso, potissimum derivandae sunt, vel *profluvia serosa* a nimia dudum partium solidarum relaxatione dependent, aut, praesente copiosa ac valde interdum virulenta impuritate, ad evacuationes salutares et mere criticas spectant.

CAP. III.

De Herba Nicotiana et Floribus Sambuci recentibus.

§. I.

HERBA NICOTIANA, alias etiam *Herba sancta*, *Tabacum* etc. dicta, hodie ubivis locorum tam nota est, ut prolixior proprietatum

externarum descriptio mihi plane superflua videatur. A Botanicis plures quidem species recensentur, in plerisque tamen Americae, Asiae et Europae regionibus duae tantum, nimirum *Nicotiana foliis lanceolatis* LINN. sive *Nicotiana maior latifolia* C. B. et *Nicotiana foliis ovatis* LINN. sive *Nicotiana minor* C. B. in agris hinc inde hortisque copiosius feruntur, et ingens ideo differentia, quae circa Nicotianae vendibilis bonitatem observatur, a climatum duntaxat, soli natalis, culturae ac praeparationis diversitate dependet. Olim haec planta solummodo in Brasilia, Peru, Mexico, Insula Tabago et aliis Americae regionibus sponte proveniebat, et Europaeis anno demum millesimo, quingentesimo ac quinquagesimo sexto primum innotuisse dicitur. Usus foliorum multis postmodum tantopere placuit, ut mox de transplantatione, et, cum successum animadverterent, de meliori pariter ac uberiori cultura solliciti essent.

§. II.

In naturali foliorum Nicotianae mixtione, praeter inertes partes terreas, substantia resinosa, gummea, et valde mobile principium vaporosum, immo interdum tenerrimae quaedam moleculae nistri embryonati, sub combustionem ex strepitu et scintillatione cognoscendae, reperiuntur, quae postremae tamen peregrinae adventitiae videntur, ac sine dubio stercorebus, quibus agri fertiles redduntur, originem debent. Portio resinosa, licet longe minori quantitate, quam gummea, mixtionem ingrediatur, maiori amaritie, eminentiori acredine atque calidiori natura gaudet, et vaporoso etiam principio matricem praecipue praebet. Pro diversa Nicotianae specie

cie separabilium elementorum proportio variat. NEVMANNVS ex uncia una *Nicotianae Americanae*, vulgo *Canaster* dictae, extracti aquosi primi unciam dimidiam et drachmam semissem, spirituosum secundi drachmam dimidiam, spirituosum primi drachmam unam cum semisse, et aquosi secundi drachmas tres cum dimidia, ex uncia vero una *Nicotianae Hollandicae* extracti aquosi primi unciam unam, spirituosum secundi drachmam unam, spirituosum primi drachmas duas et scrupulum unum, aquosi secundi drachmas duas totidemque scrupulos, et ex aequali denique *Nicotianae Marchicae* quantitate extracti aquosi primi unciam unam et grana quinquaginta, spirituosum secundi drachmam dimidiam, spirituosum primi drachmas duas cum semisse et aquosi secundi drachmas pariter duas cum dimidia obtinuit (k). Secundum mea examina, quibus *Nicotianam* duntaxat *Americanam* et *nostratam Marchicam* subieci, indicatarum quantitatum nonnullis pauxillum quidem detrahendum esset; attamen, cum maxima sit *Americanae* venalis varietas, et *Marchicae* etiam diversa bonitas, non mirandum est, quod saepissime apud principia separata maior aut minor ponderum discrepantia observetur.

§. III.

Destillatione sicca ac violenta ex tabaci foliis multum quoque olei educi potest, quod neutiquam tamen, uti LEMERY (l), aliique crediderunt, essenziale est, sed ad formanda solum principia gummeo - resinosa fixa concurrit, et

B 4

absque

(k) *Lib. saepius allegato, pag. 949.*

(l) *Vid. Eius Materialien-Lexicon, pag. 782.*

absque plenaria proinde eorum destructione separari nequit. Vix laudatus NEVMANNVS ex unciis duabus Nicotianae Americanae (*Canaster*) et vulgaris Marchicae drachmas duas, ex aequali autem Nicotianae Hollandicae quantitate saltem drachmam unam cum semisse impetravit. Empyrematicum ac foetidum hoc oleum, licet sub ignis sicci tortura notabilem mutationem perpeffum fuerit, narcoticam et acrem indolem, quam antea in integra substantia gummeo-resinosa habebat, retinet, ac tanta virulentia pollet, ut, teste FRANCISCO RHEDI (m), canibus, felibus, avibus aliisque animalibus, si ipsis ad paucas duntaxat guttulas exhibeatur, vel adhuc citius ac certius, si modica quantitate sanguini, per venam apertam, aut vulnus inflictum, immediate admisceatur, mortem inferat.

§. IV.

Manducata Nicotianae folia copiosam salivam ex glandulis oris eliciunt, ac simul, si liquor nempe salivalis, acribus eorum particulis impraegnatus, ad ventriculum et intestina defluit, vehementem emesin (n) ac catharsin, cum multa nausea, excitant, et magnam praeterea vertiginem, temulentiam, stuporem, immo sopor-

(m) *Experimenta circa varias res nat. p. 8. et 46.*

(n) D. ADAMVS a LEBENWALD in *Ephem. A. N. C. G. Dec. II. Ann. 2. Observat. 108.* refert, pulverem Nicotianae, quod notatu utique dignum est, in viro quodam, cum ulceri ichoroso femoris dextri, per currum antea contusi, inspergeretur, non prima tantum vice, sed postea quoque, sub repetita quavis inspersione, enormem provocasse vomitum.

soporem producunt; hinc nostra etiam aetate usus eius internus, etiamsi Veterum multis saepe placuerit, apud providos ac rationales Medicos plane exolevit, si extractum aquosum exceperis, quod paullo mitioris indolis est, et incidendo, abstergendo, leniterque stimulando non contemnendum subinde auxilium in adfectibus pectoris pituitosis, aliisque frigidis ac refractariis catarrhalibus, per potentiora remedia abigendis, attulit.

§. V.

Rariorem usum internum multi homines creberrimo usu externo compensant. Nam adeo adultorum quamplurimi, praesertim in regionibus humidioribus ac frigidioribus, fumum ac pulverem Nicotianae amant, ut nullam horam sine fumi, nullumque horae minutum sine pulveris usu transigant, et pane facilius, quam fumo ac pulvere memorato careant. Verum enim vero, si dicere licet, quod res est, quodque testimoniis experientiae quotidianis confirmatur, suspecta omnino medicina est, et fumus non minus, quam pulvis sanitatem eorum, qui alterutro vel utroque intemperantius utuntur, vario modo laedit, et siccis imprimis, macilentis atque cholericis subiectis magnopere nocet. Fumus enim particulis empyreumaticis foetidisque oleosis, et terreo-salino-alcalicis acribus, sub combustionem demum genitis, scatet, et forti irritatione salivam plus iusto elicit, adeoque totum corpus sero, ventriculum autem, praesertim si paullo ante aut post pastum hauriatur, necessario liquido solvente privat; unde fit, ut praesens vel futura ciborum digestio valde minuatur ac corrumpatur. Nigredinem praeterea

dentibus inducit, gingivas ad scorbuticam quasi putrefactionem et facilem cruentationem disponit, pulmones exuccos, flaccidos, debilesque reddit, animae foetorem conciliat, ac, sensim cum liquido salivali ad ventriculum delatus, appetitus et digestionis (o) vitia auget, sanguinem exagitat, cerebro ac nervis imbecillitatem infert, et successive totius corporis marasimum, vel pulmonum exulcerationem, aut aliam labem adducit.

§. VI.

Noxae, praedictis vix, aut ne vix, leviores, ab abusu pulveris Nicotianae exspectandae sunt. Dum nares enim acri atque terrestri hoc pulvere constanter replentur, aliter omnino fieri nequit, quin ductus glandularum excretorii obstruantur, et tenerrimae papillulae nerveae, sensim destructae ac quasi corrosae, tandem apta olfactus organa constituere desinant. Vt nihil dicam de laesione cerebri, ventriculi atque pulmonum, qui postremi ideo maius detrimentum patiuntur, quoniam aër, sub inspiratione nares penetrans, sub-

(o) „Tabacum masticatum, BERNHARDVS RAMAZZINI in *Tract. de Morbis artificum*, in „*Oper. pag. 538. inquit*, seu illius fumum, per „tubulum tabacinum exsuctum, appetentiam ob- „ruere, ita ut longum iter illius usu possit confici „sine famis molestiis et stomachi latratu, tradunt „multi, inter quos GVILIEL. PISO, qui in „peregrinatione per loca deserta, tali masticatione „usus, nec lassitudinem, nec famem sensisse affir- „mat. HELMONTIVS idem adstruit, aitque, „id fieri, *non quia Nicotiana famem sedet, quasi „satisfaciat defectui, sed in quantum sensus defe- „ctum tollat, simulque functionum exercitia etc.* „

subtiliores pulveris moleculas, sensim abreptas, in pulmonum fistulas transfert, ubi postea tussim et dyspnoeam excitare, ac telam eorum, ob alias causas nonnihil pridem labefactatam, ad ulteriorem corruptelam deducere valent. Adplicari hoc loco possunt, quae vix allegatus RAMAZZINVS *Loc. cit. pag. 537.* de odore Nicotianae et nocivo pulvere volante proposuit: „Tam liberaliter ergo, *sic eius verba sonant*, a Tabacopoeis odores isti ac pulvisculi volantes, qui acriores sunt, quo tenuiores, per os et nares excepti teneram pulmonum et asperae arteriae tunicam pungunt, et exsiccant, tetrisque halitibus spiritus animales, cerebri incolas, obfuscant, immo narcosi quadam obtundunt, ac eodem tempore stomachi fermentum corrumpunt, illius acidum infringendo etc.,

§. VII.

Haftenus memorata eum in finem nequaquam dicta sunt, ac si fumi et pulveris Nicotianae usum prorsus damnandum esse iudicaret; sed iis detrimenta solummodo, ab abusu metuenda, breviter indicare volui. Satis enim scio, fumum ore haustum, pulveremque naribus attractum, ad abigendos pituitosos capitis morbos, ex lymphae acris ac viscidae adfluxu et decubitu largiori oriundos, multum conferre, et in cephalalgia, hemicrania, susurro aurium, odontalgia et otalgia seroso-catarrhali et rheumatica, immo in ophthalmia humida etc. interdum, praesertim apud subiecta succulentiora, admodum prodesse: Vt nihil de excretionem alvina dicam, quam matutinus ac moderatus fumi usus apud multos, qui eidem adsuefacti sunt, regularem liberamque servare solet.

IO. ANDREAS

DREAS STISSER (p), ill. *Dom. de* HAEN (q), clariff. *Dominus Dr.* IO. GOTTLIEB SCHAEFFER (r), et plures alii Clysterem quoque tabacinum siccum, seu fumum herbae accensae, clysmatis instar, in intestina immittendum, apud aegros, obstructione alvi refractaria, colica, passione iliaca, tympanitide intestinali, hernia incarcerata, adfectibus soporosis etc. laborantes, magnopere depraedicant, et scripta igitur eorum infra allegata ab ignaris, qui plenius de utilitate huius enematis et peculiari imprimis applicandi methodo informari cupiunt, legi merentur. De reliquo usu externo multa addere supervacaneum duco, et adhuc paucis solummodo retulisse sufficiat, folia recentia non minus, quam exsiccata ac maceratione in aqua paullulum rursus emollita, subinde ulceribus ac vulneribus sanandis, nec non maturandis carbunculis pestilentialibus, ut et partibus, a serpente aliove animali venenato demorsis, cum effectu haud spernendo imponi, quin exsiccata etiam decocta traymatica et anthelmintica externa ingredi.

§. VIII.

(p) *De Machinis fumiductoriis curiosis, sive fumum impellendi intra corpus instrumentis eorumque in praxi medica adhibendi ratione et usu Epistola ad illustriss. Viros magnae Societatis Regiae Anglicanae. Hamb. 1686.*

(q) *Rat. med. in Nosocom. pract. P. I. Vindeb. 1751.*

(r) *Von den Nutzen und Gebrauch des Tobackrauch-Clysters, und zweoen dazu bequemen Maschinen. Regensb. 1766.*

§. VIII.

Herbae Nicotianae RECENTES SAMBUCI FLORES hoc loco subiungam, quoniam, praeter fixum principium mucilagineum, etiam multas partes balsamico - vaporosas possident, et ideo emollientem non minus, quam anodynam, hypnoticam et galactophoram virtutem exerunt. Plerumque cum lacte recenti coquuntur, idemque postea interne adsumitur. Externe, cum lacte pariter aut aqua cocti, partibus dolentibus, spasmus adfectis, aut nimium exsiccatis, sub cataplasmatibus aut epithematibus forma, imponuntur, et interdum quoque clysmata emollientia ac pargorica ingrediuntur.

CAP. IV.

De Croco,

§. I.

CROCUS OFFICINARVM, *Safran*, vulgo *Crocus orientalis* dictus, nec florem integrum, nec floris quoque corollam, sed tantum flavo - rubra seu potius aureo - purpurea, splendentia, aromatico - amaricantia ac fragrantissima stigmata vel stamina quaedam floralia, intra corollae terminos nascentia, denotat. Olim solummodo ex Aegypto, Natolia et pluribus regionibus orientalibus, Turcico ac Persico imperio subiectis, adferebatur, primumque locum Coryceus, in montibus Coryco et Olympo natus, itemque Cyrenaicus tenebat; nostra vero aetate planta, quae odoratissima haec florum stamina foeneratur, et C. BAVHINO *Crocus sativus*, MORISONIO *Crocus autumnalis sativus* dicitur, in

in multis quoque Europae regionibus, in Anglia v. g. Gallia, Hispania, Italia, Austria, Boemia, Silesia etc. copiose feritur, et crocus inde collectus orientali substituitur. Optimus ex hisce Anglicanus, usitatissimus autem apud nos Austriacus est. Adulteratur saepe floribus cnici sylvestris, balauistiis etc.; hinc ad usum medicum solummodo eligenda sunt filamenta latiora, nitentia, flavo - purpurea, fragrantia, contactu quidem nonnihil pingua, sicca nihilominus atque fragilia; reiicienda ex adverso albicantia, subflava, arida, gracilia, nimium flexilia ac parum odorata.

§. II.

Principiis valde activis ac plane singularibus haec stamina donata reperiuntur. Scatent nempe *particulis mobilissimis ac fragrantissimis oleoso-spirituosis*, quae cum aqua et spiritu vini facile sub destillatione transcendunt, et liquores hosce viribus excellentibus impraegnant; substantiale tamen oleum aethereum nunquam in conspectum venit, nisi maior croci quantitas, ad dimidia vel integrae librae pondus ad minimum adscendens, humidae destillationi una vice subiiciatur. Libra una circiter drachmam unam cum semisse olei aetherei fragrantissimi ac penetrantissimi reddere dicitur. *Fixiora principia*, elemento spirituofo adhuc turgida, tenerrima sunt, et adeo invicem mixta, ut seorsim menstruo spirituofo aequae, ac aqueo, solvi et penitus extrahi possint, immo extractum spirituosum, blanda destillatione ad spissiusculam consistentiam redactum, habitu externo oleum rubrum refert, quod fragrantia maxima et sapore amaro, aromatico, penetrantissimo praeditum est, et,

et, absque ulla praecipitatione, promptam atque perfectam cum spiritu, oleo, et aqua miscelam subit: Hinc BOERHAAVIUS etiam, praemissa uberiori praeparationis descriptione, inquit: „Docet hoc experimentum mirum novam speciem materiae, quam vix Oleum, Spiritum, Gummi, Resinam, Gummi-Resinam appellare possumus, sed nec Cera quoque est, nec Balsamus. Quid ergo? prorsus singulare quid, ad oleosum spirituosum pertinens (s) etc., Quicquid interea sit, uncia una croci bonae notae circiter drachmas sex et dimidiam substantiae solubilis, gummosae magis, quam resinosae indolis, continet, partem ponderis reliquam albida et inertia filamenta, maximam partem terrestria, explent. Virtus medica unice a mobilissimo ac fragrantissimo principio oleoso - spirituofo dependet, et fixior proinde substantia, penitus eodem diuturna exhalatione orbata, nullas amplius virtutes commemoratione dignas possidet.

§. III.

Crocus non nostro duntaxat tempore medicamentis praestantioribus adnumeratur, sed a Veteribus paritur tanti aestimatus fuit, ut illum *Aroph*, hoc est, *Aroma philosophorum*, *Aurum vegetabile*, *Medicinam tristitiae* etc. adpellaverint. „Vires, vix allegatus BOERHAAVIUS scribit (t), „habet laetificas adeo, ut in risum fere perpetuum nimius usus adigat. Lotium tingit colore rubro fatis. Vim petrificam lotii in rebus dicitur imprimis destruere, hinc summum remedium esse contra Calculum. Verum Paracelsi *Aroph* etc., Elogium hoc nondum singu-

(s) In *Chemiae*, T. II. p. m. 212.

(t) L. c.

singulas croci vires exhaurit, sed in scriptis numerosis ille ipse, non sine ratione et crebrioris experientiae testimonio, activum medicamentum hypnoticum, anodynum, sedativum, aperitivum, antispasmodicum, pectorale, cardiacum, stomachale, carminativum, uterinum et traumaticum depraedicatur, adeoque in vigiliis nimis, melancholia, cachexia, ictero, tussi, dyspnoea, palpitatione ac tremore cordis, lipothymia, cardialgia, colica flatulenta, dyspepsia, diarrhoea, lienteria, coeliaca, passione hysterica et hypochondriaca, obstructione fluxus menstrui ac lochialis, partu difficili, retentione placenta uterinae, torpore venereo, ulceribus etc. toties utilissimum reperitur, quoties specifica harum et similium aegritudinum causae commoventia, expandentia, discutientia simulque roborantia calidiora ac validiora postulant.

§. IV.

Inter virtutes recensitas uterina imprimis eminet, eademque non quotidiana solum experientia medica, sed memorabili pariter experimento IOH. FERDINANDI HERTODT comprobatur. Exhibuit nempe cani feminae, trium vel quatuor mensium gravidae, per totum gestationis tempus, tam cibum, quam potum, croco tinctum, donec octo circiter dies ad partum superessent. Ultimis tribus diebus crocum ad drachmas duas, immo tres, iusculis addidit. Canis, etsi in principio sperneret alimenta croco condita, fame tamen plus urgente, postea eo alacrius sumsit. Tandem, paullo ante partum, canem strangulatum sectioni subiecit, et, aperto utero, invenit, liquorem amnii colore flavo imbutum, et in catulorum cute partes,

partes, alias albidiores, eodem colore flavo tinctas fuisse, chylum vero in vasis lacteis, quod notatu omnino dignum est, solitam albedinem retinuisse (u).

§. V.

Interne parca admodum manu et saltim a grano dimidio ad grana duo, tria, quatuor, quinque, crocum exhibere convenit, ne, largiori quantitate adsumtus, nimiam sanguinis expansionem et ipsam narcosin, praesertim apud subiecta sicca, biliosa atque plethorica, inducat, vel alia prava pathemata, amentiam v. g. risum incongruum, haemorrhagias immodicas etc. concitet. Externe inter roborantia, discutientia et anodyna militat, et saepissime fomenta, cataplasmata, epithemata, unguenta, emplastra, et sacculos balsamicos, quorum alia membris dolentibus, debilitatis, paralyticis, alia partibus, tumore oedematoso, aut erysipellate et alia inflammatione correptis, adplicantur, modica quantitate ingreditur. Interdum quoque collyriis, in debilitate visus, epiphora, variolis etc. usurpandis, additur, ac multarum praeterea compositionum officinalium ingredientia auget.

CAP. V.

De Opio.

§. I.

OPIVM est succus capitum papaveris orientalis inspissatus, resinoso-gummeus, post perfectam exsiccationem duriusculus, coloris ex sub-

(u) Vid. *Ephemerid. A. N. C. G. Dec. II. Ann. 2. Observat. 60.*

subviridi aut luteo aut rufo nigricantis, saporis acris et amari, odoris ingrati, virosi, obnubilantis.

§. II.

Vulgo a scriptoribus in *Thebaicum*, quod optimum iudicatur, et *Indicum* dividitur; at distinctionem hanc nostro aevo plane inutilem existere, ex recentiorum peregrinantium relationibus abunde constat. Nam hodie papaver illud, cuius capita fauciata hunc succum fundunt, non tantum in regione Aegypti superioris Thebaide, sed etiam circa Cairum et in tractibus conterminis, nec solum quoque in Aegypto et India, sed in Persia pariter atque Natolia in agris seritur, et opium Natolicum, quod in exterarum regiones potissimum transfertur, Aegyptiaco bonitate haudquaquam inferius, sed paullo adhuc praestantius est. Perinde quidem esse videtur, an succus lacteus ex capitibus Papaveris semine albo vel nigro educatur, plerumque nihilominus Papaver semine albo in hac parte Papaveri semine nigro praefertur. In Perside, uti KAEMPFERVS refert (x), collectio eius celebratur per ineuntem aestatem propinqua maturitati capita decussatim sauciando per superficiem. Culter negotio servit quintuplici acie instructus, qui una sectione quinque infligit vulnera longa parallela. Ex vulnusculis promanans succus postridie scalpro abstergitur, et in vasculum, abdomini praeligatum, colligitur. Tum altera capitum facies eodem modo vulneratur, ad liquorem pariter proliciendum. At, haec collectio, ob capitum impar incrementum et magnitudinem, aliquoties in eodem arvo instituenda est. Solent in plan-

(x) In *Amoenitat. exot. Fasc. III. pag. 642.*

plantis nimium ramosis capita prius amputari; sic reliqua magis grandescunt, et succo implentur maioris efficaciae. Primae collectionis lachryma, *Gobaar* dicta, praestantior est, et graviori pollet cerebrum demulcendi virtute, colorem exhibens albidum, vel ex luteo pallentem; sed qui color ex longiori insolatione et ariditate infuscarī solet. Altera collectio succum promit, priori, ut virtute, ita pretio inferiorem, coloris plerumque obscuri, vel ex rufo nigricantis. Sunt, qui et tertiam instituunt, qua obtinetur lachryma nigerrima et exiguae virtutis. Praeparatio opii potissimum in eo consistit, ut, aquae pauxillo humectatum, spatha crassa lignea continuo et fortiter ducatur et reducatur in patina lignea et plana, donec elaboratissimae picis consistentiam, tenacitatem et nitorem induat. Ita diu multumque subactum, ad ultimum manu non-nihil pertractatur nuda, et demum, in cylindros breves rotatum, venale exponitur; forcipe dividendum, cum particulas emptores petunt etc.

§. III.

Quamvis ex *KAEMPFERIANA* hac collectionis descriptione ratio satis enitescat, cur opium non semper eiusdem virtutis, sed alterum altero praestantius inveniatur, multi nihilominus aliam adhuc diversae bonitatis causam adducunt. Perhibent nimirum, incolas praedictarum regionum non tantum lachrymam lacteam, e papaveris fativi capitibus post vulnerationem sponte emanantem, colligere, sed subinde, lucri maioris causa, succum pariter, ex capitibus caeterisque papaveris partibus, foliis nempe ac caulibus, succo lacteo turgidis, violentius expressum, nec minus decoctum eorum aquosum, inspissare, et

ex lachryma memorata opium nobilius, *Affion* ipsis, itemque *Affium* dictum, ex succo expresso autem et decocto sic dictum *Meconium*, seu opium ignobilius parare. Addunt quoque, solum *Meconium*, retento ab inquilinis ad proprios usus opio nobiliori, ad nos transportari. Quod me attinet, sententiam hanc nec reprobare simpliciter, nec adprobare audeo; id tamen tacitus praeterire nequeo, *Domino CAROLO ALSTONIO, Professori Edinburgensi*, postremam adserti partem minime probabilem videri. Impetravit enim, cum lachrymam lacteam ex sauciatis capitibus *Papaveris hortenſis semine albo* C. B. colligeret, ac blando aëris calore spissaret, massam, opio, in *Officinis nostris venali*, quoad consistentiam, colorem, odorem, saporem ac vires, simillimam, extractum vero ex decocto capitum aquoso et succo eorum violentius expresso paratum, ab illa, intuitu maxime saporis et odoris, adeo discrepabat, ut statim ab opio ordinario distingui potuerit (y).

§. IV.

Monstrante blanda analysi chemica, opium ex partibus *terreis, salinis, gummeis ac resinosis* componitur. Partes gummeo-resinosae *principio vaporoso mobilissimo* matricem praebent, et salinarum ope adeo invicem mixtae sunt, ut spiritu vini puram resinofam, et aqua simplici puram ac solam gummeam substantiam vix, aut ne vix, separare liceat; secundum NEVMANNI tamen (z) aliorumque examina partes resinosae gum-

(y) Vid. *Medicinische Versuche und Bemerkungen einer Gesellschaft in Edinburg*, Tom. V. Part. I. pag. 134. sequ.

(z) Vid. *Lect. de Opio*, pag. 117.

gummeas quantitate superant. Quatuor enim opii vulgaris unciae, primum spiritu vini rectificatissimo, deinde aqua simplici, extractae, dederunt uncias tres et scrupulos quatuor substantiae magis resinosae, et quatuor scrupulos substantiae mere gummosae, ita ut post duplicem extractionem saltem drachmae quinque et scrupulus unus terrae indissolubilis atque inertis superessent. Quum ordo inverteretur, et recentis opii, eadem quantitate recepti, extractio primum aqua, postea spiritu vini, fieret, extractum primum, idque magis gummosum, uncias duas, drachmas quinque et scrupulum unum, alterum vero, mere scilicet resinosum, drachmas tres et scrupulum unum pendebat.

§. V.

Partes resinosae duplicis indolis sunt, aliae nimirum consistentiae durioris, et vulgaribus resinis non dissimiles, aliae magis unguinosae et liquidiores, fere instar balsami. Priores comparative fixiores et in operando torpidioresprehenduntur, posteriores autem, principio vaporoso magis praegnantēs, et maiori ideo volatilitate ac celeriori non minus, quam vehementiori vi agendi praeditae sunt; hinc pauca etiam huius substantiae grana cani, qui integram alias opii drachmam absque noxa graviore devorare valet, mortem inferunt. Ex libra opii duae circiter vel tres drachmae separari possunt, et illa ordinario, instituta opii crudi infusione aut decoctione cum aqua, sub unguinoso-spumidae materiae forma, ad superficiem aquae adsurgit. Partes salinae, quarum mentio pariter facta est, valde acres et acidae naturae sunt. Opium crudum enim gustu amarum et adeo

morficans reperitur, ut, aliquamdiu in ore detentum, linguam atque palatum exulceret (a), immo aliquam subinde ventriculi inflammationem producat (b). Ob intimam cum reliquis principiis miscelam, separatio earum difficillima est, et raro saltem nonnullis veras crystallas salinas in opii solutionibus observare contigit (c). Ad eas caeteroquin ratio praecipue referenda videtur, cur solutio opii aquosa per salia alcalia fixa et volatilia praecipitetur, et perfecta substantiae resinosae a gummea seiunctio difficillime succedat.

§. VI.

Opium correctum atque sufficienter depuratum, hoc est, a rudioribus partibus terreo-resinosis ac nimium impetuosius vaporosis liberatum, ad potentiora sudorifera, anodyna, hypnotica et sedativa iure referendum est. Correctio, uti in primo dudum capite monui, neque tostione, neque salium alcalium, aromatum similiumque additione, sed optime infusione et frigida digestionem, vel blanda etiam coctione temporaria cum aqua simplici, nunc pura prorsus, nunc spiritu aceti, aut succo citri, limoniorum, cydoniorum, cremore tartari alioque corpore acidulo modice remixta, peragitur; immo, si maiorem adhuc temperiem illi conciliare velimus, lenem iam depurati fermentationem corrigentibus addendam esse, reor. Quando cum aqua leniter coquitur, vel eodem menstruo saltim infunditur, et infusum frigidae digestionem aliquam-

(a) Conf. WEDELII *Opiologia*, pag. 26.

(b) Vid. LINDESTOLPE *Loc. cit.* pag. 591.

(c) Conf. NEVMANNI *Loc. cit.* pag. 115.

quamdiu committitur, gummosae tantum partes, resinosis tenerioribus permixtae, solvuntur, terreo-resinosae crassiores autem in fundo remanent indissolubiles, et portio virulentissima, spiritu impetuosiori maxime praegnans, ad superficiem, uti antea retuli, extruditur, ita ut haec cochleari facile auferri, illae autem filtrationis aut colaturae beneficio a purioribus resinoso-gummeis separari queant.

§. VII.

Extractum, descripto modo paratum, inter pilulas, electuaria similesque compositiones recipitur, aut spiritu vini rectificato, vel, quod ego quidem praestare arbitror, spiritu nitri aut salis rite dulcificato solutum, sub tincturae forma, a guttis quinque ad decem, exhibetur. Dosis opii depurati in nostris regionibus ab octava grani parte saltem ad grana duo, tria, quatuor adscendit, in orientalibus vero regionibus multi, sicuti CLEYERVS (d), KAEMPFERVS (e), et plures alii testantur, illud saepe a scrupulo uno ad drachmam unam, immo duas, absque sensibili noxa (f), deglutiunt: Quod sine du-

C 4

bio

(d) Vid. *Ephemerid. A. N. C. G. Dec. II. Ann. X.*


(e) *Loc. cit. pag. 644.*

(f) Non absolute haec intelligenda sunt. Nam opii heluones, etiamsi a largo et frequenti eius usu nullam initio et post temporariam adhibitionem perferant noxam, tandem tamen, post diuturniorem scilicet abusum, gravissime, uti idem KAEMPFERVS testatur, mulctantur: „Opium, „*loc. cit. inquit*, quod Europaeis, si grani unius „vel paucorum dosin excefferis, lethiferum nefas „audit,

bio liberiori ac largiori in calidioribus hisce regionibus transpirationi cutaneae, et quotidiano imprimis usui ac diuturnae adfuetudini, tribuendum erit. Tyrones quippe exiguis dosibus incipiunt, easdemque sensim augent, aequae ac vini adusti potatores, vel etiam illi, qui tabaci fumo delectantur. In principio parum fumi herbae Nicotianae vehementia pathemata apud nondum adfuetos concitat, vertiginem nempe, temulentiam, dolorem capitis, vomitum, tremorem membrorum etc. quae postea tamen apud adfuefactos, nisi magnum committant excessum, non amplius observantur, etiamsi eorum aliqui per integrum fere diem hunc fumum hauriant. Notum praeterea est, ipsos Europaeos, in frigidioribus etiam regionibus habitantes, tandem opii adsumptionem largiorem, citra manifestum detrimentum perferre, si diuturna adfuetudo accedat. Quandoquidem GABRIEL CLAVDE-
RVS hominem unico interdum die, trina vice, grana 40. 50. opii crudi impune devorantem et hoc per menses octodecim et ultra continuantem, sese novisse, refert.

„audit, a praenominatis populis longa adfuetu-
„dine ita familiare redditum est, ut drachmam
„multi sine noxa deglutiant. Multa hoc abusu
„vel longiori eius usu acciuntur mala; emaciatur
„enim corpus, laxantur vires, contristatur ani-
„mus, stupefcit ingenium: Vnde videas instar
„stipitum somnolentos et quasi elingues sedere in
„conviviis opii liguritores etc.„





SECTIO XIV.

DE BALSAMICIS ET AROMATICIS.

CAP. I.

De differentia, natura, atque principiis Balsamicorum et Aromaticorum.

§. I.

Odorem balsamicum ab aromatico nonnihil discrepare, Physici ac Chemici dudum annotarunt. Ille nimirum, qui ex floribus hyacinthi, v. g. leucoii lutei, tuberosae, violae martiae, et nocturnae, caprifolii Italici, rosarum, liliorum alborum, iasmini, radice iridis Florentinae, ligno Rhodino, ambra, moscho, zibetho etc. invisibili exhalatione erumpit, simplex, molliusculus, et adeo in quibusdam expandens atque obnubilans est, ut diu, si fortior existit, citra aliquam cerebri perturbationem tolerari nequeat; hic autem, quem cubebae, piper, caryophylli aromatici, cardamomum, baccae lauri, macis, canella alba, radix serpentariae Virginianae, satureia, thymus etc. emittunt, ex balsamico et acriusculo compositus, adeoque priori vividior, reficiens, magisque exhilarans reperitur.

§. II.

Haud dissimilis differentia etiam apud saporem occurrit. Sapor balsamicus enim nonnihil nauseosus est, nec unquam perfecte purus, sed austeriusculo, aut amaricante, aut subacri etc. mixtus deprehenditur; aromaticus ex adverso acris, urens, penetrans existit, et in nonnullis, pipere v. g. caryophyllis, cardamomo, granis paradisi etc. purus, in aliis, myrrha v. g. calamo aromatico, radice zedoariae etc. amaro, in aliis, radice mei v. g. levistici, angelicae, femine anisi, foeniculi etc. dulci, et in aliis denique, cinnamomo v. g. dulci simul atque austero fociatus est.

§. III.

Memoratus odor balsamicus et aromaticus unice *subtili ac mobilissimo cuidam principio volatili*, sapor tum *huic*, tum *principiis fixis* suam debet originem, et prior ideo temporis successu magis minusve minuitur, quin tandem in quibusdam, praesertim mere balsamicis, penitus omnino perit; posterior autem, cum paullatina tamen in singulis imminutione, perennat, vel diutissime tamen perdurat. Ex dictis igitur ratio pariter manifesta evadit, cur simplicia huius census vires medicas, a volatili principio deducendas, successive amittant, illas vero, quae a fixis principiis potissimum dependent, post diuturnam etiam adservationem, nisi penitus, maximam tamen partem, integras retineant: Immo ratio inde constat, cur maiorem virtutem sub forma tincturae, nec non infusi aquosi et vinosi, quam sub forma decocti exerant.

§. IV.

§. IV.

Principium exhalabile odoratum in aliis mere spirituosum est, adeoque ex tenerrimis tantum mobiliissimisque *corpusculis salino-sulphureis* sive *salino-inflammabilibus* constat, in aliis vero, quae perfectum oleum essentialiale aethereum continent, idemque etiam, sufficienti nimirum quantitate recepta, sub destillatione humida cum aqua in receptaculum transmittunt, ex *particulis salino-inflammabilibus* et *oleosis*, sola interveniente mutua aggregatione, componitur, et priori proinde paullo crassius existit.

§. V.

Particulae halitus spirituosi *salinae*, sulphureis seu inflammabilibus arctiori copula iunctae, in plantis et mineralibus *acidae naturae* sunt, in subiectis animalis pro sapiae autem, in moscho v. g. zibetho et castoreo, *urinosa indole* gaudere, vel valde tamen ad illam inclinare videntur. Proportio caeteroquin inter partem salinam et inflammabilem, propter seiunctionis impossibilitatem, determinari nequit; id tamen extra dubium positum esse, arbitror, plus salis ad componendum halitum acriorem aromaticum, quam molliusculum mere balsamicum, concurrere.

§. VI.

Oleum essentialiale nativum, quod simplicium balsamicorum et aromaticorum quamplurima in sinu suo reconditum fovent, in omnibus quidem ac singulis fragrantissimum *aethereum* est, valde nihilominus in diversis speciebus respectu coloris, odoris, saporis, acredinis, fluiditatis ac volatilitatis distinctum reperitur, et longius imprimis

primis oleum illud minerale, quod naphtha et petroleum dicitur, ac non solum per se fluidum occurrit, sed ambrae etiam, succini etc. mixtionem ingreditur, quoad proprietates nonnullas ab iis, quae animalis ac vegetabilis profapiae subiecta largiuntur, recedit. Fluiditate enim, fragrantia et calida indole olea aetherea perfecte aemulatur, intuitu solubilitatis autem magis cum oleis essentialibus unguinosis convenit, adeoque aequae, ac illa, solutionem in spiritu vini respuit.

§. VII.

Pleraque olea destillata aetherea colore flavo aut flavescente tincta cernuntur; dantur tamen nonnulla, quae colorem viridem, subviridem, vel rubrum aut rubellum, vel coeruleum, vel albicantem, vel aquae instar limpidum obtinent. Colores hi, post destillationem conspicui, in aliis constanter perdurant, et sensim duntaxat sensimque paullo saturatiores redduntur, in aliis ex adverso sub adservatione, praesertim si aëri liberior in vitrum accessus saepiuscule pateat, intra breve utplurimum tempus perfectam mutationem subeunt. Oleum millefolii nobilis v. g. et oleum chamomillae vulgaris initio coeruleum est, deinde fuscum evadit. Oleum salviae sese primum amoeno virore commendat, attamen hic color, vix aliquot diebus elapsis, in subfuscum degenerat. Olea caryophyllorum aromaticorum et ligni Rhodini, quorum prius post destillationem subflavo, posterius aureo colore gaudet, paullatim rubescunt, et oleum menthae flavo-rubellum, successive colorem rubrum saturationem, deinde obscure rubrum, tandem ex rubro nigricantem consequitur. Silentio caeteroquin hoc loco praeterire nequeo, destillationis

nis

nis et adhuc magis foli natalis diversitatem multum quoque ad mutandum colorem olei, ex eadem plantarum specie prolekti, conferre. Siquidem iterata dudum experientia memet ipsum et alios docuit, oleum chamomillae vulgaris non ubique coeruleo, nec oleum salviae viridi, sed utrumque hinc inde flavo tantum colore tinctum sub humida destillatione prodire, et hunc colorem deinde etiam constantem esse.

§. VIII.

Quaedam olea essentialia aetherea, et quidem eorum quamplurima, fluiditatem suam, si in loco frigidiusculo, vasisque vitreis, obturamento probe munitis, adservantur, per multos annos retinent, et tandem aliquam duntaxat, in nonnullis vix notabilem, spissitudinem contrahunt, alia vero, oleum anisi v. g. rosarum, etc. post destillationem, sub temperata etiam, quin calidiori aëris constitutione, coagulantur, albumque colorem induunt, ita ut lotam pinguedinem suillam, aut sebum vervecinum, habitu externo referant. Redit quidem olei fluiditas cum colore flavo aut flavescente primordiali, si vitrum igni carbonum nonnihil admoveatur, vel in calida saltim manu aliquamdiu detineatur, verum durabilis non est, sed, vitro iterum ab igne remoto rursusque in locum frigidiusculum delato, nova coagulatio supervenit.

§. IX.

Non colore tantum, sapore, odore, caeterisque allegatis proprietatibus externis aetherea haec olea essentialia magis minusve distincta inveniuntur, sed notabile etiam discrimen circa gravitatem specificam animadvertitur, dum nonnulla

nulla eorum, oleum v. g. cinnamomi, ligni
 assafras, caryophyllorum, cochleariae etc. fun-
 dum in aqua petunt, alia ex adverso, oleum la-
 vendulae v. g. maioranae, rorismarini, piperis,
 caieput et reliquorum pleraque, aquae perfecte
 innatant, vel rectius, plane supernatant, et alia
 denique propius ad ipsius aquae gravitatem acce-
 dunt, ita ut magis, quam praecedentia, immer-
 gantur, et paullo difficilius pariter ab ea sepa-
 rentur (g). Ratio differentis huius gravitatis
 specifica nondum satis quidem manifesta est, di-
 ver-

(g) Secundum FRIDERICI HOFFMANNI Ob-
 servationem vitrum, cuius *tara* seu pondus pro-
 prium ℥ij et grana 42. aequabat, in lance exactissi-
 ma pendebat, penitus repletum

Oleo ligni assafras	—	—	℥vj. gr.	53
— caryophyllorum	—	—	—	52
— cinnamomi vero	—	—	—	51
— cinnamomi adulterato	—	—	—	48
— carvi	—	—	—	51
— anisi	—	—	—	50
— foeniculi	—	—	—	50
— menthae	—	—	—	40
— olivarum	—	—	—	40
— spicae	—	—	—	37
— terebinthinae igne sicco destill.	—	—	—	37
— philosophorum	—	—	—	37
— schoenanthi	—	—	—	33
— terebinthinae cum aqua destillato	—	—	—	32
— maioranae	—	—	—	30
— lavendulae	—	—	—	30
— de Citro Ital.	—	—	—	20
Spiritus vini rectificatiss.	—	—	—	32

versam nihilominus particularum, massam maiorem aggregatione sua constituentium, densitatem, et inaequalem aquae interlabentis copiam ad discriminis memorati causas referri posse, mihi valde probabile videtur.

§. X.

Oleum aethereum quodcunque ex duabus essentialibus, ex *subtili* nimirum ac *mobilissimo spiritu*, et *spissiori* ac *graviori substantia resinosa* componitur. Haec, quae per se, hoc est, absque partis spirituosae consortio fixa est, elemento spirituofo corpus atque matricem praebet, et nimiam eius praecipitemque in vase aperto dissipationem impedit; ille autem, qui cum halitu spirituofo, in antecedentibus pridem descripto, perfecte convenit, et solus fragrantiae ac potiorum pariter virtutum causa est, massam resinosam larga et intimiori miscela sua atque insigni agilitate ad olei fluidi consistentiam deducit, et tantam illi volatilitatem conciliat, ut sub destillatione humida simul cum aqua alembicum transcendere possit. Vnde ratio etiam elucescit, cur olea, in vase aperto aliquamdiu, praesertim in loco calidiori, adservata, sensim spissescant, tandemque cum magna pristinae fragrantiae iactura in densam resinam mutantur.

§. XI.

Cum laudatis oleorum partibus essentialibus prima eorum elementa, quorum quatuor, *simplex* videlicet ac *subtilissima substantia sulphurea* seu *inflammabilis*, *sal acidum*, *phlegma* et *terra tenerior* olei cuiuscunque mixtionem ingrediuntur, minime confundi debent. Intime haec elementa mixta sunt, et tam arte cohaerent, ut
diffi-

difficillime dividuntur, et ab invicem separantur; patent tamen, praesertim sulphureum ac terreum, ex praecipuis oleorum proprietatibus, et variis quoque, tum diacriseos, tum syncriseos chemicae, exemplis demonstrari possunt.

§. XII.

Oleum aethereum, in succo plantarum circulante elaboratum, sensim inde secernitur, et in parvis cellulis sive vesiculis membranaceis, quae, adhibito imprimis microscopio, in multis subiectis, oleo magis minusve praegnantibus, in radice helenii v. g. angelicae, imperatoriae, iridis Florentinae, nuce myristica, baccis iuniperi, cortice abietis, pini etc. conspicuae sunt, colligitur. Sciendum tamen, vesiculas hasce rarissime, vel nunquam, in omnibus ac singulis eiusdem plantae partibus reperiri, sed apud hanc plantam saltem in cortice trunci atque ramorum, apud aliam solummodo in radice, aut ligno, aut foliis, aut floribus, aut calyce florum, aut seminibus fructibusque, maiori aut minori numero obvias esse, ac solam ideo partem, vesiculis memoratis donatam, sub humida destillatione puriorem aut largiorem olei substantialis quantitatem reddere.

§. XIII.

Non solum in plantis, sed in quibusdam pariter animalis prosapiae subiectis, substantiale oleum aethereum generatur; certo tamen certius est, proventum eius in posterioribus longe rariorem, et in fragrantissimis quoque, moscho v. g. castoreo, zibetho etc. adeo parcum existere, ut illud vix aut ne vix separari, et humidae destillationis ope ad molem conspicuam redigi possit.

§. XIV.

§. XIV.

A maiori aut minori simplicium balsamicorum et aromaticorum fragrantia, quae, uti supra pridem dictum fuit, soli principio spirituofo adscribenda est, ad maiorem aut minorem inhaerentis ac prodituri olei substantialis copiam conclusio universalis formari nequit. Dantur enim multa, quae, uti canella alba, calamus aromaticus, salvia, ruta etc. satis fortem odorem, praesertim contusa aut contrita, spargunt, et parum nihilominus olei largiuntur: Reperiuntur rursus alia, quae, uti flores lavendulae, caryophylli aromatici etc. forti odore gaudent, et multum quoque olei reddunt: Dantur porro alia, quae, uti melissa, abrotanum etc. odorem debilem emittunt, ac parum quoque olei suppeditant: Immo occurrunt nonnulla, quae, licet non adeo fragrante odore donata sint, copiosum tamen oleum in sinu suo gerunt.

§. XV.

Expositis binis simplicium balsamicorum et aromaticorum principiis volatilibus, quorum prius, spiritus nempe, semper, posterius, oleum aethereum videlicet, plerumque adest, in subiectis quibusdam adhuc duo alia, itidem volatilia, in aliis nimirum *subtilis quaedam substantia camphorata*, in aliis *sal siccum oleosum* accedunt, quae virtutem eorum magnopere augent, quin apud nonnulla totam propemodum virium medicarum rationem in se continent.

§. XVI.

Laudata substantia camphorata cum communi elemento spirituofo et oleo aethereo quoad odoris fragrantiam et activitatem valde quidem

convenit, intuitu naturae autem atque mixtionis notabiliter ab iis distincta reperitur. Minutissimae enim molecule, quae aggregatione sua siccam, candidam, nitentem, crystallinam, massam post separationem formant, e *terra* tantum *teneriori* et *simplici substantia inflammabili*, arctissima interveniente unione, ac citra ullius, uti ego quidem credo, principii salini concursum, compositae, et oleosis proinde moleculis longe simpliciores ac teneriores sunt. Vnde illi etiam in magno errore versantur, qui, camphoram oleum coagulatum, aut resinam, aut gummi, aut sal volatile oleosum esse, perhibent.

§. XVII.

Substantia fixa, quae haecenus expositis principiiis volatilibus corpus, vel, si ita dicere mavis, matricem ac receptaculum praebet, pro diversa simplicium profapia differt. Apud vegetabilia nimirum vel *mere resinosa*, vel *mere gummea*, vel *mixta resinoso-gummea* aut *gummeo-resinosa* deprehenditur; apud animalia autem eorundemque partes medicamentosas, in moscho v. g. et castoreo, plerumque *massam sicciorum grumofam*, vel etiam *solidiorem magisque cohaerentem*, ac *gummi-resinis quodammodo analogam*, sistit, et apud mineralia denique unice *purius* aut *impurius concretum bituminosum est*.

§. XVIII.

Praeter memorata principia mere volatilia ac mere fixa, in subiectis quibusdam, praesertim aromaticis, etiam principia quaedam mixta, hoc est, partim volatilia, partim fixa, *substantia nimirum crassior unguinoso-oleoso-butyracea odoratissima* apud animalia, et *oleum crassius aromaticum*

cum ceraceo-unguinofum expreffibile, ut et balfamus liquidus apud vegetabilia, occurrunt. Substantia prima, cuius species notabiliores zibethum et pinguedo caftorina conftituunt, ex oleo effentiali aethereo et pinguedine unguinofa, oleum aromaticum expreffibile, in nuce myriftica v. g. mace, baccis lauri etc. obvium, ex oleo aethereo et fixa fubftantia ceracea, et balfamus denique liquidus, cuius census terebinthina, balfamus Peruvianus, de Copaiva etc. funt, ex copiofa refina et oleo aethereo, quod priori fluiditatem conciliat, componuntur.

CAP. II.

De modo operandi, viribus medicis et ufu Balfamicorum et Aromaticorum.

§. I.

Virtus medica balfamicorum et aromaticorum partim a volatilibus, partim fixis eorum principiis dependet, potiores tamen partes apud species quamplurimas prioribus deferendae funt, quoniam, ventriculi calore a massa fixiori feparatae, eodemque magis pariter commotae et animatae, multo vividius, ob eminentem fuam fubtilitatem ac mobilitatem, operantur, et citius etiam, quam fixae, tum inhalando per venas bibulas, tum filtrando, cum fuccis primae culinae naturalibus et adventitiis ad massam humorum circulantium remotiffimosque corporis vivi recessus penetrant.

§. II.

Aktionem fuam haec pharmaca in folidas aequae ac fluidas corporis partes exercent: Has

nempe expandunt, rarefaciunt, et in velociorem imprimis motum progressivum redigunt; illas vivido quodam ac singulari stimulo, ad ardoris et morificationis sensum referendo, ad fortio-rem celerio-remque contractionem et oscillationem impellunt. Notari tamen oportet, stimulum hunc, solidis irritabilibus impressum, apud aromatica magis minusve vehementem, apud balsamica autem, quae vires suas in fluida potissimum exerunt, multo leniorem esse; nec ignorari etiam debet, adiuncta in integris simplicibus principia fixa resinosa ac gummea, eaque vel acria, vel amara, vel austera, vel dulcia, elementi volatilis oleoso-spirituosi activitatem sub usu intendere nonnihil, aut minuere; quemadmodum prius piper et caryophylli aromatici, posterius radix angelicae, mei, levistici etc. egregie confirmant.

§. III.

Quamquam subtilis ac mobilissima substantia oleoso-spirituosa post pharmaci aromatici aut balsamici ingestionem in prima culina non adeo diu, uti antea pridem dictum fuit, commoratur, satis eximiam nihilominus operationem in illa ante transitum suum ad humores circulantes edit, dum non solum rudem materiam perspirabilem, vulgarem flatuum genitricem, discutit, cruditates mucidas attenuat, ac putridam saburram corrigit, sed languescentem quoque ventriculi et intestinorum motum peristalticum, forti mediante tunicarum irritatione, suscitatur et auget. Vnde ratio etiam protinus innotescit, cur aromatica et balsamica locum insigniorem inter stomachalia et carminativa stricte talia occupent, et in variis ideo adpetitus, digestionis

stionis ac chylicationis vitiis, in febribus itemque intermittentibus, stomachalibus, et frigidis adfectibus flatulentis, opem desideratam creberri-
me ferant: Immo inde clare pariter constare arbitror, cur vermium intestinalium exclusioni, incremento ac multiplicationi adversentur.

§. IV.

Non consistit potens atque egregia horum medicaminum actio intra arctiores primae culinae limites, sed post spirituosae substantiae introitum in sanguinem paullatim ad quascunque corporis partes extenditur. Exilissimae nimirum ac mobilissimae particulae oleoso-spirituosae, in vasa receptae, sensimque per singulos machinae maeandros perennis circuli ope distributae, tunicam arteriolarum nerveam sub transitu suo stimulis, iterato illatis, irritant, irritandoque contractionis vigorem in corde ac toto systemate arterioso intendunt, substantialiter praeterea materiam spirituosam et cruoris calorificam augment, ac totam sanguinis massam magis minusve expandunt, rarefaciunt, et secum in motum progressivum velociorem rapiunt. Unde fit, ut maior humorum fluiditas redeat, et calor naturalis increseat, ut exhalatio cutanea et reliquarum pariter se-et excretionum quamplurimae largiores evadant, ut, dissipatis nimium abundantibus humoribus seroso-lymphaticis, laxiores partes solidae nonnihil exsiccantur, et decentem vim tonicam denuo recuperent, ut latex denique nervorum spirituosus intuitu quantitatis augmenta capiat, et in vegetiorem circuitum validioremque actionem redigatur.

§. V.

Ex memorato generali operandi modo variae rursus virtutes fluunt, balsamicis et aromaticis vulgo adscriptae, et inde facili imprimis negotio, facta tamen ubivis rationali dictorum interpretatione et adplicatione, vires eorum resolventes (h), roborantes (i), nervinae, cephalicae, cardiacae, pectorales, uterinae, diureticae, sudoriferae, antiputredinosae et traumaticae derivari, et ipsarum quoque aegritudinum genera et species, quibus opitulantur, determinari

(h et i) Virtus resolvens, quod breviter hoc loco subiungere expedit, partim ab aucta, eaque velociori non minus, quam validiori partium solidarum contractione, partim ab introitu et immediata partis mobilissimae spirituosae miscela dependet. Quemadmodum enim subtile hoc principium crassam atque tenacem substantiam resinosam et gummeo-resinosam oleorum, durante unione, in decenti fluiditate conservare, immo eandem, si imminuta fuerit, novo adventu suo rursus augere valet; sic nulla etiam ratione dubitandum est, quin vires haud dissimiles in iusto crassiores animantium humores exerere queat. Circa virtutem roborantem quoque monendum duco, non solo eam fortiori ac velociori sanguinis et fluidi nervei in fibras motrices influxu niti, sed simul etiam ab exsiccatione aliqua, eidemque succedente maiori solidorum densitate seu textura compactiori, derivandam esse. Quo densiora quippe motus organa sunt, eo quoque robustiora existunt, eoque validiorem actionem in fluida, et haec reciproce in solida, exercent, ita ut motuum augmenta et vigor actionis sese in solidis ac fluidis mutuo excipiant.

nari possunt. Suppositis enim viribus recensitis, aliisque, ex generali operandi modo deducendis, sine difficultate intelligitur, aromatica et balsamica non tantum in variis primae culinae aegritudinibus, sed in omnibus quoque morbis reliquis plus minusve profutura esse, quorum caussae potiores ad imbecillitatem, flacciditatem, nimiamque humiditatem partium solidarum, vel etiam ad liquidi nervei penuriam, depressionem caloris naturalis, abundantiam partis serosolymphaticae, et sanguinis caeterorumque humorum crassitiem, viscositatem, inertiam ac variam impuritatem, adeoque in genere ad torpidam solidorum contractionem, languidumque humorum circuitum, et imminutas aut plane suppressas se- et excretiones redeunt: Cuius census v. g. sunt apoplexia pituitosa et eiusdem originis adfectus soporosi, animi deliquia, paralyses membrorum, melancholia, coryza iusto diuturnior, cephalalgia, otalgia et odontalgia rhevmatico-catarrhalis, susurrus aurium, obauditio, surditas, imbecillitas visus, incipiens gutta serena et cataracta, ophthalmia serosa, nec minus raucedo, tussis, asthma pituitosum et cachecticum, catarrhus suffocativus, obstructio hepatis, lienis ac mesenterii chronica, hydrops ascites, passio hypochondriaca et hysterica, defectus et suppressio fluxus menstrui, lochialis et haemorrhoidalis, fluor albus, sterilitas, partus difficilis, retentio placentae uterinae, prolapsus uteri et intestini recti, impotentia virilis, vomitus, diarrhoea, lenteria, coeliaca, cachexia, adfectus scabiosi, venerei, scorbutici, rhevmatici et frigidi arthritici.

§. VI.

Praeter indicatum multiplicem et egregium usum internum, pleraque amplissimum quoque externum obtinent, et opem omnino eximiam discutiendo ac roborando ferunt, quando in debilitate capitis et memoriae, coryza et gravedine rebelli, hemicrania, cophosi, imbecillitate visus, nec non in paralyfi membrorum, doloribus arthriticis et rhevmaticis, adfectibus oedematosis, tumoribus glandularum, odontalgia, colica, anasarca, tympanitide, inflammationibus erysipelaceis, aliisque, debilitate ligamentorum, etc. sub forma epithematum siccorum, facculorum, cucupharum, vel in vulnerum quoque atque ulcerum inflammationibus, contusionibus et puncturis nervorum, cum vino calido adplicantur. Creberrime quoque pulveres dentifricios et cyprios, nec minus cataplasmata, decocta travmatica, unguenta, linimenta, emplastra, suffimigia, gargarismata, in laxitate uvulae, angina spuria, stomacace etc. maxime proficua, itemque balnea, pediluvia et infessus uterinos, in sterilitate, fluore albo, suppressione mensium etc. nonnunquam utilissimos, ingrediuntur.

§. VII.

Cognitis praecipuis aegritudinum speciebus, quibus pharmaca huius classis plerumque egregie medentur, facile pariter subiecta, quibus nocent, nec minus morbi, in quibus nullum locum inveniunt, cognosci poterunt. Non conducunt nempe, praesertim calidiora, hominibus biliosis, cholericis atque plethoricis, nec tuto quoque exhibentur in morbis, qui ex nimia

mia fibrarum siccitate atque strictione, contractione solidorum iusto celeriori ac fortiori, defectu feri et partium biliosarum, aliarumque salino-oleoso-inflammabilium abundantia, nec minus a congestione, ebullitione atque orgasmo cruoris et inde necessario promanante motuum augmento, proficiscuntur. Secundum summum tamen rigorem memorata nequaquam intelligenda sunt: Varii enim dantur morbi, qui proxime quidem et immediate ex motibus solidorum exorbitantibus nascuntur, et fortiora nihilominus commoventia non solum ferunt, sed etiam ad sui curationem postulant, quoniam virulenta scilicet, corrupta ac simul valde tenax materia quaedam, vel fluidis mixta, vel tubulis minoribus hinc inde pertinacissime inhaerens, praeternaturali motuum augmento occasionem praebet, et solida sensibilia atque elastica continuis stimulis ad violentiorem contractionem tamdiu impellit, donec penitus per apta organa excludatur; quemadmodum haec febrium quarundam, venenorum animalium ac vegetabilium, dysenteriae, colicae, cardialgiae, immo epilepsiae et morborum similium curatio abunde probat. Sub cuiuscunque enim morbi curatione vera Medicus rationalis non tantum de mitigando motu praeternaturali, et profliganda causa formali, sed simul quoque de corrigenda causa materiali sollicitus esse debet, quoniam haec illam ordinario producit, et, hac igitur praesente ac perdurante, illa cessare nequit.

CAP. III.

*De Radicibus Zedoariae, Zingiberis, atque
Curcumae.*

§. I.

ZEDOARIA, *Zittwer, Zittwer - Wurzel*, quae etiam *Zaduaria, Zadura, Zadera, Zerumbeth Serapionis* etc. vocatur, in rotundam ac longam distinguitur. Haec virtute illam non-nihil superat, et unice proinde in Officinis nostris venalis prostat. Radix est brevis, compressa, quodammodo tuberosa, paucis solummodo fibris intertexta, crassitie digiti minoris, colore foris albido, ad luteum, aut fuscum, aut gryseum vergente, intus subfusco aut cinereo-subluteo, odore fragrante camphorato, sapore aromatico et amaricante. Rotunda plerumque colorem gryseum obtinet, quoad reliquas vero proprietates cum longa convenit, praeterquam, quod debilior sit, et minorem substantiae camphoratae quantitatem in mixtione foveat. Nonnulli utramque unius eiusdemque plantae radicem esse, et rotundam caput quasi seu partem radiceis superiorem, longam vero truncum seu partem inferiorem constituere, perhibent; alii ex adverso, quorum relationi maior in hoc passu fides habenda videtur, distinctarum prorsus plantarum radices iudicant, et plantam, quae ex longa progerminat, *Zingiber latifolium sylvestre*, alteram vero, rotundae nimirum radiceis progeniem, *Colchicum Zeilanicum* vocant. *Illustri* LINNAEO prior aequae ac posterior *Kämpferia foliis lanceolatis petiolatis* audit. Crescunt in China, Bengala, Malabaria, Ceylonia, aliis-

aliisque Indiae orientalis locis, optima tamen Zedoariae longae species ex Insula Ceylon adfertur.

§. II.

Radix Zedoariae longa bonae notae, h. e. integra, recens, carie nondum correpta, ponderosa, compacta, parum fibrosa, et intus saturato colore fusco, cinereo donata, copiosis ac valde activis gaudet *principiis*, tam *volatilibus oleoso-spirituoso-camphoratis*, quam *fixis resinoso-gummeis*. Oleum aethereum, cuius unica circiter drachma ex integra Zedoariae libra obtinetur (k), crassiusculum est ac ponderosum, et quoad maximam ideo partem in aqua descendit. Portio, quae primum expellitur, limpida et comparative levior existit, deinde autem viridescens, tandemque nigricans sequitur. Principium spirituoso-camphoratum non tantum ex ipsius radicis et aquae destillatae odore fragrantissimo camphorato cognoscitur, sed ita quoque humida destillatione ac sublimatione, praesertim ex radicibus recentibus (l), separari potest, ut in conspectum veniat, et vera camphora substantialis, quamquam tenerrima, sub squamularum tenuissimarum, albicantium ac splendentium forma, aquae superficiei passim innatet. Substantia fixa gummosa resinosa sapore et odore camphorato, adeoque etiam activitate medica superat, et maiori praeterea quantitate inhaeret. In una enim radicis uncia binae circiter drachmae,

(k) Vide NEVMANNI *Praelect. chemico-pharmaceut.* pag. 1212.

(l) Conf. *Miscell. A. N. C. G. Ann. IX. et X. Observat.* 196. No. 14.

mae, totidemque scrupuli substantiae gummosae, et vix scrupulus unus aut drachma dimidia substantiae purae resinosae latent. Infusum aquosum colore fusco, sapore subacri, amaro et camphorato gaudet, eundemque, quem ipsa radix contusa, odorem naribus imprimit. Extractum, inde paratum, longe debilius est, et odore ferme caret; manifesto documento, partes praecipuas, volatiles nempe oleoso-camphoratas, sub evaporatione abiisse in auras. Infusum spirituosum primum colorem flavo-rubicundum obtinet, et sapore amaro atque acri aquosum superat, odore autem et sapore camphorato multo inferius reperitur. Eadem pariter de extracto spissato dicenda sunt, praeterequam, quod hoc maiori amaritie et acrimonia praeditum inveniat, et eminentem igitur fervoris sensum aliquamdiu in lingua ac faucibus relinquat.

§. III.

Vires medicae huius radice maxime quidem volatili principio oleoso-camphorato adscribendae sunt, valde nihilominus activitatem eius fixa quoque principia resinoso-gummea augent. Militat inter efficacissima, tametsi paullo calidiora, medicamenta discutientia, sudorifera, alexipharmaca, pectoralia, cardiaca, stomachalia, carminativa, anthelmintica et uterina, ac rite usurpata, eximium subinde auxilium in morbis exanthematicis, febribus malignis et catarrhalibus, adfectibus frigidis rhevmaticis, cachecticis et oedematosis, tussi et asthmate pituitoso, anxietatibus praecordialibus, dyspepsia, dysorexia, vomitu, diarrhoea mucosa, cardialgia et colica vere flatulenta, fluore albo, suppressione mensium chro-

chronica, partu difficili, et placentae uterinae retentione praestat. Incolae Ceyloniae tantam aestimant, ut omnibus ferme medicamentis aliis praeferendam ducant. Addunt proinde singulis praeparatis suis, et multi recentem, ad corrigendam ventriculi imbecillitatem, cum oryza comedunt: Alii farinam cum eius iusculo bibunt, alii illam manducant, et halitu, quem ore emittunt, culices, aliaeque insecta alata, in regionibus orientalibus noctu valde molesta, abigunt, immo nonnulli saltem manu tenent, aut, amuleti instar, de collo suspendunt, et hac quoque ratione corpus suum contra morbos varios, maxime autem putridos ac contagiosos, optime sese tueri credunt (m). Exhibetur in essentia et infuso vinoso, et creberrime pariter pulveres, electuaria, pilulas atque potiunculas ingreditur. In substantia datur a paucis granis ad scrupulum semissem, in infuso vinoso autem a drachma dimidia ad integram. In Officinis quoque *radix condita* prostat, quae remissior est, et maiori proinde quantitate adsumi potest. Externe inter cataplasmata, vulneribus, venenato cruore aut putrido ichore turgidis, imponenda, nec minus inter decocta anthelmintica recipitur.

§. IV.

Cum Zedoaria quoad multa ZINGIBER sive *Zinziber* convenit: Radicem enim sistit brevem, tuberosam, nodosam, ramosam, paullulum compressam, ac multis fibris donatam, coloris intus albicantis aut flavo-fusci, foris albidus, subluteus, aut fusco-rubescens, saporis valde aromatici,

(m) Conf. *Miscellan. A. N. C. G. Dec. II. Ann. 3. Observat. 208.*

matici, odoris fragrantis quidem, ast debilioris ac minus camphorati, quam Zedoaria. Planta, quae *Amomum scapo radicato*, *spica ovata* LINNAEI est, in Insula Iava, multisque aliis Indiae orientalis regionibus, nec minus in Insula Americae Iamaica, in palustribus aliisque humidis locis sponte provenit, et hinc inde etiam, praesertim in vix memorata Insula Iamaica, ab incolis studiose colitur. Zingiber sylvestre, absque ulla cultura adolescens, sativo paullo ignobilius iudicatur, et huic igitur intuitu usus medici et oeconomici postponitur.

§. V.

PAVLVS HERMANNVS (n), alique Zingiberi naturam alcalinam tribuunt; ast citra ullum fundamentum solidum. In naturali enim mixtione eius, praeter *inertes partes terreas*, nil, nisi *tenerimum principium spirituosum - camphoratum*, *oleum aethereum*, et *fixa substantia resinoso-gummea*, demonstrari potest, immo, sub destillatione sicca et nativae mixtionis destructione, non merum sal alcalicum, novegenitum, sed simul quoque multum acidi prodit. Siccum principium camphoratum ex radicibus vetustioribus et diutissime siccatis conspicua mole vix quidem, aut ne vix, separari potest, in India tamen cum recenti Zingibere sylvestri optime id succedere IO. OTTO HELBIGIVS testatur (o). Oleum substantiale aethereum, cuius unica circiter drachma ex integra Zingiberis libra humida destillatione elicatur, valde temperatum est, ac multum in hoc passu a longe calidiori Zedoariae oleo

(n) Vid. *Cynos. Mat. med. pag. 10.*

(o) In *Miscell. A. N. C. G. Ann. IX. et X. Obs. 196.*

oleo differt. Substantia fixa resinosa ac gummea arcte invicem mixta est, et difficillime igitur prior extractionis ope a posteriori separatur. Infusum aquosum primum colore flavescente, sapore acri, urente, et ipsius Zingiberis odore gaudet. Inspissatum extractum odore ferme destituitur, saporem tamen valde acrem ac fervidum obtinet. Pendet, si una radice uncia recepta fuit, circiter drachmas duas. Infusum spirituosum primum, cum aequali Zingiberis quantitate blanda digestionis beneficio paratum, colorem saturate aureum, odorem debilem, qui magis spiritum vini, quam radicem prodit, et saporem vehementissime urentem atque pungentem possidet. Extractum, quod plerumque drachmam semissem, vel scrupulos duo pondere aequat, coloris flavo-subfusi est, et naribus debilem odorem, linguae autem saporem fervidum atque accerrimum imprimit.

§. VI.

Zingiber, etsi saporis acredine valde praepolleat, ob blandam nihilominus olei essentialis, ceu principii activi potioris, indolem, Zedoaria longe temperatius deprehenditur, et operationem suam magis irritando et incidendo, quam commovendo, in corpore exercet. Iure igitur inter medicamenta stimulantia, attenuantia, stomachalia, carminativa et aphrodisiaca referendum est, quae toties imprimis utilissima reperiuntur, quoties motus ventriculi peristalticus, aliarumque partium contractiones languent, et ob pravam ideo esculentorum digestionem larga impuritatum viscidarum ac flatuum generatio accidit. Plerumque, condimenti loco, iusculis, aliisque ciborum generibus additur,

tur, et subinde etiam pulveres, electuaria, infusa vinosa etc. ingreditur. In substantia non facile ultra scrupulum dimidium, praesertim apud subiecta sicca, macilenta, cholericam, exhibendum est; *conditum* vero, quod pariter in Officinis prostat, maiori dosi adsumere licet.

§. VII.

Zingiberi atque Zedoariae, ob formae atque naturae, immo ipsius plantae, similitudinem, *CURCUMAE RADICEM*, *Gilbwurzel*, *Curcume*, quam nonnulli etiam *Zingiber flavum*, *Crocum Indicum*, *Crocum terrestrem*, itemque *Terram meritam* etc. vocant, eodem capite iungere nullus dubito. Dividitur in *longam* et *rotundam*. Longa, quae in Officinis nostris praecipue venditur, et rotunda intuitu usus medici longe praestantior censetur, oblonga, nonnihil tuberosa, nodosa ac ponderosa est, colore foris subluteo, intus croceo, in vetustiori tamen valde ad puniceum vergente, odore aromatico, naribus quorundam paullulum ingrato, sapore pingui, subacri et subamaricante. Rotunda atque perfecte tuberosa, respectu coloris, odoris et saporis, longae valde quidem analoga existit, minus tamen aromatica et ignobilioris, uti dictum, indolis deprehenditur, adeoque rarissime in usum medicum trahitur.

§. VIII.

Parum discriminis *Curcumam* radice longa et radice rotunda intercedit, et sola duntaxat folia, quae forma et lateralium imprimis nervorum numero paullulum discrepant, alteram speciem ab altera distinguunt; hinc prior etiam a LINNAEO *Curcuma foliis lanceolatis; nervis lateralibus numerosissimis*

rosissimis, posterior *Curcuma foliis lanceolato-ovatis*: *nervis lateralibus rarissimis* appellatur. Vtraque in India orientali, et maxime quidem in Malabaria, Cananor, Calecut, Amboina et Ceylona, crescit, indeque ingens eius quantitas ad Europaeas non minus, quam Asiaticas et Africanas gentes evehitur.

§. IX.

Radix longa, quae sola propemodum, uti antea dictum, officinalis est, ex *partibus terreis, resinosis, gummosis, oleosis, et spirituosis-camphoratis* componitur. Camphora substantialis in radice sicciori difficiliter demonstratur, ex recenti vero, praesertim copia maiori experimento adhibita, interdum conspicua, tametsi valde exigua mole educi potest (p). Oleum aethereum, quod aureo colore et satis forti sapore et odore pollet, parcissime quoque inhaeret, et integrae radices libra vix scrupulum unum vel drachmam semissem largitur. Infusum aquosum primum coloris flavo-spadicei est, et linguae saporem amaricantem ac nauseosum balsamicum, naribusque ipsius radices odorem imprimit. Extractum, inde post inspissationem resultans, odore ipsius curcumae, colore fusco, ad nigredinem vergente, et sapore blande aromatico, amaricante et falso, qui postremus fortissimus est, donatum reperitur. Ex uncia una paratum, binas ferme drachmas pondere aequat. Infusum spirituosum primum sese elegantissima quidem rubedine commendat, digitos tamen, latera vitri, vasa argentea etc. crocea flavedine tingit, odore

(p) Conf. *Miscell. N. C. G. l. c.*

Carth. Mat. M. II, Tom.

re magis spiritum vini, quam curcumam, pro-
dit, et gustu exploratum satis acre, aromaticum
ac simul nauseosum deprehenditur. Extractum
quoad saporem cum infuso convenit, et quin-
que circiter scrupulos pendet. Docent haec
examina, principium gummosum cum resinoso
adeo mixtum inhaerere, ut alterum ab alterius
confortio sola extractione perfecte liberari ne-
queat: Immo, ex speciali educatorum contem-
platione patet, activitatem huius radicis non
foli principio volatili oleoso - spirituosum, sed
simul quoque fixo gummeo - resinoso adscriben-
dam esse.

§. X.

Blande resolvendo, abstergendo, commo-
vendo ac discutiendo in corpore agit, et in icte-
ro chronico, inertia bilis, adfectibus flatulen-
tis, febribus intermittentibus, hydrope ascite,
nephritide pituitoso - sabulosa, fluore albo,
obstructione mensium, partu difficili etc. effi-
cacissima ac plane specifica deprehenditur. In
India orientali ab incolis plerisque inter prae-
cipua esculentorum condimenta refertur, et ci-
bis ferme omnibus, croci aut Zingiberis loco,
additur. Apud nos pulveres, infusa vinosa, et
electuaria, immo emplastra et unguenta robo-
rantia ac discutientia etc. ingreditur. Dosis in
pulvere a granis aliquot ad scrupulum unum, in
infuso autem a scrupulo uno ad drachmam inte-
gram et ultra adscendere potest.

CAP. IV.

De radicibus Cyperi et Galangae.

§. I.

Duplex CYPERI RADIX in Officinis prostat, *longa* nimirum et *rotunda*. Haec olivae magnitudine est, scabra, multis fibris tenuibus, passim, pilorum quasi instar, ex capite prodeuntibus, instructa, colore foris ferrugineo aut rufo, intus albo, vel ex albido nonnihil flavescente, aut rubescente, vel subfusco, sapore subacri, amaricante ac blande aromatico, odore grato, et in recentiori fatis fragrante: Illa autem oblonga reperitur, tenuis, nodosa, geniculata, contorta, fractu difficilis, coloris in externa superficie fusco-nigricantis, intus albidi, odoris grati, et saporis, aequae ac praecedens, subacris, amaricantis et aromatici. *Cyperus rotundus* sive *Cyperus orientalis maior* C. B. in Aegypto, Syria etc. sponte circa flumina crescit; *longus* vero, sive *Cyperus odoratus radice longa* sive *Officinarum* C. B. Indiam orientalem praecipue patriam agnoscit, licet ignobilior quoque species in Sicilia, Italia et Gallia hinc inde obuia sit. Vterque caeteroquin ad plantas graminifolias ac iunciformes pertinet.

§. II.

Alii *Cyperum longum*, alii *rotundum* praestantiorē iudicant, at differentiam respectu virtutum non adeo magnam esse, examina chemica quodammodo ostendunt. Vtraque enim radix, praeter *odoratum principium oleoso-spirituosum*, eiusdem ferme indolis *substantiam fixam resinoso-gummeam* possidet, et *terreis imprimis partibus*

E 2

scatet.

scatet. Oleum substantiale, ob exiguum, qua inhaeret, quantitatem, separari nequit, nisi magna radicis quantitas una vice humidae destillationi subiiciatur; quare praesentiam eius ex fragrante aquae abstractae odore suspicari magis, quam demonstrare licet. Infusum rotundae aquosum colore aureo, odore satis fragrante, sapore modice amaricante et aromatico gaudet, et post inspissationem extractum relinquit coloris sordide ferruginei, odoris debilis fragrantis, saporis amari et aromatici, quod, ex integra uncia separatum, circiter drachmas duas, totidemque scrupulos pendet. Infusum spirituosum primum colore aurantio est, odore magis spiritum vini, quam radicem, prodit, et sapore satis acri atque amaricante pollet. Extractum colore fusco - rubente, odore debili aromatico, sapore subacri et amaro donatum est, ac linguae sub degustatione pertinaciter adhaeret. Ex uncia radicis una circiter drachmas duas, totidemque scrupulos obtinui.

§. III.

Infusa et extracta, ex radice cyperi longa leni digestionem et evaporationem parata, a prioribus parum distincta inveniuntur. Nam infusum aquosum primum, licet colore obscure rubro, ad nigrum vergente, tinctum sit, eundem odorem et saporem, quem praecedens aquosum, obtinet, praeterquam, quod amarities paullo maior deprehendatur. Extractum spissatum magis differre videtur: Colore enim fusco - nigricante, et sapore subacri, amaro et subadstringente pollet, odore autem penitus ferme destituitur. Minori praeterea quantitate gummosam hanc substantiam in radice cyperi longa adesse, mani-

manifestum est, quoniam extractum, etiamsi eadem radice portio extractioni adhibeatur, nondum quinque scrupulorum pondus perfecte explet. Infusum spirituosum primum colore flavo-rubescens sese commendat, et, praeter debilem odorem balsamicum, saporem amaricantem et aromaticum possidet. Parum itaque vel nihil ab infuso spirituofo radice cyperi rotundae differt. Massa inspissata coloris flavo-ac rubrofusci est, et odoris, ferme instar rob sambuci, debilis balsamici, saporis amari et aromatici. Ex uncia radice una separatim, drachmas duas et aliquot grana pendet.

§. IV.

Virtutem hae radices discutientem, roborantem, nervinam et cephalicam obtinent, et subinde igitur in morbis, a cerebri et systematis nervosi imbecillitate, vel ab aliarum quoque partium solidarum atonia potissimum oriundis, auxilium non plane contemnendum ferunt. Dantur interne, quamquam nostra aetate paullo rarius, sub forma infusi vinosi aut essentiae; et radix rotunda interdum etiam pulveres ingreditur. Pro usu externo non tantum pulveribus cephalicis et sic dictis cypriis miscentur, sed saepe pariter inter species pro cucuphis et sacculis discutientibus atque nervinis recipiuntur; quae remedia, sub diversa tamen ac congrua sua applicatione, in hemicrania, vertigine, apoplexia, epilepsia, coryza iusto diuturniori, incipiente gutta serena, susurro aurium, cophosi, debilitate memoriae, nec non in paralyti, tremore, dolore rheumatico - arthritico et oedemate membrorum, relaxatione ligamentorum

post luxationes, pluribusve huius commatis affectibus conducunt.

§. V.

GALANGA MAIOR ET MINOR, *grosser und kleiner Galgant*, cyperi radicibus valde analogae deprehenditur. Minor, quae praestantior est, radicem sistit tuberosam, nodosam, crassitie digiti minoris, colore foris spadiceo sive ex fusco rubescente, pallidioribus geniculis circularibus hinc inde distincto, intus rufo, aut ex rufo albicante, odore fragrante, et sapore acri, aromatico, ac paullulum subadstringente praeditam. Planta, quae *Kämpferia foliis ovatis sessilibus* LINNAEI est, in China, Malabaria, Insulis Philippinis, Iava, et aliis quibusdam Indiae orientalis regionibus crescit, ibidemque, teste HERMANNO (q), *Lagondi* dicitur. Nonnulli minorem hanc galangam etiam *Galangam Chinensem*, itemque *Cyperum Babilonicum* vocant.

§. VI.

Galanga maior cum minori maximam partem convenit, praeterquam, quod pollice ut plurimum crassior sit, et ingratiore odore ac sapore, adeoque ignobiliore etiam indole medica gaudeat. Rarius igitur, ob rationem indicatam, in usum medicum trahitur, et in paucissimis saltem Officinis hodie venalis prostat. Planta, in India *Banchabe* nuncupata, sola praecedentis varietas esse videtur, et eandem quoque patriam habet.

§. VII.

Mixtionem naturalem galangae minoris, quam solam ulteriori contemplationi submit-

tam,

(q) *Lib. cit. pag. 8.*

tam, principium spirituofo-camphoratum, parum olei essentialis aetherei, copiofa fubftantia gummea, refinofa parcius mixta, et multae partes terreae inertes ingrediuntur. Partes fpirituofa-oleofae non tantum ex odore fragrante patent, fed humida etiam deftillatione demonftrari poffunt, etiamfi integra radicis libra vix drachmam unam olei fubftantialis reddat. Sicca fubftantia camphorata rariffime in confpectum venit, nifi maior radicis recentis (r) quantitas deftillationi fubiiciatur. Infufum aquofum primum odore fragrante, fapore fubacri ac paullulum aromatico, et colore fufco rubente gaudet. Infpiffatum, recepta radicis uncia una, circiter drachmas duas, totidemque fcrupulos pendet, et fatis acrem atque urentem faporem poffidet. Infufum fpirituofum primum, ex aequali radicis quantitate paratum, debiliori quidem odore, quam aquofum, pollet, fapore tamen acri ac fervido longe iftud fuperat, et rubro praeterea colore fefe commendat. Poft blandam evaporationem binos plerumque fcrupulos maffae rubro-fufcae relinquit, quae primo fubadstringentem et aromaticum, deinde, piperis acerrimi infar, tam mordacem atque urentem faporem linguae imprimit, ut duo grana, aliquamdiu in ore detenta, apud fubiefta ficciora ac fenfibiliora faucium atque palati inflammationem excitare poffe, credam. Notatu quoque dignum eft, extrafti utriusque fuperficiem fubinde fplendentibus ac valde acribus miculis falinis paffim confperfam cerni; unde ingentis acredinis ratio quodammodo innotefcit.

E 4

§. VIII.

(r) Conf. *Mifcell. A. N. C. G. Ann. IX. et X. Obfervat. 196.*

§. VIII.

Militat haec radix, quae in substantia seu pulvere, a granis aliquot ad scrupulum unum, in infuso vinoso autem a scrupulo uno ad drachmam integram exhiberi potest, inter activa medicamenta nervina, cephalica, stomachalia, carminativa, antifebrilia atque uterina, et eminentem igitur virtutem in vitiis digestionis et appetitus, diarrhoea, vomitu, lienteria, coeliaca, adfectibus frigidis flatulentis, debilitate capitis ac visus, vertigine, paralyfi, epilepsia cacochymica, suppressione mensium, fluore albo, doloribus post partum, cachexia, febribus intermittentibus quotidianis et quartanis etc. exerit. Externe cucuphas et facculos roborantes ingreditur.

CAP. V.

De radice Iridis Florentinae.

§. I.

RADIX IRIDIS sive IREOS ALBAE FLORENTINAE C. B. *Florentinische Violon - Wurzel*, oblonga est, nodosa, tuberosa, pollicem crassa, paullulum compressa, foris candida, fuscis tamen punctulis passim ornata, intus vero vel perfecte albicans, vel, praesertim quoad partem medullarem, ex albido flavescens. Odorem, repurgata scilicet et exsiccata, spargit subtilem, gratum, balsamicum, odori florum violae martiae simillimum, et manducata saporem, ex amaricante, subacri, et nonnihil pingui mixtum, linguae imprimit. Ex terra vix extracta, cortice tegitur rubente, multis fibris seu radiculis circum-

cumquaque instructo, quo detracto, radix aliquantulum siccatur, ut a citiori carie atque corruptione immunis evadat. Post exsiccationem facile tritura in pulverem redigitur, farinae ex albo flavescenti haud dissimilem, qui, naribus attractus, mucum potenter incidit, et sternutationem provocat.

§. II.

Planta, quae *Iris Florentina flore albo*, itemque *Iris Illyrica* dicitur, in variis Italiae provinciis, et campestribus imprimis atque montanis Hetruriae tractibus, sponte ac sine cultura crescit, nec raro pariter in multis Germaniae, aliarumque Europae regionum hortis sativa ac culta visitur. Testibus quoque plerisque rei medicae scriptoribus, in Insulis Rhodo et Cyprio, nec minus in Lybia, Macedonia, Dalmatia (s) etc. provenit. Olim, intuitu nempe usus medici, radicem iridis Illyricae et Macedonicae praestantissimam iudicabant; nostra vero aetate Florentinae radix, quae ab Illyrica parum vel nihil differt, et vulgari nostrate solummodo candidior, compactior, atque odoratior existit (t), reliquis omnibus praefertur.

E 5

§. III.

(s) Vide VALENTINI *Histor. Simpl. reformat. Lib. II. Sect. II. Cap. XX.*

(t) „De Iride Florentina, HEVCHERVS scribit, „et Illyrica bene observes velim, quod vix differant, nisi floris odore, qui in Florentina fragrantior, et colore, qui in eadem candidissimus; in Illyrica pallide coeruleus — — — „Iris quoque alba Florentina a vulgari flore albo „specie diversa non est, differentia sola est in radicibus,

§. III.

Circa principia constitutiva, praesertim activa, huius radice apud plerosque materiae medicae scriptores altum observatur silentium. LEMERY quidem, pro more suo, de copioso oleo et sale essentiali loquitur, et alii pinguedinis, terrae levis, farinaceae, porosae, absorbentis, nec non salis acris mentionem faciunt: attamen nullus inde perspicuus et sufficiens conceptus nascitur, et instituta examina chemica potius docent, radicem hanc ex *subtili terra farinacea, pauca substantia resinosa, ac paullo largiori gummosa sive salino-mucilaginea*, quibus omnibus *tenerimae, odoriferae, particulae oleoso-spirituosae exhalabiles* mixtae reperiuntur, compositam esse. Terra insipida, farinacea, maximam ponderis partem constituit, et ordinario in uncia radice una quinque drachmas superat. Oleum essentielle aethereum minima quantitate inhaeret, nec quicquam, nisi magna radice quantitas recipiatur, sub destillatione humida prodit. Quum octo enim radice, antea probe maceratae, uncias in arenae balneo ex cucurbita destillarem, nil, nisi aquam, odore violaceo ac debili sapore balsamico imbutam, cui frustula discerptae cuticulae

„dicibus, quae in Florentina maiores, crassiores,
 „solidiores, candidiores, odoratiores; ut adeo
 „recte IOH. BAVHINVS diversitatem regioni
 „calidiori adscribat. Sic foeniculum dulce, in
 „nostras regiones translatum, paullatim in vulga-
 „re degenerasse, ipsi observavimus. Forte etiam
 „Florentina dicta sationi primam suam originem
 „debuit; nam ab eodem semine proveniunt irides
 „flore odorato, et inodoro. Vid. *Eiusd. Novos*
 „*Proventus Horti med. Acad. Viteberg. pag. 11.*

culae pinguis, et paucissimae miculae oleosae innatabant, in receptaculum translatam fuisse, deprehendi.

§. IV.

Substantia fixa gummosa, cuius quinque circiter scrupuli uni radicis unciae innati reperiuntur, substantia oleoso-resinosa, quae minori quantitate adest, et binos scrupulos plerumque pondere aequat, adeo remixta est, ut notabilis eius portio sub prima digestionem cum spiritu vini simul extrahatur. Infusum aquosum pallide flavescens est, saporis amaricantis, moderate acris, ac paullulum nauseosi, odoris violacei; extractum vero colorem sordide fuscum, saporem amaricantem, lenissima saltem acredine mixtum, et gratum odorem obtinet. Sub evaporatione odor violaceus nares constanter replet; manifesto documento, odoriferum principium evaporabile copiose in fixa hac substantia delitescere. Tinctura spiritiosa prima colore flavescente, odore violaceo, et sapore amaricante, acri ac temperate balsamico pollet. Acredo, brevi interiecto tempore, sese eminentius manifestat, tantaque deprehenditur, ut, piperis instar, fortem in faucibus ardoris sensum excitet. Quando tinctura haec spiritus abstractione aliqua in cucurbita concentratio redditur, moleculae quaedam spissiusculae resinoso-oleosae, superficiei innatantes, in conspectum veniunt, quae, cochleari ablatae, in loco frigidiusculo paullulum coagulantur, et teneriorem ac liquidiorum massam resinosam referunt, accedente vero leni calore ad pristinam fluiditatem redeunt, et degustatae aromaticum, pinguem ac valde acrum saporem linguae imprimunt.

Ex-

Extractum, ex integra residuae tincturae mole paratum, coloris fusco-flavescentis est, et quoad saporem et eminentem acredinem cum descripta massa resinoso - oleosa innatante convenit. Vnde constat, radicis activitatem parti oleoso - resinosa praecipue adscribendam esse.

§. V.

Sub destillatione sicca, adeoque violenta nativae mixtionis destructione, ex radice hac primo aqua limpida, deinde liquor flavescens, tandemque liquor brunneo - rubens et saturate spadicæus, cum notabili portione olei nigri empyreumatici, prodeunt; in retorta autem caput mortuum nigrum, iners, terrestre, quod, receptis quinque radicis uncis, binas ferme uncias pendet, relinquitur. Liquor flavescens debili saltem sapore acidulo gaudet; in succedente vero liquore fusco-rubente aciditas tanta reperitur, ut acetum vini, nisi acore, certe tamen acrimonia, superet. Postremum quoque hoc liquidum cum alcalicis vivide effervesceat, et cutem, si guttula instilletur, colore flavo, aliquamdiu pertinaciter inhaerente, tingit. Oleum empyreumaticum, simul ex praedicta radicis quantitate prolectum, ac postea a liquore, cui innatat, separatum, ad drachmae pondus et ultra plerumque adscendit.

§. VI.

In genere huic radici vires leniter commoventes, discutientes, resolventes, abstergentes, laxantes, aperitivae, diureticae, pectorales, antacidae atque anodynae competunt. Mediante enim principio, subtili, exhalabili, balsamico, blande discutit, ac lenem virtutem anodynam exserit; mediante autem substantia fixiori
resi-

resinoso-gummea, et oleosa spissiuscula acriori, humores commovet, mucositates valide attenuat et abstergit, partesque solidas, praesertim nervoso-musculosas, adeo vellicat, ut fortiori ac vegetiori nisu in humores agant, et hac ratione circuitum non minus, quam fluiditatem eorum augeant, et terra denique farinacea, quae, extracta portione solubili, relinquitur, acidum, primae culinae inimicum, nonnihil destruit. Ob varias igitur vires hasce generales ad profligandos multos morbos valet, ac valde imprimis in debilitate capitis atque ventriculi, foetore oris, tussi, asthmae pituitoso, adfectibus flatulentis, torminibus ventris, praesertim apud infantes (u), obstructione atque tumore hepatis, lienis, glandularum mesaraicarum, suppressione fluxus menstrui, calculo et epilepsia infantili, sese commendat, immo, contra gravedinem, coryzam, hemicraniam rebellem, cachexiam, hydropem, febres intermittentes et continuas, catarrhales atque malignas, venena animalia, diarrhoeas, et plures aegritudinum species alias, quae per blanda diapnoica, abstergentia ac diuretica maxime curanda sunt, et copioso imprimis muco, in ventriculo, intestinis, aliisque cavi-

- (u) „Vfus eius, BERNH. VALENTINI in *Hist. Simpl. reformat. pag. 117. scribit*, praecipue in „omnibus pectoris affectibus, a tenaci pituita oriundis, valde est decantatus, quippe quam resolvit, et ad faciliorem eiectionem idoneam praestat. Id quod in tenellorum infantum tussi, torminibus, aliisque affectibus cum emolumento fit eo maiori, quoniam pulvis, ad aliquot grana datus, interdum etiam lenissimum vomitum excitat etc.”

cavitatibus hospitanti, aut firmitus etiam canalibus impacto, natales debent, multum aegris auxilii ferre deprehenditur. Optime datur in pulvere, apud adultos a scrupulo dimidio ad integrum, apud infantes a granis aliquot ad scrupulum semissem; commode tamen etiam inter infusa vinosa, a drachma dimidia ad integram et ultra, recipitur.

§. VII.

Externe, sub forma pulveris grossioris aut subtilioris adhibita, exsiccando, valide incidendo, abstergendo, discutiendo ac stimulando operatur, et frequentissime proinde inter pulveres errhinos, ptarmicos, dentifricos, cyprios, erysipelaceos, sacculos nervinos et species pro cucuphis recipitur. Subinde etiam a Chirurgis felici effectu ossibus cariosis et ulceribus fistulosis, laxis, ichorosis etc. inspergitur, ut carnem luxuriantem absumat, et absorbendo humidum acre corrigat, adeoque consolidationem adiuvet.

CAP. VI.

De radicibus Calami aromatici et Helenii.

§. I.

RADIX ACORI VERI sive CALAMI AROMATICI OFFICINARVM et C. B. *Calmus*, *Ackerwurz*el, radicem sistit oblongam, in superficie nonnihil geniculatam, fungosam, colore foris ex candido aut subflavo-rubescente, intus albicante, sapore acri, aromatico, amaro, et odore admodum fragrante praeditam. Planta loca humida palustria amat, ac passim copiose crescit.

crescit. *Acorus Indicus*, seu *Asiaticus*, sese ab *Europaeo* sola radice distinguit, quae, teste HERMANNO (x), tenuior est, compactior, in superficie crebrius geniculata, et saporis quoque atque odoris gratioris.

§. II.

Copioso quidem *principio spirituofo*, et copiosa pariter *substantia fixa resinoso-gummea*, at paucio saltem *oleo substantiali aethereo* radix calami nostratis instructa est, quare eminens odoris fragrantia magis mobilissimis partibus spirituosis, quam oleo aethereo, cuius unica circiter drachma, vel interdum bini duntaxat scrupuli integrae radice librae inhaerent, in acceptis ferenda erit. Infusum aquosum primum, colore aureo tinctum, fragrantem odorem spirat, et balsamico ac valde amaro sapore gaudet. Inspissatum massam ex flavo-fuscam relinquit, quae pristinum quidem saporem balsamicum et amarum retinet, odore autem penitus ferme spoliata reperitur. Tinctura spirituofo prima coloris spadicei est, odore magis spiritum vini, quam calamum aromaticum, prodit, et saporem valde acrem, pungentem, amaro modice saltem mixtum, possidet. Extractum spissatum parum vel nihil a tinctura differt, praeterquam, quod mordacitas saporis in illo paullo remissior sit, idemque melius etiam, quam tinctura, ipsum calamum sapore referat. Ex uncia radice una ferme drachmas tres extracti primi aquosi, et binas circiter drachmas extracti primi spirituofo obtinui: Vnde apparet, substantiam fixam gummosam longe maiori, quam resinofam, quantitate mixtionem ingredi, et amaritiem radice pra-

(x) *Lib. cit. pag. 5.*

praecipue a parte gummosa, aromaticam vero acredinem maxime a parte oleoso-resinosa derivandam esse.

§. III.

Operationem suam in corpore humano valide commovendo, discutiendo, irritando ac roborando calamus absolvit quare caute etiam apud subiecta sicca, biliosa, cholericam et plethorica in usum vocandus est. Conducit magis subiectis humidis, frigidis atque pituitosis, adeoque in iis quoque morbis, qui ex mucida lymphae dyscrasia, lentore humorum et partium solidarum laxitate oriuntur, multum auxilii spondet. Pertinent huc varia adpetitus atque digestionis vitia, ex ventriculi flacciditate et muci adaccumulatione per saepe nascentia, nec minus inertia bilis, vermes intestinales, adfectus flatulenti, febres intermittentes quartanae, cachexia, oedema membrorum, leucophlegmatia, asthma pituitosum simplex et cachecticum, nephritis pituitosa, scabies humida, fluor albus, sterilitas, torpor veneris, tumores glandularum, coryza diuturna etc. Nonnulli eum specificè quoque contra scorbutum, hydropem ascitem, febres malignas, pestilenciales, et benignas catarrhales, immo, contra paralyin atque tremorem membrorum, praesertim apud aurifabros, aliosque, qui halitus mercuriales, seu rectius, Mercurium vivum, igne in halitus resolutum, saepiuscule intra corpus recipere coguntur, commendant.

§. IV.

Plerumque in infuso vinoso, a drachma dimidia ad integram, rarius in aquoso, exhibetur. In Officinis quoque *radix condita* prostat, quae
cru-

cruda longe remissior est, et maiori ideo quantitate adsumi potest. Externe decocta vulneraria et anthelmintica, nec minus sacculos et epithemata sicca, membris paralyticis, arthriticis etc. adplicanda, ingreditur, et interdum quoque, amuleti instar, contra aërem corruptum, effluvia contagiosa et infecta de collo suspenditur. Vltimum hunc usum non reprobo quidem, credo tamen, radicem hanc, per intervalla manducatam, grassantibus morbis malignis, corpus a contagio certius, quam sub amuleti forma, immune praestituram esse.

§. V.

RADIX ENULAE, sive HELENII, VULGARIS C. B. *Alant-Wurzel*, quam calamo aromatico hoc capite iungam, crassa est, oblonga, foris subfusca, intus pallida, contactu pinguis, saporis amari et subacris, odoris fragrantis, paululum ingrati. Planta in hortis colitur, et passim quoque in locis sylvestribus provenit.

§. VI.

Quamvis dissecta enulae radix valde pinguis deprehendatur, parum tamen, vel nihil, *olei substantialis aetherei* in mixtione fovet. Nam integra libra sub destillatione humida ne guttulam olei reddit, sed aquam transeuntem mobili duntaxat *principio spiritioso* impraegnat. Notatu quoque dignum est, nonnunquam, recepta nimirum maiori radicis quantitate, in alembico, quin ipsa aqua, *materiae cuiusdam camphoratae* moleculas in conspectum venire, quae forma externa flosculos nivales aemulantur, et partim aquae innatant, partim alembici ac rostri lateribus, aut collo receptaculi adhaerent. NEUMAN-

NVS ex radicis libris duabus drachmam unam et scrupulum dimidium huius materiae obtinuit, eamque spiritu vini quidem, neutiquam vero aqua, solvi testatur (y).

§. VII.

Penuriam olei copiosa *principia fixa resinosa-gummea* compensant, et praecipuam radici activitatem largiuntur. Substantia gummosa resinofam quantitate superat, et in una radicis uncia ferme ad unciam dimidiam adscendit; resinosa ex adverso circiter drachmam dimidiam aut duos scrupulos pondere aequat. Infusum aquosum primum nonnihil turbidum est, colorem tamen flavescenscentem possidet, et odore ac sapore ipsam radicem refert. Post evaporationem massam, odoris debilis, saporis moderate balsamici et amari, coloris alibi albicantis, alibi ex albido flavescenscentis, alibi ex flavo fusci, relinquit. Infusum spirituosum primum partim radicem, partim vini spiritum prodit, et satis acrem atque amarum saporem linguae imprimit. In extracto spissato color aureus adhuc saturatior et amarities fortior existit, acredo autem nonnihil imminuta deprehenditur. E quibus colligere licet, activitatem huius radicis magis resinosae, quam gummosae substantiae adscribendam, et acredinem quoque a principio volatili, quod sub evaporatione maximam partem in auras dispergitur, simul derivandam esse.

§. VIII.

Inter activa medicamenta discutientia, diaphoretica, sanguinem purificantia, alexipharmaca, stomachalia, carminativa, pectoralia, antiscor-

(y) In *Praelect. chemicis*, pag. 880.

tiscorbutica, vulneraria etc. locum sibi vindicat, et frequentissime proinde, nec sine insigni plerumque emolumento, in infuso vinoso aut aquoso, vel subinde etiam in decocto, a drachma dimidia ad drachmas duas, contra adfectus flatulentos, cachecticos, catarrhales, frigidos rhevmaticos, scorbuticos et scabiosos, tam benignos, quam malignos, nec minus contra tussim et asthma pituitosum, hydropem ascitem, chlorosin, fluorem album, profluvia alvina, febres intermittentes et continuas malignas, praesertim exanthematicas, paralyfin, imbecillitatem ventriculi, visus ac cerebri, melancholiam etc. praescribitur, immo multum quoque ad expellenda venena animalia, et sananda ulcera ac vulnera valet. Externe inter unguenta atque decocta travmatica et anthelmintica recipitur.

CAP. VII.

De radice Serpentariae Virginianae et Valerianae.

§. I.

RADIX SERPENTARIAE seu VIPERINAE, VIRGINIANAE, *Virginianische Natter- oder Schlangen - Wurzel*, tenuis est, fibrosa, foris gryseo- aut luteo-fusca, intus albicans, saporis acris, amaricantis et camphorati, odoris aromatici ac pariter camphorati. Planta in America, praesertim Carolina et Virginia, crescit, et Aristolochiae species est, quae a RAI0 et PLUCKENETO *Aristolochia Pifolochia*, sive *Serpentaria Virginiana caule nodoso*, appellatur.

§. II.

Praeter egregium principium volatile spirituosocamphoratum, quod ex odore satis cognoscitur, multas quoque partes resinoso-gummeas continet, olei substantialis vero nihil inde elicitur, nisi magna quantitas una vice destillationi humidae subiiciatur. Infusum aquosum saturate fuscum est, odorem spirat balsamicum camphoratum, et sapore amaro, leniter balsamico et camphorato gaudet. Extractum, inde blanda evaporatione paratum, nigricans est, odore rob sambuci aemulatur, et amarum, subacrem, balsamicum atque camphoratum saporem obtinet. Vncia radice una binas circiter drachmas suppeditat. Tinctura spirituosa prima aurantii coloris est, saporis acris, amaricantis, camphorati, odoris nonnihil saltem balsamici. Massa spissata, quae sub evaporatione fortem odorem balsamico-camphoratum spirat, colorem flavo-fuscum, odorem aromaticum, et saporem amarum, subacrem, et nonnihil camphoratum obtinet. Superat activitate extractum aquosum, et ex uncia una circiter drachmam unam pendet.

§. III.

Ab incolis Virginiae magni haec radix aestimatur, quoniam sese simplici hoc remedio contra virulentissimos anguium quorundam morsus egregie tueri possunt. Apud nos inter diaphoretica, diuretica, roborantia, carminativa, anthelmintica, et praestantissima alexipharmaca atque purificantia numeratur, et specificè imprimis in peste, aliisque febribus malignis, scorbuto, angina spuria, adfectibus soporosis et apoplecticis seroso-pituitosis, refractaria febre quartana et quotidiana etc. magnopere prodesse, ac multum

multum quoque ad destruenda venena animalia, et variolas aliaque exanthemata expellenda, valere deprehenditur: A largo tamen atque frequenti eiusdem usu in morbis paullo calidioribus abstinere decet, ne iusto fortius commovendo et irritando noceat. Plerumque in infuso vinoso, a scrupulo uno ad drachmam integram, praescribitur, et subinde quoque pulveres et electuaria ingreditur. Tinctura, cum spiritu vini parata, calidioris indolis est, et saltem a guttis 10. ad 20. 30. 40. propinatur. Externe, grossiuscule contusa, speciebus pro sacculis discutientibus et nervinis miscetur, nec raro quoque decoctis vulnerariis additur.

§. IV.

RADIX VALERIANAE, *Baldrian - Wurzel*, dividitur in *hortensem*, *sylvestrem maiorem*, et *sylvestrem minorem*. Hortensis crassa est, rugosa, in superficie geniculata, foris gryseo-fusca, intus pallida, saporis subacris et aromatici, odoris fragrantis ingrati. Planta in hortis colitur, et *Phu magnum*, *Valeriana Pontica*, *Phu Ponticum*, *Valeriana hortensis* etc. dicitur. Sylvestris maior tenuis atque fibrosa est, et foris colore fusco, intus cinereo - aut subflavo - albicante, odore aromatico atque simili etiam sapore donata reperitur. Fibrae seu radiculae minores ex capitulo crassiori prodeunt. Planta, quam C. BAVHINVS *Valerianam sylvestrem maiorem*, alii *Phu Germanicum*, *Phu maius vulgare* etc. vocant, in locis humidis sylvestribus crescit. Sylvestris minor, sive palustris, cum sylvestri maiori maximam partem convenit, praeterquam, quod radiculae adhuc tenuiores sint, et saporem magis amaricantem, quam aromaticum, obtineant.

§. V.

Respectu virtutis radix Valerianae sylvestris maioris reliquis speciebus praeferenda est, et frequentius proinde in usum trahitur. Continet activa *principia spirituosum*, et *fixa resinoso-gummea*, oleum substantiale autem in ea vix, aut ne vix, demonstrari poterit. Infusum aquosum primum coloris fusco-nigricantis est, fortem atque specificum radice odorem eructat, et saporem amaricantem ac valde nauseosum possidet. Massa spissata coloris nigricantis est, odorem sat fortem ac valde nauseosum spirat, et saporem dulcamarum, seu potius amaricantem, aliqua in principio dulcedine mixtum, linguae imprimit. Tinctura spirituosum prima, colore obscure aureo, odore ingrato, et sapore acri atque balsamico gaudet. Inspissata extractum coloris ex fusco nigricantis, odoris debilis balsamici, et saporis subacris, aromatici atque amari relinquit. Maior activitas, quod sapor testatur, in extracto spirituosum, magis resinoso, quam in extracto aquoso, magis vel unice gummoso, latet. Ex uncia radice una drachmas duas et grana triginta quinque extracti primi aquosi, et drachmam unam cum semisse extracti primi spirituosum obtinui.

§. VI.

Viribus medicis radice Serpentariae valde analoga est, in operando tamen longe remissior deprehenditur, et eximiam imprimis ac plane specificam activitatem in imbecillitate visus, incipiente cataracta et epilepsia monstrat. Antiepilepticam virtutem dudum FABIVS COLVM-

NA (z) laudavit, eamque postea, praeter complures alios, *Dominus* MARCHANTIVS (a) ulterius confirmavit, et novis exemplis plane evictam dedit. Multis enim hominibus, aetatis diversae, qui truculento huic morbo ab infantia, vel per longum tamen tempus obnoxii fuerant, radicem pulverisatam, praemissis laxantibus, semel, vel iterata etiam vice, ad drachmam unam, tam felici exhibuit successu, ut plerique perfectam sanitatem, alii notabilem ad minimum symptomatum mitigationem inde reportaverint. Apud infantes et delicatiores pulveris dosim minuere, et eo saepius eundem propinare praestat: Nec opus quoque est, ut in quovis morbo, cui opitulari solet, in pulvere exhibeatur, sed subinde vino quoque infundi, immo inter decocta recipi potest; certo tamen certius est, radicem pulverisatam in adfectibus epilepticis efficacissime operari. Externe traumaticis accensetur, et humidis epithematibus vinosis, quae, praesente visus debilitate, imminente cataracta ac gutta serena etc. oculis imponuntur, persaepe additur. Nonnulli antimagicam quoque atque magneticam illi virtutem tribuunt, et, amuleti instar de collo suspensam, febres intermittentes imprimis profligare credunt: Verum enim vero, putatitias hasce vires superstitionis sobolem esse, Medicos rationales facillime cognituros spero.

(z) In *Histor. Plant. Cap. de Phu Diosc.*

(a) Vide *Memoires de l'Acad. Royale des Sciences*, ann. 1706.

CAP. VIII.

*De radicibus Imperatoriae, Angelicae,
Levistici atque Mei.*

§. I.

RADIX IMPERATORIAE, *Meister - Wurzel*, crassa est, oblonga et geniculata, foris fusca, intus alba, aut ex albido flavescens, odoris admodum fragrantis aromatici, saporis acris et amari. Dissecta hinc inde numerosas vesiculas, materia oleoso - resinoso - gummea repletas, ostendit. Planta, quae C. BAVHINO et LINNAEO *Imperatoria*, DODONEO *Ostrutium* audit, in Austria, Styria, Helvetia, Comitatu Tyrolensi et montibus Tridentinis sponte crescit, apud nos autem plerumque in hortis colitur.

§. II.

Radix recens, et carie, cui valde obnoxia est, nondum corrupta, copiosis *partibus resinoso-gummeis*, et paucis quoque *oleosis aethereis* instructa est. Nam libra radicis una circiter drachmam semissem olei, octo propemodum uncias substantiae gummosae, et binas, immo tres uncias substantiae resinosae reddit. Infusum aquosum primum nonnihil turbidum est, coloris fusci, odoris, instar ipsius radicis, fragrantis, saporis satis amari et quodammodo nauseosi, cui post aliquam moram lenis acredinis sensus iungitur. Inspissatum suppeditat massam fusco - nigricantem, saporis amari, odoris debilis, et, instar rob sambuci, nonnihil balsamici. Praeter amaritatem tandem aliqua etiam acredo percipitur. Tinctura spiritiuosa prima colore dilute aureo, odore

odore valde fragrante, et sapore amaricante ac longe acriori, quam infusum aquosum, pollet. Extractum, post evaporationem relictum, colorem saturate aureum, odorem ipsius radices, et saporem amarum ac valde acrem obtinet: Unde manifestum evadit, virtutes huius radices primario principiis spirituofo-oleoso-resinosi adscribendas esse, etiamsi multo minori quantitate, quam substantia gummosa, inhaereant. Quicquid enim circa copiam deficit, abunde indole calidiori et eminenti acredine compensatur.

§. III.

Efficacissimum, et subinde plane egregium medicamentum carminativum, stomachale, pe-
torale, diureticum, uterinum et alexipharmacum est; caute nihilominus, modice, et apud humida saltem et torpidioris naturae subiecta, praesente causa materiali magis frigida, quam calida, in usum vocanda est. Conducit maxime in debilitate ventriculi, pituitosis cruditatibus onusti, cardialgia ac colica vere flatulenta, diarrhoea mucida, febre intermittente quotidiana et quartana, suppressione urinae, calculo, nephritide pituitosa, hydrope, fluore albo, suppressione mensium chronica, asthma, cachexia, peste ac pluribus morbis, quorum curationi paullo calidiora aromatica, balsamica et amara tuto impendi possunt. Locum etiam inter anthelmintica et travmatica obtinet, nec parum subinde in refractaria viscerum obstructione et morbis catarrhalibus prodest. Interne plerumque in infuso vinoso, aut aquoso, a drachma dimidia ad drachmas duas, praescribitur, et crebro pariter inter electuaria recipitur. Externe multum valet ad scorbutum oris, intumescen-
F 5 tiam

tiam glandularum salivalium, et ulcera ac vulnera impura curanda, si pulveribus, gargarismatibus, decoctis etc. additur.

§. IV.

Imperatoriae radice temperatior, adeoque etiam praestantior est RADIX ANGELICAE SATIVAE C. B. *Angelicken - Heilige - Geist - Brust-Wurzel*. Multas haec ipsa fibras seu radices minores e capite crassiori emittit, quae, aequae ac ipse truncus seu caput, colore foris subluteo-ferrugineo, intus albicante, punctis hinc inde fusco-flavescentibus distincto, odore fragrante aromatico, sapore acri et amaricante, grata quadam dulcedine mixto, pollent. Praeter angelicam sativam hortensem maiorem, in Officinis etiam RADIX ANGELICAE SYLVESTRIS MAIORIS prostat, quae praecedente sativa, respectu virium, nisi superior, certe tamen non inferior est, et sponte in Helvetiae, Bohemiae, Norwegiae, Lapponiae, Islandiae etc. montibus ac rupibus nascitur. Septentrionalis montana censetur optima: Huic Bohemica et Helvetica, et hisce denique vulgaris sativa succedit. Longe facilius adhuc, quam Imperatoriae radix, ob iunctam dulcedinem, cariota redditur; hinc semper integram, recentem ac probe resinosa ad usum seligere praestat.

§. V.

Activis principiis oleoso-spirituosis, resinosis ac gummeis instructa est. Olei essentialis aetherei quantitas in integra libra raro ad drachmam unam adscendit; fixa autem principia maiori copia mixtionem ingrediuntur, et uncia radice una plerumque drachmas tres extracti aquosi, et
drach-

drachmas duas extracti spirituosi primi largitur. Infusum aquosum, quod luteo colore est, balsamico-subdulcem saporem possidet, et odore suo radicem quodammodo aemulatur, etiamsi tam debilis sit, ut simplex paullo difficilior inde cognoscatur. Massa spissata, cuius color saturate fuscus est, odore adhuc debiliori gaudet, et aromaticae duntaxat dulcedinis sensum in lingua excitat. Tinctura spirituosa, dilute aurea, radicem ipsam valde redolet, et acri, balsamico et amaricante sapore, qui longe maioris, quam in priori, activitatis index est, donata reperitur. Massa spissata ab infuso vix distincta videtur, praeterquam, quod color flavus ad fuscum vergat, et aromatica acredo longe adhuc potentior sit, adeoque morificatione sua linguam ac fauces fortius adficiat.

§. VI.

Medicaminum praestantissimorum auget numerum, et bezoardica imprimis, antiscorbutica, carminativa, pectorali et uterina virtute sese commendat. Operationem suam partim irritando et discutiendo, partim abstergendo ac demulcendo absolvit. Virtus demulcens subdulci principio gummoso, vires reliquae partibus resinoso-oleoso-spirituosis primario adscribendae sunt. Imperatoriae radici ubivis substitui potest, immo eidem, ob indolem longe temperatiorem, in casibus plerisque, maxime autem in scorbuto, adfectibus flatulentis et pectoris pituitosis, passione hysterica, et febribus malignis praeferrimeretur. Datur in infuso vinoso et aquoso, a drachma dimidia ad drachmas duas, et subinde etiam in decocta et infusa theiformia recipitur. Externe inter masticatoria antiputredinosa, antiscor-

tifcorbutica, anticatarrhalia et prophylactica, locum habet, et frequentissime etiam gargarismata, contra odontalgiam et tumores glandularum salivalium praescribenda, nec minus decocta, unguenta, epithemata et cataplasmata, discutientia, roborantia, carminativa, traumatica atque alexipharmaca, ulceribus scorbuticis, ac venenatis vulneribus, punctura aut morfu inflatis, adplicanda, ingreditur.

§. VII.

RADIX LEVISTICI, sive LIGUSTICI VULGARIS, C. B. *Liebstockel - Wurzel*, crassa est, oblonga, in multas fibras rectas ac satis quoque crassas divisa, coloris extrinsecus subfusci, intus albicantis aut pallide flavescentis, odoris fragrantissimi, saporis subdulcis, subacris et blande aromatici. Facile, et intra modicum tempus, aequae, ac radices praecedentes, pulverulenta atque cariota evadit. Planta ordinario in hortis feritur, et apud Botanicos etiam *Angelica maior*, *Laserpitium Germanicum* etc. audit.

§. VIII.

Praeter copiosum principium spirituosum, quod sese maxima odoris fragrantia manifestat, parum quoque olei, ac multum substantiae fixae resinoso-gummeae in mixtione fovet. Oleum essenziale aethereum in integra radice libra drachmae pondus rarissime excedit, substantia fixa autem, praesertim gummosa, quantitate longe maiori inhaeret. Infusum aquosum primum, saturate aureum, odorem spirat debilem, et balsamico-subdulcem saporem obtinet. Massa inspissata, quae ex uncia radice circiter drachmas tres pendet, vix distincta est, et maiori solummodo

modo dulcedine balsamica, et colore obscuriori, nimirum subfusco, seu flavo-fusco pollet. Tinctura spirituosâ, cuius color aureus est, odore radicem aemulatur, et acris atque balsamici saporis sensum in lingua excitat. Extractum, quod, integra pariter radicis uncia recepta, drachmas duas et scrupulum dimidium pondere aequat, quoad odorem cum infuso convenit, respectu saporis et coloris autem aliquantulum differt, dum subfusco-flavum est, et saporem subdulcem et aromaticum possidet. Notatu quoque dignum est, extracto huic, cum evaporando iam ad consistentiam mellis redactum esset, materiam paullo liquidiores, pinguem, resinoso-oleosam, valde aromaticam, innataisse, quae massae reliquae activitatem praecipue largiri videbatur; nec prorsus silentio praetermittendum est, dulcedinem in extracto aquoso radicis levistici maiorem, acridinem contra aromaticam extracti spirituosi multo minorem fuisse, quam apud similia extracta radicis angelicae.

§. IX.

Virtute carminativa, pectorali, diuretica et uterina multa simplicia huius commatis superat, et specificè imprimis in adfectibus colicis et cardialgicis, aliisque flatulentis, ictero, tussi, asthma, calculo, ardore et suppressione urinae, malo hysterico, obstructione mensium et lochiorum, ceterisque morbis, in quibus radix angelicae prodest, convenit. Datur in infuso vinoso, rarius in decocto, aut infuso theiformi aquoso, a drachma una ad duas, immo unciam dimidiam. De usu externo eadem prorsus, quae de radice angelicae dicta fuerunt, memorare licet.

§. X.

§. X.

Cum Levistici et Angelicae radicibus quoad odorem, saporem, principia activa ac vires medicas, RADIX MEI sive MEV convenit, praeterquam, quod maiori dulcedine, minori ex adverso acredine donata sit. Planta, quae *Meum foliis anethi* C. B. et *Athamanta foliolis capillaribus, seminibus glabris striatis* LINNAEI est, sponte in montibus, praesertim alpinis Helvetiae, Italiae ac Galliae, et subinde etiam in pratis siccioribus crescit. In iisdem morbis, quibus levistici radix medetur, conducit, et sub eadem quoque forma interne in usum trahitur. Externe grossiuscule contusa et cum vino cocta, mammis, ad tumores duros resolvendos, imponitur.

CAP. IX.

De radice Carlinae.

§. I.

RADIX CARLINAE CAULE VNIFLORO LINNAEI, *Eberwurz*, radix oblonga est, digiti ut plurimum crassitie, colore foris pallide ferrugineo, intus ex flavo aut fusco albicante, odore ingrato, sapore subacri ac debili balsamico. Sponte in tractibus Italiae, Helvetiae, Bohemiae, Moraviae, Thuringiae et Hercyniae montanis atque apricis crescit, indeque in Officinas nostra sat magna copia transmittitur. Facile in superficie situm contrahit, posteaque carie corrumpitur, nisi effossa probe siccetur, et in sicco pariter loco adservetur.

§. II.

§. II.

Copiosas partes resinofas ac gummeas, paucas vero spirituofo - oleofas poffidet. Portio effentialis oleofa portioni resinofae tam alte immerfa eft, ut altera ab altera primae deftillationis et extractionis ope perfecte feperari nequeat. Ex libra radicis una circiter fcrupuli duo, rariffime drachma integra eliciuntur. Hoc oleum, quod paullo fortiorem ignem ad fui feperationem poftulat, ob partium quarundam resinofarum mifcelam, in aqua fundum petit, et fpiffioris confidentiae eft, adeoque temporis fuffeffu fluiditatem fuam penitus amittit, et in balsamum craffiusculum condensatur, nifi mature nova deftillatione humida a mixtis particulis resinofis, quae, fubtrato igne moderato, in vefica remanent, feparetur. Rectificatione laudata perfecte fluidum redditur, et aquae poftea innatat, multumque virtutis obtinet, immo reliquis principiis intima unione fua praecipuam activitatem conciliat (b).

§. III.

Infufum aquofum primum ipfam radicem nonnihil redolet, et valde debili ac parum grato fapore balsamico pollet. Color ex flavo et rubente fubfufcus eft. Extractum flavo - brunneum vix praeflantius exiftit, licet uncia radicis una dimidiam ferme unciam, vel ad minimum drachmas tres largiatur. Maior virtus in parte resinofa latet. Nam infufum spirituofofum primum, quod aureo colore gaudet, fubacrem, et ipsius radicis infar ingrate balsamicum faporem linguae imprimit. Eiusdem ferme conditionis extractum infpiffatum deprehenditur, quippe
quod

(b) Conf. NEYMANNI Lib. cit. pag. 671. fequ.

quod colore saturate aureo, ad rufum nonnihil vergente, odore debili balsamico, et sapore subacri et amaricante praeditum est. Vncia radice una duas circiter drachmas mihi reddidit.

§. IV.

Inter medicamenta sudorifera, alexipharmaca et anthysterica non infimum locum occupat, et in peste imprimis, febribus malignis exanthematicis, adfectibus scabiosis, passione hysterica, et sopore praeternaturali effectus plane singulares edere traditur. Nonnulli etiam specificè illam contra tremorem membrorum, a mercurialibus ortum, commendant; quae virtus, si eventus expectationi respondet, unice in diaphoresi, quam praestat, rationem suam habere videtur. In decocto et infuso aquoso aut vinoso datur a drachma una ad drachmas duas et ultra. Externe decocta traumatica, contra scabiem imprimis adhibenda, ingreditur.

CAP. X.

De Nardo sive Spica Indica et Celtica.

§. I.

NARDVS INDICA, *Spica Indica*, *Spica Nardi*
 OFF. nec radix, nec vera spica est, licet ob aliquam formae similitudinem ita nuncupetur, sed densa quaedam filamentorum seu comarum aridarum, circa tenuem ac concavum caulem stramineum e suprema radice parte prodeuntium congeries, coloris ferruginei seu fuscorufescentis, saporis acriusculo-aromatici et amaricantis, odoris fragrantissimi cerebrumque non-
 nihil

nihil turbantis. Planta, cuius gracilia folia radicalia, post exarescentiam suam, praedictas comas seu filamenta capillaria relinquunt, passim in India orientali, maxime autem in Insula lava crescit; a Botanicis tamen nondum satis descripta est. BREYNIUS eam ad graminis species refert, et *Gramen cyperoides, aromaticum, Indicum* vocat.

§. II.

Praeter partes spirituosas copiosissimas, et crassius paullo atque tenacius *oleum aethereum*, quibus potiores vires medicae, et ingens, adeoque plerisque nonnihil adversa, fragrantia eius adscribendae sunt, satis activam quoque *substantiam fixam resinofam ac gummeam* in mixtione sua continet; prior tamen posteriorem virtute superat. Infusum spirituosum primum, flavo colore tinctum, specificum plantae odorem balsamicum emittit, et sapore subacri aromatico ac leniter in recessu amaricante gaudet. Post evaporationem, qua durante constanter odor fortissimus diffunditur, extractum flavo-fuscum, sapore balsamico, aromatico ac mediocriter amaro praeditum, relinquit. Extractum hoc, cuius ex integra spicae uncia grana duntaxat triginta quatuor impetravi, ob magnam tenacitatem suam saliva difficilius solvitur, et dentibus atque palato sub degustatione adhaerescit. Infusum aquosum primum, vinum Rhenanum colore aemulans, fortem quoque odorem spirat, at solum saporem aromaticum linguae imprimit. Ad extracti consistentiam evaporando redactum, colore gryseo-flavescente est, et saporem pariter aromaticum, subamaricante tamen nonnihil remixtum, obtinet. Ex uncia spicae una quatuor circiter scrupulos pendebat.

§. III.

Varia praeparata atque composita pharmaceutica ingreditur, per se autem nostro aevo paullo rarioris usus medici est. Infunditur ut plurimum vino aut aceto, et hoc adversus scorpionum, viperarum, serpentum atque rabidorum animalium morsus interne et externe usurpatur; illud, roborandi, discutiendi ac resolvendi scopo, in morbis capitis et pectoris catarrhalibus, imbecillitate ventriculi, adfectibus frigidis flatulentis, obstructione viscerum, et suppressione fluxus menstrui atque urinae, adsumitur. Externe spica integra contra inflammationes erysipelaceas, nec non oedemata atque paralyfes membrorum commendatur, et in hunc igitur finem subinde inter pulveres grossiores, epithemata sicca et facculorum ingredientia recipitur.

§. IV.

NARDUS sive SPICA CELTICA OFFIC. est radix rufescens fibroso-capillaris, cui sicca, viridiusculo - flavescencia ac quasi squamosa foliola adhaerent, quae aequae, ac ipsi ramuli radicales, saporem subacrem et aromatico - amaricantem possident, ac graviusculum odorem aromatico-balsamicum spirant. Planta, quae CLVSIO *Nardus Alpina*, TOVRNEFORTIO *Valeriana Celtica*, et C. BAVHINO *Nardus Celtica Dioscoridis* dicitur, non tantum in Galliae, sed etiam Italiae montibus, nec minus in Alpibus, Germaniam ab Italia seiungentibus, crescit, ac tota aromatica deprehenditur; ut plurimum tamen solae radiculæ cum adnatis foliolis in usum medicum trahuntur, quoniam, iusto tempore, ad finem nimirum decurrente Augusto, vel initio Septembris

bris collectae, gratiorem prae reliquis plantae partibus odorem emittunt. Convenit haec nar-di species quoad naturam, principia ac vires cum praecedente, adeoque illi commode etiam substitui et eodem pariter modo usurpari potest.

CAP. XI.

De Schoenantho et Malabathro sive Folio Indo.

§. I.

SCHOENANTHVS, *Schoenanthos*, *Schoenanthum*, *Squinanthum*, *Iuncus odoratus* OFF. est culmus aridus, rigidus, teres, geniculatus, pedalis circiter longitudinis, intus medulla repletus fungosa iuncea, foris foliis, nec raro etiam floribus, adhuc instructus, coloris in parte inferiori pallidi aut subflavi, prope verticem viridiusculi aut purpurascens, odoris fragrantissimi, mixto pulegii et rosarum odori haud dissimilis, saporis subacris, aromatici et amaricantis.

§. II.

Planta, quae plures eiusmodi culmos ex uno radicem cespite emittit, IOH. BAVHINO et TOVRNEFORTIO *Schoenanthos* sive *Iuncus odoratus*, C. BAVHINO *Iuncus rotundus aromaticus*, LINNAEO *Lagurus paniculae spiculis coniugatis ovatis*, et PLUCKENETIO *Gramen dactylon aromaticum, multiplici panicula, spicis brevibus tomento candicantibus, ex eodem pediculo binis*, audit, et in Arabia petrea atque deserta, unde ordinario ad nos defertur, tanta copia crescit, ut commune ibidem camelis pabulum praebeat; quare germanice etiam *Camels-Heu*, *Camel-Stroh* appellatur.

§. III.

Abundat hoc simplex, praesertim recentius, floridum ac forti adhuc odore donatum, *principiis oleoso-spirituosis*, immo activam quoque *substantiam fixam gummeo-resinosam* in mixtione sua continet. Olim, ob vires suas nervinas, carminativas, uterinas et diureticas, in variis morbis frigidis, a crassa pituita oriundis, maxime autem in vomitu, singultu, inflatione ventriculi et intestinorum, tumore hepatis et lienis, dysuria etc. usum crebriorem habuit; nostra vero aetate contra morbos memoratos paullo rarius adhibetur. Interne in pulvere, a drachma dimidia ad integram, in decocto autem et infuso aquoso aut vinoso ad drachmas duas praescribitur. Externe speciebus pro sacculis siccis et vinosis discutientibus ac roborantibus additur.

§. IV.

FOLIUM INDUM, sive MALABATHRUM, est folium magnum, oblongum, acuminatum, densum ac glabrum, tribus a pediculo ad apicem discurrentibus nervis crassioribus distinctum, odoris ac saporis aromatici, nonnihil caryophyllaei. Adfertur ex India orientali, ubi ab arbore, quae Lauri species est, et a MUNTINGIO *Canella arbor sylvestris*, a RAIO *Canella sylvestris Malabarica* vocatur, decerpitur. Quoad naturam, principia, vires et usum medicum cum Schoenantho convenit, et aequè pariter, ac ille, inter theriacam, mithridatium et alias quasdam compositiones pharmaceuticas recipitur.

CAP. XII.

*De Melissa citraria, Turcica atque Canariensi,
nec non Mentha Romana et Basilico.*

§. I.

MELISSA CITRINA sive CITRARIA OFFIC.
Melissa hortensis C. B. *Apiastrum* sive *Melisso-*
phyllum L. O. B. *Melisse*, *Citronen-Melisse*, ad prae-
stantiores plantas medicas pertinet, et foliis suis,
quae sola in usum trahuntur, sese potissimum
commendat. Sapore enim haec ipsa subacri ac
blande balsamico gaudent, et eximiis, iisque
valde temperatis, *principiis volatilibus oleoso-spi-*
rituosis, nec spernendis etiam *fixis resinoso-gum-*
meis, donata inveniuntur.

§. II.

Oleum substantiale aethereum non adeo ma-
gna quidem quantitate ingenitum reperitur, pe-
nuria tamen indole nobilissima abunde compen-
satur, et HERMANNVS (c) ideo, alique vola-
tilia melissae principia tanti aestimarunt, ut spi-
ritibus corporis humani analoga iudicaverint.
Volatilibus principiis, intuitu virtutis, pars fixa
resinosa, tandemque gummosa succedit. Nam
tinctura spirituosa prima, saturate viridis, vel
etiam ex viridi nigricans, ipsius melissae odorem
spirat, et acrem atque balsamicum saporem
possidet. Extractum inspissatum nigricans est,
odore balsamico quidem, non adeo tamen gra-
to, sapore subacri, amaricante ac paullulum ad-
stringente. Ex uncia foliorum integra drach-
mam unam cum semisse obtinui. Infusum aquo-

G 3

sum

(c) L. cit. pag. 207.

sum coloris quidem ex rubro ac fusco nigrificantis est, et herbam, unde paratum fuit, odore satis prodit, nullo singulari tamen sapore donatum, sed nauseosum ac valde iners deprehenditur. Aliter comparatum est cum inspissata massa nigricante; quippe quae austeriusculum et amarificantem saporem linguae imprimit, et activitate igitur non prorsus destituta videtur. Ex aequali foliorum quantitate drachmas duas totidemque scrupulos impetravi.

§. III.

Operationem suam blanda commotione, diffusionem, ac moderatissima irritatione et subadstrictione absolvunt, nec parum fortassis, uti Medicorum aliqui cum vix allegato HERMANNO firmiter credunt, ad partes spirituosas in sanguine et nervis substantialiter augendas conferunt. Iure igitur inter medicamenta nervina, cephalica, cardiaca, pectoralia, stomachalia, carminativa et uterina, nisi primum, certe tamen valde eminentem, locum sibi vindicant, et magnum imprimis atque egregium auxilium in debilitate memoriae, vertigine idiopathica, melancholia, epilepsia, apoplexia pituitosa, syncope, imbecillitate visus, flacciditate ventriculi et intestinorum, cardialgia, colica, passione hypochondriaca et hysterica, suppressione mensium, fluore albo, sterilitate muliebri, gonorrhoea benigna, tremore et palpitatione cordis, tussi, asthmate, et singulis morbis reliquis, ex debilitatione generis nervosi, et partium spirituosarum penuria atque depressione maxime oriundis, ferre consueverunt. Optime praescribuntur in infuso vinoso, et aquoso theiformi, a pugillo uno ad duos, tres, quatuor. Externe inter infusus uteri-

uterinos, in passione hysterica, fluore albo, sterilitate et mensium defectu valde proficuos, nec minus inter balnea nervina et sacculos roborantes ac discutientes recipiuntur. Recens contusa subinde etiam vulneribus venenatis, morfu aut punctura ab animalibus rabidis, serpentibus, viperis, scorpionibus, apibus etc. inflictis, imponuntur, ac multum pariter ad resolvendos tumores scrophulosos, et purificanda ac sananda vulnera vulgaria valent.

§. IV.

Cum Melissa nostrate sive vulgari MELISSA PEREGRINA FOLIO OBLONGO C. B. vulgo *Melissa Turcica* sive *Moldavica* appellata, nec minus MELISSA CANARIENSIS seu *Cedronella Canariensis viscosa*, floribus plerumque ex eodem pedicello ternis COMMELINI, nonnihil conveniunt, multo potentiora tamen ac calidiora principia oleoso-spirituosa obtinent, et propter actionem itaque impetuosiore vulgari postponuntur; possunt tamen eidem, interdum, praesertim Canariensis, quae Turcica praestantior existit, in morbis nonnullis, qui potentiora nervina, cardiaca, carminativa et uterina ad sui curationem desiderant, substitui, et, aequae ac illa, sub forma infusi vinosi in usum vocari. Spectat quoque huc MENTHA HORTENSIS CORYMBIFERA C. B. seu vulgo ita dicta *Mentha Romana*; quippe quae longe remissiore ac gratiorem odorem, quam Melissa Moldavica, emittit, et propius itaque, quam illa, ad naturam melissae citrariae accedit. Laudantur maxime vires eius stomachales, carminativae atque uterinae, et ob hasce igitur subinde contra hysteralgiam et varios adfectus

flatulentos, sub forma infusi aquosi aut vinosi, interne adhibetur.

§. V.

Expositis *Melissae* speciebus *BASILICVM*, *Ocimum citratum*. *Ocimum caryophyllatum maius* et *minimum* C. B. *Mittel- und klein Basilien-Kraut*, propter magnam pariter naturae et principiorum analogiam, iungi meretur. Vtrumque apud nos unice in hortis colitur, in Italia autem, India et Insula imprimis Zeylona, sponte crescit. Folia, de quibus hoc loco praecipue sermo est, odorem spirant fragrantissimum, et subacrem atque balsamicum saporem linguae imprimunt; feminibus tamen, quae pariter in medicina usum invenerunt, ac multis adduntur compositionibus, naturae bonitate inferiora sunt. Quondam Physicorum ac Medicorum quamplurimi crediderunt, *ocimum citratum*, saepius interne exhibitum, aut creberrime saltem odoris causa naribus admotum, in corpore humano, praesertim cerebro, scorpiones generare, et multi eapropter herbam hanc in usum trahere vix ausi sunt: Verum enim vero, traditionem memoratam prorsus fabulosam esse, certior neotericorum experientia, ratione suffulta, docet. Scio quidem, scorpiones amare basilicum; et in calidioribus regionibus, v. g. in Italia etc. saepissime inter folia degere, ibidemque ovula sua deponere; ast inde nondum sequitur, basilicum scorpionibus in corpore aut extra illud generandis aptum esse. Ego ad minimum testari possum, me herbam hanc frequentissime adhibuisse, et nunquam noxios, sed semper salutares, ab usu eius observasse effectus. Quare aliis quoque eam commendare, et vires eius nervinas, cardiacas, carmina-

minativas, pectorales et uterinas deprædicare nullus dubito. Plerumque in infuso vinoso, ad unum alterumve pugillum, præscribitur, et subinde etiam, tametsi ob nimiam fragrantiam paullo rarius, speciebus pro infuso theiformi additur. Externe inter balnea nervina, infusus uterinos, et sacculos discutientes ac roborantes, æque ac melissæ species, recipitur.

CAP. XIII.

De Rosmarino.

§. I.

ROSMARINVS OFF. *Rosmarinus hortensis angustiflore*, et *spontaneus latiore folio* C. B. *Rosmarin*, est planta fruticosa notissima, quæ apud nos in hortis colitur, in Hispania autem, Gallia Narbonensi, Galilæa, et passim quoque in Italia, Hungaria etc. sponte provenit. Folia fragrante ac grato odore aromatico, nonnihil camphorato, pollent, et acrem atque amaricantem saporem possident. Flores paullo temperationis indolis sunt, ratione odoris nihilominus atque saporis cum foliis conveniunt.

§. II.

Principia activa, tam fixa, quam volatilia, in foliis et floribus unius quidem eiusdemque naturæ deprehenduntur, maiori tamen copia foliis, quam floribus ingenita reperiuntur. *Volatilia* partim *spirituoso-camphorata*, partim *oleosa* sunt, *fixa* autem indolem *resinoso-gummeam* obtinent. Tenerrimæ substantiæ camphoratae præsentia ex aquæ destillatæ, præsertim vetu-

stioris, odore abunde innotescit, et substantiale oleum aethereum, cuius una circiter, vel una interdum et dimidia drachma ex integra foliorum libra elicatur, aquae innatat, paullulumque post separationem viridescit. Flores longe adhuc minorem olei quantitatem reddunt, quae penuria princeps sine dubio activitatis remissionis causa existit: Paucum praeterea hoc oleum magis in calyce eorum, quam petalis, residet. Folia, primum cum spiritu vini digesta, infusum largiuntur ex flavo viride, grato atque specifico rorismarini odore imbutum, et sapore balsamico, amaricante, ac satis acri praeditum, quod inspissatum massam relinquit coloris ferrugineo-viridantis, saporis, instar ipsius rorismarini, subacris, amaricantis ac camphorati, et balsamici quoque, debilioris tamen, nec tam grati amplius, quam antea, odoris. Vncia foliorum dimidia drachmam semissem mihi reddidit. Infusum aquosum primum longe ignobilioris, quam tinctura spiritiuosa, indolis est, et debilem duntaxat atque inertem saporem amaricantem possidet, etiamsi saturato colore fusco, ad nigrum et viridem nonnihil inclinante, tinctum sit, et ipse herbae odorem eructet. Parum differt extractum, praeterquam, quod color nigricans sit, et debili amaritiei aliqua acredo admixta sentiantur. Ex aequali foliorum quantitate drachmam unam et grana 24. impetravi. Instituta haec examina docent, vires rorismarini praecipuas principio volatili oleoso-spirituoso-camphorato, et fixo resinoso adscribendas esse, in gummoso autem parum vel nihil virtutis latitare.

§. III.

Praeter indicata principia activa spirituoso-oleosa et resinoso-gummea, foliis herbae tenera pariter *substantia ceracea* inhaeret, de qua BOERHAAVIUS sequentia retulit: „Balsama quaedam, calore solis acta, et inspissata, dein apparent copia minutissima in superficie foliorum quibusdam in plantis, ut in Rosmarino manifeste videtur apparere, aliter et sunt plerumque globuli exilissimi, qui salient de apiculis seminalibus plantarum apertis, in parte floris masculina. Haec vix ulla arte colligi queunt ab hominibus. Attamen deprehendi, quod aliquando cupiens folia Rosmarini saepe cohobare cum alcohole, praeter expectationem invenirem saporem ingratum et odorem *Cerae* deturpasse spiritus hos primo bonos. Inde folia haec, lustrans microscopiis, tubercula *ceracea* in superficie deprehendere videbar, manibusque tractans multum, *Ceram* digitis sensim accrescere experiebar satis evidenter etc.,

§. IV.

Vires generales, quibus folia et flores rosmarini pollent, roborantes, nervinae, cephalicae, pectorales, stomachales et uterinae sunt; hinc valide etiam aegris, epilepsia, vertigine, melancholia, debilitate memoriae, sopore praeternaturali, cephalalgia chronica, apoplexia pituitosa, syncope, paralyssi, imbecillitate visus, tremore et palpitatione cordis, adfectibus pectoris mucosis, flacciditate ventriculi, obstructione mensium, fluore albo et sterilitate muliebri, cachexia etc. laborantibus, opitulantur. Plerumque

rumque in infuso vinoso, a pugillo uno ad duo, tres, praescribuntur, et interdum pariter speciebus pro infuso aquoso theiformi, immo decocto, miscentur. Externe in hemicrania refractaria, aliisque capitis adfectibus, e meningum atque nervorum debilitate praecipue resultantibus, nec minus in paralyfi membrorum, doloribus frigidis rhevmaticis et arthriticis, aphonia, rauedine, laxitate uvulae, angina spuria, tumore glandularum salivalium, ulceribus impuris cancrōsis et fistulosis, suppressione fluxus menstrui, fluore albo, sterilitate etc. auxilium plane eximium praestant, quando, pro morbi et partis adfectae diversitate, modo inter cucuphas et sacculos, modo inter pulveres cephalicos aut errhinos, modo inter gargarismata, decocta, epithemata, balnea, infusus uterinos et suffimigia recipiuntur.

CAP. XIV.

De Salvia.

§. I.

SALVIA VULGARIS OFFIC. *Salvia* nimirum maior, nec non *Salvia minor aurita* et non *aurita* C. B. *Garten-Salbey*, quae apud nos in hortis colitur, rosmarino naturae ac virium praestantia perfecte aequiparanda foret, nisi nimia fragrantia sua hominibus plerisque displiceret: Flores tamen, sive sint albi, sive pallide coerulei, ob maiorem principiorum teneritudinem, foliis paullo remissiores ac temperatiores reperiuntur, et saepius proinde, quam folia, apud subiecta sensibilia in usum vocantur.

§. II.

§. II.

Principiis *spirituoso-camphoratis* Salvia magis, quam rosmarinus, abundat, *olei aetherei* autem longe minorem quantitatem continet, et integra foliorum libra vix drachmam dimidiam aut binos scrupulos reddit. Oleum hoc aquae innatat, et ordinario post destillationem amoenissimo tinctum cernitur colore viridi, qui, modico tamen tempore elapso, in subfuscum mutatur. Memini quoque, me aliquoties, praesertim ex foliis adultioribus, appropinquante autumno decerptis, oleum subflavum accepisse. Infusum aquosum, cuius color fuscus est, odore herbam prodit, et moderato sapore amaricante atque simul camphorato pollet. Extractum inspissatum, quod ex uncia una circiter drachmas duas ac totidem ferme scrupulos pondere aequat, coloris saturate fusci est, ad nigrum nonnihil inclinantis, odoris debilis, fere instar prunorum coctorum, saporis subamaricantis, subsalsi et paullulum in recessu adstringentis. Parum in hoc ipso virtutis latet. Tinctura spirituosa prima colorem ex viridi nigricantem, odorem folius vini spiritus, et saporem acrem obtinet, ac longe maiori, quam infusum aquosum, activitate instructa deprehenditur. Hoc postremum etiam de nigricante massa spissata, cuius pondus, recepta aequali foliorum quantitate, nondum ad quatuor scrupulos adscendit, dicendum erit. Odorem enim balsamicum, non amplius tamen salviae specificum, sed mellis potius ac cerae odorem aemulantem, spirat, et acris, amaricantis atque camphorati saporis sensum in lingua excitat. Quae singula satis docent, virtutem medicam praecipue parti spirituoso-oleoso-resinosae ingenitam esse, substantiam gummeam vero,

vero, per se consideratam, nullum singularem edere posse effectum.

§. III.

Folia et flores commovendo, discutiendo, attenuando ac roborando agunt, et iure maximo inter praestantiora nervina, alexipharmaca, antiputredinosa, purificantia, anticatarrhalia, pectoralia, uterina et traumatica referenda sunt. Conveniunt igitur in singulis ferme morbis, quibus curandis rosmarinus inservit, multumque imprimis contra catarrhos et ictus morsusque virulentos valent, etiamsi araneae, bufones, immo serpentes plantam hanc valde ament, et folia noxio humore saepissime conspurcare dicantur. Interne sub forma infusi vinosi, a pugillo uno ad plures, exhibentur, et flores subinde etiam infusa theiformia ingrediuntur; ante infusionem tamen tam folia, quam flores, ob rationem antea allegatam, aqua abluere decet. Vfus externus latius propemodum patet. Miscentur enim speciebus pro facculis, gargarismatibus, decoctis et balneis, quorum medicaminum alia in doloribus arthriticis et rhevmaticis, tumoribus oedematosi, etc. alia in laxitate uvulae, raucedine, angina spuria, intumescentiis glandularum salivalium, aphthis benignis et malignis, aphonia, scorbuto oris, odontalgia, ulceribus impuris, vulneribus venenatis etc. et alia denique in sterilitate muliebri, fluore albo, aliisque uteri adfectibus pituitosis ac frigidis, cum fructu in usum vocantur. Quando aceto infunduntur, virtus antiputredinosa et alexipharmaca, praesertim sub usu interno, valde intenditur; hinc pestis quoque tempore acetum eiusmodi inter optima prophylactica militat, immo, sub ipsa morbi

morbi invasione plus, quam multae tincturae, aliaque pharmaca concentrata, praestat.

§. IV.

Salviae vulgari hortensi SALVIA PRATENSIS LINN. sive *Horminum pratense foliis serratis* C. B. nec minus illa salviae sativae species, quae BAVHINO HORMINVM SATIVVM audit, hoc loco subiungi quidem merentur; longe rudioribus tamen principiis gaudent, ac tuto igitur, propter ingentem fragrantiam et impetuosam prorsus operationem suam, interne adhiberi nequeunt, immo amplius nullum ferme locum inter medicamenta tueri possent, nisi, speciebus pro balneis et infessibus uterinis addita, in sterilitate, fluore albo, aliisque morbis muliebribus, validas et sat eximias vires monstrarent. Folia principio pingui camphorato valde turgida sunt: Sicco enim ac calido aestatis tempore hinc inde in superficie tenerrima, sicca, albida, splendentia, corpuscula, quae foliola, vel potius tenues moleculas camphoratas referunt, persaepe concrescunt, et camphorata quoque haec substantia destillationis humidae beneficio interdum ita separari potest, ut sub camphorae verae, quamquam tenerrimae, forma ac consistentia quodammodo in conspectum veniat (e).

CAP. XV.

De Maiorana.

§. I.

MAIORANA VULGARIS C. B. planta notissima est, et in hortis plerisque seritur. Folia, quae medicis usibus praecipue destinata sunt, sapore

(e) Conf. NEVMANNI *Lect. de Camphora.*

sapore acri, amaricante, aromatico, odore fragrante gratissimo pollent, et egregiis omnino *principiis volatilibus oleoso-spirituoso-camphoratis, fixisque resinoso-gummeis*, donata inveniuntur. Oleum aethereum, destillatione humida separabile, in una foliorum libra circiter drachmas duas pondere aequat, et plerumque subflavi coloris est. Quando in vitro probe obturato diu adservatur, flores albicantes in eo nascuntur, immo color et consistentia ita quandoque mutantur, ut in corpus salinum concretum videatur; quemadmodum hoc posterius DANIEL CRVEGERVS aliquando observavit: Reperiit videlicet in pharmacopolio quodam vitrum, angustissimi orificii, cera atque vesica probe munitum, et sex unciiis olei maioranae stillatitii repletum, quod per annos viginti septem in cella reconditum fuerat, ac totum ferme in salem albicantem transmutatum adparebat. Misit illud Norinbergam, ut SCHROECKIUS pariter magma hoc intueretur, et naturam eius ulterius exploraret. Concretum hoc, uti examina monstrabant, eodem, quo oleum maioranae recens, odore et sapore pollebat. Cum ferro calefacto pauxillum imponeretur, ad pristinam olei fluiditatem ac formam redibat, ab igne autem denuo remotum ac refrigeratum, formae ac consistentiae salinae iterum compos fiebat; rursus tamen, igni in ferro memorato admotum, diffuebat, tandemque penitus, relicta saltem exigua olei crassioris, vel potius massae resinosae portiuncula, evolabat in auras, et sub discessu suo conclave olei maioranae vetustioris ac rancidi odore replebat. Portio alia, in rectificatum vini spiritum iniecta, prompte solvebatur, et solutio, aqua frigida admixta, nonnihil statim lactescebat.

Cum

Cum spiritus in arenae balneo abstraheretur remanentia clara reddebatur, et ulteriori evaporatione partibus aqueis liberata, in massam albicantem, floresque, argenteo quasi nitore splendidos, et sapore nonnihil nauseoso praeditos, concrefcebat. Flores hi, iterum iterumque aqua soluti, neque infuso oleo tartari p. d. neque instillato oleo vitrioli quicquam ad fundum deiciebant; ferro calefacto autem impositi, rursus oleosam fluiditatem recuperabant, ac, debilem maioranae odorem spirantes, paullatim in aërem, exigua saltem pulvisculi albicantis parte relicta, migrabant (f).

§. II.

Principia fixa, quae aequae, ac in plantis huius census reliquis, ad *gummea*, ut dictum, et *resinosa* redeunt, sat magna pariter copia adsunt. Gummea enim substantia, quae parum tamen activa, in uncia foliorum una circiter drachmam unam et scrupulum dimidium pondere explet. Infusum aquosum primum colore fusco est, et, praeter debilem ac parum gratum saporem amaricantem, specificum herbae odorem possidet. Inspissata massa fusco-nigricans nullum amplius odorem singularem diffundit, et amaricante atque subadstringente sapore gaudet. Tinctura spirituosissima prima coloris viridiusculo-nigricantis est, odore magis spiritum vini, quam herbam, prodit, et acri aromatico sapore praedita reperitur. Post evaporationem extractum relinquit nigricans, sapore amaro, subacri et subadstringente donatum.

§. III.

(f) Vide *Miscell. A. N. C. G. Dec. II. Ann. 5. Observat. 38.*

§. III.

Nervos haec folia, membranas ceterasque partes solidas roborant, calorem sanguinis augment, humores viscidos blande commovendo attenuant, putredinem avertunt, flatus discutunt, et excellentissima proinde virtute cephalica, pectorali, cardiaca, stomachali, carminativa et uterina pollent. Specificè laudantur in debilitate memoriae, vertigine idiopathica, adfectibus soporosis, epilepticis, melancholicis, apoplexia pituitosa, amavrosi, incipiente cataracta, susurro aurium, lipothymia, palpitatione cordis, prava digestionē, cardialgia et colica flatulenta, tympanitide, asthma seroso-mucido et cachectico, nephritide sabuloso-pituitosa, et plerisque adfectibus uteri frigidis. Praescribuntur in infuso vinoso, rarius aquoso, ad pugillos aliquot, et frequentissime etiam esculentis, condimenti loco, adduntur. Externe cucuphas, pulveres cephalicos, errhinos, ptarmicos, facculos nervinos, clysteres carminativos et antihystericos, balnea antiparalytica et uterina, decocta vulneraria, gargarismata, immo unguenta, emplastra etc. ingrediuntur.

CAP. XVI.

De Thymo, Serpillo et Origano.

§. I.

THYMVS VVLGARIS tam TENVIOR, quam LATIORE FOLIO, C. B. alias etiam *Serpillum hortense*, *Serpillum Italicum* etc. nuncupatus, in locis quibusdam Galliae Narbonensis, Hispaniae et Italiae sponte crescit, apud nos autem solum-

solummodo in hortis colitur. Folia et flores satis gratum odorem aromaticum spirant, et acri atque amaricante sapore gaudent. Folia floribus potentiora ac praestantiora censentur, et frequentius ea propter in usum medicum trahuntur.

§. II.

Quoad principia activa, tam fixa, quam volatilia, cum maiorana convenit, largius tamen *principium camphoratum* et *oleum aethereum* longe acrius continet. Hoc aureo colore gaudet, si igne blando elicitur; sin violentior vero ignis gradus adhibitus fuerit, saturata rubedine tinctum cernitur. Acrimonia eius tanta est, ut parti cutis teneriori illitum, fortem ardoris et rossonis sensum excitet, et, recens admotum, halitu suo vividam in naribus titillationem, cui per saepe sternutatio supervenit, efficiat. Ponderus eius in una herbae libra circiter ad drachmam unam et semissem adscendit. Substantia tenerrima camphorata sub destillatione humida cum aqua et oleo essentiali expellitur, et ita nonnunquam in posteriori concrevit, ut quodammodo sub forma ac consistentia camphorae vulgaris in conspectum veniat; uti hoc ex subiuncta NEVMANNI observatione, quam *Miscellaneis Societatis regiae Berolinensis* inseruit, uberius patet (g). Tinctura spirituosissima prima, ex

H 2

folis

(g) „Destillaveram, scribit *Cont. II. pag. 72. ann.*
 „1719. ex dicta herba olei copiam bene multam,
 „institutaque huius ab aqua separatione cum gossy-
 „pio, cernebam tam ad orificium vitri, quam
 „in gossypio oleo imbuto, parvos figuratos cry-
 „stallulos haerentes, qui ipsam destillationem,
 „alias

foliis foliis ficcatis parata, colorem ex viridi nigricantem, odorem debilem balsamicum, et saporem acrem atque subamaricantem obtinet.

Evapo-

„alias satis celere, magis magisque remoraban-
„tur, adeo, ut necessarium esset, gossypium con-
„tra morem aliquoties renovare. Mirabar, quid
„rei novae et extraordinariae contingerit, varias-
„que cogitationes agitabam, parum tamen vel
„nihil certi ea de re, unde venerit, et quid esset,
„poteram colligere; lagenam igitur oleo plenam
„bene munitam reponebam. Interim semel ex-
„citatae et conceptae de rei novitate cogitationes
„inquietum me tenebant; quare sciendi cupiditate
„ductus, post paucos dies resumam lagenam olei,
„visurus, an denuo Crystallulorum quid ad orifi-
„cium vitri haereat, et quantulumque demum id
„fuerit, per experimenta tamen parvula probatu-
„rus, cuius indolis illud sit; sed circa orificium
„nihil eiusmodi reperiēbam, circa fundum vitri
„vero, quod me tanto magis attentum, ne dicam
„attonitum, habuit, confedissee vidi Crystallulos in
„sic satis magna quantitate diversae magnitudinis,
„partim avellanas exaequant, plerasque cubifor-
„mes, saccharo cando similes. Nondum suspica-
„bar Camphoram, sed potius sal volatile, quod
„prae copia herbae successive simul transcenderit,
„et in parte aquosa solutum, postquam haec fun-
„dum petiisset, purumque oleum supernataret,
„tandem ita coaluerit. Effundo igitur oleum,
„ut sal, quod esse putabam, impetrarem, et iu-
„dicii mei certior fierem. Sed denuo in admi-
„rationem rapiebar, quod ne guttulam quidem
„aquae in fundo invenirem, ubi consultius nihil
„erat, quam magma salinum a fundo liberare,
„et

Evaporata massam, alibi flavam, alibi viridiusculo - nigricantem, suppeditat, quae thymum paullulum adhuc redolet, et sapore valde acri, pungente ac simul camphorato pollet. Huic itaque principio, post spirituoso-oleosum, quod potentissimum est, primus, intuitu virium, locus assignandus erit. Infusum aquosum, cuius color flavo - subfuscus est, ipsius herbae gratum atque specificum odorem eructat quidem, debili

H 3

nihil-

„et ab oleo separatum servare. Quo me igitur ex
 „dubio extricarem, vel potius, ut de sale, quod
 „iudicando praesumeram, certior essem, tenta-
 „bam experimentum, quo cuncta salia, cuiuscun-
 „que indolis et nominis fuerint, probantur; ma-
 „gnam scilicet quantitatem aquae destillatae infun-
 „debam super materiam crystallinam, sat diu
 „simul agitabam, huic per aliquot horas quieti
 „dabam, solutionem crystallini per omnes horae
 „quadrantes cupide, sed frustra, exspectans; ne-
 „que enim solutionem, neque ullam mutationem
 „eius animadvertēbam, praeter quod minimae
 „particulae in superficiem elevarentur, maiores ve-
 „ro, quantumvis bene interagitatae, fundum sem-
 „per repeterent, et aqua particulis oleosis, crystal-
 „linae materiae adhaerentibus, sed agitatione libe-
 „ratis, impraegnata esset. Transfundo aquam,
 „et nova adfusa, denuo tentabam Crystallorum
 „pro indole salium solutionem, postquam hi ab
 „adhaerente oleo, quod forsā solutionem eius
 „in aqua impediret, liberati essent, sed pertina-
 „citer solutioni renitebantur, quam neque adhuc
 „dum, saepius licet tentatam, admiserunt. De-
 „hinc praecoccupatione de salino concremento pla-
 „ne abiecta, coniecturare cepi, quod plane quid
 „aliud,

nihilominus sapore amaricante praeditum, ac satis ideo iners deprehenditur. Extractum rubro - et flavo - fuscum pristino odore maximam partem spoliatum reperitur, fortiori tamen, quam infusum, sapore amaricante, subsalfo et austeriusculo gaudet. Vncia herbae una mihi drachmas duas et grana sedecim extracti aquosi primi, et drachmam unam ac binos scrupulos extracti spirituosi primi praebuit.

§. III.

Ob virium analogiam maioranae commode, tam interne, quam externe, substitui potest, potentiori tamen virtute stimulante, attenuante et abstergente pollet, et plus ideo ad sanguinem congrumatum et coagulatum dissolvendum, lotionum-

„aliud, scilicet mixtum oleosum, vel quasi resin-
 „osum volatile ex oleo condensatum, esse debeat:
 „hoc mecum perpendens sub examen revoco varia
 „alia existantia mihi nota subiecta, si quod
 „eorum cum novo hoc comparari queat, et mox
 „ob similitudinem cogitabam Camphoram; sine
 „mora igitur nova quaedam, per quae me magis
 „certum de re fore sperabam, adornavi, et ecce!
 „rei certus eram, siquidem omnia, quae modo
 „feci, experimenta non alia, quam quae communis
 „camphora suppeditat, phaenomena exhibuerunt,
 „unde tandem, utpote veritatis convictum,
 „nullo plane dubio relicto, concludere me oportuit,
 „corpus hoc crystalliforme aliud nihil, quam
 „veram esse Camphoram, quae ab orientali non
 „nisi in eo differat quod haec Thymum, illa vero
 „aliud vegetabile redoleat, quod, quia camphoram
 „copiosam suppeditat, huc usque nullo alio,
 „quam Arboris camphoriferae nomine indigitatum fuit etc.”

tiumque retentum ac calculum, nec minus sanguinem menstruum, secundinas et foetum mortuum pellenda et expellenda valet. Eminentiorem quoque effectum in morbis seroso-pituitosis catarrhalibus capitis, partiumque reliquarum edit. Datur in infuso vinoso ad pugillos aliquot, et subinde pariter speciebus pro decocto et infuso theiformi miscetur. Externe eadem quoque praestat, quae maiorana, et frequentius, quam illa, inter sacculos, balnea et infusus uterinos recipitur.

§. IV.

SERPILLUM, *Serpyllum*, *Thymus sylvestris*, *Quendel*, *wilder Poley*, *wilder Thymian*, nec minus ORIGANUM sive *Maiorana sylvestris*, *Wohlgemuth*, *braune Dosten*, sponte in locis sylvestribus crescunt, et adeo cum thymo hortensi, quoad naturam, principia ac vires, conveniunt, ut eidem, praesertim serpillum, interne substitui queant: Raro nihilominus interne praescribuntur, sed unice propemodum speciebus pro facculis discutientibus atque nervinis, nec minus infessibus uterinis et balneis miscentur.

CAP. XVII.

De Hyssopo et Mentha.

§. I.

HYSSOPUS OFFICINARUM CAERULEA sive SPICATA C. B. *Ysop*, ubique in hortis feritur, et planta proinde notissima est. Folia, quae floribus praestantiora censentur, odorem balsamico-camphoratum spirant, et acri amari-

cante sapore donata inveniuntur. Cum hac specie, intuitu naturae ac virium, etiam species reliquae, nimirum *Hyssopus flore albo* et *purpureo*, conveniunt, et altera igitur in alterius locum commode surrogari potest.

§. II.

Aktivitatem huic plantae partim *volatilia principia oleoso-spirituoso-camphorata*, partim *fixa gummeo-resinosa* foenerantur. Oleum essentialle, quod principiorum reliquorum praecipuum est, mediocri quantitate inhaeret, et, humida destillatione ex integra foliorum libra separatum, plerumque drachmam unam et semissem, vel drachmas duas pendet. Non adeo magna quoque copia principium resinosum mixtionem ingreditur, et uncia foliorum una nondum integram drachmam extracti spirituosi primi mihi suppeditavit. Substantia gummosa, cuius vires tamen valde debiles sunt, post recrementa inertia maximam ponderis partem constituit, et ultra drachmas tres adscendit. Infusum aquosum primum flavo-subfuscum est, debilemque herbae odorem et ingratum saporem camphorato-amaricantem possidet. Evaporatione in extractum mutatum, coloris flavo-fusci est, saporis subamaricantis, subsalsi et austeriusculi, odoris debilis, instar prunorum coctorum. Tinctura spirituosissima prima, ex viridi nigricans, sapore acri aromatico gaudet, et odore suo partim spiritum vini, partim ipsam herbam prodit. Massa, inspissando producta, alibi flavum, alibi viridinigricantem colorem obtinet, et odore debili balsamico, sapore amaro, subacri, et camphorato praedita est. Patet abunde ex recensitis examinibus, virtutem hyssopi partim oleo aethereo,

reo, partim substantiae resinosae adscribendam esse, portionem gummeam vero, licet maxima quantitate adsit, parum ad virium augmentum conferre posse.

§. III.

Vires attenuantes, pectorales, diureticae et uterinae in hyssopo maxime a Medicis praedicantur, frequentissimumque ideo usum folia eius in adfectibus pectoris pituitosis, tussi videlicet, asthmate, raucedine etc. nec minus in nephritide sabuloso-pituitosa, calculo, suppressione mensium, partu difficili et secundinis retentis, immo, in obstructione hepatis et lienis, cachexia etc. inveniunt. Dantur plerumque in infuso vinoso, rarius in decocto, a pugillo uno ad tres vel quatuor. Externe folia et flores cum aqua aut vino coquuntur, et partibus, post plagam etc. sanguine suffusis, cum fructu imponuntur, nec raro quoque ingredientia gargarismatum augent, quae contra tumorem glandularum salivalium, laxitatem uvulae, anginam spuriam, odontalgiam, scorbutum oris et paralylin linguae adhibentur.

§. IV.

MENTHA CRISPA OFF. *Krausemünze*, valde fortem, nec diu itaque tolerabilem odorem aromatico-balsamicum emittit, et acri atque amaricante sapore gaudet. Folia eius, quae potissimum in usum medicum trahuntur, copiosa et valde activa *principia oleoso-spirituosa* et *resinoso-gummea* in naturali sua mixtione foveant. Oleum essentiale, quod primaria activitatis causa existit, post destillationem colore flavescente, qui intra breve tamen tempus in rubicundum,

H 5

tandem-

tandemque obscure rubrum mutatur, tinctum cernitur, et valde calida indole, summaque fragrantia pollet. Ex libra una foliorum siccatorum, iusto tamen tempore collectorum, tres circiter drachmae eliciuntur. Portioni spirituosae et oleo aethereo extractum resinofum, intuitu nempe virtutis, succedit; in gummofa vero substantia, essentiali oleo prorsus spoliata, parum activi reperitur. Nam infusum aquosum primum, licet colore quidem flavo-subfusco gaudeat, et sat fortem adhuc herbae odorem specificum eructet, nullo tamen singulari sapore pollet, sed valde iners deprehenditur, et massam fusco-nigricantem post evaporationem relinquit, quae debili duntaxat atque nonnihil ingrato odore melleo, et debili pariter sapore subacri, cui lenissime amaricans et subadstringens mixtus sentitur, donata est. Ex uncia foliorum una ferme drachmas tres obtinui. Tinctura spirituosae prima, cuius color ex viridi nigricans est, odor debilis balsamicus, sapor aromaticus, peracta inspissatione extractum nigricans, priori longe praestantius, largitur. Mentham enim odore adhuc prodit, et satis fortem saporem acrem, amaricante et subadstringente mixtum, possidet. Vncia foliorum una mihi saltem grana quinquaginta suppeditavit.

§. V.

Vires huius herbae stomachales, carminativae et uterinae praestantissimae sunt, ita, ut non facile medicamentum simplex inveniat, huic in adfectibus frigidis flatulentis et hystericeis, chlorosi, fluore albo, suppressione fluxus menstrui etc. intuitu activitatis praefendum. Multum etiam valet ad ventriculum roborandum, pro-

profluvia alvina cohibenda, et vermes expellendos, immo, in variis capitis ac pectoris morbis, ex uteri aut primae culinae vitio nascentibus, utilitate non destituitur. Praescribitur interne in decocto et infuso, praesertim vinoso, ad pugillum unum alterumve. Externe sub forma sacculi abdomini, praesente ventriculi imbecillitate, vomitu, colica, cardialgia, diarrhoea, itemque mammis muliebribus, ad tumores du-
ros discutiendos et ipsum lac minuendum ac dissolvendum, imponitur. Frequentissime praeterea sacculos discutientes ac roborantes, in paraly-
si, oedemate membrorum etc. proficuos, nec minus balnea uterina ingreditur.

CAP. XVIII.

De Abrotano et Matricaria.

§. I.

ABROTANVM MAS ANGVSTIFOLIVM MA-
IVS C. B. *Stabwurz, Ebereiss*, apud nos in
hortis colitur, et folia eius, quae sapore amaro,
ac grato odore citrino gaudent, usui medico po-
tissimum inserviunt. Vires magis in principio
resinoso-oleoso, quam *gummoso*, latent, licet *ole-
um essentiale aethereum*, et substantia fixa resinosa,
longe minori quantitate, quam fixa pars gum-
mea, mixtionem naturalem ingrediantur. Ex
uncia enim foliorum una drachmas duas ac toti-
dem ferme scrupulos extracti aquosi primi, et
drachmam duntaxat unam cum semisse extracti
spirituosi primi obtinui. Infusum aquosum, fla-
vo-rubente colore tinctum, plantam odore sa-
tis prodit, inertem nihilominus saporem ama-
rum

rum possidet, et post evaporationem massam obscure fuscam, grato ac quasi melleo odore, atque subacri, nonnihil falso et amaro sapore donatam, relinquit. Tinctura spirituosa viridinigricans non adeo singularem quidem odorem emittit, vivido nihilominus sapore aromatico atque amaricante pollet, et evaporata extractum valde activum, acre, amarum et aromaticum, alibi aurei, alibi nigricantis coloris, suppeditat.

§. II.

Abstergendo, discutiendo ac roborando in corpore operatur, et egregie imprimis virtute carminativa, anthelmintica, uterina, immo cardiaca, pectorali, diuretica et alexipharmaca sese commendat. Melius in decocto et infuso vinoso, quam aquoso, ad unum alterumve pugillum, praescribitur, praesertim si in refractariis morbis pituitosis, v. g. asthma-
te, fluore albo, passione hysterica, suppressione mensium, obstructione hepatis, lienis etc. usus eiusdem necessarius est. Externe speciebus pro balneis uterinis, et decoctis anthelminticis ac vulnerariis saepissime miscetur, immo facculis siccis discutientibus atque nervinis, nec minus clysteribus carminativis et anthystericis haud raro additur.

§. III.

HERBA et FLORES MATRICARIAE VULGARIS sive SATIVAE C. B. *Mutter-Kraut*, eiusdem plane indolis atque virtutis sunt, et plerumque igitur coniunctim adhibentur. Odorem valde fortem balsamicum, eumque paullo ingratum, spirant, et acriusculo-amarum saporem linguae imprimunt. Praeter principium oleoso-spirituosum,

sum, copiosa principia fixa resinoso-gummea in foliis non minus, quam floribus adsunt. Vnica enim uncia florum, quibus aliqua tamen foliorum portio mixta erat, mihi drachmas tres et scrupulum unum extracti primi aquosi, maximam partem gummosi, et scrupulos quatuor extracti spirituosi primi praebuit. Infusum aquosum ipsam plantam redolet, et satis amaro sapore, atque subfusco colore est. Inspissatum massam sistit, falso quidem ac satis amaro sapore, ast debili saltem odore, qui plantam non adeo amplius prodit, donatam. Tinctura spirituosa colore flavo-subviridi, odore debili balsamico, sapore acri, aromatico atque amaricante pollet, et evaporata extractum relinquit, quod colore ex flavo-fusco, ad nigrum nonnihil vergente, odore balsamico specifico, ac satis grato, sapore subacri, aromatico et valde amaro praeditum est. Longe hoc posterius activitate superat extractum aquosum, et inde igitur colligere licet, virtutes huius plantae magis a partibus oleoso-spirituosis et fixis resinosis, quam gummeis dependere. Oleum aethereum substantiale non adeo copiose quidem innatum reperitur, eiusdem tamen penuriam relativam spirituosa portio insigni copia sua, quam odor fragrantissimus demonstrat, abunde compensat.

§. IV.

Operationem suam haec planta partim discutiendo et abstergendo, partim roborando absolvit, et inde quoque notissimae ac satis eximiae virtutes uterinae, diureticae et carminativae, quibus instructa deprehenditur, derivandae erunt. Sterilitati nempe, suppressioni fluxus menstrui et lochialis, passioni hystericae, fluor albo

albo, ceterisque uteri morbis, quoties scilicet ex atonia partium solidarum, et humorum crassitie atque muciditate nascuntur, specificè ac valide medetur, et multum quoque ad vermes necandos, materiam sabulosam et urinam pellen-
dam, flatus discutiendos, foetum mortuum excludendum, et sanguinem congruatum resolvendum valet. Interne in decocto et infuso, tam aquoso, quam vinoso, ad unum alterumve pugillum, praescribitur; externe autem inter infessus et balnea uterina, nec minus inter epithemata humida et sicca, contra inflammationes partium, tumorem atque duritiem mammarum, dolores colicos etc. adplicanda, frequentissime recipitur.

CAP. XIX.

De Satureia.

§. I.

SATVREIA SATIVA HORTENSIS C. B. *Saturey, Pfeffer-Kraut*, propter multiplicem atque frequentem usum oeconomicum in hortis plerisque feritur, adeoque planta notissima est. Folia, quae caeteris partibus praestantiora sunt, odore gaudent aromatico, et leviter saltem manducata valde acrem, pungentem, et, piperis ferme instar, urentem saporem gustus organo imprimunt, immo, si adhuc recentia paululum teruntur, naribusque admoventur, vividam in iis titillationem ac sternutationem halitu suo excitant.

§. II.

Efficacissimis *principiis oleoso-resinoso-gummeis* instructa sunt. Oleum substantiale aethe-

thereum, humida destillatione separatum, magna acredine pollet, et spirituosus particulis adeo refertum est, ut recens vulgaria vitri obturamenta penetret, et in naribus pruritum producat. Substantia gummea satis larga quantitate adest, activitate nihilominus parciore principio oleoso-resinoso longe cedit. Nam rubro-fuscum infusum aquosum, licet odorem balsamicum emittat, admodum iners et acredine prorsus destitutum sentitur. Inspissata massa nigricans non multo praestantior est, et debili duntaxat odore balsamico, eoque nonnihil ingrato, debilique sapore amaricante, subacri ac paullulum adstringente praedita reperitur. Vncia una mihi drachmas duas cum semisse suppeditavit. Tinctura spirituosa prima colore saturate viridi, ad nigricantem paulisper vergente, gaudet, odorem herbae specificum ac longe gratiorem, quam infusum aquosum, diffundit, et saporem acrem, modice urentem ac pungentem, possidet. Similes proprietates in extracto spissato inveniuntur, praeterquam, quod odor, qui volatilibus particulis spirituosus-oleosis unice in acceptis ferendus est, paullo debilior, sapor ex adverso acrior et magis aromaticus existat.

§. III.

Partibus solidis vividos haec planta stimulos imprimit, et humores viscidos quoque, incidendo ac commovendo, resolvit, attenuat et abstergit, adeoque modo utroque motus in toto corpore intendit, et se-et excretiones quascunque egregie auget ac promovet. Non infimum igitur locum inter antiscorbutica, diuretica, lithontriptica, carminativa, stomachalia, pectoralia, uterina et aphrodisiaca occupat, et magno-

gnopere in variis morbis chronicis, a motuum languore et humorum spissitudine atque lentore oriundis, maxime autem in sopore praeternaturali, refractariis febribus quartanis, scorbuto frigido, cachexia, oedemate membrorum, tympanitide, asthma pituitoso, calculo, suppressione mensium etc. sese commendat, si interne, sub forma infusi vinosi, a pugillo uno ad duo, exhibetur. Subinde etiam, praesertim in adfectibus scorbuticis, fero lactis infunditur, immo frequentissime cibus flatulentis condimenti loco additur. Externe, cum vino prius cocta, partibus sugillatis, nec minus oculis contra incipientem cataractam, auribusque contra susurrum et cophosin imponitur. Non contemnendam quoque utilitatem in aphonia, intumescencia glandularum salivalium, et uvulae laxitate spondet, quando gargarismatibus modica quantitate additur.

CAP. XX.

De Ruta et Sabina.

§. I.

RUTA HORTENSIS LATIFOLIA C. B. *Garten-Raute*, in Africa, Graecia, Hetruria et Gallia Narbonensi sponte provenit, apud nos autem solummodo in hortis colitur. Folia, quae usui medico potissimum inserviunt, saporem mediocriter amarum obtinent, et odorem nonnihil gravem, adeoque parum gratum, spirant. Praeter principia fixa resinosa ac gummea, oleum quoque aethereum, tam exigua tamen quantitate, mixtionem eorum ingreditur, ut ex libris decem

cem sub destillatione humida vix uncia dimidia prodeat. Infusum aquosum flavo-fuscum sapore quidem amaro gaudet, odorem vero admodum debilem emittit, et post evaporationem extractum coloris fusco-nigricantis, odoris debilis ingratis balsamici, ac saporis acriusculi, subfalsi et austeriusculo-amaricantis relinquit, quod ex uncia foliorum una circiter drachmas duas et semissem pendet. Tinctura spirituosae, viridi colore praedita, linguae saporem balsamico-acrem imprimit, ac solum fere menstruum odore suo prodit. Massa, inde evaporando parata, colorem fusco-nigricantem, odorem debilem, et saporem satis acrem atque amaricantem possidet. Virtute extractum aquosum valde superat, et ex uncia foliorum una ad quatuor circiter scrupulos pondere suo adscendit.

§. II.

Viribus lenioribus carminativis, stomachalibus, anthelminticis, diaphoreticis et alexipharmacis haec folia pollent; hinc interdum contra adfectus catarrhales, flatulentos, vermes, febres intermittentes atque continuas malignas praescribuntur. Exsiccata rarissime adhibentur, sed recentia ut plurimum, eaque teneriora, vino aut aceto infunduntur, vel cum pane, butyro illito, tempore matutino comeduntur.

§. III.

FOLIA SABINAE FRUTICOSAE et ARBOREAE, *Sadebaum - Blätter*, satis fortem, praefertim contrita, odorem balsamicum spirant, et amari, acris atque aromatici saporis sensum in lingua excitant. Folia fruticis seu *Sabinae folio tamarisci*, propter saporem acriorem, potentiora,

tiora, quam folia arboris, seu *Sabinae folio cupressi* C. B. censentur, et a quibusdam proinde frequentius in usum medicum trahuntur. In nostris regionibus binae hae *Sabinae* species in hortis coluntur; in Graecia autem, Italia, Lusitania, Sibiria etc. passim quoque in locis montanis et sylvestribus sponte crescunt.

§. IV.

Continent *partes activas resinosas, gummeas et oleoso-spirituosas*. Oleum aethereum, quod aquae innatat, colore subflavo, sapore acri atque amaro, et odore ipsorum foliorum specifico gaudet. FRIDERICVS HOFFMANNVS, libram foliorum unam fere uncias tres huius olei reddere affirmat (h); at, veritati hoc adsertum consentaneum esse, vix amplius credere possum. Nam ipse distillationem humidam bis suscepi, et ex dicta foliorum quantitate, etiamsi quaevis observanda debite observaverim, quatuor duntaxat scrupulos et aliquot grana olei impetravi. Principia fixa maiori copia adsunt, et uncia foliorum una mihi drachmas duas et grana aliquot extracti aquosi primi, et drachmam unam cum semisse extracti spirituosii primi dedit. Virtus praecipua in oleo et substantia resinosa later, pars gummea autem parum activa reperitur. Infusum aquosum primum colore subfusco est, ad flavum inclinante, odore foliorum specifico, et sapore amaricante. Evaporando inspissatum satis tenax atque mucosum extractum foeneratur, odoris quidem debilis balsamici, non amplius tamen specifici, saporis subacris, subadstringentis ac paullulum aromatici. Tinctura spiritiuosa prima colorem obscure viridem, odo-

(h) In *Observat. physico chemicis*, pag. 7.

odorem plantae specificum, et saporem acriusculo - aromaticum atque amaricantem possidet. Massa spissata plane singularis est, et ex duplici materia, altera nimirum flava, altera nigricante, constat. Portio flava, quae oleosa et non nihil fluida adparet, sapore acri, amaricante atque aromatico praedita est, et specificum foliorum odorem sensibilius diffundit; nigricans vero sicciior atque compactior reperitur, et, praeter acrem et amaricantem saporem, simul debilem adstringentem obtinet. Probabile itaque est, aliquam crassioris olei essentialis partem post evaporationem remanere, et, cum teneioribus moleculis resinosis mixtam, priorem massam, spissiusculam saltem magisque pinguem, formare.

§. V.

Virtutem haec folia anthelminticam, emmenagogam et diureticam possident, et contra sterilitatem ideo et fluorem album, nec minus ad calculum, urinam, fluxum menstruum ac foetum mortuum pellendum, vermesque necandos subinde adhibentur. Non promiscue tamen, sed valde circumspecte in memoratis et similibus morbis in usum vocanda sunt, ne operatione iusto vehementiori noxam corpori inferant. Praescribuntur in infuso vinoso et decocto aquoso ad unum alterumve pugillum. Externe suffimigiis, decoctis, clysteribus ac balneis, discutientis, anthelminticae, travmaticae et uterinae virtutis adduntur, immo pulvis purificandis et consolidandis ulceribus malignis inspergitur, et inter leniora etiam cathaeretica militat.

CAP. XXI.

De Botry ambrosioides.

§. I.

Duplex BOTRYS AMBROSIOIDES, MEXICANA nimirum et VULGARIS C. B. locum inter medicamenta simplicia obtinuit. Prior in regno Mexicano et Lusitania habitat, ac rarius adhibetur; posterior, TOVRNEFORTIO *Chenopodium ambrosioides vulgare folio sinuato*, et LINNAEO *Chenopodium foliis oblongis sinuatis, racemis nudis multifidis* dicta, passim in locis Europae australis, praesertim Galliae, arenosis sponte nascitur ac saepe pariter in hortis nostris feritur; unde paullo quoque frequentius in usum medicum vocatur. Folia eius, quae nunc sola, nunc simul cum exiguis atque luteolis flosculis usurpantur, contactu valde unguinosa ac pingua sunt, et linguae debilem saporem balsamico-amari-cantem, naribus autem fortem ac gravem odorem camphorato-balsamicum, imprimunt. Botrys Mexicana intuitu odoris a vulgari parum discrepat, sapor vero in foliis et floribus magis aromaticus est, et nonnihil ad cumini saporem accedit.

§. II.

Botrys ambrosioides vulgaris, quam exactiori examini chemico subiecti, copioso principio spirituosso aromatico-camphorato, paucio oleo, tam subtiliori aethereo, quam crassiori nonnihil unguinoso, nec non sale quodam salso et fixa substantia resinoso-gummea donata est; quemadmodum haec ex subiunctis experimentis clarius patent:

I. Aqua

I. Aqua destillata in principio dilutum colorem albicantem, qui satis diu perdurat, et post plurium demum hebdomadam decursum perfecte evanescit, possidet, ac sapore aromatico - amaricante, odore balsamico-camphorato, ad galangae et zingiberis odorem nonnihil accedente, gaudet. Oleum aethereum, cuius vix grana viginti quatuor ex una plantae siccatae libra civili seorsim impetravi, flavescentis est, et sapore aromatico - amaro, mediocriter acri, odore ipsius plantae recentis specifico pollet. Miculae oleosae, quod notatu utique dignum est, peracta consueta olei separatione, in aquae superficie remanentes, superveniente frigore hiberno, coagulum subeunt, et sevi albissimi, seu potius cerae albae colorem ac consistentiam consequuntur. Separavi condensatas hasce moleculas, posteaque, cum seiunctas ac parvo vitro inditas ulteriori examini submitterem, observavi, coagulas hasce massulas, cum vitro carbonum igni admotas, paullatim quidem, quamquam difficiliter aliquantulum ac tardius, in oleum crassum diffluere, ac protinus iterum, post aliquam vitri refrigerationem, pristinam consistentiam solidam et albedinem recuperare (i), deinde tamen, et quidem satis

I 3

cito,

(i) Simile prorsus oleum coagulabile aethereum hactenus ex alia dudum planta aut plantarum parte eductum esse, non recordor. Me quidem non latet, et alibi etiam retuli, oleum rosarum, feminis anisi, et alia nonnulla in loco frigidiusculo coagulari, et butyri aut sevi colorem ac consistentiam adipisci:

cito, in frigido etiam spiritu vini solvi, eumque colore subflavo, odore debili aromatico-balsamico haud ingrato, et sapore acri, modice simul amaro ac camphorato, imbuere. An oleum caeteroquin, ab aqua, destillatione peracta, confestim separatum, idem coagulum refractarium in frigore subeat, et eadem quoque phaenomena postmodum exhibeat, certius referre nequeo, quoniam futurae mutationis antea plane ignarus, parvam illam quantitatem, quam tempore calido aestivo separatim obtinui, paullo post destillationem usu vario consumsi.

II. Infusum aquosum, blandae digestionis beneficio paratum, colore fusco, odore ipsius herbae, quamquam debiliori ac paululum nauseoso, et sapore amaro gaudet. Suscepta iusta eius evaporatione, massa fusci pariter coloris relinquitur, quae sapore falso-amaro pollet, et odore suo rob sambuci valde aemulatur. Superficie huius extracti hinc inde etiam corpuscula quaedam splendida salina insident, nec ullum ideo

ci: at scio quoque, haec olea, si vitrum aliquamdiu in manu calida detineatur, aut igni carbonum per pauca horae minuta admoveatur, cito ad perfectam fluiditatem pristinumque colorem reverti; quae de oleo botryos dici nequeunt, quippe quod in manu calida fluere plane renuit, et diutius quoque igni carbonum admoveri debet, antequam, cum notabili lentore, lique scat: Vt nihil rursus de nova coagulatione afferam, quae subito et post modicam duntaxat vitri refrigerationem denuo supervenit.

ideo dubium superest, quin plura per totam massae molem dispersa sint. Ex una herbae siccatae uncia drachmas duas et aliquot grana huius extracti impetravi.

III. Tinctura spirituosa ante digestionem calidam sese colore viridi amoenissimo commendat, post digestionem vero color viridis, dilutior primo, in obscure viridem, tandemque viridiusculo-nigricantem mutatur. Odor ab odore spiritus vini vix discerni potest, et suum itaque simplex saltem obscure prodit, sapor vero satis acris et amaricans est. Extractum, inde post evaporationem nascens, ex duplici substantia, altera nimirum densa, nigricante, altera semifluida, fusco-subflava, oleosa, constat. Vtraque debiliorem quidem odorem balsamicum et saporem amarum, acri mixtum, possidet, amarities tamen atque acredo paullo fortiores in portione densa, quam semiliquida oleosa, reperiuntur. Non reticendum quoque est, amaritiem sub prima statim degustatione percipi, acredinem ex adverso post aliquod demum, quamquam brevissimum, temporis intervallum sese magis manifestare. Vncia plantae una huius extracti, quod praecedens aquosum amaritiae non minus, quam acredine superat, mihi drachmam unam et grana viginti praebuit.

§. III.

Militat botrys inter medicamenta satis efficacia, carminativa, anthelmintica, uterina, pectoralia et anticachectica; unde interdum cum fructu in cardialgia ac colica vere flatulenta,

tympanite intestinali, obstructione fluxus menstrui, fluore albo, sterilitate, asthmate pituitoso et oedematoso, tussi mucida, cachexia, morbisque similibus interne adhiberi potest. Infunditur ordinario, pro usu interno, aqua fervida, aut vino, aut hydromelite, et subinde etiam folia pulverisata, ut et semina in electuaria, praesertim anthelmintica, recipiuntur, aut pultibus quoque apud infantes adduntur. Dosis pro scopi et aegritudinum diversitate variat, ac generatim in electuario a scrupulo uno ad drachmam integram, in infusis autem a drachmis duabus ad unciam semissem adscendit. Externe folia recentiora, in torminibus ventris et doloribus post partum, speciebus pro discutientibus sacculis balsamicis miscentur, vel sola, vino calido prius irrorata, cum linteo duplicato, aut sacculo etiam inclusa, abdomini adplicantur, immo pulvis grossior foliorum condiendis defunctorum corporibus inservit.

§. IV.

Cum Bötroy ambrosioide vulgari *Botrys ambrosioides Mexicana* quoad naturam ac vires convenit, et in iisdem ideo morbis, in quibus vulgaris proficua reperitur, et eodem pariter modo, in usum vocari potest; ob gratiorem tamen saporem frequentius, quam prior, aqua fervida infunditur, et infusum hoc theeforme multum imprimis ad temperandam acrimoniam humorum scorbuticam valere creditur.

CAP. XXII.

De Tanaceto et Agerato.

§. I.

TANACETVM LVTEVM VVLGARE et TANACETVM FOLIIS CRISPIS G. B. *Rheinfarren*, passim in marginibus pratorum, aggeribus, similibusque locis incultis crescunt, et eiusdem plane odoris, saporis, naturae atque virtutis sunt. Praeter semina, usum quoque folia et flores invenerunt, posteriores tamen prioribus praestantiores iudicantur, et ideo paullo frequentius a Medicis adhibentur. Odor eorum plerisque hominibus displicet, et ingens fragrantia apud multa, praesertim plethorica et chole-rica subiecta, capitis dolorem excitat. Sapor subacris, amarus et aromaticus est.

§. II.

Abundant haec folia et flores *principiis spirituosus balsamico - camphoratis et fixis resinoso-gummeis*, immo, modicam olei aetherei quantitatem naturalem mixtionem ingredi, humida destillatio monstrat. Infusum aquosum primum colore flavo - rubente tinctum cernitur, ipsosque flores ac folia valde redolet, et sapore eminenti balsamico - amaro pollet. Massa inspissata, flavo - et rubro - subfusca, saporem subacrem, amarum, falso nonnihil remixtum, et debilem odorem balsamicum, non amplius tamen perfecte specificum, obtinet. Tinctura spirituosa prima infuso aquoso longe excellentior est, et, praeter colorem dilute aureum et moderatum odorem balsamicum, satis fortem saporem aromaticum et amarum, quo flores perfecte prodit,

det. Ex una florum uncia drachmas duas et aliquot grana extracti primi aquosi, et drachmam unam ac grana sedecim extracti spirituosii primi impetravi.

§. III.

Potiores huius plantae, praesertim florum, virtutes carminativae, anthelminticae et uterinae sunt; hinc in singulis quoque morbis, in quibus matricaria commendata fuit, maxime autem in adfectibus flatulentis et verminosis, opem egregiam praestat. Datur optime in infuso vinoso ad unum alterumve pugillum, et ex floribus efficacissima etiam tinctura parari potest. Externe balnea uterina et antiparalytica, nec non decocta traumatica et anthelmintica ingreditur.

§. IV.

Tanaceto AGERATVM FOLIIS SERRATIS c. B. seu vulgo ita dictum *Eupatorium Mesuae* valde quoad indolem atque virtutem analogum reperitur. In Liburnia, Hetruria et circa Montspelium spontanei proventus est, apud nos autem in hortis feritur. Flores et folia in usum medicum veniunt, posteriores tamen usitatiores prioribus ac potentiores existunt. Saporem aromatico-amarum obtinent, et fortem gravemque odorem camphorato-balsamicum spirant, qui in exsiccatis quoque diutissime perdurat.

§. V.

Adsunt principia activa, tam *volatilia oleosa* et *camphorato-spirituosa*, quam *fixa resinoso-gummea*. Oleum aethereum, humida destillatione prolectum, sapore aromatico-amaro, fragrantissimoque odore gaudet, et praecipuam virium ratio-

rationem in se continet. Inter principia fixa gummeum quantitate, resinofum virtute praepollet. Infusum aquosum primum, aureo colore tinctum, fortem gravemque odorem camphorato - balsamicum emittit, et linguae saporem mediocriter amarum imprimit. Post evaporationem extractum coloris fusci, ad rubellum nonnihil inclinantis, odoris ingrate balsamici, saporis amari, remanet. Infusum spirituosum primum colore flavescente et sapore subacri, balsamico atque amaricante gaudet, odore autem magis spiritum vini, quam plantam, prodit, Massa flavo-subfusca, inde post inspissationem relicta, debilem odorem balsamicum, ipsius plantae odori adhuc nonnihil analogum, et fortem saporem aromatico - amarum possidet.

§. VI.

Viribus satis potentibus carminativis, anthelminticis et uterinis haec planta donata est, et contra adfectus ideo flatulentos, vermes, suppressionem fluxus menstrui, fluorem album, sterilitatem etc. quamquam nostro aevo paullo rarius, in usum trahitur. Scriptores nonnulli illam remediis quoque aperitivis accensent, et in obstructionibus hepatis atque lienis energiam eius depraedicant. Interne plerumque in infuso vinoso, rarius in aquoso aut decocto exhibetur; pro usu externo autem epithemata, fofus, infessus et balnea uteri vaporosa ingreditur, quae ad praedictos adfectus uteri tollendos ac splenis hepatisque duritiem emolliendam usurpantur. Recipi etiam potest inter decocta et unguenta vulneraria, immo in lotionibus anthelminticis reliquorum ingredientium virtutem auget.

CAP. XXIII.

De Chamomilla et Millefolio.

§. I.

Duplex in Officinis nostris CHAMOMILLA prostat, altera nimirum VULGARIS, altera ROMANA. Illa, quae C. BAVHINO *Chamaemelum vulgare et Leucanthemum Dioscoridis* audit, hinc inde in vineis, arvis, aliisque locis cultis ac stercoreatis sponte nascitur; haec autem, *Chamomilla nempe Romana, Chamaemelum nobile* sive *Leucanthemum odoratius* C. B. in Italiae quidem ac plurium regionum calidarum locis campestribus absque cultura crescit, apud nos autem solummodo in hortis reperitur. Flores apud speciem utramque palmam foliis praeripiunt, adeoque longe frequentius, quam illa, usibus medicis impenduntur. Odor eorum balsamicus est, paullo debilior tamen, molliusculus et quodammodo nauseosus (k) apud flores
chamo-

- (k) Odor pro foli natalis diversitate admodum variat, et nunc gratior, nunc ingrator existit. Idem IO. HEINR. SCHVLZIVS in *Dissertat. de Chamaemelo* testatur: „Notabile, videtur, pag. 18. „scribit, quod chamaemelum vix unquam alibi „reperiatur, quam in agris cultis: atque hos in „ter non tantopere amet solum nigrum, et natura „pingue, quam aliquanto macrum et arenosum: „inque tali, si probe stercoreatum fuerit, non solum „copiosissime provenit, verum etiam odore „malo cydonio proxime accedens. Vbi vero in „agris, nigriori solo praeditis et compactiore, nuper etiam stercoreatis, crescit, non perinde iucundum odorem spargit, et cotulae foetidae nomen meretur etc.“

chamomillae vulgaris, fragrantior vero atque gratissimus apud chamaemelum Romanum. Similem differentiam circa saporem deprehendimus; quippe qui in floribus chamomillae Romanae magis amarus ac simul aromaticus est, in vulgaris autem chamaemeli floribus remissior et simul mucilagineus.

§. II.

Principiis activis, tam *fixis salso-resinoso-gummeis*, quam *volatilibus spirituosiss* scatent, *substantialis* autem *olei aetherei* non adeo multum sub destillatione humida largiuntur, idemque raro ex libra integra florum chamomillae vulgaris ad scrupulum unum, et ex aequali florum chamomillae Romanae quantitate ad drachmam semifem pondere suo adscendit. Oleum chamaemeli vulgaris post destillationem colore coeruleo tinctum conspicitur; ast ille non constanter remanet, sed, elapsis aliquot septimanis aut mensibus, in fuscum mutatur, praesertim si aëris crebrior in vitrum accessus pateat. „Praeterea, b. FRID. HOFFMANNVS scribit (1), „mentio etiam est facienda oleorum florum „chamomillae vulgaris, et summitatum mille- „folii, quae olea si pura, et quamdiu recentia „sunt, eleganti coeruleo oculis blandiuntur colore, qui vero postea perit, inque brunneum „mutatur. Enim vero, si diutius et ultra annum hic color olei florum chamomillae pulchre coeruleus persistit, certi mangonii sistit indicium: nam oleum terebinthinae, quod a cupro saturate coeruleum fit, immiscere illis oleis solent etc., Oleum chamaemeli Romani saphirino hoc colore destituitur, et saltem fla-

(1) In *Observat. physico-chym.* p. II.

flavescent prodiit, viribus nihilominus praecedenti analogum est, immo paullo adhuc calidius atque potentius deprehenditur, praesertim si planta in Italia, aliisque regionibus calidis adoleverit.

§. III.

Fixa principia resinosa et gummea in utraque chamaemeli specie copiosius adsunt, et vires medicas, oleo memorato praecipue adscribendas, miscela sua nonnihil augent, immo, vulgaris chamomillae floribus emolliendi virtutem conciliant. Vncia florum chamaemeli Romani dimidiam ferme unciam extracti aquosi primi, et drachmas duas, totidemque scrupulos extracti spirituosi primi suppeditat. Infusum aquosum, cuius color saturate aureus est, specificum simplicis odorem eructat, et debilem balsamicum ac modice amarum saporem obtinet. In extracto inspissato color flavus in subfuscum mutatur, odor valde imminuitur, amarities vero increfcit, et sapore austeriusculo paullulum remixta videtur. Tinctura spirituosa aurei coloris est, odore magis spiritum vini, quam flores, prodiit, et satis forti sapore amaro atque balsamico pollet. Massa spissata quoad saporem cum tinctura convenit, odore autem decoctum prunorum aemulatur.

§. IV.

A principiis chamomillae Romanae principia fixa florum chamomillae vulgaris indole ac pondere parum differunt. Nam uncia una florum memoratorum dimidiam unciam extracti aquosi primi, et drachmas duas ac grana quinquaginta extracti spirituosi primi mihi dedit. Tinctura
spiri-

spirituosa colore obscure viridi est, odore debili balsamico, acri, blande balsamico et amaricante. Post evaporationem massa relinquitur, coloris viridi-nigricantis, odoris balsamici, et saporis amaricantis atque aromatici. Infusum aquosum deterioris conditionis est, et, licet quidem flores adhuc satis redoleat, ingratum solummodo et inertem saporem amaricantem possidet. In extracto fusco-nigricante sapor, mucilagineus nempe, subacris, falsus et amaricans fortior, odor specificus vero longe debilior deprehenditur.

§. V.

Fixis hisce principiis, praesertim gummoso ac mucilagineo, *sal falsum*, culinari analogum, immersum est. Cognoscimus illud ex sapore vix descripti extracti aquosi, immo ipsius infusi vinosi: Hoc posterius enim, si vinum aliquoties floribus recentibus superfunditur, et blande cum iisdem coquitur, vel saltem digeritur, testante SIMONE PAVLI (m), tam falsum evadit, ac si aliquot salis culinaris pugilli inieci fuissent. Non haeret caeteroquin in intima mixtione, multo minus in ipsa planta generatur, sed ex fimo, quo agri fertiles redduntur, sensim extrahitur, sensimque cum succo nutriente in plantae tubulos transit, et reliquis principiis obiter miscetur.

§. VI.

Vsus medicus florum chamomillae utriusque, tam internus, quam externus, latissime patet, quoniam eximiis plane viribus carminativis, uterinis, discutientibus, anodynis et antispasmodicis, quibus in calidiori chamaemelo Romano nervi-

(m) Vide *Eiusd. Quadripart. Botan. pag. 282.*

nervinae, et in temperatiori vulgari abstergentes et emollientes accedunt, instructi sunt. Iure igitur multis aliis medicamentis in adfectibus flatulentis et spasmodico-dolorificis, colica v. g. cardialgia, passione hypochondriaca et hysterica, dolore nephritico etc. praeferri merentur. Singulare praeterea et specificum omnino remedium a Veterum non minus, quam neotericorum nonnullis, in febribus intermittentibus, praesertim tertianis, praedicantur; quam virtutem tamen magis floribus chamaemeli Romani, quam vulgaris, adscribendam esse, arbitror, quoniam priores in morbis, ubi validiori resolutione et discussione opus est, plus, quam posteriores, qui magis emolliendo ac relaxando operantur, praestare solent. De virtute anthelmintica, quam aliqui simplici huic pariter tribuunt, nihil addam, dum nondum satis comprobata est, nec ullo etiam singulari fundamento nititur. Interne hi flores in decocto et infuso aquoso aut vinoso ad aliquot pugillos praescribuntur, et ex chamomillae Romanae floribus efficacissima quoque essentia paratur, quae inter remedia carminativa et antihysterica eminentem locum occupat.

§. VII.

Externe usum adhuc frequentiore inveniunt, multisque adfectibus, qui emollientia, paregorica et blande discutientia ad sui curationem postulant, egregie medentur, quando pro aegritudinis et partis adfectae diversitate, modo inter clysteres, modo inter sacculos et epithemata sicca, modo inter cataplasmata, emplastra, fomenta, infessus, balnea vaporis etc. recipiuntur. Numerus morborum, quibus, extrinsecus
sub

sub hac vel illa forma adhibiti, opitulantur, valde magnus est, iisdemque, observato tamen iusto applicationis modo ac tempore, cardialgia, colica, tormina ventris, passio iliaca, hypochondriaca et hysterica, suppressio et defectus mensium atque lochiorum, dolor nephriticus, obstructio urinae, sive a calculo sive spasmo orta, hernia incarcerata, dolores rhevmatici et arthritici, tumores, inflammatorii non minus, quam frigidi lymphatici, dolor, durities et intumescencia mammarum, oedemata membrorum, obstructio alvi, haemorrhoides coecae et dolentes, rigiditas articulationum, siccitas ligamentorum, et strictura membranarum prae reliquis adnumerari merentur. Iterum nihilominus iterumque monendum duco, flores chamomillae vulgaris operationem suam praecipuam emolliendo, flores chamaemeli Romani autem discutiendo absolvere, et priores proinde saepius clysteres, cataplasmata, fomenta et balnea, posteriores saepius sacculos et epithe-mata sicca ingredi.

§. VIII.

MILLEFOLIVM VVLGARE ALBVM C. B. et MILLEFOLIVM PURPUREVM TABERN., *Garbenkraut*, *Schaaf-Garbe*, passim iuxta vias, in pratis itemque ac passcuis, ubi animalia stercora sua proiciunt, sponte nascuntur, et nobilius purpureum persaepe etiam ob colorem floris elegantiozem in hortis plantatur. Quoad naturam et virtutem medicam alterum quidem cum altero convenit, vulgare tamen album et albido-purpurascens propter uberiozem proven-tum suum, usus frequentioris est. Folia et flores odore forti balsamico - camphorato, et

sapore acri amaricante gaudent, posterior tamen in floribus magis aromaticus existit, unde hi etiam foliis paullo praestantiores iudicantur.

§. IX.

Respectu principiorum millefolium cum chamomilla multa communia habet. Aequè nempe, ac illa, sub destillatione humida parum *olei coerulei* sive sapphirini reddit, si in pingui nempe ac stercoreato solo natum fuerit; contrarium namque accidit, et oleum subflavo colore tinctum elicitur, quando in macriori et arenoso solo adolevit. Copiosa praeterea *principia fixa resinoso-gummea* possidet, quae una cum substantia spirituofo-oleosa, cui primus intuitu activitatis concedendus erit locus, vires medicas ipsi foenerantur; praestantior tamen portio resinosa, quam gummea, deprehenditur. Infusum aquosum primum, ex solis floribus paratum, rubro- et flavo-subfusci coloris est, odoris nauseosi, saporis moderate amaricantis. Inspissatum massam offert obscure fuscam, vel potius nigricantem, odore ingrate balsamico, sapore subacri ac paullulum falso atque austeriusculo donatam. Ex uncia una drachmas duas et grana viginti quatuor impetravi. Tinctura spirituofo prima flavo-viridi obscuriori colore gaudet, et linguae acrem, amaricantem atque aromaticum saporem imprimit. Massa spissata, saturate flava, gratum spirat odorem balsamicum, et amaricantem, aromaticum atque nonnihil camphoratum saporem obtinet. Vncia una circiter drachmam unam cum semisse mihi suppeditavit. Extracta et infusa eiusdem ferme conditionis, largiori tamen quantitate, ipsa herba largitur. NEVMANNVS enim ex uncia una drachmas tres et

et scrupulum unum extracti aquosi, et drachmas duas cum semisse extracti spirituosi primi sese impetrasse testatur (n).

§. X.

Simplici huic a Medicis quamplurimis singulares vires antispasmodicae, sedativae, tonicae, antepilepticae, antihystericae, traumaticae et anthelminticae adscribuntur, et multi igitur folia non minus, quam flores, in cardialgia, colica, malo nephritico, passione hypochondriaca et hysterica, tormentis haemorrhoidalibus, doloribus post partum, a lochiorum suppressione oriundis, epilepsia idiopathica, et consensuali uterina, haemorrhoidali ac verminosa, nec minus in asthmate, febribus intermittentibus, gonorrhoea benigna, fluore albo, exulceratione renum, caeterorumque viscerum (o), ex-

K 2

ceden-

(n) *Lib. cit. pag. 943.*

(o) „Denique, HOFFMANNVS in *vix allegata*
 „*Dissertatione, pag. 23. scribit* millefoliata miri-
 „fica pollent virtute in laesionibus, corruptioni-
 „bus et exulcerationibus internarum partium con-
 „solidandis, adeoque in pulmonum, renumque
 „exulceratione eorum usus circumspectus non est
 „plane contemnendus. *Rodericus a Fonseca T. II.*
 „*Conf. Med.* et *Iohannes Praevotius in Medicina*
 „*pauperum* valde extollunt pulverem millefolii in
 „phthisi et ulceribus pulmonum, si quotidie eius
 „drachma una in iusculo calido sumatur. Neque
 „dubium est, quin dictis in morbis maximam in-
 „terdum praestet utilitatem, praesertim si aegro-
 „tantis aetas non sit profectior, si succos adhuc in
 „venis alat benignos, nec marcor, languor, et
 „summus

cedentibus haemorrhagiis, immo contra pestem et abortum imminens magnopere commendant. Interne decocta et infusa eorum, cum aqua, vino, aut fero lactis paranda, nec minus tinctura spirituosa adhibentur; externe autem, pro morborum et partium affectarum discrepantia, modo inter epithemata sicca, modo inter cataplasmata, decocta, clysteres, gargarismata etc. recipiuntur, iisdemque creberrime flores chamomillae, ob aliquam naturae ac virium analogiam, iunguntur. Vfus externus non minorem, quam internus, ambitum habet. Aliae enim ex recensitis praeparationibus in erysipellate, et tumoribus inflammatoriis mammarum, aliae in tumoribus oedematosis, odontalgicis, aliae in vulneribus et ulceribus, aliae in doloribus haemorrhoidalibus, colicis, cardialgicis, hystericis et hypochondriacis, et aliae denique in odontalgia etc. egregie profunt.

CAP.

„summus virium lapsus in corpore sentiatur, sique
„insimul accuratior victus ratio observetur, et me-
„dicatio haec per dimidium annum et ultra solli-
„cita cura continuetur. Eundem vero et illustrio-
„rem adhuc effectum in phthisi expectare possu-
„mus ab usu continuato decocti millefolii cum
„conserva rosarum rubrarum praeparati et bene
„clarificati. In laesionibus et exulcerationibus in-
„testinorum post dysenteriam gravem flores mil-
„lefolii et chamomillae in clystere adplicati, vel
„intus quoque in forma decocti adsumti ad con-
„solidationem egregiam exerunt efficaciam. In
„casu ab alto ad sanguinem congrumatum resol-
„vendum aqua millefolii destillata, vel eius de-
„coctum, pulvis quoque cum aceto itidem prae-
„statissimae sunt virtutis etc.,

CAP. XXIV.

De Floribus Lavendulae.

§. I.

Binae LAVENDVLAE five LAVANEDVLA VVLGARIS species, LAVANDVLA nimirum ANGVSTIFOLIA et LATIFOLIA C. B., apud nos in hortis plantantur, in Hispania autem, Italia, Gallia Narbonensi etc. in locis campestribus et montanis sponte crescunt. Valde quoad formam, proprietates externas et naturam conveniunt, praeterquam, quod Lavendula angustifolia gratiori odore balsamico sese commendet, et ideo naturae magis amica videatur. Non tota planta, sed solummodo flores in usum medicum trahuntur, quoniam activis principiis multo largius, quam folia instructi sunt, et, praeter odorem fragrantiozem, saporem quoque fortiozem, eumque subacrem et amari- cantem, possident.

§. II.

Oleum essentiale aethereum floribus hisce praecipuas vires medicas conciliat, et licet fixa quoque *substantia gummeo-resinosa* virtute non penitus destituta sit, oleo tamen in hoc passu longe cedit. Largior olei copia in floribus spicae vulgaris seu lavendulae maioris latifoliae, quam minoris angustifoliae, hospitatur, idemque utplurimum in horum libra civili ad drachmas duas, in aequali autem illorum quantitate ad drachmas quinque vel sex pondere adscendit. Superat praeterea oleum lavendulae latifoliae oleum lavendulae angustifoliae gravitate specifica (p), et paullo

K 3

(p) Vid. Cap. I. pag. 12.

paullo calidioris proinde naturae existit. Ex memorata discrepante olei essentialis quantitate ratio patet, cur flores lavendulae angustifoliae gratiores, quam flores lavendulae latifoliae, odorem spirent, ac paullo remissiores quoque in corpore operationem exercent.

§. III.

Infusum aquosum florum lavendulae latifoliae colore ex flavo-fusco est, odorem gratum balsamicum eructat, et saporem amaricantem possidet. In massa spissata, quae ex uncia florum una circiter drachmam unam ac binos ferme scrupulos pendet, proprietates hae externae nonnihil mutatae reperiuntur: Color fuscus nempe ad nigredinem vergit, odor debilior et ingrator est, ac, praeter amaricantem saporem, etiam subsalsus sese manifestat. Tinctura spirituosae prima subviridi colore gaudet, naribusque odorem simplicis specificum, linguae autem acrem, amaricantem atque balsamicum saporem imprimit. Eiusdem quoque conditionis extractum est, praeterquam, quod odor debilior existat. Ex uncia florum una duas ferme drachmas, adeoque maiorem, quam extracti aquosi quantitatem obtinui. Infusa et extracta lavendulae angustifoliae parum vel nihil a descriptis differunt, et levissimae igitur discrepantiae ratio, unice ferme, quod antea pridem monui, in oleo aethereo delitescere videtur.

§. IV.

Inter activa pharmaca nervina et cephalica utriusque lavendulae flores locum tuentur, multumque memoriae debilitate, vertigine, hemi-crania, coryza diuturna aut gravedine, epilepsia,

sia, melancholia, apoplexia pituitosa, hebetudine sensuum externorum, paralyfi membrorum etc. laborantibus prodesse solent. Interne plerumque sub forma infusi vinosi exhibentur, ac multa variaque praeparata et composita pharmaceutica ingrediuntur. Externe, discutiendi ac roborandi fine, saepissime speciebus pro cucuphis, sacculis, pulveribus cephalicis, immo balneis et suffimigiis miscentur, viresque eximias varia hac adplicatione in multis capitis morbis, nec non oedemate et paralyfi membrorum, doloribus rhevmaticis et arthriticis, suppressione mensium, sterilitate, fluore albo etc. exerunt.

CAP. XXV.

De Floribus Calendulae et Leucoii Lutei vulgaris.

§. I.

FLORES CALENDVLAE OFF., sive *Calthae vulgaris* C. B., *Ringel- oder Gold-Blumen*, sapore debili herbaceo gaudent, et fortem, si adhuc recentes sunt, odorem balsamicum, nonnihil tamen nauseosum, emittunt, qui maximam partem in exsiccatis perit; manifesto documento, copiosum quidem atque tenerrimum principium spirituosum, parum vero olei substantialis aetherei in naturali mixtione latitare. Principia fixa resinoso-gummea maiori quantitate adsunt, eminentiori nihilominus activitate carent. Nam flavescens infusum aquosum primum, licet nauseosum odorem balsamicum diffundat, saporem solummodo inertem subamaricantem et mucilagineum obtinet. Extractum inde paratum valde tenax est, est odore panem mellitum, sapore

re rob sambuci quodammodo aemulatur. Tinctura spirituosae prima paullo potentior existit, quoniam, praeter colorem aurantium et debilem odorem nauseosum, saporem subacrem ac blande balsamicum possidet, et, evaporatione peracta, massam relinquit rubro-subfuscam, sapore amaricante ac paullulum adstringente praeditam. Vncia florum una mihi ferme drachmas tres extracti aquosi primi, et drachmam unam ac grana quinquaginta extracti spirituosii primi praebuit.

§. II.

Vulgo hi flores, praesertim recentiores, fugacissimo principio spirituosae adhuc praegnaentes, ad medicamenta alexipharmaca, expellentia, cardiaca et uterina referuntur, et specificè inprimis in febribus malignis, variolis, morbillis, aliisque morbis exanthematicis, nec minus in ictero, palpitatione cordis, suppressione mensium, partu difficili, retentione placentae uterinae et fluore albo prodesse dicuntur, quoniam discutiendo ac leniter abstergendo agunt, et blandae igitur humorum resolutioni, mobiliumque impuritatium exclusioni per poros cutaneos inserviunt. Interne optime operantur, quando ad aliquot pugillos vino, aceto, aut aqua fervida infunduntur. Infusum aquosum in febribus, vinosum autem in morbis frigidioribus magis locum habet, acetum denique in peste, ceterisque febribus putridis malignis maxime proficuum reperitur. Externe decoctum eorum inter vulneraria militat, et cataplasma quoque, coctione cum vino paratum, multum ad maturandos bubones pestilenciales valere creditur.

§. III.

§. III.

LEVCOIVM LVTEVM VVLGARE C. B. five *Cheiranthus foliis lanceolatis acutis glabris* LINNAEI apud nos in hortis colitur, alibi, in Helvetia v. g. et Gallia, sponte in locis sylvestribus provenit. Flores eius, qui soli in censum medicamentorum veniunt, ac vulgo in Officinis *Flores Cheiri* adpellantur, gratum odorem balsamicum, in siccatis etiam satis diu perdurantem, emittunt, et saporem acriusculo - amaricantem possident. *Principiis activis tam volatilibus oleo-spirituosis, quam fixis gummeis ac resinosis* instruiti sunt, praecipua tamen virium ratio ad principia volatilia, et post illa ad fixam substantiam resinosam redit; quippe quae, spiritus vini ope separata et ad extracti formam redacta, saporem subacrem atque amarum obtinet.

§. IV.

Leni virtute discutiente, anodyna atque nervina gaudent, et subinde igitur contra adfectus catarrhales, paralyticos atque cachecticos, nec minus contra spasmos, leviores viscerum infarctus, icterum, suppressionem mensium, passionem hystericam et fluorem album in usum vocantur. Interne in infuso vinoso aut aqueo-vinoso praescribuntur; externe autem infusus uterinos, balnea uteri vaporosa, et facculos, siccos aequae, ac vinosos, ingrediuntur.

CAP. XXVI.

De Ligno Sassafras.

§. I.

LIGNVM SASSAFRAS, alias etiam *Lignum Pavanum, foeniculatum, anticatarrhale* etc., germ. *Indianisches Fenchel- oder Sassafras - Holz*, dictum, colore rufescente, vel ex albido aut flavo gryseo, odore grato fragrante, sapore debili aromatico gaudet. Cortice cingitur, coloris intus ferrugineo - subrufi, foris cinerei, odoris, si raditur, fragrantissimi, saporis sub-acris, subadstringentis et aromatici, qui subiacentem substantiam lignosam medica virtute longe superat, eidemque proinde in casu quocunque praeferri meretur.

§. II.

Arbor, quae hoc lignum suppeditat, et LINNAEO *Laurus foliis integris trilobisque* audit, alta est, ac tanta ubertate in variis Americae tractibus, maxime autem in Brasilia, Florida atque Virginia, adolescit, ut passim integrae sylvae reperiantur. Folia habet ficulnea, floresque fert rosaceos, quibus baccae nigricantes, lauri baccas forma et magnitudine aemulantes, succedunt. Radix lignosa et rami minores trunci ligno praestantiores sunt, adeoque ad pharmacopolia nostra praecipue transferuntur.

§. III.

Principio mobili spirituofo hoc lignum, praesertim cortice suo adhuc tectum, valde turget, et sat notabilem quoque *olei substantialis aetherei*
et

et fixae substantiae resinoso-gummeae quantitatem in mixtione fovet. Oleum, cuius drachmae duae ac totidem ferme scrupuli in libra una adsunt, in aqua fundum petit, et pleraque olea aetherea reliqua gravitate specifica superat. Post destillationem limpidum est, deinde autem nonnihil rubescit. Tinctura spirituosae prima colorem obtinet obscure rubrum, ad nigrum paulisper inclinantem, odorem ligni specificum spirat, et balsamicum atque subacrem saporem linguae imprimit. Inspissata extractum largitur coloris fusco-nigricantis, saporis subacris, balsamici ac paullulum adstringentis, odoris debilis foeniculati. Ex uncia ligni una drachmam unam, et grana quinquaginta obtinui. Infusum aquosum primum rubicundi coloris est, et, licet fortem ligni odorem eructet, valde debili tamen sapore balsamico pollet. Extractum inde resultans, rubro-ac fusco-nigricans, odore maximam partem reperitur orbatum, sat austerum tamen et amaricantem saporem possidet: Vnde cognoscere licet, quod sapor aromaticus praecipue a partibus spirituoso-oleosis et fixis resinosis, virtus subadstringens autem magis a substantia gummosa dependeat. Vncia ligni una binas drachmas et grana aliquot huius extracti dedit. Quando coctione fortiori atque protracta partes fixae gummosae ac resinosae simul separantur, extractum inde parari potest, viribus cortici Peruviano aequiparandum (q).

§. IV.

Cortex respectu naturae ab ipso ligno minime differt, praeterquam, quod memoratis principiis

(q) Conf. HOFFMANNI *Observat. physico-chym. select.* pag. 14.

piis activis largius instructus sit, et eminentiores proinde vires in corpore exerat. Valide discutiendo cortex et lignum humores commovent, ac lenissime adstringendo et irritando partium solidarum contractiones augent, adeoque sudorem atque urinam pellunt, impuritates mucidas attenuant, et sanguinem ac lympham egregie purificant. Vfus eorum specialis notissimus ac plane eximius est in frigidis adfectibus catarrhalibus atque rheymaticis, lue venerea, eiusdemque prodromis et symptomatibus, nec minus in scabie benigna et maligna, ulceribus impuris, scorbuto, cachexia, fluore albo, arthritide, ceterisque morbis, qui ex spissitudine, muciditate et impuritate varia humorum praecipue nascuntur. Dantur interne infusum vinosum et aquosum, nec minus decoctum et essentia. In infuso plerumque a drachma una ad duas praescribuntur. Externe nonnunquam gargarismata, in tumoribus glandularum salivalium, dolore dentium, raucedine, stomacace etc. proficua, ingrediuntur.

CAP. XXVII.

De Ligno Guaiaco et Sancto.

§. I.

LIGNVM GVAIACVM, *Franzosen-Holz, Pocken-Holz*, valde densum, ponderosum ac resinosum est, coloris gryseo-fusci, vel fusco-nigricantis, et subinde quoque nonnihil viridescens, saporis subacris ac resinosi, odoris, si raditur, debilis balsamici. Cortex, quo cingitur, crassus existit, gryseumque colorem, vel
cine-

cinereo-ferrugineum, interdum maculis obscure viridibus hinc inde distinctum, et eundem, quem lignum, saporem et odorem obtinet. Arbor in variis locis Indiae occidentalis, maxime autem in Mexico et Insulis Iamaica, Hispaniola et S. Dominici, iuglandis magnitudine crescit, et PLUMERIO *Guaiacum flore coeruleo, fructu rotundo*, SLOANIO *Pruno vel Evonymo affinis arbor, folio alato*, et LINNAEO *Guaiacum foliolis biugatis obtusis* dicitur. Quando truncus et rami maiores spontaneas fissuras agunt, vel inciduntur, succus acris resinofus effluit, qui sensim in corpus friabile, acre, fusco-rubicundum aut viridescens, gummeo-resinosum, sive sic dictum *Gummi-Guaiacum*, condensatur.

§. II.

Principiis volatilibus parum in hoc ligno tribuendum est, quoniam *portio spiritiosa* parca admodum quantitate inhaeret, et oleum substantiale aethereum plane deficit: Quod fixam vero *substantiam gummosam ac resinofam* attinet, illa sat notabili copia adest, ita tamen, ut posterior pondere priori antecellat. Infusum aquosum primum, cuius color flavo-fuscus, odor debilis et nonnihil aromaticus, sapor resinofus et subacris est, post blandam evaporationem extractum largitur, coloris fusci, ad nigredinem aliquantulum vergentis, odoris debilis, saporis in principio subadstringentis ac paullulum resinosi, postea autem adeo acris atque urentis, ut piperis instar, quamquam remissius, fauces pungat atque adurat. Quando perfecte siccatur, facile in pulverem tenerrimum teritur, cuius molecule, sub tritura adscendentes, pruritum in naribus (*ein Krüblen*), immo sternutationem produ-

producunt. Ex uncia una ligni raspati et satis compacti drachmam unam et scrupulos duo obtinui. Tinctura spirituosa prima colore ex rubro ac fusco nigricante, odore resinoso ac debili balsamico, et sapore subacri atque balsamico pollet. Extractum inspissatum, quod fusco-nigricantis coloris ac valde tenax est, odore vulgare rob sambuci aemulatur, et linguae saporem mere propemodum resinosum; nulla notabili amplius acredine mixtum, imprimit. Pendet circiter, una nimirum ligni uncia experimento adhibita, drachmas duas, totidemque scrupulos.

§. III.

Vires medicae, praesertim stimulant, attenuantes, abstergentes ac diureticae, quod liquido ex institutis examinibus patet, magis quidem gummoso, quam resinoso principio adscribendae sunt; certo nihilominus certius est, substantiam gummeam, particulis resinosis tenerioribus remixtam, operari efficacissime; quam sententiam dudum quoque FRID. HOFFMANNVS amplexus est: „Praeter resinosam hanc, „in *Observationibus physico-chymicis select. Lib. I.* „pag. 66. scribit, quae beneficio spiritus vini elicitur, adhuc alia resiniformis substantia, non „parum ratione saporis et virtutis a priori diffidens, ex hoc ligno poterit obtineri, idque „non per macerationem cum menstruis spirituosiss, sed per simplicem et paullo longiorem coctionem cum aqua communi; quando nempe „ligni guaiaci decoctum leni inspissatur igne, „tunc in fundo vasis residuum manet spissamentum quoddam resiniforme, quod balsamici et „grati odoris est, saporis acriusculi, quod in „pulve-

„pulverem tenuem redactum et naribus admis-
 „sum, stimulo glandulosas illas, quae na-
 „rium ossa investiunt, tunicas, pituitam ibi hae-
 „rentem potenter colliquat atque educit, adeo,
 „ut omnibus a multo iam tempore notis et ex-
 „pertis errhinis, propter eximiam, quam ex-
 „serit efficaciam, mihi resina haec praeferenda
 „videatur. Nam praeter vim errhinam et sti-
 „mulantem simul quandam possidet facultatem
 „roborantem, nervosis capitis partibus amicissi-
 „mam. — — — Hoc experimentum nobis
 „perspicue aperit modum, quo ligni guaiaci de-
 „coctum ex aqua operationem suam in lue Gal-
 „lica sananda exserit. Quilibet enim facile hic
 „perspicit, in decoctum non nisi hanc resinam
 „acrem, errhina facultate donatam, transire,
 „relieta in ligno copiosiori et magis oleosa illa
 „resiniformi substantia. Quemadmodum itaque
 „resina haec spiculis et stimulis suis salino-acri-
 „bus vellicando glandulosas narium tunicas, fun-
 „dit et liquat tenacem pituitam; ita nullum du-
 „bium est, quin ligni guaiaci decoctum, spiculis
 „istis salino-resinosus roboratum, dum accedit
 „ad partium solidarum glandulosos tubulos, eos
 „eadem ratione vellicando et ad validiorem con-
 „strictionis motum invitando, corruptos et te-
 „naces, qui ibi haerent, humores colliquet,
 „eosque e latibulis suis excussos, ad expulsio-
 „nem e corpore idoneos reddat, quae prima-
 „ria in hoc morbo sanando medentis debet esse
 „intentio etc.,

§. IV.

Corticis principia separabilia, natura ac viri-
 bus, cum principiis ipsius ligni perfecte conve-
 niunt, minori tamen quantitate reperiuntur in-
 geni-

genita, hinc cortex etiam dosi largiori, quam lignum, praescribi potest. Non differt quoque nativum GUMMI GVAIACVM, dum pariter ex partibus resinosis, gummeis et terreis inertibus conflatum deprehenditur, ita tamen, ut portio resinosa gummeam quantitate longe superet, et maximam totius ponderis partem constituat. Quando gummeo - resinofum hoc concretum, nec minus cortex et lignum ex retorta igne sicco destillantur, multum olei empyreumatici et sat notabilem quoque spiritus aciduli quantitatem reddunt, quae producta tamen, cum natales suos solummodo violentae substantiae gummeo - resinosae destructioni debeant, nullam, intuitu principiorum naturalium, considerationem merentur.

§. V.

Lignum Guaiacum frequentissime, cortex vero atque nativa gummi - resina, licet summa, quod dictum fuit, virium analogia adsit, paullo rarius, apud nos in usum medicum vocantur. Locum inter praestantissima attenuantia, abstergentia et purificantia inveniunt, ac sese mirifice inprimis in morbis venereis, adfectibus scabiosis, scorbuticis atque cachecticis, ulceribus impuris et refractariis, catarrhis capitis, faucium, pectoris etc., rebellibus rhevmatismis, fluore albo, et singulis morbis reliquis commendant, quorum causae primariae ad spissitudinem et salino - mucidam humorum impuritatem redeunt. Lignum et cortex ordinario in decocto, rarius in infuso vinoso, a drachma una ad unciam dimidiam, praescribuntur gummi - resina autem pilulas, bolos et electuaria ingreditur, vel, in spiritu vini, aut liquore terrae foliatae tartari vinoso

noso soluta, sub tincturae forma, a guttis viginti ad triginta, quadraginta, propinatur. Externe lignum et cortex decoctis vulnerariis et gargarismatibus, contra anginam spuriam, laxitatem uvulae, tumores glandularum salivalium, odontalgiam et scorbutum oris adhibendis, adduntur, et siccum ac pulverulentum extractum aquosum, cuius uberior mentio §pho VI. facta fuit, commodè inter pulveres errhinos et ptarmicos, itemque abstergentes ac stimulantés, in paralyfi linguae proficuos, recipitur.

§. VI.

Cum Ligno Guaiaco sic dictum LIGNVM SANCTVM, quod ab alia arboris Guaiaci specie, quam LINNAEVS *Guaiacum foliolis multiungatis obtusis* appellat, quoad naturam quidem, virtutes et usurpandi modum convenit, textura tamen rariori et colore albicante ab illo differt, et viribus quoque inferius est; underarius, quam praecedens, in usum medicum trahitur.

CAP. XXVIII.

De Ligno Aloes et Santalo flavo.

§. I.

LIGNVM ALOES, *Xyloaloes, Lignum Paradisi, Agallochum, Lignum Calambac, Aloes-Holz, Paradis-Holz*, rectè pro meo iudicio in *verum* et *spurium* dividitur. Hoc, quod plerumque apud nos venale prostat, lignum densum est, coloris fusci aut ferruginei, nigricante passim distincti, saporis subacris, amaricantis, et aromatici, odoris debilis quidem, ast satis grati bal-

famici; illud autem, in Officinis Europaeis rarissime obvium, colorem subfusco vel aurantio-purpureum, venulis cinereis persaepe distinctum, obtinet, ac valde resinofum deprehenditur; hinc facile etiam, ac cerae propemodum instar, in igne liquefcit, et odorem sub combustione sua fragrantissimum diffundit.

§. II.

Arbor, quae verum lignum Calambac foeneratur, in regionibus Indiae orientalis, Cambodia et Cochinchina, nec minus in Tartaria Chinenfi, habitat; spurium vero, teste GEORGIO EVERHARDO RUMPHIO (r), ab arbore excaecante, hinc inde in Insulis circa Amboinam adolescente, desumitur. „Lignum Agallochum, verum, *sic relatio eius sonat*, in regno Coinam nascitur, et raro ad Europaeos defertur, quoniam in India maioris est pretii, quam in Europa, ibidemque duplo aut triplo argenti pondere redimitur: Spurium vero ab arbore excaecante, quae circa Amboinam in Insulis passim obvia est, desumitur, et ad suffiendum adhibetur. Prunis enim inspersum, primo benzoinum olet, deinde mox in odorem nidorosum desinit. Arbor excaecans nihil habet commune cum Agallochi veri arbore, sed arbor deformis est, non nisi in littoribus solitarie crescens, et male audiens apud nautas et incolas, quia lacteo quodam liquore turget, qui, casu oculis immissus, magnos cruciatus excitat, inflammat, et, nisi citissime succurratur, excaecat. Videtur Lathyris quaedam arbor, rescens esse, ubique fructus fert triquetros, „La-

(r) Vide *Ephemerid. A. N. C. G. Dec. II. Ann. 3. Observat. 22.*

„Lathyridis baccis valde similes, quae vulgo „Cataputia audit. Folia cum pyri foliis conveniunt, quae in margine tamen obscure dentata sunt. Frustulum corticis, aut quinque laevis guttulae, validam provocant purgationem, sed in gutture urunt. In caudicis radicumque terrae exstantium cavernis haec arbor dictum lignum odoratum habet, quod gignitur ex pinguioribus eius partibus, solis fervore, et crebra aspersione aquae marinae probe excoctis etc., Nonnulli, quod adhuc paucis subiungendum censeo, inter ipsum lignum Agallochum, sive aloes verum, aliquid rursus discriminis faciunt, et speciem eius nobiliorem fusco-vel aurantio - purpuream ac valde resinofam trunci arboris medullam existere, ignobiliorem vero textura sua totoque habitu externo ad lignum ordinarium accedere, et colore fusco-vel flavo-nigricante praeditam esse, perhibent. Addunt quoque, veram arborem Calambac, licet ad quercus magnitudinem excrescere consueverit, vix dimidiam ligni nobilioris libram reddere, et inde igitur ingentis caritatis non minus, quam raritatis rationem petendam esse.

§. III.

Lignum aloes vulgare satis copiosam quidem *substantiam fixam gummeo-resinosam*, parum vero *spiritus et olei essentialis aetherei* possidet. Nam FRIDERICVS HOFFMANNVS ex decem ligni raspati ac macerati libris vix unciam dimidiam liquidi cuiusdam resinoso-oleosi spissiusculi, humidae destillationis ope, elicere potuit. Mixtum hoc resinoso-oleosum instar camphorae albicans erat, et in spiritu vini rectificatissimo promte solvebatur, eumque eximiis viribus ner-

vinis impraegnabat (s). Tinctura spirituosā prima, colore fusco-nigricante praedita, saporem obtinet subacrem, lenissime amaricante atque balsamico remixtum, debilemque duntaxat odorem balsamicum spirat. Massa inspissata nigricans est, ac valde debili sapore et odore donata reperitur. Infusum aquosum primum turbidum est, ac fordide fuscum, fortiori tamen odore balsamico et eminentiori amaritiae atque aromatica acredine, quam tinctura spirituosā, pollet. Extractum, evaporatione peracta relictum, odore propemodum destituitur, et, praeter colorem obscure fuscum, saporem amaricantem ac paullulum in recessu adstringentem possidet. Ex uncia una ligni raspati drachmas tres extracti spirituosi primi, et drachmas duas extracti aquosi primi impetravi; unde clare constat, quod pars resinosa maiori quidem copia, quam gummea, inhaereat, quodque posterior nihilominus, testante imprimis sapore infusi et extracti aquosi, activitate nonnihil praepolleat.

§. IV.

Vires medicae, quibus hoc lignum, praesertim nobilius, instructum reperitur, ad roborantes, nervinas, cephalicas et cardiacas maxime redeunt, ac multum proinde auxilii ab usu eius expectandum erit in morbis singulis, in quibus partes solidae atonia, et humores inertia quadam viscosa partiumque spirituosarum penuria laborant; cuius census sunt vertigo, imbecillitas memoriae, apoplexia pituitosa, similesque adfectus soporosi, epilepsia, melancholia, lipothymia, palpitatio cordis, debilitas pulmonum et ventriculi, singultus, vomitus, passio hypochondri-

(s) Vide *Observat. physico-chemicae select.* p. 16.

driaca, incontinentia urinae, diabetes, fluor albus, abortus imminens, gonorrhoea benigna et complures alii. Ingreditur pulveres grossiores, decocta et infusa vinosa, a drachma dimidia ad integram. Externe rasura eius speciebus procucuphis et facculis roborantibus, nec minus, ob gratam fragrantiam suam, suffimigiis additur. Chineses et aliae gentes orientales, referente HERMANNO (t), odoratu eius magnoperè delectantur, et quo gratior amicus, eo meliorem portionem illi offerunt, immo mulieres Banianorum in India, cum defuncto marito sese comburere volentes, lignis pro construendo ferali rogo illud miscent, et odorem eius Diis suis gratum esse, credunt.

§. V.

SANTALVM CITRINVM, *Santalum flavum*, gelber wohlriechender Sandel, lignum solidum, densum ac flavum est, gratissimumque odorem balsamicum, si prunis iniicitur, aut cultro duntaxat paullulum raditur, spirat, et amaricantem ac simul aromaticum saporem, praevia tamen protractiori manducatione, linguae imprimit. Arbor, quae lignum largitur, baccifera est, et IACOBO BREYNIO *Santalum verum ligno citrino et albo*, foliis laurinis, incolis autem, teste HERMANNO (u), *Sercanda* dicitur. In Insula Timor proventus uberioris est, et hinc inde etiam in Insula Solor, regione Tanassarim, regno Siam, pluribusque Indiae orientalis tractibus nascitur. Ab eadem arbore etiam LIGNVM SANTALVM ALBVM, quod pariter in Officinis nostris

L 3

(t) In *Cynosura Mat. med. pag. 107.*

(u) *L. cit. pag. 109.*

nostris prostat, desumi, Scriptores nonnulli testantur. „Vtrumque Santalum Officinis nostris usuale, IO. PHILIPPVS BREYNIUS, IACOBI FILIVS, *scribit* (x), eiusdem arboris foetum esse, ab *Herberto Iagero* Parens certior factus est. Citrinum videlicet annositate, saltem ab albo differt, hincque odoris est longe praestantioris; quod in omnibus fere lignis odoriferis observari, docet. Samuel Dale in *Pharmacolog.* pag. 478. quidem Santalum album et citrinum quoque ex una et eadem arbore desumi tradit; sed eius partem corticalem Santalum album, medullarem citrinum, ut a multis affirmatur, esse perhibet etc.,

§. VI.

Oleum essentiale aethereum, cuius duae circiter drachmae ex libra una ligni fantali citrini eliciuntur, ambram et moschum redolet, et praecipuum principium activum constituit. Huic *substantia fixa resinosa*, tandemque *gummea* activitatis intuitu succedit. Color infusi aquosi primi flavescens est, odor balsamicus quidem, non adeo tamen gratus, et sapor debilis balsamicus nonnihil nauseosus. Massa inspissata eiusdem ferme coloris reperitur, et sapore amaricante ac debili aromatico gaudet. Ex uncia ligni una scrupulos duos impetravi. Tinctura spirituosissima prima colore aurantio seu flavo-rubente, odore leniter balsamico, et debili sapore aromatico pollet. Extractum, inde evaporando paratum, quoad odorem ac saporem cum tinctura convenit, obscuriorem tamen, fuscum nempe, colorem obtinet. Quantitate praecedens gummosum

(x) *Icones rariorum Plantarum, Tab. V. pag. 19.*

mosum superat, et, ex uncia una ligni bonae notae separatum, scrupulos quatuor pendet.

§. VII.

Viribus medicis ligno aloes nisi praeferri, certe tamen aequiparari meretur, et mirandum omnino est, quod usus eius hactenus paullo rarior fuerit. Militat inter optima nervina, cephalica et cardiaca, adeoque in morbis singulis, quibus balsamica huius commatis opitulantur, non sine emolumento sub infusi aquosi aut vinosi forma in usum trahi poterit. Nonnulli eidem adstringentem quoque ac validam diureticam virtutem adscribunt, et specialius proinde in sudoribus colliquativis et hydrope commendant: Verum enim vero, laudatam virtutem adstrictoriam neque in ligno integro, neque productis deprehendi, et in hac igitur parte calculum meum iis adicere nequeo. Pro usu externo istud in casu quocunque ligno aloes ac rhodio commode substituitur. Lignum *santalum album*, quod paucis addo, parum odoris atque virtutis possidet, et pro meo igitur iudicio, ob inertiam suam, ex Officinis merito relegandum est.

CAP. XXIX.

De Ligno Rhodio ac Cedrino.

§. I.

LIGNVM RHODIVM sive ROSACEVM, *Rosenholz*, *Rhodiserholz*, alias etiam *Lignum Cyprium*, nec non *Rhodyxilon* dictum, compactum ac ponderosum est, coloris aurantii vel subfusco-lutei, saporis amaricantis et oleoso-balsamici, odoris rosacei suavissimi. Planta, cuius radix, trun-

cus et rami crassiores hoc lignum foenerantur, ad frutices arborescentes pertinet, et LINNAEO *Genista foliis ternatis*, HERMANNO *Cytisus incanus siliquis falcatis*, et nonnullis quoque *Oleaster Rhodius* dicitur. Crescit in Syria, nec non Insulis Rhodo, Cypro, Antillanis atque Canariensibus, et truncus, qui lignum optimum suppeditat, nonnunquam brachii virilis crassitiem consequitur. Eligendum est lignum rectum, densum, ponderosum, pingue ac probe resinofum, quod colore saturate flavo, ad rufum aut subfuscum nonnihil vergente, donatum est, ac, cultro leviter rasum, fortem protinus odorem rosaceum gratissimum emittit.

§. II.

Principiis gaudet *oleoso-spirituosis*, *gummeis* ac *resinosis*. Quantitas olei substantialis aetheri, humida destillatione prolecta, pro valde discrepante ligni bonitate admodum variat, et ex libra ligni una nunc uncia dimidia, nunc drachmae duae vel tres, nunc aliquot tantum scrupuli prodeunt. Oleum recens colorem aureum obtinet, temporis vero successu magis magisque rubescere incipit. Principium fixum resinofum quantitate gummosum superat, et ex uncia una ligni optimi circiter drachmae tres extracti primi spirituosus, et drachmae duae extracti primi aquosi separari possunt. Tinctura spirituosus prima colore gaudet aurantio, ad rubrum vergente, vel potius flavo-rubicundo, et naribus gratum odorem rosaceum, linguae autem subacrem, balsamicum, et austeriusculo-amaricantem saporem imprimit. Inspissatum extractum flavo-rubicundo-fuscum cum infuso quoad odorem ac saporem congruit, et adeo

tenax est, ut degustatum, terebinthinae instar, palato, linguae ac dentibus pertinacissime adhaereat. Infusum aquosum primum colore aureo fese commendat, ipsius ligni odorem spirat, et sapore amaricante atque balsamico pollet. Cum hoc infuso ipsum extractum inspissatum convenit, praeterquam, quod colorem flavofuscum obtineat, et debiliorem odorem balsamicum emittat.

§. III.

Energia medica ad oleum essentielle aethereum maxime quidem redit, symbolum tamen suum fixa pariter principia conferunt. Illud enim praecipue commovendo ac discutiendo, haec autem magis roborando et subadstringendo operantur. Valet igitur usus eius in morbis plerisque, in quibus lignum aloes ac santalum flavum conducunt, et interne quoque eodem modo, frequentius tamen in infuso vinoso, quam aquoso, adhibetur. Externe suffimiis, sacculis roborantibus, cucuphis et pulveribus odoratis additur.

§. IV.

Cum Santalo flavo, propter magnam naturae analogiam, rubrum quoque ac fragrans LIGNVM CEDRINVM ad eandem medicaminum classem revocari posse arbitror. In Officinis quidem nostris haecenus nondum inter ordinaria pharmaca locum obtinuit, receptionem tamen, pro meo iudicio, meretur. Arbor, quae istud foeneratur, in montibus Libano, Tauro et Amano, nec minus in regno Africae Congo, Insula Tercera, Nova Hispania, Florida atque Virginia, potissimum habitat, et C. BAVHINO *Cedrus conifera foliis laricis*, TOVRNEFORTIO

Larix orientalis fructu rotundiore obtuso, et LINNAEO *Abies foliis fasciculatis acuminatis* dicitur. Celeb. A. S. MARGGRAFIUS lignum hoc chemice examinavit, et oleum inde *essentiale aethereum*, *substantiam fixam resinofam* et *salso-gummosam* eduxit. Oleum, cuius duae circiter drachmae ex libra ligni una, sub humida destillatione, prodierunt, crassiusculum est, coloris flavi aut subflavi, odoris grati balsamici. In spiritu vini facile solvitur; oleo terebinthinae tamen specificè gravius est, et frigore intensiori tantopere condensatur, ut vitrum apertum absque effluxu eius inverti possit. Substantia fixa resinosa longe minori quantitate, quam gummea, mixtionem ingreditur, grata tamen fragrantia posteriorem superat. Ex unciiis ligni quatuor Auctor laudatus extracti aquosi primi drachmas quinque cum semisse, et extracti spirituosi secundi scrupulos duo, inverso autem extractionis ordine, ex aequali ligni quantitate extracti spirituosi primi drachmas duas et dimidiam et aquosi secundi drachmas tres ac scrupulos duo impetravit (y). De usu medico speciali nihil addo, dum nondum perfecte exploratus fuit.

CAP. XXX.

De Ligno Iuniperi et Lentisci.

§. I.

LIGNVM IUNIPERI VVLGARIS, tam FRUTICOSAE, quam ARBOREAE C. B., partim albicans, partim flavescens est, ac debili dun-
taxat

(y) Vide Eius *Chymische Schriften*, I. Band, pag. 247. sequ.

taxat odore et sapore balsamico pollet. Principio oleoso - spirituofo parcissime instructum reperitur, nec ullum proinde oleum substantiale reddit, nisi magna eius quantitas destillationi humidae una vice impendatur, ita ut praesentiam olei essentialis magis suspicari, quam demonstrare liceat. Quod fixa vero *principia resinoso - gummea* attinet, illa maiori copia inhaerent, et uncia ligni una plerumque scrupulos duo extracti primi aquosi, et drachmam integram extracti primi spirituofo largitur. Infusi aquosi color rubicundus est, sapor ingrate balsamicus, et, ipsius Sandarachae instar, resinofus, odor nauseofus oleofus. Massa inspissata colorem rubro - fuscum obscuriorem, odorem debilem balsamicum, et saporem amaricantem, subadstringente et balsamico mixtum, possidet. Tinctura spirituofo prima colore saturate aurantio, odore et sapore resinoso - balsamico, instar mastichis, gaudet, et, peracta blanda evaporatione, extractum flavo - fuscum relinquit, resinoso pariter atque balsamico odore et sapore, cui lenissima saltem acredo admixta deprehenditur, praeditum. Praecedens caeteroquin extractum aquosum, maiori, quam vix descriptum resinofum, activitate pollet.

§. II.

Multi lignum iuniperinum ligno sassafras viribus analogum esse, et alterum alteri commode ea propter substitui posse, credunt: Verum, pro mea sententia, prius, ob olei aetherei defectum, aut magnam tamen penuriam, posteriori longe debilius atque temperatius est. Virtutes eius, a fixis principiis resinoso - gummeis potissimum derivandae, blande roborantes, sub-

ad-

adstringentes, nervinae, diureticae, adeoque etiam paullulum purificantes sunt. Convenit igitur in lue venerea, adfectibus scabiosis, scorbuticis, catarrhalibus, rhevmaticis et arthriticis, cachexia, hydrope, suppressione urinae, calculo, fluore albo, et morbis quibusvis reliquis, quorum origo partium solidarum atoniae, et spissitudini atque impuritati humorum praecipue adscribenda venit. Exhibetur ordinario in decocto aquoso et infuso vinoso, a drachma una ad unciam semissem. Externe istud nonnulli decoctis travmaticis addunt.

§. III.

LIGNVM LENTISCI VULGARIS C. B. *Mastix-Holz*, quod multa cum ligno iuniperino communia habet, intus flavo- et subfusco-pallidum est, foris autem cortice ferruginei coloris cingitur. Odor et sapor eius valde debilis balsamicus est, posterior tamen subadstringente nonnihil mixtus deprehenditur. Cortex paullo potentior existit, et adstrictoria inprimis virtute lignum superat. Crescunt Lentisci in Syria, Hispania, Lusitania, Italia, Gallia meridionali, maxime autem in Chio, Cypro, Candia, aliisque Insulis maris Aegei, indeque non lignum duntaxat, sed exsudans quoque concretum gummeo-resinosum, *Mastiche* dictum, cuius uberior in sequentibus mentio fiet, ad nos deferitur.

§. IV.

Volatilia principia oleoso-spirituosa vix considerationem in hoc ligno merentur, et medicae igitur vires unice propemodum fixae substantiae gummeo-resinosae adscribendae sunt. Portio magis gummosa, in aqua solubilis, portione magis resi-

resinosa respectu quantitatis superior est, et in uncia una ad integram ferme drachmam adscendit, cum posterior ex adverso saltem grana viginti quatuor vel drachmam semissem pondere aequet. Tinctura spirituosae prima aurei coloris est, saporis nonnihil balsamici et subacris, odoris nullius singularis. Massa inspissata colorem flavo-fuscum, odorem debilem balsamicum, similemque saporem, subadstringente et subsalfo mixtum, possidet. Infusum aquosum primum, eleganti colore rubicundo, ad fuscum paullulum inclinante, tinctum conspicitur, gratum odorem balsamicum, instar gummi anime aut sandarachae, spirat, debilemque duntaxat saporem balsamico-resinosum obtinet. Extractum, inde post evaporationem relictum, nigricans est, odoris grati, saporis balsamici, subacris et subadstringentis.

§. V.

Blande discutiendo, subadstringendo et roborando operationem suam in corpore exercet, ac iure meritoque inter moderatae activitatis nervina et adstrictoria collocandum est. Specificè sese in diabete, gonorrhoea benigna, imbecillitate ventriculi, aliorumque viscerum, nec minus in vomitu, arthritide, asthmate pituitoso et cachectico, vertigine, adfectibus oedematosis, melancholia, apoplexia, epilepsia etc. commendat, quando in infuso aquoso-vinoso, aut decocto, ad unam alteramve drachmam, praescribitur. Externe decoctis traumaticis, et gargarismatibus, in odontalgia inprimis, laxitate uvulae, tumoribus glandularum salivalium, cruentatione gingivae scorbutica, raucedine refractaria etc. adhibendis, additur.

CAP. XXXI.

De Corticibus Citri et Aurantiorum.

§. I.

Balsamico - amaricantes et fragrantissimi CORTICES MALI CITREI unicuique notissimi sunt, et flava eorum pars exterior, cui odor, sapor ac reliquae dotes excellentes unice inhaerent, adeo *essentialem oleo aethereo* turgida est, ut humida non minus destillatione, quam expressione et scarificatione (quae postrema separandi methodus in Italia, Lusitania et Hispania usitatissima est), sat copiose elici queat. Oleum, expressionis et scarificationis ope separatum, flavescens est, vel instar aquae limpidum, ac levitate sua, fluiditate et temperata atque gratissima indole sese magnopere commendat; destillatum vero, ob aliquam partium spirituosarum iacturam, et lenissimam quandam metamorphosin, quam sub ignis actione patitur, paullo crassius, acrius, atque calidius existit, et minori praeterea quantitate prodit.

§. II.

Primario, ac prorsus eximio huic principio spirituofo - oleoso, exilissimis cellulis sive vesiculis incluso, *particulae quaedam gummosae ac resinosae*, quae corticis virtutem augment, sociatae inveniuntur. Vncia enim una, ab interiori albicante, fungosa et inertis substantia, quantum fieri potest, repurgata, circiter drachmas duas et semissem extracti primi aquosi, et drachmas duas extracti primi spirituosius, sive magis resinosis largitur. Infusum aquosum post filtrationem colore saturate et elegantissime aureo gaudet, odore

odore ipsum corticem aemulatur, et saporem balsamicum et amaricantem obtinet. Extractum fusco-rubicundum est, odore tamen orbatum reperitur, et balsamicum duntaxat et amaricantem saporem, cui in principio dulcedinis quidquam admixtum videtur, linguae imprimit. Tinctura spirituosa prima coloris dilute aurei est, specificum corticis odorem emittit, et balsamicum, subacrem atque amaricantem saporem possidet. Tincturae huic ipsum extractum haud dissimile deprehenditur, praeterquam, quod color flavus saturatior, et amarities paullo fortior sit. Docent recensita examina, in fixis quoque principiis, aliquam, uti antea dictum, virtutem, maiorem tamen in resinoso, quam gummeo, delitescere.

§. III.

Principia activa, praedictis natura et proprietatibus valde analogae, in suaveolente pariter AVRANTIORVM CORTICE reperiuntur, quantitate tamen inaequali. *Essentiale* videlicet *oleum aethereum* longe parcius adest, *fixa* contra *substantia resinoso-gummea* copiosius in mixtione latet, et uncia una portionis flavae circiter drachmas tres et scrupulum unum extracti aquosi primi, et octo ferme scrupulos extracti spirituosi primi reddit. Infusum et extractum aquosum cum infuso et extracto corticum citri, quoad odorem, colorem et saporem, conveniunt, ac paullo maiori saltem amaritie a praecedentibus distincta sunt. Tinctura spirituosa prima colore saturate aureo sese commendat, atque odore specifico balsamico, et acri, amaricante ac pariter balsamico sapore simplex satis prodit. In extracto flavo-rubente odor imminutus, amarities

rities vero aucta sentitur. Praecipua igitur virium ratio ad essentialiale quidem oleum aethereum redundat, in fixis nihilominus principiis non contemnenda pariter virtus residet, praesertim, si resinosum, quod praestantius existit, intime adhuc cum gummeo mixtum est.

§. IV.

Cortex citri, ob maiorem olei copiam, in operando potentior deprehenditur, quam cortex aurantium; respectu modi agendi autem ac virium, tam generalium, quam specialium, tantam similitudinem adesse observamus, ut alterum alteri ubivis substituere liceat. Virtus utriusque egregia omnino ac varia est, praecipue nihilominus vires nervinae, analepticae, cardiacae, stomachales, carminativae et uterinae praedicantur, et iure quidem maximo: Vix enim medicamentum simplex novi, corticibus hisce intuitu virium memoratarum praeferendum. Latissime igitur usus eorum patet, et in vertigine inprimis, melancholia, lipothymia, palpitatione cordis, tussi, asthmate, colica, cardialgia, torminibus ventris, passione hypochondriaca, malo hysterico, et doloribus post partum multum valet. Quando cortex recens frusto sacchari Canariensis sensim abraditur, inde sic dicta *essentia corticum citri et aurantium sicca*, seu elaeoscharum gratissimum magnae virtutis, resultat. Frequentissime caeteroquin, praesertim cortices citri, decocta, et infusa vinosa atque theeformia aquosa, ingrediuntur.

§. V.

Descriptis corticibus citri et aurantium
CORTICES POMORVM SINENSIVM et LIMO-
NIO-

NIORVM itidem iungi possunt, virtute tamen praesertim priores, qui debili duntaxat odore et sapore, oleoque essentiali paucissimo gaudent, inferiores existunt, ac paullo rarius proinde in usum vocantur. A fraudulentis nihilo-fecius corticibus citri et aurantiorum persaepe miscentur.

CAP. XXXII.

De Cortice Cascarillae et Thymiamatis.

§. I.

CASCARILLA, alias etiam Chaccarilla, Chacarilla, Schacharilla, China china spuria, Cortex Peruvianus gryseus etc. appellata (z), corti-

(z) „Originem vox haec (Cascarilla nempe), Ex-
 „cell. Dn. Doct. et Profess. PHILIPP. ADOLPH.
 „BOEHMERVS in *Dissertatione de Cortice Cas-*
 „carillae, Cap. I. §. 2. scribit, debet Hispano-
 „rum *Cascara*, quae Corticem denotat, in verna-
 „cula dicimus *eine Rinde oder Schaale*. Hinc
 „*cascara di buovo*, ovi testa, *cascara de narania*,
 „cortex aurantiorum, vocantur; ut taceam varias
 „denominationes, v. g. *Cascara de limon*, *casca-*
 „*ra de granada*, *cascara del arbore* etc. Itali di-
 „cunt *Corteccia*, ceu patet ex GIOVANNI
 „TORRIANO lexico, ubi v. *cascara* seu Cor-
 „teccia ait: the ut most Barck ar Kind at ang
 „Tree, hoc est, *die Schaale oder Rinde eines*
 „Baumes. Corticula vero hispanice significat
 „*cascarillam*, adeoque est diminutivum vocis *ca-*
 „*scarae*. Inde Corticem Peruvianum *cascarilla de*

la

corticem quendam denotat magis minusve convolutum atque compactum, coloris extrinsecus grysei, intus subfusci, odoris balsamici, saporis aromatico-amari. Ab arbuscula detrahitur, quae LINNAEO *Clusia foliis lanceolatis acutis integerrimis, petiolatis*, CATESBY autem aliisque *Kicinioides elaeagni* folio dicitur, et plerumque decem pedum altitudinem atque unius circiter pedis crassitiem consequitur. Folia protrudit oblonga, acuminata, angusta, pallide viridia, flosculosque fert exiguos, hexapetalos, albicantes, flavis apicibus donatos, quibus baccae ex albo viridescences, in tres loculos, semina nigra includentes, distinctae, et pisum magnitudine aequantes, succedunt. Copiose hae arbusculae in plerisque Bahamae Insulis crescunt, et passim quoque in regno Peruviano, Nova Hispania, aliisque Americae tractibus adolescere dicuntur.

§. II.

„*la Oia Fiebr. Rinde* vocari, nonnulli scriptores referunt; tanquam signum, denominationem „Hispanos Peruviano cortici κατ' ἐξοχήν tribuisse. „Itaque tam late patet Hispanis significatus huius „vocis, ut non in genere solum pro corticibus intelligatur, verum etiam ad speciem quandam corticum referatur. Quomodo vero ab hac generica denominatione cortex noster *cascarilla* proprie dictus fuerit, aliam non invenio rationem, „quam quod botanices ignari illam ad speciem „nullam referre sciverint, vel quod, ut verisimile „mihi videtur, propter tenuiorem corticularum „texturam aliter denominare, ipsis non displicuerit, quam *cascarillam* etc.,

§. II.

Principiis volatilibus oleoso-spirituosis et fixis resinoso-gummeis valde activis gaudet. Oleum essenziale aethereum, cuius unica circiter drachma ex integra corticis libra elicitor, subviride, mobilissimum, spiritu valde turgidum, adeoque fragrantissimum est, et fixae substantiae resinoso-gummeae inhaesione sua praecipuam activitatem foeneratur. Infusum aquosum primum flavo-rubicundi coloris est, odoris balsamici, saporis amari ac paullulum quoque balsamici. Sub evaporatione fragrantiam suam, abeuntibus particulis oleoso-spirituosis unice adscribendam, amittit, et massam saturate fuscam relinquit, debili duntaxat sapore amaricante, et vix sensibili amplius odore praeditam. Ex uncia una circiter drachmas duas, totidemque scrupulos obtinui. Infusum spirituosum primum, colore saturate aureo tinctum, corticem odore prodit, et subacrem atque amaricantem saporem possidet. Extractum flavo-fuscum, quod peracta evaporatione relinquitur, valde tenax est, odoris balsamici, nullius vero amplius saporis; unde manifestum redditur, parum virtutis principii fixis, per se consideratis, ingenitum esse, ac totam igitur, vel tamen praecipuam, virium rationem, quod antea pridem monui, in volatili portione oleoso-spirituosa latitare. Ex uncia corticis una drachmas duas et scrupulum unum impetravi.

§. III.

Nostro aevo cortex hic, ob egregias vires roborantes, discutientes, diaphoreticas et sedativas, frequentissimi usus est, et cum insigni imprimis fructu in febribus exanthematicis, catar-

rhalibus, intermittentibus, inflammatoriis, affectibus spasmodicis, convulsivis, scabiosis, scorbuticis, cachecticis, frigidis rhevmaticis atque arthriticis, nec minus in diarrhoeis, dysenteria, coeliaca, lienteria, vomitu pituitoso, imbecillitate ventriculi, morbis pectoris falso-mucidis, suppressione mensium diuturna et fluore albo, vel in pulvere, a granis aliquot ad scrupulum dimidium, vel etiam sub forma infusi vinosi, a scrupulo uno ad duo, exhibetur. Pertinet praeterea ad suffimigia, et saepiuscule praesertim in Anglia, rasura eius herbae Nicotianae, grati odoris causa, miscetur.

§. IV.

CORTEX THYMIAMATIS, olim *Thus iudaeorum* dictus, nusquam in Officinis nostris sub forma cannularum occurrit, sed ex meris frustulis minoribus et maioribus, quibus subinde aridae foliorum partes mixtae deprehenduntur, constat, ita, ut, iudicante FRID. HOFFMANNNO (a), relictum quoddam magma compressorum foliorum et corticum ex arbore esse videatur. Frustula haec colorem subfusco-cinereum, aut fusco-rubentem, et saporem subacrem, amaricantem, in recessu nonnihil adstringentem, possident, gratumque odorem balsamicum spirant. Nomen suum a vocabulo *Thymiana* accepit, quod apud Graecos in genere *Suffitum* sive *Suffimentum* denotat. Adfertur ex Syria, Cilicia, Pamphilia etc., ac nihil sane aliud esse videtur, quam cortex resinofus arboris, quae solidum, vel, ita sentiente vix allegato HOFFMANNNO, liquidam styracem foeneratur: „Nostra quidem sententia, loco cit. scribit, videtur esse
„COR-

(a) In *Observat. physico-chym.* p. 65.

„cortex arboris, ex qua liquida storax expri-
„mitur, et arbor est minoris Ciliciae, cui etiam
„sententiae favet Serapion, qui pro cortice sty-
„racis arboris eum habet, expressae et excoctae
„liquidae styraci superstitae, praesertim cum eius
„odor cum odore styracis liquidae quam maxi-
„me conveniat etc.,

§. V.

Substantiam fixam *gummeo-resinosam*, parti-
bus *oleoso-spirituosis* fragrantissimis satis prae-
gnantem, continet; maior tamen virtus in par-
te resinosa, quam gummosa latet. Filtratum
infusum aquosum primum coloris aurantii est,
et saporem atque odorem ingrate balsamicum
possidet. Extractum inde paratum colore ru-
bro-fusco, ad nigrum nonnihil vergente, odore
ipsius corticis balsamico, et sapore austeriusculo
adstringente, levi amaritiae blandaque acredine
aromatica remixto, donatum reperitur, ac, in-
tegra corticis uncia extractioni adhibita, drach-
mam unam et grana duodecim pendet. Tin-
ctura spirituosa prima, annotante HOFFMAN-
NO (b) instar essentiae balsami Peruviani valde
nigra est, et, aquae communi infusa, protinus
laetescit. Spiritus abstractus odoris fragrantissi-
mi est, eumque ita diffundit, ut a drachma una
aliquot mensurae aquae odorem fragrantem mu-
tuentur. Relinquitur resina satis copiosa, ita
ut ex libra corticis una unciae-duae ad minimum
resinae haberi possint. Haec resina, uti porro
refert, itidem suavem et fragrantem odorem
emittit, et commodissime extracto storacis,
gummi benzoino et balsamo Peruviano, ad ef-

M 3

for-

(b) *L. cit.*

formandam massam odoratam, calidae fornaci illinendam, admisceri potest.

§. VI.

Vsus internus paullo rarior est, etiamsi virtute nervina, sedativa et anodyna polleat, nec contemnendum itaque auxilium in sedandis doloribus et compescenda tussi convulsiva praestet, si nimirum sub tincturae aut infusi vinosi forma exhibetur. Externe frequentius in usum trahitur, et egregium prorsus suffimentum, in oedemate partium, doloribus frigidis rhevmaticis, coryza rebeli etc. constituit.

CAP. XXXIII.

De Cinnamomo.

§. I.

CINNAMOMVM, *Zimmet-Rinde*, alias quoque *Cassia cinnamomea*, *Cassia Ceylanica*, *Canella Ceylanica*, *Canella Officinarum*, nec minus *Cinamomum*, quasi *Chinae amomum*, dictum, corticem sistit tenuem, in cannulas convolutum, colore fusco-rubente, odore balsamico gratissimo, et sapore acri aromatico, subdulci tamen et austriusculo nonnihil remixto, praeditum.

§. II.

Arbor, cuius truncum hic cortex ambit, a Botanicis, inter Lauri species refertur, et ab HERMANNO *Laurus Ceylanica baccis calyculatis*, a LINNAEO *Laurus foliis oblongo-ovatis, trinerviis, nitidis, planis*, et a quibusdam aliis simpliciter *Laurus canellifera Ceylanica* adpellatur. Ex-
crescit

crescit plerumque ad oleae aut pruni altitudinem, et radicem habet, substantia oleoso-camphorata, ex forti odore satis cognoscenda, et destillationis quoque ac sublimationis ope separanda, valde praegnantem. Lignum non plane inodorum est, uti nonnulli tradunt, sed rosaceum odorem spirat. Folia, lauri foliis, quod dictum, forma haud dissimilia, amoenissimo, dum primum erumpunt, colore purpureo, qui postea in viridem mutatur, tineta cernuntur, et contrita caryophylla aromatica aut iuniperum olent, flores autem albi, monopetali, in fundibuliformes, qui mense Ianuarii prodeunt, odore prorsus destituti dicuntur. Hisce tandem fructus succedunt, qui forma et magnitudine glandes quercinas, vel olivas quodammodo referunt. In principio colore gaudent viridi, postea rubescentem, tandemque nigrum splendentem induunt, odore caryophylla aromatica imitantur, et oleo quodam spissiori, quod, post coctionem in aqua expressum, natura ad oleum nucis myristicae, albedine et consistentia ad sebum animale accedit, largius impraegnati sunt.

§. III.

Truncus et rami cortice duplici, vel, secundum alios, triplici cinguntur, quarum exterior grysea, inodora, insipida, et plane inutilis est, binae interiores autem, firmissime cohaerentes, cinnamomum constituunt: Latet tamen oleum suaveolens unice in tenui cortice seu pellicula intima membranacea, quae ex multis vesiculis, oleo repletis, constat. Altera enim, cui etiam adhuc recenti laudata pellicula tam arte adhaeret, ut vix discerni, multo minus sine vesicularum dilaceratione et olei effluxu separari queat,

oleo aromatico penitus destituitur, ac solo propemodum principio terreo-gummoso styptico gaudet.

§. IV.

Descriptae arbores canelliferae in orientalis Indiae insula Ceylon, unice, et quidem in parte eius meridionali et occidentali, inter flumina Chilauw et Waluwe, tanto numero crescunt, ut vastae earum sylvae reperiantur. Numerantur etiam a quibusdam rerum orientalium scriptoribus (c), praeter descriptam, adhuc octo aliae arboris canelliferae species, quae corticem tamen ignobiliorem, maiori plerumque stypticitate, aut sapore camphorato, alioque peregrino donatam, largiuntur, ac verae igitur cinnamomi arbori neutiquam, intuitu bonitatis corticis, aequiparandae sunt. Fieri caeteroquin creberrime solet, ut ignobiliores hae species, quae hinc inde in aliis pariter Indiae orientalis regionibus crescunt, nec soli Insulae Ceylon, ut prior, propriae inveniuntur, cinnamomo genuino, quod incolae *Rasse Coronde* vocant, a fraudulentis admisceantur.

§. V.

Certam hae arbores aetatem postulant, priusquam cortex ad iustam maturitatem perveniat. Quae in vallibus enim, ubi terra sicca, arenosa atque tenerior reperitur, progerminant, post annum quintum adolescunt, reliquae autem, in solo humido et limoso crescentes, ad septem vel octo annorum aetatem pervenire debent, antequam cortex maturus detrahi possit. Diutius.

(c) SALMONS *Beschreibung der Elephanten und Zimmet - Insul Ceylon*, pag. 42.

tius praeterea corticis bonitas in aliis, ad decimum quintum scilicet vel sextum aetatis annum, perdurat, in aliis, deterius solum natale nactis, citius perit. Certis quippe annis praeterlapsis, trunci evadunt crassiores, et cortex, amissa dulcedine atque aromatici saporis suavitate, camphoratum acquirit indolem, tantamque crassitiem, ut in cannulas, radiis solaribus expositus, amplius sese convolvere renuat.

§. VI.

Post corticis detractionem, quae ordinario a certis hominibus, mercede conductis, mense Maio suscipitur, arbores denudatae quidem emoriuntur (d); at, cum ex radice, prius trunco caesim ablato, paullo post multi furculi progerminant, qui, exactis quinque vel sex annis, arborum magnitudinem cum desiderata corticis maturitate denuo consequuntur, et cito praeterea novae arbusculae ex fructibus supra descriptis, tum sponte decidentibus, tum hinc inde etiam a certis columbis, quae illis vescuntur, eosdemque ad pullos alendos in nidos suos transferunt, inter volandum fortuito sparsis, nascantur, nulla earum penuria unquam metuenda erit.

M 5

§. VII.

(d) Recentiorum peregrinantium nonnulli, qui ipsi cassiae cinnamomeae collectioni interfuerunt, referunt, corticem hunc nequaquam a truncis arborum, sed a resectis duntaxat ramis earum, detrahi, nec arbores ideo postmodum exarescere atque emori, sed novos rursus ramos extrudere, aequae ac falices, quarum rami apud nos vernali tempore citra earum interitum iterum iterumque rescinduntur,

§. VII.

Detracta cortex cinnamomea, ac debite ab inutili cineritia exteriori separata, radiis solaribus exponitur, ut, paullulum exsiccata, in fistulas contorqueatur, et oleum aethereum quoque, tenerrimae membranae interioris, firmissime medianae adhaerentis, vesiculis inclusum, ruptis iisdem, in totam penetret corticem, eamque grato pariter sapore et odore aromatico imbuat. Haec enim, uti supra pridem dictum fuit, solo pollet sapore styptico, et aromatica suavitate ante olei laudati transitum ac distributionem penitus destituta observatur. Ratio inde patet, cur cannulae tenuiores fistulis, ex crassiori cortice convolutis, semper praestantiores existant. Hae nempe, sub eodem pondere consideratae, plus substantiae inertis ac stypticae, quam priores, et longe minorem ex adverso olei aromatici quantitatem possident, adeoque, cum virtus aromatica unice ab oleo laudato derivanda sit, nemini mirum videri poterit, quod ea in corticibus crassioribus multo debilior sit, quam in tenuioribus.

§. VIII.

Triplici principio activo, *spirituoso - oleoso* nimirum, *resinoso*, et *terreo - gummoso*, cassia cinnamomea instructa est. Quando una enim eiusdem libra civilis grossiuscule contunditur, et, praemissa decenti maceratione in aqua falsa, humidae destillationi in cucurbita humiliori aut vesica cuprea subiicitur, igne substrato et per gradus aucto, aqua fragrantissima, coloris lactei, parte oleoso - spirituosae largissime referta, et grato cinnamomi sapore aromatico praedita, transtillat, ipsumque oleum substantiale, aureo colo-

colore, gratissimoque odore aromatico donatum, secum in recipiens ducit. Oleum hoc, ceu liquidum aqua specificè gravius, fundum petit, et biduo vel triduo elapso, demum separatum, drachmam circiter unam, scrupulos duo, et aliquot grana, vel etiam, si cinnamomum optimae notae fuerit, drachmas duas pendet.

§. IX.

Fixa principia extractionis beneficio manifesta redduntur. Quando una enim cinnamomi pulverisati uncia cum sufficiente aquae simplicis quantitate blandae digestionis submittitur, infusum suppeditat, coloris fusco-rubescens, saporis subdulcis, aromatico et subadstringente nonnihil remixti, odoris specifici cinnamomei. Sub evaporatione gratum cinnamomi odorem diffundit, et copiosam in principio materiam spumidam, pinguem, coloris pallide rubescens, quae olei aetherei particulis, calore expulsi et terra teneriori remixtis, sine dubio natales debet, ad superficiem extrudit. Extractum, ad perfectam pene siccitatem redactum, unam circiter drachmam pondere aequat, et colorem subfuscum, debilemque saporem adstringentem possidet. Tinctura spiritiuosa prima fusco-nigricans est, et saporem aromaticum, dulci tamen et subadstringente mixtum, nec non specificum cinnamomi odorem obtinet. Inspissata massam largitur fusco-nigricantem, sapore adstringente et grato simul subdulci et aromatico praeditam. Vncia una cinnamomi mihi drachmam unam et semissem dedit. Clare ex descriptis examinibus constat, virtutem cinnamomi adstrictoriam praecipue in parte gummosa, aromaticam vero in substantia resinosa et oleo aethe-

thereo quaerendam esse, et tincturam proinde atque infusum vinosum infuso aquoso longe praestantiora existere.

§. X.

Cinnamomum, in pulvere exhibitum, ob stypticam inprimis terreo-gummosi principii indolem, fibras partium solidarum satis valide adet et constringit, propter resinoso-oleosam vero substantiam solida nervoso-membranacea, interveniente vivido quodam ardore, ad vegetiores contractiones irritat, et sanguinem praeterea ac fluida reliqua commovet, impuritates tenaces, viscidas, pituitosas, attenuat, calorem intendit, fluidi nervei influxum auget, et vario hoc modo non tantum solida roborat, sed humorum etiam circuitum vegetiorem reddit. Ex vario hoc operandi modo quaevis virtutes generales, cinnamomo vulgo adscriptae, nimirum stomachalis, nervina, cephalica, uterina, atque cardiaca, et ex hisce iterum specialiores derivandae sunt. Opem nempe egregiam ferre consuevit in variis adpetitus atque digestionis vitiis, v.g. in anorexia, dysforexia, aepsia, dyspepsia immo ipsa pica et malacia, si illa scilicet ad accumulatis cruditatibus frigidis pituitosis, quarum resolutionem adiuvat, nec minus tunicarum flacciditati et atoniae, indeque pendenti languido motui peristaltico, quem denuo, flacciditatem corrigendo, fortiolem reddit, originem suam debent. Ex eodem ferme fundamento in variis fluxionibus serosis et seroso-sanguineis praeternaturalibus, vomitu nimirum, diarrhoea vulgari, lienteria, coeliaca, dysenteria, diabete, fluore albo etc. sese commendat, praesertim, si ante exhibitionem eius impuritates eliminandae
per

per congrua remedia resolutae et educatae fuerint, aut fluores hi solam laxitatem et atoniam fibrarum causam agnoscant.

§. XI.

Notatu pariter dignum est, corticem hunc, qui fluxiones serosas et sanguineo-serosas praeternaturales sistit, sanguineas naturales et non-naturales v. g. fluxum menstruum, lochialem etc., itemque foetus atque placentae uterinae exclusionem egregie promovere, et quidem eo certius ac citius, si eidem alia specifica, ut succinum, crocus, borax Veneta, salia mediae naturae etc., iungantur. Dum fibras enim leniter constringit, et sanguinis ac fluidi nervei in fibras musculorum motrices influxum auget, contractiones, ad praedicta expellenda necessarias, auctiores quoque reddit.

§. XII.

Latius, quam virtus stomachalis et uterina, vires nervinae atque cephalicae sese extendunt. Creberrime videlicet hic cortex proficuum fuit repertus in melancholia idiopathica, epilepsia cacochymica, coryza iusto diuturniori, vertigine, imbecillitate memoriae, apoplexia, affectibus soporosis, paralyti, hebetudine et plenaria abolitione sensuum externorum, itemque, ob generalem virtutem roborantem, in cachexia, tumoribus partium oedematosis, intumescentiis glandularum frigidis, febre intermittente quotidiana et quartana, adpetitu venereo nimis torpido, et singulis affectibus reliquis, qui ex nimia partium solidarum laxitate, humiditate, atonia, et humorum viscositate, languidoque circulo, vel liquidi etiam nervosi penuria nascuntur.

§. XIII.

§. XIII.

Haëtenus dicta primario de cinnamomo, in pulvere et infuso aquoso aut vinoso aegris exhibito, intelligenda erunt. Circa olei enim, essentiae ac spiritus, inde cum alcohole per abstractionem parati, virtutes differentia quaedam occurrit. Nam oleum aethereum, destillatione separatum, medicamentum summe activum est, forti virtute commovente, calefaciente, discutiente, exsiccante atque nervina, nulla vero adstringente, praeditum: Spiritus abstractitius subtiliorem duntaxat olei portionem continet, et ideo oleo longe temperatior est, et essentia denique, si rectificatissimo vini spiritu extrahitur, oleum solummodo et resinam solvit, styp-ticam vero substantiam intactam relinquit, vel exiguam saltem substantiae terreo-gummosae portionem, quam phlegma, menstruo spirituo-so adhuc inhaerens, solvit, in poros suos recipit; hinc nulla singulari etiam virtute adstrictoria pollet, et viribus saltem commoventibus, discutientibus, calefacientibus et roborantibus instructa est. Cinnamomum, quod addendum erit, in pulvere a granis aliquot ad scrupulum semissem, in infuso aquoso ac vinoso autem a scrupulo dimidio ad scrupulum integrum, immo drachmam dimidiam praescribitur.

CAP. XXXIV.

De Cassia lignea, et caryophyllata.

§. I.

CASSIA LIGNEA, *Cassia* seu *Canella Malabarica*, *Xylocassia* etc., *Mutter-Zimmt* aequae, ac cinnamomum, in fistulas sive cannulas convo-

convoluta est, maiori tamen, quam illud, rubedine tineta, crassior, et, ratione saporis, odoris atque virtutis, longe debilior deprehenditur. Odorem videlicet debiliorem spirat, et loco saporis acris, gratissima dulcedine remixti, debilem duntaxat saporem aromaticum, lentore quodam terrestri deturpatum, gustus organo sub manducatione imprimit: Aliquamdiu praeterea manducata non lignum, ut cassia cinnamomea, sed glutinosam solummodo materiam, quae paullatim in saliva diffluit, in ore relinquit.

§. II.

Cortex hic a trunco et ramis arboris canelliferae Malabaricae, Iavanensis ac Sumatrensis, quam LINNAEVS in Flora Ceylanica *Laurum foliis lanceolatis trinerviis nervis supra basin unitis* vocat, detrahitur, et cassia cinnamomea multo ignobilior est. Praeter partes enim *terreas, resinosas*, et copiosas ac valde crassas *mucilagineas*, in mixtione sua paucissimas tantum *spirituosas oleosas* continet. Olei aetherei penuria tanta est, ut libra integra, quod ipse expertus sum, sub destillatione humida ne guttulam in substantia largiatur, sed aquam solummodo lactescentem, grato sapore dulci et aromatico imbutam, reddat. Destillatio praeterea admodum taediosa est, ac lente procedit: Admoto quippe igne mitiori, protinus cessat, substrato autem paullo fortiori, massa terreo-mucilaginea, licet dimidia saltem vesicae pars aqua et cortice diffracto repleta sit, adeo expanditur, ut integra corticis frustula, una cum expansa mucagine, transcendere minitentur, et liquor hinc inde per alembici commissuras penetret.

§. III.

§. III.

Simillimae difficultates sub extractione et separatione partis mucilagineae occurrunt. Vnica enim cassiae pulverisatae uncia largam aquae molem tam copiosa, crassa atque tenaci mucilagine impraegnat, ut post digestionem in gelatinam, densam, fusco-rubicundam, mutata videatur. Mucilago haec, licet aquae recentis adfusione dilutior reddatur, filtra chartacea, ob insignem crassitiem et tenacitatem, transire recusat, et, si, adhibita vi maiori, per pannum lineum exprimitur, terra tenerior, quae altius ipsi immersa est atque involuta, simul penetrat, ut verum ideo substantiae mucilagineae pondus determinari nequeat, praesertim, cum notabilis insuper portio, linteo ac digitis sub percolatione ac forti expressione tenacius adhaerescens, a mole traiecta detrahenda sit. Felicius paullo opus succedit, quando cassia lignea, in maiora duntaxat frustra dissecta, extractioni ac leniori coctioni in olla subiicitur. Nam frustula facilius a mucilagine extracta cribri ope separari, et illa ficcari, haec inspissari, et sic pondera lance examinari possunt. Adhibita ultima hac methodo, ex uncia cassiae una extracti mucilaginei, iustae consistentiae, drachmam unam et scrupulos duo impetravi. Mucilago nondum spissata, quod addendum duco, per se considerata, ac penitus a reliquis principiis separata, uti hoc, sub expressione infusi per linteum, ex puriori hinc inde transeunte portione cognoscere licet, albicans quidem, inodora, ac plane insipida est; verum, cum sub extractione et percolatione praecaveri nequeat, quominus portio aliqua terrae tenerioris fusco-rubicundae, mucilagini altius immersae, immo ipsius substantiae resinosa

nosae pauxillum colatorii poros simul penetret, non mirandum est, quod massa spissata, praeter colorem fuscum, debilem quoque saporem aromatico-salinum adquirat, et ipsam cassiam aliquantulum adhuc redoleat.

§. IV.

Partis resinosae separatio minus facessere solet negotii, et post blandam cum spiritu vini digestionem tinctura inde resultat, coloris e rubro nigricantis, odoris aromatici, saporis acris, aromatici et subadstringentis, quae evaporando ad iustam spissitudinem redacta, massam relinquit, rubro-nigricante pariter colore tinctam, et sapore adstringente, cui subdulcis tamen ac debilis aromaticus mixtus deprehenditur, praeditam. Vncia cassiae una mihi drachmam unam et semissem huius extracti dedit. Residuum, cum aqua coctum, itidem in crassam atque tenacem massam mucilagineam resolvitur, et antea memoratae difficultates circa mucilaginis a terra separationem iterum obviae sunt.

§. V.

Vires calefacientes, commoventes, discutientes, roborantes atque nervinae in cassia lignea longe remissiores sunt, quam in cinnamomo, incrassantes vero ac demulcentes, quibus cinnamomum destituitur, ob mucilaginis copiam et crassitiem, notabiles inveniuntur, et inde etiam ratio praecipue petenda videtur, cur cassia lignea in morbis, ex nimia humorum tenuitate et acrimonia, partiumque solidarum erosione deducendis, v. g. in asperitate faucium, tussi, ardore ventriculi, cholera, dysenteria, stranguria etc. specificam virtutem exerat. Tota

quidem mucilaginis in ventriculo extractae moles, ob insignem glutinositatem, per vasa bibula et lactea ad sanguinem penetrare nequit, sed maxima eius pars in primis viis remanet, ast subtilior tamen portio, confluentibus tepidis liquoribus aquosis dilutior reddita, ad humorum circulantium massam transfertur, et hinc inde demulcendi atque incrassandi virtutem edit. Scriptores aliqui huic cortici specificas etiam vires in uvulae laxitate, fluore albo aliisque uteri adfectibus frigidis tribuunt; verum, in hoc passu cinnamomo, me sentiente, neutiquam praeferenda, sed potius postponenda erit, quoniam rudioribus principiis gaudet, et in iis quoque morbis, qui leniora adstringentia postulant, longe minorem efficaciam monstrat. Optime exhibetur in infuso vinoso et tinctura spirituosa, decocta autem et infusa aquosa nullius fere pretii sunt, nisi medicus nonnunquam ad crassae ac glutinosae mucilaginis actionem, indeque derivandas vires incrassantes et demulcentes, respicere velit. Datur etiam in pulvere a granis aliquot ad scrupulum unum et ultra.

§. VI.

CASSIA CARYOPHYLLATA, *Nelken-Zimmt*, cortex aridus est, cinnamomo paullo tenuior, asperiori superficie externa, colore, si a pellicula extima grysea probe purgatus fuerit, ex rufo ferrugineo, sapore acri aromatico, et odore caryophyllorum, quanquam longe debiliori, praeditus. Arbor, hunc corticem foenerans, non tantum in Nova Hispania, Brasilia, Guiana, Cuba et Iamaica, sed etiam in Insulis Zeylona et S. Laurentii crescit, et a LINNAEO *Myrtus foliis obverse ovatis*, a PLUKENETO *Caryophyllus*

lus aromaticus Indiae occidentalis folio et fructu rotundis, appellatur.

§. VII.

Natura corticem hunc *principiis gummosis, resinosis, et oleoso-spirituosis* parcissime saltem donavit. Nam integra libra civilis, quam humidae destillationi in vesica, post sufficientem in aqua falsa macerationem, aliquando subieci, aquae transtillanti colorem quidem ex albo flavescensem, et aromaticum saporem et odorem conciliabat, nullum tamen oleum substantiale largiebatur, si paucas miculas exceperis, quae aquae superficiei innatabant, et ob molem nimis exiguam non separari poterant. Non adeo larga quoque messis post extractionem aquosam et spirituosam adparuit: Ex integra enim corticis uncia, primum rectificatissimo vini spiritu extracta, tincturam fusco-nigricantem, odoris aromatici, valde acris ac paullulum aromatici saporis, obtinui, quae, blando calore spissata, vix drachmam unam massae gummeo-resinosae, colore obscure fusco, et sapore aromatico ac valde acri donatae, reliquit. Longè parciior adhuc, post residui coctionem cum aqua, substantiae mere gummosae proventus fuit, eademque vix ad scrupuli dimidii pondus adscendebat. Caput mortuum siccatum plane iners erat, et drachmas sex cum dimidia pendeat. Aliae cassiae recentis uncia, ordine inverso, primum cum aqua protractiori ac repetitae digestionis tradita, liquorem praebuit fusco-flavescensem, insipidum ferme, specifico tamen cassiae odore imbutum, qui, peracta decenti evaporatione, extracti gummosi, sapore austeriusculo atque nonnihil amaricante ingrato praediti, drachmam

N 2

semis-

femissem foenerabat. Tinctura spirituosa, quam post secundam residui siccati cum spiritu vini extractionem impetravi, grana triginta octo substantiae resinosae suppeditavit.

§. VIII.

Militat inter pharmaca roborantia, calefacientia, nervina, cephalica et stomachalia, in morbis, a pituita, humorum spissitudine et partium solidarum flacciditate oriundis, proficua. Caryophyllis aromaticis substitui potest, quoties moderatioris operationis medicamina desiderantur. Optime in infuso vinoso, a drachma dimidia ad integram et ultra, praescribitur.

CAP. XXXV.

De Cortice Caryophylloide Amboinensi.

§. I.

CORTEX CARYOPHYLLOIDES AMBOINENSIS, vulgo *Cortex Culilawan* dictus, est cortex crassus, aridus, ac parum, ob texturam paullo rariorem, ponderosus, colore intus et extus (a subcinereo-albicante scilicet pellicula externa debite purgatus) rufo-flavescente, aut flavo-rubente ac quasi lateritio, odore fragrante caryophyllaeo, sapore acri, aromatico, ad caryophyllorum saporem accedente, cui plerumque tamen lenissime amaricans ac debilis mucilagineus, immo terreo-subadstringens admixtus sentitur. Habitu suo externo et ipso pariter colore cassiam ligneam perfecte refert, frustra tamen longe crassiora sunt, nec convoluta in cannulas, sed plana potius, oblonga, et interdum saltim circa margines longitudinales nonnihil introrsum contorta. Optimus hic cortex iudi-

iudicatur, qui, a parte trunci superiori detractus, tenuior est, et circiter calamum scriptorium crassitie sua aequat, deterior ex adverso, qui infimam trunci partem cingit, et digiti minoris crassitiem habet. Prior enim puriori odore caryophyllaeo et satis penetrante acredine aromatica donatus reperitur; posterior autem odore magis lignum sassafras, quam caryophylla aromatica aemulatur, et fortiores praeterea saporem amarum, quam aromaticum, obtinet.

§. II.

Amboinenses, teste GEORGIO EVERHARDO RUMPHIO (e), hunc corticem *Salackal*, itemque *Salackar*, alii iterum atque alii populi *Tedio*, *Eyck*, *Haumo* etc., et reliqui denique omnes, qui lingua Malaccensi, in plerisque Indiae orientalis locis usitatissima, utuntur, *Culilawan*, *Culilavan*, *Coeli-Lawan*, nec non *Coelit-Lawang* appellant. Singulae hae denominationes, praesertim posteriores, licet magis minusve, si ad solum nempe vocabulorum sonum attendas, ab invicem discrepent, idem prorsus, corticem videlicet *caryophyllaeum* denotare videntur. Vocabula enim Malaccensia *Culit* et *Bugulawan* corticem caryophyllatum significant, et inde igitur corruptae adpellationes *Coeli-Lawan*, *Coelit-Lawang*, *Culilawan* ortum suum traxerunt.

§. III.

Arbor culilabanifera in quibusdam Insulis Moluccanis, maxime autem in sylvestribus ac valde montanis Insulae Amboinae tractibus spon-

N 3

te

(e) In *Amboinischen Kräuter-Buch*, Lib. II. Cap. 22. Conf. in. MICH BERNHARDI VALENTINI *Mus. Museor.* p. 249, et in *Appendice*, pag. 79.

te crescit, ac Lauri species est, quam *Laurum canelliferum Amboinensem* proceriorem, foliis longioribus atque trinerviis, baccis calyculatis oblongo-rotundis adpellandam censeo. Secundum vix allegati RUMPHII et FRANCISCI VALENTINI (f), descriptionem arbori, cassiam ligneam foeneranti, valde similis est, iustamque aetatem adeptam, admodum procera. Radices eius, quae altius in terram penetrant, ac tenui duntaxat cortice cinctae inveniuntur, saporem dulcem, subacrem leniterque aromaticum, specifico caryophyllaeo remixtum, obtinent, et, propter magnam cum ligno sassafras intuitu coloris, saporis atque texturae similitudinem, Bataviae a Chirurgis Hollandicis ligno sassafras creberrime substituuntur, nec raro contra eosdem morbos, quibus dictum lignum medetur, cum fructu adhibentur. Silentio caeteroquin minime praetermittendum erit, dulcedinem aromaticam foeniculatam in ligno sassafras paullo eminentiorem esse, quam in radicibus descriptis, et has ex adverso simul sapore caryophyllaeo, quo lignum sassafras destituitur, donatas reperiri, adeoque calidiori etiam, quam istud, natura gaudere. Caudex sive truncus recta adsurgit, et apud arbores adultas ea ut plurimum crassitie est, ut homo iustae staturae illum brachiis suis amplecti possit. Cortice tegitur, cuius in antecedentibus pridem uberiores descriptionem dedi, foris nimirum subcinereo-albicante, parvis verrucis ubique obsito, intus rufo-flavescente aut potius flavo-rubente, quasi lateritio. Lignum subluteo-albicans est, et hinc inde pariter,

(f) Vide Eius *Oud en neuve Ostindien*, Tom. I. pag. 210

ter, ipsius fere corticis instar, rubescens. Facile quidem exsiccatur, non adeo tamen compactum minusque proinde durabile deprehenditur. Rami maiores, e trunci parte superiori emissi, maxime sursum adscendunt, et parum itaque ad latera exporriguntur. E ramis maioribus ramuli multi virides ac satis rigidi minores exeunt, et ex hisce tandem folia, bina ubivis e regione nascentia, erumpunt. Haec, quae arboris cassiae lignae foliis admodum similia inveniuntur, adeoque notiora quoque lauri folia forma sua aemulantur, petiolata sunt, oblongo-ovata, mucronata, trinervia, rigida, adspectu et contactu sicciora, in superficie superiori plana, laevia, nitida, dilute viridia, in inferiori pallidiora gryseo-viridescentia, sapore caeteroquin praedita aromatico, leniter caryophyllaeo, ac paululum insuper mucilagineo. Arbores iuniores foliis vestiuntur longioribus ac latioribus, quam annosiores adultae. In hisce enim longitudine septem circiter, octo, vel novem pollices transversos vulgares, latitudine tres vel duos saltem cum dimidio aequant, in illis vero plerumque ad spithamae longitudinem et quatuor, immo quinque pollicum latitudinem excrescunt (g). Incolae, quod addendum duco, ex foliis oleum aromaticum eliciunt, idem-

N 4

que

(g) Circa magnitudinem foliorum VALENTINVS nonnihil quidem a RVMPHIO dissentit, eademque quatuor duntaxat vel quinque pollices longa, et tres pollices lata esse, perhibet: Attamen, cum RVMPHII relatio in hac parte plenior non minus quam accuratior existat, adeoque propius ad verum tem accedere videatur, eam merito praeferendam esse, putavi.

que cum corticis oleo, intuitu indolis ac virium, convenire testantur. De floribus multa, eaque certa, tradere nequeo, quoniam Auctores laudati decentem eorum descriptionem addere neglexerunt. Si coniecturae interim locum concedo, summe probabile mihi videri, non diffiteor, maximam hos et flosculos arboris canelliferae Zeylanicae ac Malabaricae intercedere similitudinem, eosdemque itidem albos esse, monopetalos atque stellatos, seu in lacinias petaloides sex divisos. Floribus mense Aprili baccae nuciformes, seu fructus oblongo-rotundi, calyculis suis, margine crenato sexfido praeditis, arcte ac paullo profundius insidentes, laeves, virides, glandibus quercinis haud dissimiles, multo tamen iisdem minores, succedunt. Sub crasso cortice externo nucleus, durus, bifidus, purpureus, latet, qui, aequae, ac apud lauri baccas, facile dividi potest. Sponte hi fructus, et quidem plerique adhuc immaturi, ex arbore decidunt, hinc ex nonnullis duntaxat, qui ad perfectam scilicet maturitatem pervenerunt, novae arbusculae progerminant. Quando diutius in arbore remanent, et parvae olivae magnitudinem consequuntur, cortex plerumque in aliquo latere dehiscit, ibidemque corpus, ochrae instar flavum, siccum ac molle, (meditullio excepto, quod duriusculum est), generatur, quod paullatim ad iuglandis magnitudinem excrescens, fructum adeo tegit atque involvit, ut amplius parva tantum eius pars in conspectum veniat.

§. IV.

A solo arboris trunco, quod initio pridem retuli, cortex laudatus detrahitur, paullulumque

que abrafa cuticula cinereo-albicante externa, in frusta oblongo-quadrata diffecatur, quae deinde, soli per aliquot dies exposita, siccantur, ut aetatem melius ferant, nec, situm contrahendo, indolis nativae integritatem et saporis maxime atque odoris gratiam perdant. Peraetis hisce in loco sicco, non clauso tamen, sed perflabili, adservantur, donec ad usus medicos, aliosve necessaria sint, vel mercatoribus peregrinis vendi possint.

§. V.

Valde activis hunc corticem principiis instructum esse, non tantum odor fragrans caryophyllaeus, et sapor aromaticus, sed ipsa etiam examina chemica probant. Sunt autem *spiritus*, *oleum aethereum* et *substantia fixa resinosa ac gummea*. Sub humida nimirum destillatione aqua transcendit lactea, fragrans, sapore acri aromatico simulque amaricante praedita, cui oleum essentiale aethereum tam exigua tamen quantitate, ut, recepta corticis grossiuscule comminuti libra dimidia, pondere suo post separationem vix drachmam dimidiam expleat. Oleum hoc levissima tantum flavedine tinctum adeoque aquae fere instar limpidum est, et sapore acri aromatico gaudet, odore autem tum caryophylla aromatica, tum lignum sassafras aemulatur, non aliter, ac si ex oleo caryophyllorum et ligni sassafras mixtum esset. Quantitas olei indicata, quam ego impetravi, valde quidem exigua est, vero nihilominus simillimum existit, corticem recentiore, quem Insularum Moluccensium incolae destillationi subiiciunt, plus reddere. Nam cortex hic, ob rariorem suam texturam, sub translatione sua et diuturna adservatione vo-

N 5

lati-

latiles particulas oleoso-spirituosas sensim sensimque amittit, et, teste RUMPHIO, post decem annorum decursum tam debilis evadit, ut vix amplius ad usum consuetum aptus reperiat. Non dubitandum proinde est, quin, destillatione in regionibus nostris ab aliis iterum iterumque suscepta, messis olei aetherei, pro diversa corticis adsumti aetate ac bonitate, nunc largior, nunc parcior, futura sit.

§. VI.

Infusum corticis pulverisati spirituosum primum colore rubro saturiori, odore grato ac satis forti caryophyllaeo, et sapore acri, aromatico, itidem caryophyllato, cui lenis tamen amaricans et longe adhuc debilior austeriusculus admixtus sentitur, praeditum est. Sub blanda evaporatione odorem caryophyllaeum constanter diffundit, tandemque massam iustae consistentiae ac coloris flavo- et subfusco-rubelli largitur, quae a tinctura liquida intuitu saporis et odoris nequaquam differt, praeterquam, quod sapor acrior magisque urens, paullo remissior tamen, quam apud extractum caryophyllorum aromaticorum, deprehendatur. Sub degustatione linguae tenaciter adhaeret, et talem illi sensum imprimit, ac si glutine crasso obducta esset; unde conicere licet, partibus resinosis purioribus multas quoque mucilagineas interiectas esse. Ex corticis uncia semisse grana quinquaginta huius extracti obtinui.

§. VII.

Ab infuso et extracto spiritoso infusum non minus, quam extractum aquosum primum notabiliter discrepat. Infusum enim, blanda pariter dige-

digestione paratum, colore rubro, ad fuscum nonnihil vergente, tinctum cernitur, et licet caryophyllaeum quoque odorem emittat, saporem tamen solummodo amaricantem, subacrem ac leniter caryophyllaeo-aromaticum possidet. Filtro infusum, ob indolem mucilagineam, gustu et tactu facile cognoscendam, lentius paullo per chartam bibulam transit, et post evaporationem extractum relinquit flavo- et rubello-fuscum, immo, sub mole maiori plane nigricans, odoris debilis, magis ad odorem rob sambuci, quam caryophyllorum, accedentis, et saporis tantum amaricantis, acriusculi ac modice aromatici. Vncia corticis dimidia mihi scrupulos duos et grana octo suppeditavit. Si loco aquae aut spiritus vini, sicuti sub usu eiusmodi aromaticorum satis solenne est, solum vinum Gallicum ordinarium huic cortici superfunditur, post digestionem notabile discrimen circa odorem et saporem observatur. Infusum enim saturate flavum debilem atque ingratum odorem caryophyllaeum spirat, et saporem duntaxat subacrem nauseosum, acido remixtum, linguae imprimit. Sub filtratione chartam bibulam tardius etiam, quam infusum mere spirituosum, penetrat, ac, blanda postmodum evaporatione inspissatum, massam praebet flavo-rubentem atque subfuscam, quae ingrato odore balsamico, vix amplius aut ne vix caryophyllaeo, et sapore subsalfo-acidulo leniterque simul amaricante, aromaticae tamen acridinis penitus experte, gaudet. Quantitas praeterea valde exigua est, et saltem ex uncia corticis semisse ad triginta quatuor granorum pondus adscendebat.

§. VIII.

Vires medicae huius corticis, sicuti ex praecedentibus clare intelligitur, ad principium oleoso-spirituosum ac fixum resinosum praecipue redeunt, et calefacientes, diaphoreticae, diureticae, antiputredinosae, roborantes, nervinae, cephalicae, cardiacae, stomachales carminativae et uterinae sunt: Vnde haud contemnendum quoque auxilium ab usu eius in dysforexia, et dyspepsia, nausea, vomitu, diarrhoeis chronicis, cardialgia ac colica vere flatulenta, hydropé ascite incipiente et intercutaneo, cachexia, anasarca, oedemate membrorum, scorbuto recentiori pituitoso, adfectibus paralyticis, catarrhalibus ac frigidis rheumatico-arthriticis, nec minus in refractaria viscerum obstructione, asthma humorali, apoplexia serosa, hemicrania rheumatico-catarrhali, dysuria, nephritide sabuloso-pituitosa, fluore albo, suppressione mensium et morbis reliquis, a crassis, mucido-tartareis ac pituitoso-putridulis humoribus, et nimia insimul partium solidarum humiditate, flacciditate et atonia potissimum oriundis, expectandum est. Pro usu interno in pulvere a granis quinque ad scrupulum unum, in infuso aqueo-vinoso autem, quod monstrante tamen examine chemico minus efficax est, a drachma dimidia ad drachmam unam vel duas praescribitur. Admiscetur praeterea pulverisata dosi refracta pilulis, morsulis, electuariis etc., et valde activa pariter tinctura in adfectibus frigidioribus a guttis 20. ad 30. 40. propinatur. Externe cucuphas roborantes, et sacculos nervinos, discutientes ac carminativos ingreditur, et utiliter quoque inter species, ad
con-

condienda defunctorum corpora necessarias, recipi potest (h).

§. IX.

Amboinenses pluriumque Insularum Moluccensium incolae oleum, e cortice et foliis destillando prolectum, magni aestimant, eodemque creberrime contra varias aegritudines utuntur. Valde inprimis istud in renum atque vesicae vitiis proficuum credunt, et bis itaque de die, ante prandium nempe ac coenam, ad guttas 3. 4. 5. 6. in vino adusto sumtum, in ischuria et dysuria singulare prorsus remedium esse, perhibent. Vfus externus adhuc latius patet, et ibidem proinde interno longe etiam frequentior est: Saepissime videlicet hoc oleum unguenti loco contra luxationes, contusiones, dolores arthriticos et rebelles membrorum adfectus paralyticos adhibent, immo VALENTINVS, idem pernionum quoque remedium praestantissimum esse, testatur. Ego memoratas olei virtutes priores, usu diuturno atque creberrimo procul dubio confirmatas, negare quidem nolo, promiscuum tamen usum eius in morbis praedictis, praesertim adfectibus arthriticis et suppressa urinae excretionem, suadere minime audeo, quoniam causae harum aegritudinum ita plerumque comparatae inveniuntur, ut calida eiusmodi remedia haudquaquam perferant, sed interno et externo eorum usu magis potius exasperentur.

CAP.

(h) Plura de virtutibus allegatis in *Dissertatione nostra, de hoc cortice 1753. habita*, dicta fuerunt, et illuc ideo sciendi cupidos ablegandos censeo.

CAP. XXXVI.

De Cortice Winterano Vero et Spurio.

§. I.

CORTEX WINTERANVS vel *Verus*, vel *Spurius* est. *Verus*, qui etiam *Cortex aromaticus Magellanicus* appellatur, crassus ac densus existit, et partim in tubulos convolutus, partim in frusta maiora et minora diffractus, ad nos adfertur. Superficies eius externa gibba colorem luteo - subfuscum obtinet, totaque parvis punctis nigricantibus irregularis figurae conspersa cernitur, concava interna autem colore brunneo, ad cinereum nonnihil inclinante, gaudet, et compactior denique substantia, utrique superficiei interiecta, brunneo - rubentis coloris est, ac non solum odorem aromaticum fragrantissimum spirat, sed valde acrem etiam, pungentem et urentem saporem, qui partim cinnamomeum, partim caryophylleum aemulatur, linguae imprimit. In Europa eximius hic cortex anno 1579. primum innotuit, suumque cognomen WILHELMO WINTER, navarcho quondam Anglicano, debet, qui illum dicto anno, cum, feliciter peracto itinere, circa totum orbem suscepto, in Angliam rediret, ex freto Magellanico secum attulit.

§. II.

Arbor, de qua detrahitur, non tantum in Insulis freti Magellanici, sed passim quoque in littoribus terrae continentis, freto memorato conterminae, crescit et C. BAVHINO *Laurifolia Magellanica cortice acri*, CLVSIO *Arbor aromatica Magellanica*, et SLOANIO *Periclymenum*.

num rectum, foliis laurinis, cortice acri, aromatico dicitur. Secundum STEPH. FRANCISCI GEOFFROY descriptionem (i), mediocris magnitudinis est, malo nonnihil similis, radices late diffundens, ramis magis patula, quam alta, cortice foris cineraceo, crasso, intus vero ferrugineo. Folia, sesqui unciam longa, unciam lata, ex utraque parte acutiora cum extremo obtuso et quasi bifido, dilute virentia, pediculo semipollicari inhaerent. Flores ex foliorum alis oriuntur duo, tres, quatuor aut amplius, communi pediculo unciali affixi, candidissimi, pentapetali, Periclymeni floribus nonnihil similes, Iasmini odore fragrante. Floribus deciduis succedit fructus conglomeratus ex duobus, tribus, vel plurimis acinis, communi pediculo affixis simulque congestis, dilute virentibus, maculis nigris nonnullis respersis; in quibus semina continentur nigra, aromatica, inaequalia, uvarum granulis nonnihil similia.

§. III.

Valde activis hic cortex *principiis oleoso-spirituosis* ac *gummeo-resinosus* donatus reperitur. Nam aqua simplex, super eum, praevia maceratione temporaria, in cucurbita vitrea blando igne abstracta, lacteum colorem, lenemque odorem aromatico-balsamicum cinnamomeo-caryophyllaeum, terebinthinaceo remixtum, et similem quoque saporem nanciscitur; oleum aethereum vero, aquae innatans, odorem fragrantissimum balsamico-aromatico-terebinthinaceum spirat, ac saporem acri-amarum, nonnihil pariter terebinthinatum gustus organo imprimit. Ab aqua separatum, et per aliquot menses aestivos in

(i) In *Tract. de Mat. med. T. II. pag. 177.*

in vitro repositum, duas substantias diversas offert, quarum altera sebaceo - unguinosa, alba, et aqua specificè gravior, altera aqua specificè levior, liquidior, et, olei citri Italici instar, subflavo colore tincta est. Vtraque quantitate exigua elicitur, et ex integra corticis libra civili coniunctim unum duntaxat scrupulum pondere aequat.

§. IV.

Quando, absoluta destillatione aquosa, cortici, in cucurbita relicto, spiritus vini rectificatissimus superfunditur, et destillatio post viginti quatuor horarum macerationem, secunda vice suscipitur, spiritus in receptaculum transit, qui debilem odorem ac saporem aromaticum terebinthinatum obtinet, et in cucurbita, novo rursus spiritu vini infuso, post sufficientem digestionem tinctura nascitur, quae sapore valde amaro, acri, aromatico et odore grato caryophyllaeo gaudet. Extractum, inde blanda primum spiritus in cucurbita abstractione et perfecta postmodum evaporatione in concha aperta paratum, duplicis naturae massam, alteram nempe mere resinosa, alteram resinoso-gummeam, in aqua non minus, quam spiritu vini solubilem, sistit. Color substantiae utriusque obscure quidem brunneus, odor balsamicus et sapor amarus et aromatico - caryophyllaeus est, postremus tamen in parte mere resinosa, tam amaroris, quam acredinis aromaticae intuitu, multo fortior, quam in parte resinoso-gummea, apprehenditur. Discrepat etiam quantitas. Nam ex libra corticis una, si extractio, tincto spiritu vini decantato, novoque iterum adfuso, toties reiteratur, donec spiritus nullum amplius colorem in-

induat, duae circiter unciae cum semisse extracti resinoso - gummei, et bini tantum scrupuli extracti mere resinosi, impetrantur. Peracta penitus extractione spirituosa, ex cortice residuo cum adfusa aqua simplici, adiuvante tamen digestionem ac leni tandem coctione, liquidum flavum, odoris balsamico-aromatici et saporis valde amari, parari potest, quod, evaporando inspissatum, unciam unam et semissem massae mere gummosae, colore fusco, odore aromatico et sapore salino - amaro praeditae, relinquit (k).

§. V.

Inter potentiora medicamenta resolventia, irritantia, calefacientia, nervina, cephalica, stomachalia, carminativa, purificantia, diaphoretica, diuretica, anticatarrhalia, antiputredinosa et antiscorbutica hic cortex militat, et in variis itaque morbis, maxime autem in vitiis appetitus et digestionis aliisque primae culinae affectionibus praeternaturalibus, a crudis viscidarum colluvie et tunicarum relaxatione potissimum oriundis, nec minus in cachexia, leucophlegmatia, oedemate membrorum, hydrope ascite incipiente, asthma pituitoso, nephritide mucido - fabulosa, et scorbuto frigido (l), utiliter

(k) Plura de hisce in *Domin. D. CAROLI FRID. HARSLEBEN Dissertat. de Cortice Winterano*, 1760. sub mea directione habita, videri possunt.

(l) „WINTERVS VERO, CLVSIVS *Exot. Lib. IV. Cap. I. pag. 76. scribit*, illius corticis facultates „nullas exploratas habuit, sed eo recente vel ex- „siccato et in pollinem trito, ut in eduliis Cannelae aliorumve aromatum vicem suppleret, usi
Carth. Mat. M. II. Tom. O „sunt,

ter haud raro usurpari poterit. Interne adultis in pulvere a granis quindecim ad drachmam semissem, in infuso vinoso autem a drachma una ad duas exhibetur, et pulvis subinde etiam pilulas, morfulos et electuaria ingreditur. Externe discutiendi ac roborandi fine speciebus pro cucuphis, facculis, siccisque epithematibus, contra vertiginem, epilepsiam, hemicraniam refractariam, cephalalgiam catarrhalem, paralyfin, similesque adfectus, capiti et aliis corporis partibus adplicandis, additur.

§. VI.

CORTEX WINTERANVS SPVRIVS, alias etiam *Cassia lignea Iamaicensis*, *Costus Arabicus Officinarum*, *Costus corticosus et ventricosus*, *Cinnamomum Magellanicum* etc. dictus, *weisser Zimmt*, citius paullo, quam verus, Medicis Europaeis cognitus fuit, nec a WINTERO, uti vulgo creditur, sed ab ignoto quodam alio peregrinatore primum ex America in Europam translatus est (m). In cannulas quoque convolutus advehitur, ac cassia cinnamomea, lignea et caryophyllata crassior, cortice autem Winterano vero tenuior atque fragilior existit. Colorem in superficie gibba externa albido-subluteum, in concava interna album, et in ipsa substantia interiori tum albidum, tum flavescentem possidet, et naribus odorem gratissimum, nucis myristicae

„sunt, qui ea navi vehebantur. Postea tamen
„intelligebam, adversus stomacacis sive scorbuti
„morbum, quo illorum nonnulli in ea navi affe-
„cti fuerant, non infeliciter usos esse etc.,

(m) Vid. *Sammlungen aller Reisebeschreibungen*,
Tom. XVII. Lib. VII. Cap. II. pag. 594.

cae ac cinnamomi odori haud dissimilem, gustus organo saporem valde acrem, aromaticum atque amarum, ex cinnamomi quasi, zingiberis ac caryophyllorum sapore mixtum, imprimit.

§. VII.

Arbor, cuius truncus et rami hoc cortice cinguntur, in Insulis Americae, Cuba, Iamaica, S. Dominici etc. nec minus in terris, freto Magellanico vicinis, in Carolina itemque, Peru, et Insula Madagascar habitat, et SLOANIO *Arbor baccifera laurifolia aromatica fructu viridi calyculato, racemoso*, PLUCKENETO *Arbor Cassiae lignae Iamaicensis cortice acri candicante*, et LINNAEO *Laurus foliis enerviis obverse ovatis obtusis* audit. Referente antea laudato STEPH. FRANCISCO GEOFFROY (n), arbor procera est, ad quatuor vel quinque hexapedas assurgens, ramosa, cuius truncus saepe femoris humani crassitudinem aequat, et ramorum plurimi deorsum propendent. Duplici cortice circumvestitur, exteriori uno, lineam crasso, cineraceo, maculis albicantibus variegato, rugis quibusdam fuscis circularibus exasperato; interiori altero, laevi, cinnamomo crassiori, aromatico, in antecedentibus fufius pridem descripto. Folia summis ramulis inordinate adnascuntur, pediculis pollicaribus innixa, duas uncias longa, unciam unam lata, circa pediculum angustiora, versus extremum latiora et subrotunda, ex pallido vel flavo virentia, nitentia, glabra, ad Laurocerasi folia nonnihil accedentia. Ex ramusculorum extremis oriuntur pediculi, qui flores sustinent umbellatim congestos, constantes ex calyce multifido, quinque petalis rubentibus aut

O 2

pur-

(n) L. cit. pag. 175. sequ.

purpurascentibus, quorum meditullium occupat pistillum crassum. His succedunt baccae calyculatae, pisi crassitudine, subrotundae, primo virides, dein purpurascentes, continentes in pulpa subviridi, mucaginosa, quatuor semina, irregularis figurae, nigricantia, lucida.

§. VIII.

Canella alba a Cortice Winterano vero parum quoad *principia constitutiva* discrepat, et haec in posteriori paullulum duntaxat subtiliora, acriora ac penetrantiora, quam in priori, inveniuntur. *Oleum essentiale aethereum* sub destillatione copiosis partibus crassis mucido unguinoso remixtum prodit, et hisce igitur postmodum separatis, exigua tantum eius quantitas colligitur. Nam cum integram aliquando libram civilem canellae albae, grossiuscule contusae ac debite in aqua maceratae, destillationi in vesica cuprea submitterem, aqua albido-flavescent, turbida, sapore acri aromatico, odore fragrante praedita, transibat, et paullatim ipsum oleum, saturate aurea flavedine tinctum, secum in receptaculum educebat. Oleum hoc, quod aquae sub destillatione, et post eam, usque ad separationem, perfecte innatabat, vitri recipientis lateribus adeo circumquaque adhaerebat, ut tota aquae superficies eodem copiose contexta, idemque minimum ad unciae dimidia pondus adscendere videretur: Verum enim vero spem meam eventus fefellit, et, separatione suscepta, vix scrupulum dimidium olei limpidi, saturate flavi, aromatici, impetravi. Longe maior quidem portio adhuc aderat, attamen illa ob valde glutinosam suam indolem, separari atque seorsim colligi nequibat, dum partim receptaculi, partim

tim vitri hypocleptici lateribus, unguenti, aut crassi olei expressi instar, adhaerescens, quacunque etiam adhibita encheiresi, defluere renuebat. Aqua etiam multis adhuc particulis oleosis impraegnata erat, ac diu igitur turbida permanebat. *Dominus Doctor HARSLEBEN*, quod addendum duco, integrum scrupulum olei ex libra corticis una sese obtinuisse, idemque aquae primum innataffe, deinde autem, brevi interiecto tempore, ad fundum descendisse, in allegata *Dissertatione pag. 23* refert. Fateor, me diversae huius observationis rationem nondum penitus perspicere; suspicor tamen, adhibito forsan igne fortiori, plures partes rudiores unguinosas, quibus quantitas aequae ac gravitas aucta est, sub destillatione expulsas, et oleo aethereo subtiliori una cum impuris quibusdam terreis, violentius abreptis, immixtas fuisse. Coniecturae huic ipsius olei, ab aqua seiuncti, qualitas quodammodo favere videtur; quippe quod ex duplici substantia, altera nimirum crassiori, vitri fundum occupante, altera fluidiori supernatante, compositum erat.

§. IX.

Principia *fixa gummeo-resinosa*, quae viribus oleo aethereo parum cedunt, et amaritiam canellae potissimum conciliant, maiori quantitate mixtionem ingrediuntur. Tinctura spirituosissima prima colorem fusco-rubescens, saporem acrem, aromaticum ac valde amarum, et odorem ipsius canellae specificum obtinet. Blanda evaporatione inspissata saporem aromaticum, qui principio oleoso-spirituoso praecipue adscribendus venit, maximam partem amittit, ac solum fere amarum retinet. Ex uncia canellae

una drachmas duas et grana sex huius extracti impetravi. Infusum aquosum primum flaves-
cens est et intense amarum. Post evaporatio-
nem massam relinquit, odore fusco et magna
pariter amaritiae praeditam, quae, integra pari-
ter canellae albae uncia extractioni subiecta, cir-
citer scrupulos quatuor, vel drachmam unam
cum semisse pendet.

§. X.

De virtutibus medicis multa addere superse-
deo, quoniam cum illis, quae cortici Wintera-
no vero adscriptae fuerunt, potissimam partem
conveniunt; irritandi tamen facultas, ob mino-
rem acredinem, paullo remissior deprehenditur.
Adhibetur quoque eodem modo, et pro usu in-
terno a drachma dimidia ad drachmas duas vino
infunditur, aut pulverisata alias compositiones,
pulveres nempe, electuaria, morsulos, etc. in-
greditur; pro usu externo autem inter sacculos
nervinos, cucuphas cephalicas et pulveres cy-
prios recipitur, immo inter ciborum condimen-
ta subinde pariter locum invenit.

CAP. XXXVII.

De Camphora.

§. I.

CAMPHORA, alias etiam *Caphura*, itemque
Casura dicta, recte in *crudam* et *depuratam*
dividitur. Cruda, ob ad-et immixtas partes re-
crementitias, nondum perfecto pollet candore,
sed gryseum colorem obtinet, et propter hunc
ideo et exiguas tantum hastulas crystallinas, ad
salis

salis culinaris impurioris ac grossioris formam habitu externo accedit. Colligitur ea ac sublimando separatur, tum in Iaponia et China, tum etiam in Insulis Borneo et Sumatra; maxima tamen quantitas, quae alibi venalis prostat, ex Iaponia ad gentes externas transvehitur.

§. II.

Differunt forma totius et partium externa arbores, quae in Insulis Borneo et Sumatra camphoram reddunt, ab arboribus, quae idem concretum in China et Iaponia largiuntur. Nam arbor camphorifera Iaponiae, quae a KAEMPFFERO *Laurus camphorifera* vocatur, et in Iaponiae tractibus occidentalibus, maxime autem in provincia Satzuma Insulisque adiacentibus uberius proventus est, ad vastam tiliae magnitudinem excrescit. Radicem habet, uti vix memoratus KAEMPFFERVS refert (o), validam ac parum brachiatam, largiori tamen prae partibus reliquis substantia camphorata instructam. Truncus cortice scabro nonnihil ac pulli coloris, rami vero iuniores nitente, laevi, viridiusculo, facile tamen, ob interioris superficiei glabritiem et mucositatem, detrahendo, cinguntur. Medulla magna, fungosa ac lignosa est, lignum recens candidum, siccatum vero colorem ex rufo variegatum acquirit. Folia lauri vulgaris foliis similia inveniuntur, et flosculi, qui mense Maio Iunioque in fastigiis ramulorum inter foliorum axillas prodeunt, albi et hexapetali sunt, iisdemque tandem baccae succedunt, per maturitatem atro-purpureae et splendentes, pisa maiora magnitudine aequantes, figura quodammodo turbinata, pericarpio molli purpurascente, et

O 4

sapo-

(o) In *Amoenitat. exot.* pag. 771. *sequ.*

saporem ex camphora caryophyllaceo praeditae, quae intus nucleum, grani piperis magnitudine, cortice nigro micante obductum, bifidum, oleosum, fatui saporis, continent.

§. III.

Altera arbor camphorifera, quae Insulas Sumatram et Borneo patriam agnoscit, secundum GRIMMII descriptionem (p), caudicem habet recta adscendentem, et ramos suos eleganter explicat. Lignum eius ad aedificia perutile reperitur, et, ferra dissectum, fortem spirat odorem, multumque ostendit pinguedinis. Folia sunt magna et carnosae, antea acuta, et camphorae odorem contrita emittunt, qui non adeo diu tamen perdurat, sed denuo, consumptis paulatina exhalatione particulis volatilibus, cessat; magna caeteroquin haec et arboris caryophylliferae folia, quoad formam, similitudo intercedit. Fructus, quos profert, formosi sunt atque oblonge rotundi, parvamque nucem avellanam magnitudine aequant. Cortice tenui vestiuntur, quae rursus alteri elegantis formae tunicae, diversis coloribus, rubro scilicet, purpureo, flavo ac viridi praeditae, inclusa haeret. Haec posterior integrum contegit fructum, et superius, instar tulipae, quam figura etiam nonnihil refert, sese aperit. Fructus conditi grato pollent sapore et subtili odore camphorato, adeoque etiam in India inter praestantiora referuntur alexipharmaca. Ex fructibus hisce, ut et ex foliis ac floribus, aqua destillata satis activa, itemque oleum aethereum et expressum elici possunt, et ex ligno etiam, ad medullam usque discisso, copiosa materia oleosa prodit.

§. IV.

(p) In *Miscell. A. N. C. G. Dec. II. Ann. I. p. 371.*

§. IV.

Ex foliis, cortice, ligno, ramis et maxime radicibus, contritis, raspatis, aut grossiuscule saltem dissectis arborum descriptarum, camphora cruda ab incolis Chinae et Iaponiae, maxime autem a rusticis provinciae Iaponicae Satzuma et Insularum Gotho, singulari destillatione ac sublimatione separatur. Methodus haec ab Autoribus diversimode quidem describitur, plerorumque tamen descriptio ad sequentia redit: Radices scilicet, quae, uti antea dictum fuit, prae reliquis arborum partibus camphora abundant, vel simul etiam, si sufficiens radicum copia desit, folia, cortices, lignum et ramos cum aqua simplici, tanta quantitate adfusa, ut species aliquantulum tegat, in vesica, vel singulari ahenno ferreo aut cupreo, cui amplum capitellum sive alembicum, fictile, rostratum, intus pileo seu operculo stramineo obductum, imponitur, coquunt, et igne moderato, lutatis prius commissuris et receptaculo adaptato, camphoram in alembicum, ubi forma sicca capitello stramineo adhaeret, et ex parte etiam cum aqua transtillante in adplicatum receptaculum, propellunt (q).

§. V.

Occurrunt quoque, teste laudato GRIMMIO (r), multae inter arbores camphoriferas, reliquis hoc concreto ditiores, quae ideo camphoram *nativam, puram, candidam, virgineam*, absque ulla destillatione ac sublimatione sepa-

O 5

ran-

(q) Conf. BREYNIUS in *Miscellan. A. N. C. G. Ann. 4. Observat. 130.* Item KAEMPFERUS *l. cit. pag. 272.* NEVMANNUS in *Lect. de Camphora.* (r) *L. cit.*

randam, largiuntur. Incolae igitur, postquam externis quibusdam signis cognoverunt, arborem camphora divitem esse, omnibus eam foliis, cortice ac ligno externo usque ad medullam spoliant, et camphoram ex medulla fissa, in qua hinc inde sub forma salis coagulati, tenuis, crystallini, foliati, latet, eximunt. Alii coacervatam crystallinamque hanc camphoram in interstitiis fibrarum, nec non lacunis et fissuris sive hiatibus ipsius ligni, potissimum reperiri tradunt: „Circa Sumatrensem camphoram, WILHELMVS ten RHYNE scribit (s), ita a me comper-
tum est; vetustae arboris corticem exsecant et
olfaciunt, ac truncum pulsitant Insulani, atque
ita ex colore, sono et odore fiunt gnari, num
illa infarciatur camphora, nec ne; si bene omen-
nentur, integram arborem radice tenus de-
truncant, corticem avellunt, lignum findunt,
ubi fibrarum interstitio, praesertim ubi nodus
aliquis, vel hiatus est, gummi hoc se insinuat,
et in exiguas tenerasque lamellas, (quae quo
grandiores et magis candidae sunt, et splen-
descunt, eo plaris veneunt,) grumescens, ve-
luti terebinthina larici, vel congelatum anisi
oleum, seu uti confertae piscium squamae, in-
haeret, haud magno lucro laborem pensans.
Folia sat fortis fragrantiae sunt, non ita lignum,
uti quidem Iaponensis Camphorae est: Hoc
enim Sumatrense non ita compactum, firminus
tamen Pino, rarius Quercu, nec ita longae-
vum, fibrarumque textura pulchrum, (his
enim praerogativis Iaponense commendatur,)
existit, fabрили serviens usui.„ Cara admodum
haec

(s) Vide IACOBI BREYNII *Prodr. Fasciculi rar. Plantarum primi et secundi*, pag. 13.

haec camphorae species est, quoniam magnae arbores, teste GRIMMIO, unam duntaxat libram, vel libram unam cum dimidia, libras duas, et ad summum tres libras foenerantur, et Chineses praeterea, Iaponenses, ac plurium regionum orientalium incolae eam, ob vires praestantiores, camphorae Iaponicae longe praeferunt.

§. VI.

Nulla amplius depuratione, nulla nova sublimatione virginea haec camphora indiget, rudior vero seu cruda ordinaria, quae methodo antea descripta in Iaponia et alibi ex radicibus, cortice, ligno etc. arboris educitur, denuo sublimari debet, ut formam ac proprietates, quibus camphora Officinarum donata cernitur, adquirat. Olim hanc sublimationem depuratoriam, quam Indi ignorant, quamque Europaei vulgo *Rafinationem* vocant, Veneti suscipiebant; nostra vero aetate illa praecipue in Belgio foederato, et quidem secundum vix allegati WILHELMII ten RHYNE testimonium sequenti modo peragitur: „Quae (*camphora scilicet Iaponensis impura*), inquit (t), quomodo postea alibi, „ego saltem in Belgio vidi, purificetur, iam „palam innotuit; Exstructis nempe ex laterculis „furnis, longa serie copulatis, imponuntur „oblongi colli, compressioris quadantenus ventriculi, vitra (chartaceis incrustata striis, ne ad „lapilli aliusve duriusculi corporis offendiculum „sindantur rumpanturve excandefacta), quibus, „admixto vivae calcis pauxillo (videlicet ad libram impurioris camphorae uncia circiter calcis

(t) L. cit. pag. 12.

„cis una (u); atque in hoc totum, si quod est,
 „arcanum consistit), iniectantur camphorae fru-
 „stula, quae modico igne in arenae balneo can-
 „didam, rotundi glomi forma, ad vitri conve-
 „xum adfricant resinam; ubi accurate observant
 „hi rectificatores, ne dictum collum obturetur;
 „quem in finem subcurvo ferro tentant idem, ac
 „ferramentum hoc ad intestinum colli orificium
 „circumagunt, ne reseratarum fuliginum (quas
 „alii gossypio excipiunt, ut arthritidi, et tumo-
 „ribus *Φλεγμονώδεις* medicentur) fervore diffiliat
 „lagma, qua frigefacta frangitur eadem et subli-
 „matae camphorae, ut vocatur, panis eximi-
 „tur, paucis faecibus cum calce residuis etc.,
 Alii. sicuti ex *priori Editione Tom. II. pag. 198.*
 constat, hanc depurandi methodum fufius de-
 scripserunt; at eam, evitandae prolixitatis caus-
 sa, rursus hoc loco exponere supersedeo.

§. VII.

Camphora, praedicto modo depurata, sub-
 stantia sicca est, contactu nec unguinosa, nec
 aspera, candida, splendens, crystallina, fragi-
 lis, volatilis, inflammabilis, odore fragrantissi-
 mo, sapore penetrante, acri, urente, paullu-
 lumque amaricante, praedita. Differt igitur ab
oleo coagulato, sale volatili oleoso, resina, gummi,
gummi-resina ac succo inspissato (x), et peculiare
 potius

(u) Conf. *Cel. ANDR. SIEGM. MARGGRAFII*
Chymische Schriften, I. Theil, pag. 262.

(x) NEVMANNVS, qui dudum camphorae lo-
 cum inter corpora generica non assignavit solum,
 sed strenue etiam vindicavit, proprietates eius, va-
 riaeque phaenomena chemica, quibus a resina,
 gummi,

potius *concretum genericum*, ex *terreis* duntaxat atque *tenerioribus inflammabilibus particulis*, arctissima interveniente unione, compositum, sistit; quemadmodum haec partim ex habitu et proprietatibus eius externis, partim etiam, et quidem adhuc clarius, ex subiunctis observationibus et experimentis partescunt:

I. Subtilitas, mobilitas ac volatilitas partium, seu molecularum camphorae minimarum, tantae reperiuntur, ut non solum, aëri libero, praesertim calido, exposita, intra modicum temporis spatium, invisibili resolutione halituosa consumatur, sed chartae etiam ac scatulae lignae poros penetret, et sensim sensimque, nullo prorsus pristinae praesentiae suae vestigio relicto, in auras aufugiat.

II. In cucurbita vitrea, admoto igne moderato, tota in sublime evehitur, et in alembico rursus in massam, priori quoad proprietates essentielles simillimam, concrescit.

III. In cochleari argenteo aut stanneo, prunis imposito et iam calefacto, cito quidem liquefcit, et olei subflavo albicantis formam induit; at cito etiam sub liquefactione, citra nativae mixtionis destructionem, in halitus fragrantissimos resolvitur.

IV.

gummi, oleo coagulato, sale volatili oleoso etc. distinguitur, in *Miscell. Societ. Reg. Berolinensis, Cont. II. p. 72.* et adhuc clarius in peculiari *Lectio-
ne de Camphora*, exposuit; quare hoc etiam loco specialia rursus de iisdem adferre, iteratamque comparisonem instituere, supervacaneum duco.

IV. Per se accensa flammam lucidissimam, quae atrum tamen fumum eructat, aliquamdiu alit, nullosque, deflagratione cessante, cineres, nullasque faeces alias relinquit.

V. In spiritu vini rectificatissimo perfecte, in aqua simplici autem, cui ob levitatem innatat, nunquam solvitur, sed illi specificum duntaxat odorem suum, secedentibus quibusdam et per aquae molem diffusis particulis adscribendum, communicat. Solutionem quoque respuit in acidis debilioribus ac valde aquosis, nec ullam pariter dissolutionem aut mutationem aliam in spiritibus urinosis et concentratis lixijs alcalicis patitur; immo cum siccis salibus alcalibus fixis liquefactionis ope coniungi nequit, sed post modicum ignis, crucibulo substrati, augmentum accenditur, nec minimam sub lucidissima deflagratione et consueta, fumi nigri evolutione, metamorphosin additi salis alcalici moleculis infert.

VI. In rectificato oleo vitrioli dissolvitur quidem, et rufo istud colore, qui successive obscurior tandemque rufo-fuscus redditur, imbuat, pristinam nihilominus formam ac indolem confestim recuperat, quando solutio aquae frigidae infunditur. Notatu caeteroquin dignum est, acidum memoratum, camphorae largiori quantitate adfusum, adeo tandem fragrantiam eius deprimere, ut odore suo penitus propemodum, solutione atque miscela durante, spoliata videatur.

VII. In concentrata aqua forti, interveniente nova prorsus partium acidarum, aquearum, terrearum et inflammabilium syncrifi, in
verum

verum oleum, pallide flavescens, menstruo perfecte innatans, transformatur. Silentio interim minime praetermittendum est, cohaesionem seu copulam elementorum in hoc oleo nondum satis firmam, et ipsum quoque oleum, propter rudem ac iusto largiorem (y) acidi principii unionem, adhuc causticum esse. Nam aquae frigidae infusum olei formam protinus amittit, et camphora rursus in conspectum reducitur. Idem quoque accidit, quando eidem limatura argenti aut Mercurius vivus iniicitur, et

(y) Secundum adcuratam HAMBERGERI observationem substantia illa, quae camphoram intimiori sua miscela, cohaesione et potenti actione ad olei fluidi formam redigit, sextam duntaxat totius ponderis partem constituit: „Quando vero camphora, *scribit*, per spiritum nitri fluorem acquirit, maius quidem pondus spiritus nitri, quam camphorae, requiritur, istud vero, quod de spiritu nitri in camphora fluida haeret, i. e. quod camphoram reddidit fluidam, non nisi sexta camphorae pars est; scrupulos enim 13. camphorae solidae spiritui nitri imposui, et 15. scrupulos camphorae fluidae obtinui, sic pondus eius per spiritum nitri non nisi quoad 2. scrupulos, sextam circiter partem, auctum est, i. e. duo scrupuli fluidi mutarunt 13. scrupulos camphorae solidae in fluidum etc., Vid. *Programma* eius *auspicale, de Camphora per spiritum nitri fusa*, §. 13. Indicata acidi quantitas multis valde exigua videbitur; ast sciendum, oleorum naturalium mixtionem, docentibus examinibus chemicis, multo adhuc minorem laudati principii quantitatem ingredi.

et acidum praedominans laxiusque cohaerens, relictis partibus terreo-inflammabilibus, immissa corpuscula metallica aut semimetallica solvere incipit.

§. VIII.

Genericam camphorae indolem non tantum observationes et experimenta exposita, sed specierum quoque multitudo probant. Similis enim naturae substantia, quanquam specifico ut plurimum plantae oleo plus minusve imbuta, e pluribus vegetabilibus, intuitu generis ac speciei distinctis, adhibitis tamen decentibus encheiribus, separari atque educi potest. In India orientali v. g. testantibus IO. OTTONE HELLWIGIO (z), NICOLAO GRIMMIO (a), et CLEYERO (b), qui ipsi artis chemicae satis gnari fuerunt, camphora, vulgaris aemula, e radicibus recentibus zedoariae, galangae, zingiberis sylvestris, cassiae lignae ac cinnamomeae, immo ex ipsa cassia lignea interdum a curiosis destillando elicitur. Delitescit quoque camphoratum hoc principium in *schoenantho Indico* (c), *mentha Zeilanica* (d), *thymo* (e), *hyssopo*, *tanaceto*, *millefolio*, *sclarea*, *chenopodio Ambrosioides*, *cardamomo rotundo*, et pluribus aliis plantis et plantarum partibus: Nec dubi-

(z) *Miscell. A. N. C. G. Dec. II. Ann. 3. Observ. 208.*

(a) *Ibid. Ann. IX. et X. Observat. 196. No. 14.*

(b) *Ibid. Ann. 4. Observat. 6.*

(c) KAEMPFE. *Amoenit. exot. Fasc. V. pag. 772.*

(d) HERMANNI *Cynos. Mat. med. pag. 255.*

(e) *Miscellan. Societ. Reg. Berolinens. Cont. II. pag. 72.*

dubitandum denique erit, massulas illas candidas atque saliniformes, quae secundum GODOFREDDI (f), SLARE (g), MENZELII (h), IOH. MAVD (i), aliorumque observationem, subinde in oleis destillatis, diutius adservatis, in *oleo terebinthinae* v. g. *cinnamomi*, *menthae*, *matricariae*, *ligni sassafras* etc. concreverunt, ut plurimum camphoratae indolis esse, et rarissime saltem siccum, aut, si dicere mavis, solidum sal volatile oleosum natura sua aemulari (k).

§. IX.

Cognitis constitutivis camphorae principiis et praecipuis proprietatibus, operatio quoque eius, quam in corpore humano vivo exercet, cognitu facilior erit, eamque ita comparatam esse, credo: Quando camphora pura, sub sicci pulveris forma, adsumitur, minime quidem a liquore gastrico, qui nimium aquosus est, nec ullum ideo in camphorae moleculas ingressum invenit, in ventriculo solvitur, facillime nihilominus et intra breve tempus, ob laxiorem particularum suarum cohaesionem et insignem ac plane mirabilem teneritudinem atque volatilitatem, blando calore in effluvia resolvitur, quae
non

(f) *Memoires de l'Acad. Royale des Sciences de Paris*, ann. 1721.

(g) *Transact. Angl. Comp.* T. III. pag. 362.

(h) *Miscell. A. N. C. G.* Dec. II. Ann. 5. Observ. 38.

(i) *Hamburg. Magazin*, Band 4. pag. 499.

(k) Conferri hic poterunt, quae in praecedentibus Cap. XV de massa candida saliniformi, in vetusto oleo maioranae concreta, relata fuerunt.

non tantum in ipsius ventriculi tunicas vividam quandam impressionem, lenissimi forsan ardoris nomine insigniendam, faciunt, sed rudi etiam materiae perspirabili, in ventriculi et intestinorum cavo saepius praesenti, mixta, eam in motum celeriores redigunt; unde aliter fieri nequit, quin hac actione motus peristalticus, eodemque mediante cruoris per vasa ventriculi arteriosa ac venosa progressus citatior evadat atque vegetior, et flatuum quoque discussio atque expulsio promoveatur.

§. X.

Moras tamen non adeo diuturnas memorata camphorae resolutae effluvia mobilissima atque tenerrima in ventriculo et intestinis neſtunt, sed paullatina inhalatione partim per ordinaria vasa lactea, partim etiam, et quidem quoad portionem maximam, per numerosissima vascula bibula venosae originis ad sanguinem et reliquos humores circulantibus transferuntur, eosdemque, dum miscelam intimiorem cum illis, ceu maximam partem aquosis, subire nequeunt, insigni celeritate, sub halitus siccissimi forma et fulmineae propemodum materiae instar, pervadunt, solida nervoso - musculoſo - membranacea leni, quem imprimunt, ardore ad vegetiores contractiones sollicitant, sphaerulas cruoris et aliorum liquidorum moleculas blande secum in motum rapiunt velociorem, crassa et viscida citra impetum maiorem dissolvunt, et sic, meatuum capillarium ac pororum cutis obstructionibus reſeratis, meandi ac remeandi libertatem humoribus reddunt, adeoque largiorem quoque exspirationem periphericam, qua ipsa tandem e corpore rursus excluduntur, provocant: Unde ratio-

rationem pariter satis patescere opinor, cur camphora, in substantia exhibita, nullum ordinario caloris, nullumque notabile pulsus augmentum, sed sensibile potius refrigerium sanis aequè, atque aegrotis corporibus, adferat.

§. XI.

Ex generali operandi modo non tantum vires specialiores facile deduci, sed morbi etiam, quibus camphora efficacius medetur, determinari poterunt. Ad posteriores nimirum primo febres redeunt exanthematicae cuiuscunque generis, pestilenciales nempe, petechiales, purpuratae, variolosae, etc. quae ordinario, praesertim si gravioribus symptomatibus stipatae accedant, copiosae, crassae, viscidae, valde acri, plus minusve corruptae ac putridae materiae, per universam humorum, praesertim sanguinis, massam disseminatae, et plerisque tubulis capillaribus impaetae, originem debent, quam sola natura, ob crassitiem et tenacitatem, aut refractariam canalium excernentium oppilationem, non semper tempestive ad habitum cutaneum transferre, ibidemque expellere potest. In hisce igitur morbis multum omnino auxilii a camphorae usu expectandum est, dum tenerime in corpore resoluta, et praevia inhalatione distributa, canales ac poros obstructos referat, materiam peccantem resolvit, adeoque necessariam exanthematum expulsionem adjuvat ac cito promovet. Quibus tamen adiiciendum est, camphoram in febribus memoratis minoris deprehendi efficaciae, et interdum nullum plane locum invenire, quando gravior iracundia praecessit, et biliosa proinde materia humoribus largiter mixta reperitur. Non licet quoque eam

confestim porrigere, si aegri plethorici sint, sed venaesectio prius administranda, et cruoris copia paullulum minuenda erit, ut mobilissimae eiusdem molecule citius postea atque liberius vascula maiora ac minora permeare possint. Non adeo proficius denique usus eius primis statim morbi diebus deprehenditur, sed demum circa diem tertium aut quartum, quo natura materiam praeparatam, cuius resolutio aliis interea medicamentis promovenda est, excludere et ad habitum cutaneum transferre intendit, illam exhibere decet.

§. XII.

Efficaciam, nisi maiorem, certissime tamen parem, camphora monstrat in purpura chronica scorbutica, quae absque febre accedit, vel levior rem duntaxat, catarrhali benignae simillimam, adducit comitem, et singularem humorum dyscrasiam acido-pituitosam aut falso-urinoso-mucidam causam agnoscit praecipuam. Maculae, quae erumpunt, et pectus, dorsum, collum, et partes maxime artuum musculosas occupant, latae sunt, grossum nonnunquam magnitudine aequantes ac valde pruriginosae, praesertim quando serum acre emittere incipiunt. Facile iterum recedunt, et materia, ad interiora iterum reducta et hinc inde postmodum subsistens, multiplici corpus tortura adficit, et omnis generis symptomata, quae primarios haud raro gravesque morbos aemulantur, provocat, quorum pleraque tamen, immo singula, denuo remittere solent, quamprimum maculae, pustulae, tubercula, sponte rursus prodeunt, aut congruis medicamentis expelluntur. Quae expulsio autem cum multum per saepe negotii Medico facessat,

cessat, heroicis opus est remediis, quorum sane praecipuum camphora esse videtur, si, praemis-
sis tamen ad primas vias repurgandas blandis la-
xantibus, nitro, aequè, ac in febribus exanthe-
maticis gravioribus, iungitur. Hoc enim blan-
da, quam praestat, resolutione, viam transitu-
ris camphorae corpusculis liberiores parare, et
violentiores partium collisiones, quibus alias
aestus quidam praeternaturalis facile succedit,
prohibere ac praecavere valet.

§. XIII.

Praeter febres exanthematicas et purpuram
chronicam scorbuticam, in censum aegritudinum,
quibus camphora, modice ac tempestive usur-
pata, egregiam medelam adfert, etiam adfectus
inflammatorii, convulsivi et venerei veniunt. In
tumoribus scilicet inflammatoriis, qui vel mere
sanguinei sunt, vel sanguineo-ferosi, et nunc
ideo a solo cruore, in minoribus arteriis sub-
sistente ac fimiter impacto, nunc a sanguine, in
vascula ferosa seu canaliculos arteriosos secundi
generis vi propulso, ibidemque cum lymphâ
acriori ac viscidiori mixto, producantur, mi-
nutissimae ac mobilissimae camphorae resolutae
moleculae massam inhaerentem et obstruentem
blande dissolvunt, dissolutione hac canales ob-
structos referant, humoribus transitum liberio-
rem reddunt, et sic ipsam inflammationem tol-
lunt. Sin subinde quoque impacta materia
fixius haereat, adeo, ut ad circulum plane re-
duci nequeat, camphora suppurationem, tunc
temporis necessariam, promovet, et hac etiam
ratione desideratum fert auxilium. Proficua
inprimis camphora reperitur, viresque monstrat
eminetiores, in refractariis inflammationibus ve-

nereis aliisque contumacibus; ad gangraenam ac sphacelofam corruptionem proclivibus, interne non minus, quam externe usurpata, quoniam humores in prioribus adfectibus copiosa atque tenaci pituita acri et corrupta remixtos, in posterioribus autem cruorem, omnibus, vel tamen plerisque partis gangraenosae vasculis firmiter impactum, potentissime dissolvit, adeoque imminuentem sphacelationem impedit.

§. XIV.

In erysipelaceis inflammationibus multi camphorae usum internum, quem alioquin in vulgaribus sanguineis lubentissime admittunt, plane damnandum esse opinantur: Attamen in hisce pariter, me sentiente, penitus improbari ac dissuaderi nequit, dummodo Practicus ad specificam inflammationis causam materialem debite respiciat. Nam quoties fervida materia biliosa, post praegressam iracundiam graviolem, largius ad sanguinem translata, eidemque intimius mixta est, et inflammatoriae cruoris stasi stimulo suo occasionem praebet, camphorae usus non adeo tutus videtur; si sanguinis vero spissitudo, vel levior etiam canaliculorum crispatura et constrictione, ab aliis causis provocata, eam producant, non video, qualem noxam camphora inferre possit, eamque potius potenter ac salutariter materiam subsistentem disiecturam esse, credo. Quid citius enim in vasa arteriosa secundi generis, quae in huiusmodi inflammationibus obstructionem patiuntur, penetrare potest, quam camphora, in tenerrimas moleculas resoluta? Quid potentius etiam, quam camphora, partium cohaesionem praeternaturalem in fluidis quiescentibus tollere et resolutionem eorundem atque dis-

discussionem halituosam, qua harum inflammationum curatio ex parte nititur, procurare ac promovere valet? praesertim quando venaesectio, plethora aut congestione praesente, prius administrata fuit, et diluentia temperata subiunguntur et interponuntur.

§. XV.

Ratio denique, cur camphora interne adhibita, in spasmis quoque et adfectibus convulsivis heroicum subinde remedium existat, ex consideratione originis ac genii eorum facillime rerum medicarum gnaris patebit. Frequentissime nimirum convulsiones, nec minus spasmi dolorifici materiae cuidam heterogeneae, in tubulis sanguiferis aut lymphaticis subsistenti ac magis minusve impactae, nunc copiosae ac viscidae, adeoque ob molem prementi ac distendenti, nunc parviori acri, continuo vellicanti, natales debent; hinc aliter omnino fieri nequit, quin solida plus minusve irritata in contractiones solito fortiores, stimulis tamen, intuitu vehementiae, proportionatas, ruant, et hisce mediantibus materiam inhaerentem ac quiescentem de novo excutere atque propellere, adeoque circuli libertatem restituere nitantur. Necessario igitur ac salutari huic negotio promovendo cum camphora, ceu pharmacum resolvens, discutiens et aperitivum excellentissimum, existat aptissima, in propatulo est, cur tollens causam turbarum, ipsas etiam turbas, spasmos nempe atque convulsiones, tollat, et naturae validas in hoc passu manus auxiliatrices porrigat.

§. XVI.

Haëtenus recensita, etiamsi veritate nitantur, sine limitatione tamen minime accipienda sunt. Occurrunt quippe casus huius commatis, in quibus cum usu camphorae interno cautius mercandum, quin penitus ab eodem abstinendum erit. Subinde videlicet, et satis quidem frequenter, allegati adfectus spasmodici et convulsivi plethorae eminentiori, vel congestioni aut orgasmo cruoris, scoriis biliosis rarefactis largius referti, originem debent; quibus praesentibus causis camphora parum proficua, immo interdum plane noxia deprehenditur, dum sanguinis ebullitionem atque fervorem, nec non congestiones, commovendo et biliosas imprimis moleculas ulterius expandendo, magis augere, quam minuere videtur. Supra igitur memorata praecipue de affectibus dolorifico - spasmodicis ac convulsivis valent, ex visceris cruoris aut lymphae mucidae et acris stagnatione et pertinaci ad - et inhaesione primario resultantibus; quae humorum vitia camphora valida resolutione ac prompta discussione, ob insignem, qua pollet, particularum subtilitatem ac mobilitatem, tollere valet.

§. XVII.

Quamvis camphora in haëtenus recensitis aegritudinum speciebus praecipue locum sibi vindicet, ac vires exerat eminentiores, nullo tamen modo dubitandum est, quin ea in incipientibus pariter tumoribus cachecticis, oedematosis, caeterisque partium, imprimis glandulosarum, frigidis, egregie profutura sit, praesertim si laxantia et cathartica praemittantur, et ipsi

ipsi quoque camphorae alia adpropriata ac congrua, v. g. salia neutra etc. maxime autem nitrum depuratum, ceu ordinarium atque optimum camphorae additamentum, iungantur. Nitrum enim, uti antea pridem dictum fuit, blanda resolutione volatilibus mobilissimisque camphorae moleculis, per minutissima vascula transi-turis, viam quasi pandit, ut citius ac citra im-petum canaliculos penetrare et contenta fluida spissiora promptius disiungere atque discutere possint. In adfectibus convulsivis atque spasmodicis, stricture imprimis atque siccitate fibra-rum insigniori praesente, praeter nitrum, per-saepe etiam sperma ceti, oleum amygdalarum dulcium recentissime expressum et similia cum illa miscentur, ut debita relaxatio eo citius con-tingat, ac iusta filamentorum flexilitas certius reducatur. Tam universalis tamen usus addi-tamenta, quam nitrum, haec neutiquam aesti-manda sunt, quoniam promptam camphorae re-solutionem halituosam viscidis suis particulis quodammodo impediunt, et volatiliu[m] cor-pusculorum progressum per canales exilissimos magis retardant, quam promovent.

§. XVIII.

Nonnunquam etiam, praesertim in purpura chronica scorbutica aliisque adfectibus chronicis, camphorae exhibitioni laxantia et cathartica, sic-uti antea dudum monui, praemittere decet, ut primae viae a crassioribus quibuscunque, quae, paul-latina translatione sua ad sanguinem, novum causae materiali fomitem suggerunt, et cam-phorae quoque actionem remorantur, prius re-purgentur. Multum praeterea interest, ut camphora debita forma et iusta dosi exhibeatur.

Optimam autem, quantum mihi experiri licuit, operationem exercet, quando sub pulveris forma, et quidem in morbis acutis et exanthematicis dosi minori, quae duo vel tria grana non facile superare debet, in chronicis vero, praesertim valde frigidis pituitosis, paullo maiori, nimirum a granis duobus ad grana tria, quatuor, quinque, exhibetur. Subinde pilulis pariter, bolis et electuariis additur, paullo tardius tamen atque languidius sub hac miscela operatur. Nonnulli contusam etiam potiunculis addunt; verum, cum moleculae eius aquae confortium penitus respuant, ac protinus ad superficiem eius adsurgant, hoc modo non adeo apte propinatur. Externe sacculos discutientes, epithemata sicca, unguenta et emplastra usus varii et virtutis discrepantis ingreditur.

CAP. XXXVIII.

De Myrrha.

§. I.

MYRRHA GENVINA, a DIOSCORIDE *Σμύρρα* vocata, est substantia resinoso-gummea, ex diversae magnitudinis glebis constans, quae contactu pingues, nonnihil interdum pellucidae, fragiles, in saliva sub manducatione quoad maximam partem solubiles, extrinsecus colore rubro-fusco, vel fusco-rubescente aut flavescente, intus tamen miculis plerumque aut striis albicantibus semicircularibus, vel figurae saltem irregularis, distincto, odore balsamico, multis tamen adverso, et sapore subacri, balsamico, amaro, eoque paullulum nauseoso, praeditae inveniuntur.

§. II.

§. II.

Optimam atque pinguissimam myrrhae genuinae portionem, quae sponte, absque praevia scilicet corticis incisione, ex arbore fluit, et in puriores atque pellucas guttas aut glebular condensata reperitur, veteres rei medicae scriptores *Staeten* sive *stillatitiam*, alteram vero, quae inciso prius cortice promanabat, et palmeis tegetibus excepta, vel citra expressionem, vel eius ope, addito oleo, in massas, glebular, aut pastillos a collectoribus redigebatur, *Plasten* sive *fictitiam* vocabant. Prior caeteroquin, *Staete* nimirum genuina, a spuria, quae ex *Plaste* sive *fictitia* per expressionem fiebat, et pinguissima quasi ac purior myrrhae destillatio erat, probe distinguenda, parciore semper proventus fuit; hinc nostra etiam aetate parum nota, immo probabile est, eandem olim pariter ad gentes remotiores non adeo copiose fuisse delatam, sed incolas et populos vicinos illam maxima ex parte propriis duntaxat usibus impendisse.

§. III.

Praeter allegatas binas species genericas, DIOSCORIDES multas adhuc alias recenset, quarum denominationes partim a patriae, soli natalis, qualitatis terrae, aetatis atque culturae arborum etc. partim ab indolis ac bonitatis diversitate desumtae videntur: Vocatur, *scribit* (1), in myrrhae genere quaedam *pediasmos*, i. e. campestris, pinguis, et quae expressa, *staeten* dat: — — Quaedam vero *gabirea*, omnium pinguissima, pingui et feraci solo proveniens, quae copiosam *staeten* etiam reddit.

„Pri-

(1) In *Operib. p. m. 83.*

„Primum bonitatis honorem habet *Troglodytica*,
 „a regione, in qua nascitur, sic appellata. Vi-
 „ret haec modice, translucida est, et mordaci
 „in gustu erosionem sentitur. Colligitur myrrha
 „etiam *colore candido*, numeraturque post Tro-
 „glodyticam in myrrhae censu et honore, bdel-
 „lii modo cum tractatur lentescens, odore le-
 „niter viroso, apricis locis nascens. Est prae-
 „terea, quae *caucalis* appellatur, eorum modo
 „quae exoleverunt arescens, colore nigro, et
 „velut ab igne torrida: Omnium pessima, quae
 „*ergasime* dicitur, squalore suo fragilis, nullo
 „pingui sapore acri, gummi viribus et aspectu
 „referens. Improbatur etiam, quae *minea* ap-
 „pellatur.„

§. IV.

Myrrha, quae nostra aetate a pharmacopoeis
 et seplasiariis venditur, raro solitaria et perfecte
 pura occurrit, sed ignobilibus plerumque, aut
 plane peregrinis frustulis ac glebis, natura pror-
 sum ac viribus a myrrha genuina distinctis, re-
 mixta deprehenditur. Nam inter verae myr-
 rhae glebulae ut plurimum reperiuntur primo
 frustula, splendentia, dura, pallide flavescen-
 tis, aut succinei coloris, quae gummi Arabi-
 cum magis minusve forma externa aemulantur,
 et odore aequae, atque sapore destituta sunt.
 Deinde etiam, et quidem magna nonnunquam
 copia, obviae sunt glebae, in magnas et elegan-
 tes guttas per saepe concretae, genuinae nihilo-
 minus myrrhae frustulis longe duriores, com-
 pactiores atque tenaciores, adeoque fractu diffi-
 ciles: Minorem praeterea pinguitudinem possi-
 dent, et colore, instar picis, rubro-fusco, aut
 fusco-rubescente obscuriori, odore magis nau-
 seoso,

seoso, et tam ingrata amaritiae praeditae inveniuntur, ut absque vomendi conatu diu in ore detineri ac circumvolvi nequeant, etiamsi, ob valde resinofam earum indolem, parum a liquore salivali solvatur. Multum igitur interest, ut myrrha genuina feligatur, et a frustulis massulisque spuriiis probe repurgetur, quoniam veram et spuriam respectu naturae ac virium medicarum maximum omnino discrimen intercedit. Nam prior longe gratior, longe temperatior est posteriori, et longe praestantiores etiam effectus in corpore humano edit. Pridem hoc cognovit praelaudatus DIOSCORIDES, et myrrham proinde recentem, fragilem, non ponderosam, undique sibi concolorem, et quae contra fracta candidas intus, humanorum unguium figura, per medium transeuntes divisiones ostendat, quae minutis glebis sit, et cum acrimonia amara et odorata, eligere, ponderosam contra, picis colore donatam, ceu usibus medicis ineptam, reicere iubet (m).

§. V.

Colligitur hoc concretum resinoso-gummeum in Aegypto, Arabia, et Aethiopia, maxime autem in postremae regionis provincia quadam, quae sub Aegypto sita in mare rubrum ac Sinum Arabicum protensa est, et a Veteribus Trogodytica adpellata fuit; ubi ex trunco arboris spinosae humilioris, cuius completam descriptionem Botanici nobis nondum dederunt, vel sponte, vel, quod fieri solet frequentius, inciso prius cortice, exstillat. DIOSCORIDES myrrhiferam hanc arborem spinæ Aegyptiacae similem esse, et lachrymam, post corticis incisuram
sensim

fenfim promanantem, palmeis tegetibus excipi, vel nonnunquam etiam in arboris trunco concrefcere et indurari refert (n). PAVLVS HERMANNVS spinofam hanc plantam arboream, quae, teſte PLINIO, raro quinque ulnarum altitudinem excedit, ab incolis *Bola* vocari, teſtatur (o): SAMVEL DALE illam bacciferis arboribus adnumerat (p), et POMETVS eandem foliis, ulmi foliis ſimillimis, donatam eſſe, tradit (q); aſt horum nullus uberiores communi-
cavit deſcriptionem, ut ideo circa formam eius et creſcendi modum, certi quidquam hac vice tradere haud liceat, cum mihi et Medicorum plerisque illam propriis oculis luſtrare nunquam contigerit.

§. VI.

Conſtat hoc concretum ex partibus ſpirituoso-oleoſis eſſentialibus, gummoſis, reſinoſis, et paucis recrementitiis. Nam myrrhae purae, electae, et in pulverem cominutae, libra una ſub deſtillatione humida ex veſica, teſtante b. FRIDERICO HOFFMANNO (r), aquam transmittit albicantem, ſat ſuavi myrrhae odore praeditam, et cum ea ſimul oleum eſſentiale aethereum, quod, in multos globulos diviſum, partim aquae innatat, partim fundum petit. Oleum hoc, vitro per aliquot dies in quiete relictum, ſeparatum, circiter drachmas duas, vel ſubinde etiam, recepta nimirum myrrha optimae notae, ac rite pari-

(n) L. cit. (o) In *Cynof. Mat. med.* p. 279.

(p) In *Pharmacolog.* pag. 434.

(q) In *der Beſchreibung der Specereyen und Materialien*, pag. 381.

(r) In *Obſervat. phyſico - chym. ſelect.* p. 20.

pariter adornata destillatione, tres propemodum drachmas pondere aequat. Myrrhae caeteroquin odorem spargit, nec ingratum quoque saporem linguae imprimit. Quando etiam portio aliqua myrrhae integrae, optimae pariter indolis, cum aqua simplici blandae digestionis aliquamdiu committitur, maximam partem solvitur, et infusum praebet saporis et odoris fortiter myrrhati, coloris quidem ante et post filtrationem obscure flavescentis, nonnihil tamen in calore non minus, quam frigore turbidum; unde conicere licet, particulas quasdam oleosas, et fortassis etiam resinosas teneriores, ita gummosis intertextas esse, ut simul ab aqua, quamquam ruditer saltem, dissolvantur, et per filtri chartacei poros abripiantur. Infusum hoc, ad iustam extracti consistentiam evaporando reductum, myrrham integram odore et sapore refert, et flavo-subfusco colore tinctum deprehenditur. Ex uncia myrrhae una drachmas septem et grana tria impetravi. Residuum siccatum, et ulteriori cum spiritu vini digestionis subiectum, adhuc scrupulos duos et grana quinque substantiae resinosae suppeditavit, ut ideo undecim duntaxat, vel duodecim grana materiae recrementitiae superessent. Portio mere resinosa obscurioris erat coloris, et, praeter ingratiorem amaritiam, tanta pollebat tenacitate, ut dentibus atque palato sub volutione in ore pertinaciter adhaeresceret, ac parum saltem in saliva diffunderet.

§. VII.

Memorato explorandi modo postea respectu ordinis inverso, et primum spiritu vini rectificatissimo aequali myrrhae electae ac genuinae
quan-

quantitati adfuso, tinctura resultavit coloris ex flavo rubicundi, saporis valde amari, odoris balsamici atque specifici myrrhati, quae, peracta evaporatione, extracti duriusculi unciam dimidiam relinquebat. Hoc interim, uti ex quantitate patet, non mere resinofum, sed gummeo - resinofum erat, valde nihilominus tenax, et colore rubro-fusco donatum. Quod reliquum erat, aqua simplici maximam partem solvebatur, ita, ut hac pariter vice vix duodecim grana relinquerentur. Vnde constare arbitror, unam myrrhae genuinae unciam circiter ex drachmis septem substantiae gummosae, paucis tamen particulis resinoso-oleosis tenerrimis remixtae, scrupulis duobus et granis aliquot resinosae crassioris, oleo aethereo pariter impraegnatae, et duodecim, vel etiam pluribus, aut paucioribus, granis impuritatum indissolubilium compositam esse. Maior enim, quam obtinui, extracti resinosi primi quantitas ab actione phlegmatis, quod in spiritu vini, methodo vulgari rectificato, adhuc notabili ut plurimum copia haeret, et principii gummosi partem solvit, deducenda erit. Negare caeteroquin nolo, indicatam principiorum quantitatem relativam, pro differenti myrrhae bonitate, valde nonnunquam variare posse. Quo melior enim myrrha existit, eo maiorem substantiae gummosae portionem continet, quo deterior ex adverso, eo copiosiori etiam resina instructa reperitur.

§. VIII.

Demonstrata myrrhae genuinae principia neque indole eadem, neque pari virtute pollent, sed aliud alio, intuitu operationis ac virium medicarum, deprehenditur praestantius. Substantia

tia nimirum gummofa, effentiali et aromatico oleo aethereo modice imbuta, quae maximam myrrhae genuinae partem constituit, reliquis principiis, seorsim consideratis, excellentior existit, quoniam temperationi natura gaudet. et perfecte ac satis promte a saliva et liquore gastrico solvitur, ut ideo facillime deinde ex prima culina ad sanguinem et lympham filtrationis beneficio transferri possit: Hinc illa quoque operationem suam in toto exercet corpore, et, ob blandam atque balsamicam suam amaritiem, impuritates putridas atque corruptas quascunque, sive illae in primis viis stabulentur, sive per humorum circulantium massam inveniantur disseminatae, sive alio haereant, loco, emendat ac destruit (s), et viscidam bilem, quae inertia sua
variis

(s) Propter egregiam indolem balsamicam ac valde potentem virtutem antiputredinosam, myrrha, prisca aequae, ac recentioribus temporibus, magni semper aestimata fuit. Antiquissimi Aegypti incolae, qui prae gentibus reliquis defunctorum suorum corporibus diuturnitatem conciliare, eademque contra corruptionem putredinosam, brevi alias supervenientem, defendere atque per longam annorum seriem immunia praestare nitebantur, balsamicum hoc concretum cadaverum polilincturae, ceu praestantioris pro magnatum ac divitum conditura materiam, frequentissime adhibebant, quod HERODOTVS, uberius de variis Aegyptiorum balsamandi modis agens, testatur: „Ante omnia, inquit *Hist. Lib. II. p. 190.* „incurvo ferro cerebrum per nares educunt, ut „quamcunque partem educentes ita locum eius „medicamentis explentes. Dehinc acutissimo lapide Aethiopico circa ilia conscindunt, atque il-
Carth. Mat. M. II. Tom. Q „lac

variis adfectibus chronicis ansam praebet, ad naturalem indolem saponaceam, ac iustam amaritiam et fluiditatem reducit.

§. IX.

Magnam quidem hae vires laudem merentur, maiori nihilominus encomio digna est excellentissima virtus roborans, cui blanda commovens atque discutiens iuncta reperitur: Blanda, inquam; nullas enim singulares expansiones humorum orgasticas, etiam apud subiecta calidioris, biliosi atque cholericici temperamenti, dummodo rite, tempestive, ac modice in usum vocetur, producit, sed nonnihil saltem circulum auget, atque vegetiorem reddit, et hac ratione quisquillas, corpori inimicas, per poros cutis ac vias urinarias, citra impetum et iusto fortio-
rem exagitationem, expellit. Aliter longe in
hoc

„lac omnem alvum protrahunt; quam ubi repur-
garunt ac vino phoeniceo expleverunt, rursus
„aromatibus contusis refarciunt; tum omenta
„complementes contusa myrrha pura, et cassia et
„caeteris (excepto thure) aromatibus iterum con-
suunt etc. „ Nullum quoque dubium est, quin
virtus medica antiputredinosa et traumatica, quae
Mumiae verae, antiquae et praestantiori Aegy-
ptiacae a Medicis, quibus horridum hoc medi-
camentum civitate pharmaceutica donare placuit,
adscribitur, potissimam partem a myrrha pendeat,
tamen si minime negem; crocum pariter, aloen,
cassiam, cinnamomum, opobalsamum refinam
cedrinam et similia aromatica atque balsamica, e
quibus veteres materiem ad divitum corpora post
obitum condienda necessariam, plerumque com-
ponere solebant, ad augendas vires memoratas
multum conferre.

hoc passu comparatum esse deprehendimus cum substantia resinosa solitaria, vel gummosae tamen in myrrha ignobiliore aut spuria largius mixta. Haec ipsa nimirum, adsumta in substantia, hoc est, citra praeviam solutionem in spiritu quodam inflammabili, a naturalibus oris atque ventriculi mensstruis falso-aqueis nunquam perfecte dissolvitur, sed meatuum parietibus quoad portionem crassiores hinc inde adhaeret tenacius, quoad subtiliorem vero partem quodammodo soluta, et ad sanguinem delata, hunc et humores reliquos, ob indolem suam longe calidiorem, fortius exagitat, commovet et expandit. Et hoc quoque causa est, cur multi Medicorum, naturam myrrhae genuinae ac spuriae discrepantem ignorantes, promiscue myrrham quamcunque inter medicamenta valde calida retulerint, et etiamnum referant.

§. X.

Quod oleum denique essentielle atque aethereum attinet, illud, per se consideratum, paullo calidioris quidem naturae deprehenditur; veruntamen, cum non adeo larga quantitate in myrrha adsit, et hinc inde saltem partibus resinoso-gummeis parcissime haereat interspersum, vehementes quoque effectus ab eo in corpore neutiquam metuendi sunt. Hisce accedit, quod oleum hoc, etiam post destillationem seorsim spectatum, indole tam ignea, sicuti pleraque olea aromatica et balsamica reliqua, minime polleat, sed satis moderatam operationem, si ad aliquot saltem guttulas una vice exhibeatur, exerceat. B. FRID. HOFFMANNVS illud magnis extollit laudibus, et usum eius in variis morbis eximium esse testatur: „Tām delicati,

„*scribit* (t), hoc oleum saporis atque odoris
 „est, ut singulari modo reficere, et vires re-
 „creare videatur. Cum saccharo comminuto si
 „aliquot guttulae commiscentur, elaeo - saccha-
 „rum balsamicum et pectorale conficitur, quod
 „per se, vel cum infuso veronicae aut Coffee
 „sumtum, in chronicis pectoris vitiis, in tussi
 „inveterata, asthmate humido, eximiam et ma-
 „gnam meretur laudem. Neque mediocrem ab
 „eo efficaciam promittimus, si ad arcendum pu-
 „tridum aërem, ubi coelum nubilum est, et epi-
 „demico morbo urbs conflictatur, mane cum
 „iusculo, vel infuso Succoladae, aut Coffee,
 „unam vel alteram guttulam in usum adhibea-
 „mus etc.,

§. XI.

Inde igitur, et ex praedictorum reliquis
 liquido constare opinor, substantiam myrrhae
 gummosam mitissimae naturae esse, resinam au-
 tem, et nonnihil quoque oleum, calidiori in-
 dole gaudere, quae valde, praesertim apud re-
 sinam, intenditur, quando myrrha cum spiritu
 vini dephlegmatissimo, qui, intacta gummosa,
 oleoso - resinosa substantiam solvit, eidemque
 unione sua vires longe impetuosiores conciliat,
 in tincturam redigitur. Consentientem in hoc
 passu habeo b. STAHLIUM, qui idem de myr-
 rha aequae, ac similibus resinosis et gummeo-re-
 sinosis aliis testatur, quando inquit (u): „No-
 „tabile illud phaenomenon medicum est, quod
 „resinae hae sub essentiarum forma, id est in spi-
 „ritu

(t) *L. cit. pag. 20.*

(u) *In Fundamentis Chymiae dogmaticae et ex-
 perim. pag. 115.*

„ritu vini adhuc valde tenuiter expansae, com-
„muniter decuplo plus efficient, quam sub te-
„naci illa pristina propria aut extractiformi con-
„sistentia, v. g. myrrha rubra per os assumpta,
„vel ad drachmae pondus, menses simpliciter
„pellit; huic drachmae si superfundatur spiritus
„vini uncia una, tinctus auferatur, (ubi citra
„expressionem drachmae sex vel septem erunt,)
„huius sic dictae essentiae drachma dimidia vel
„scrupuli duo tantundem efficient, quantum
„drachma una myrrhae in substantia etc., Qua-
re non perinde erit, an practicus myrrham sub
hac vel illa forma aegrotanti promiscue exhibe-
re velit, sed talem semper eligere tenetur, sub
qua, pro subiectorum et aegritudinum diver-
sitate, mitiorem vel fortiolem, adeoque con-
gruum semper et adaequatum, effectum edere
possit.

§. XII.

Praeter virtutes generaliores, roborantem
videlicet, antiputredinosam, ac leniter com-
moventem, myrrha genuina egregias quoque
vires stomachales, carminativas, uterinas, be-
zoardicas, traumaticas et pectorales possidet.
Stomachales et carminativae tam excellentes re-
periuntur, ut nullum pharmacum mihi notum
esse fatear, quod myrrhae palmam in hac parte
praeripiat. Amissum nempe tonum ventriculi
et intestinorum efficacissime reducit, et fibris tu-
nicarum flaccidis robur naturale reddit, adeoque
vividiorem harum partium contractionem, ad
alimenta debite resolvenda, et in laudabilem
chymum ac chylum convertenda, nec minus ad
cruditates attenuandas, promovendas, tandem-
que, una cum flatibus accumulatis atque reten-

tis, per alvum expellendas summe necessariam, denuo suscitatur, immo, collectas impuritates viscidas ac semiputridas abstergit ac destruit, bilis inertiam corrigit, et sic omnes liquores, digestionis et chylicationis negotio inservientes, variis ac crebro praesentibus temperiei atque mixtionis vitiis liberat: Vnde etiam in propatulo esse opinor, cur myrrha genuina, praesertim manducationis ope adsumta, ordinario vires exferat praestantissimas in dyspepsia, apepsia, dysforexia, anorexia, aliisque adpetitus et digestionis depravationibus, maxime iis, quae post morbos relinquuntur, aut apud homines senilis aetatis, vel curis, studiis profundioribus etc. valde debilitatos, generantur, nec minus in vomitu pituitoso, adfectibus flatulentis, diarrhoea mucosa, ictero chronico, lienteria, coeliaca, cachexia, febribus intermittentibus, praesertim rebelli quartana, similibusque primae culinae morbis, qui tunicarum flacciditati, bili mucidae, et collectis cruditatibus pituitosis ac semiputridis praecipuos natales debent.

§. XIII.

Virtute roborante stomachali non multo inferior deprehenditur virtus uterina et emmenagoga, maior tamen cautio circa usum eius in passione hysterica, sterilitate, fluore albo, suppressione lochiorum, et catameniorum defectu aut obstructione adhibenda, ac probe ante exhibitionem materialis aequae ac formalis causa evolvenda erit. In memoratis enim morbis tantummodo conducit, quando humorum viscositati et solidorum flacciditati, quarum radix per saepe in ventriculi imbecillitate ac prava digestionem quaerenda est, praecipuam originem debent:

Sin

Sin spasmi autem, a sanguine abundante, bilioso, aut alia materia acri calidiori largius impraegnato, producti, formalem constituent causam, usus eiusdem non adeo proficuus reperitur, nisi plethora prius venaesectione imminuta, et acrimonia, imprimis calida biliosa, congruorum temperantium usu emendata fuerit. Similis circumspectio necessaria est, quoties myrrha, tanquam bezoardicum, in febribus usurpanda est. In ardentibus enim, biliosis, et inflammatoriis nullum prorsus locum invenit, nec satis tuto pariter febre synocha simplici laborantibus exhibetur, quoniam haec semper abundantiam cruoris causam agnoscit praecipuam, illae autem materiae cuiusdam fervidioris praesentiam supponunt, aut ingentem tamen aestum cum magna partium solidarum siccitate atque stricture comitem adducunt. Quod putridas autem atque malignas febres, pestilenciales, petechiales, purpuratas, et variolosas, itemque catarrhales, coryza imprimis, tussi humida, aut glandularum salivalium tumore stipatas, attinet, in illis persaepe opem ferre consuevit egregiam, quoniam partes putridas destruit, pituitosoviscidas attenuat, et exanthematum expulsionem valide adiuvat. Non porrigenda tamen erit tinctura eius spirituosa, quae nimium exagitans est atque calida, sed saltem aquosa, aut aquoso-vinosa, quae, moderata dosi oblata, satis blandam operationem exercet, et impuritatum exitum, citra notabile aestus incrementum, promovet.

§. XIV.

Virtutes haecenus adductae iam satis quidem myrrham genuinam nobilitant, longe maiora

nihilominus encomia vires vulnerariae et pectorales eidem conciliant. Quis concretum enim novit medicum, myrrhae genuinae virtute traumatica, purificante, consolidante in vulneribus atque ulceribus, tam internis, quam externis, immo, in ipso sphacelo et ossium carie, aequiparandum? Quis pharmacum simplex nominare audet, myrrhae verae in tussi inveterata, aliisque pectoris adfectibus chronicis, a partium solidarum, maxime autem ventriculi et pulmonum, debilitate, eamque protinus subsequente materiae mucidae continua genesi, et largissimo in pectore decubitu oriundis, praefendum? Ego sane novi nullum, et myrrham genuinam, nisi omnibus, certissime tamen plerisque, haecenus cognitis, anteponendam esse, arbitror. Non solum quippe ventriculum, nec solos pulmones confortat mirifice, sed reliquis etiam visceribus, succorum alibilium praeparationi, sanguinisque ac lymphae circulo et depurationi inservientibus, robur conveniens reddit, sanguinemque praeterea et caeteros humores purificat, blande attenuat, et imminentem fluidorum non minus, quam solidorum corruptionem avertit, vel iam praesentem, febre lenta tamen aut hectica nondum stipatam, efficacissime corrigit.

§. XV.

Virtuti vulnerariae et pectorali tandem anthelmintica quoque subiungi meretur, quae satis pariter insignis existit, et multiplici nititur fundamento: Ob balsamicam nempe indolem et amaritiem myrrha genuina non tantum ipsos lumbricos, aliosque vermes, in canale intestinorum hospitantes, enecat, sed viscido-putridam quoque saburram, quae vermibus nidum

prae-

praebet ac pabulum, destruit, inertiam bilis, quae debite constituta praecipuum vermium antidotum aestimanda est, corrigit, eidemque decentem amaritiem, ventriculo autem naturale robur restituendo efficit, ut debita iterum alimentorum resolutio, debitaque chyli laudabilis praeparatio contingat, adeoque impedit, quominus novae cruditates colligantur.

§. XVI.

Optime hoc concretum operatur, si in substantia adhibetur, praesertim, quando, diutius paullo in ore detentum, et penitus a saliva confluente creberrimae volutationis ope dissolutum, sensim ad ventriculum descendit. Saliva enim, ceu menstruum falso-aqueum temperatissimum, oleoso-gummosam substantiam, paucis atque tenerrimis miculis resinosis mixtam, solvit, portionem resinosam crassiore autem, et terream inertem relinquit intactam, quae postea igitur, si post manducationem temporariam pauxillum superstes sit, pro lubitu eiici poterit. Sub hac igitur forma et adsumendi modo omnibus, qui usu eius indigent, semper commendanda esset myrrha, nisi ingens amarities nonnullis nimium crearet fastidium: Quare ad illud avertendum aut minuendum cum saccharo misceri, aut cum hoc et adpropriatis aliis stomachalibus, pectoralibus etc. v. g. croco, semine fantonico, rhabarbaro, aniso stellato etc. in morsulos, vel etiam cum Syrupis in electuarium, cum aqua quadam destillata, aut vino bonae notae, terra foliata tartari modice impraegnatis, in tincturam, vel cum extractis et succis inspissatis in pilulas aut bolos redigi potest, dum sub allegata forma varia blandam sem-

per operationem exercet. Quod tincturam vero mere spirituofam ac concentratam attinet, illa, ob cauffas fupra pridem (§. XI.) indicatas, longe calidior reperitur, et in certis folummodo cafibus, ubi exagitantia fortiora requiruntur, locum invenit. Dofin caeteroquin exactam, five per fe adfumatur, five cum aliis mixta, generalius vix determinare licet, fed unice Medici rationalis iudicio relinquitur, an in hoc vel illo cafu individuali maior, an vero minor quantitas praefcribenda fit?

CAP. XXXIX.

*De Gummi Ammoniaco, Galbano, Bdellio
et Opopanace.*

§. I.

GUMMI AMMONIACVM, five HAMMONIACVM, eft concretum refinofum - gummeum, colore foris flavefcence, intus albicante, odore ingrato balsamico, fapore refinofum, fubacri, et amaricante naufeofum praeditum. Advehitur a mercatoribus ex Aegypto, et in Africae defertis, maxime autem in tractu Lybiae Cyrenai- co, et circa delubrum Hammonis, ex incifa quadam planta ferulacea, cuius completam descriptionem Botanici haftenus nondum dederunt, exstillare, ac fenfim in glebularum puriores et impuriores, magnitudinis diverfae, condenfari dicitur.

§. II.

Ex partibus refinofis ac gummeis, quibus faepe tamen, praefertim in glebis ignobilioribus, femina, anethinis non diffimilia, arenae granu-

granula, aliaque recrementa mixta inveniuntur, constat. Portio gummosa resinofam quantitate superat, virtute tamen posteriori paullo inferior est. Solutio aquosa prima turbida est, coloris albidi, ad subluteum nonnihil vergentis, saporis amaricantis, odoris debilis virosi. Extractum spissatum colore sordide subluteo-fusco tinctum est, odore destituitur, et debilem duntaxat saporem resinoso-amaricantem obtinet. Ex uncia dimidia gummi purissimi drachmas tres et grana viginti tria impetravi. Infusum spirituosum primum pellucidum est, et colore flavo-rubescente, sapore ingrato subacri atque amaricante, et fortiori, quam aquosum, odore gaudet. Extractum cum infuso convenit, praeterquam, quod color saturatior, ex luteo nempe et rubescente subfuscus, odor vero ac sapor paullo debilior sit. Vncia dimidia circiter drachmas tres dedit. Neque hoc, neque praecedens extractum perfecte purum est, sed, ob intimiorem substantiae utriusque miscelam, in solutionem aquosam, quod maxime ex turbida eius constitutione patet, partes quaedam resinosae, et in resinofam multae moleculae gummosae secedunt.

§. III.

Ob lenissimam virtutem laxantem, validamque abstergentem, attenuantem et aperitivam, concretum hoc specificè laudatur in obstructione hepatis, lienis, mesenterii, uteri, renum et vesicae, nec minus in cachexia, ictero, febribus intermittentibus, hydrope, nephritide sabuloso-pituitosa, tussi, asthmate, aliisque mucidis pectoris adfectibus, gutta serena, fluore albo, gonorrhoea virulenta, et ulceribus partium inter-

ternarum. Datur in infuso et sub forma pilulari, a granis aliquot ad scrupulum unum, et subinde etiam in emulsionem cum aqua simplici aut quadam destillata redigitur. Externe egregium, usitatissimumque emplastrorum emollientium, resolventium et suppurantium ingrediens constituit, immo emolliendis clavis pedum, aliisque excrescentiis et tumoribus induratis per se, non sine efficacia insigni, adplicatur.

§. IV.

GALBANVM, *Mutterharz*, est concretum gummeo - resinosum, paullulum splendens, tenax, et cerae instar ductile, colore nunc albido aut rufo - flavescente, nunc fusco, aut ferrugineo - nigricante, sapore resinoso - amaricante atque subacri, odore grato balsamico. Planta, quae fauciata hunc succum fundit, in India, Syria, Aethiopia, Arabia, nec non Africae promontorio Bonae Spei crescit, et a **TOURNEFORTIO** *Oreoselinum Africanum galbaniferum frutescens folio anisi*, ab **HERMANNO** *Ferula Africana galbanifera, folio et facie ligustici*, et ab aliis *Ferula fruticosa semper virens Syriaca* vocatur. Optimum censetur galbanum ex albido aut rufo flavescens, in lachrymas seu grumos puriores ac paullulum splendentes concretum; reiiciendum vero sordidum, quisquiliis variis refertum, et fusco obscuriori aut nigricante colore praeditum.

§. V.

Partes gummosas et resinosas, essentiali oleo aethereo praegnantibus, in mixtione fovet, ita tamen, ut resinosae copiosius, quam gummeae, adsint. Oleum essentielle, cuius circiter drachmae

mae sex in una galbani libra haerent, destillatione humida expellitur, et miscela sua utramque substantiam fixam praecipue activam efficit: Hinc, quo recentius hoc concretum est, eo maioribus etiam viribus instructum reperitur, et vice versa. Notatu quoque dignum est, galbanum per se, igne aperto leniori ex retorta destillatum, in principio singulare quoddam oleum coeruleum aut violaceum, aethereo essentiali adhuc satis natura analogum, reddere, eidemque tandem, igne nimirum aucto, copiosum empyrevmaticum, ex violenta substantiae fixae gummeo-resinosae destructione resultans, succedere. Laudatum oleum coeruleum magnarum virium est, colorem tamen non adeo diu retinet, sed intra aliquot dies, praesertim si vitrum solummodo obiter clausum fuerit, purpureum evadit. Solutio aquosa prima, quae turbida deprehenditur, colore pallide flavescente, et grato odore balsamico, similique sapore gaudet. Extractum spissatum, cuius pondus, assumpta uncia galbani dimidia, duos circiter scrupulos aequat, flavo-subfuscum est, odoris debilis, saporis resinosi. Tinctura spirituosa prima sese colore saturate aureo commendat, et acri, grate balsamico, et subamaricante sapore pollet, balsamico autem odore infuso aquoso, quod plures partes oleosas, quibus maior fragrantia unice tribuenda, continere videtur, non nihil cedit. Massa post evaporationem relicta, subfusci coloris est, parum amplius olet, et debilem duntaxat saporem resinoso-balsamicum, acredine prorsus spoliatum, linguae imprimit. Vncia galbani dimidia mihi ferme drachmas tres huius extracti resinosi suppeditavit.

§. VI.

Selectioribus uterinis, antihysteriis et antiepilepticis remediis hoc concretum adnumeratur, et frequentissime, ob laudatas vires generales, in suppressione mensium, fluore albo, partu difficili, iusto parciori lochiorum fluxu, malo hysterico, colica convulsiva, epilepsia, aliisque convulsionibus, nec minus, ob moderatam virtutem roborantem et attenuantem, in obstructione viscerum, tussi, asthma, coryza, ceterisque adfectibus catarrhalibus, sub forma pilulari, a granis aliquot ad scrupulum unum, exhibetur. Externe balsama et emplastra traumatica, suppurantia, resolventia, nervina, antispasmodica et anodyna ingreditur, quae duris tumoribus, partibus inflammatis, paralyticis, vulneratis, exulceratis, rigidis, itemque abdomini in colica, passione hysterica, obstructione hepatis, lienis, mesenterii etc. adplicantur. Additur etiam suffimigiis uterinis, in prolapsu vaginae et uteri, fluore albo, dolore hysterico atque sterilitate, multumque praeterea, sub forma emplastri adplicatum, ad abigendos clavos pedum valet.

§. VII.

BDELLIVM OFFIC. est concretum gummeo-resinosum, contactu pingue, myrrhae genuinae instar, quodammodo fragile, coloris albido-subfusci, vel fusco-rubentis, odoris grati balsamici, saporis subacris et amaricantis. Arbor, quae hanc lachrymam foeneratur, nondum satis nota est, in Arabia tamen, India, Media etc. crescere, et lactescens atque spinosa esse dicitur. Nonnulli hanc et myrrhiferam unius eiusdemque generis esse, et utramque specie duntaxat differre opinantur; quam sententiam, cum, experien-

perientia destitutus, certiores substituere nequeam, tutoribus suis relinquo.

§. VIII.

Ex aequalibus *partibus gummosis ac resinosis* constat, praecipua tamen virtus posterioribus ingenita est. Infusum aquosum primum, quod turbidum, et coloris lutosi aut ex albido subfufci existit, linguae nauseosum saporem amarum, naribusque odorem debilem, ingrate balsamicum, imprimit, et post plenariam evaporationem massam relinquit, coloris pallidi, ad lutosum aut ferrugineum vergentis, saporis amaricantis et aromatici, odoris debilis balsamici. Pendet ex uncia bdellii una circiter drachmas tres et grana aliquot. Solutio spirituosae prima coloris aurantii est, saporis resinoso-balsamico-amaricantis, et fortioris ac gratioris, quam aquosa, odoris. Extractum spissatum flavo-rubescens eodem, quo infusum, odore, est paullo debiliori, gaudet, et forti sapore resinoso, debili balsamico, subacri et amaricante donatum reperitur. Ex uncia una circiter drachmas tres impetravi.

§. IX.

Militat inter roborantia et attenuantia, atque specificè in morbis pituitosis pectoris, uteri, renum et vesicae, adeoque in tussi, asthma, fluore albo, suppressione mensium, sterilitate, epilepsia hysterica, calculo, nephritide pituitosa, ulcere renum et vesicae prodesse consuevit. Praescribitur sub forma pilulari, a granis aliquot ad scrupulum unum. Externe, ob validam virtutem resolyentem, discutientem et traumaticam, frequentius in usum vocatur, et emplastris

stris non minus, quam unguentis, tumoribus duris, glandulis induratis, scrophulis, apostematibus, vulneribus, distortis aut alio modo laeſis tendinibus, herniis etc. adplicandis, additur. Interdum etiam ſuffimigiis uterinis, ad foetum mortuum expellendum, aliaque uteri vitia curanda, miſcetur.

§. X.

Cum Galbano *O P O P A N A X* multa quoad principia ac vires medicas communia habet, et itidem gummi-resinam ſiſtit, in grumos ſeu grana, piſo nunc maiora, nunc minora, nunc aequalia, concretam, contactu quidem pinguem, friabilem tamen, intus albam aut albido-flaveſcentem, foris ſubluteo-rufeſcentem aut flavo-subfuſcam, ſaporis acris et amari, odoris ingrati. Adfertur ex Graecia, Italia, Sicilia, Gallo-provincia, ibidemque ex radice ac ramis inciſis plantae cuiusdam, quae LINNAEO *Paſtinaca foliis decompoſitis pinnatis*, C. BAVHINO *Panax coſtinum*, et MORISONIO *Panax heracleum* audit, extrahitur. In iisdem morbis, quibus galbanum medetur, conducit, propter ingratiorem tamen ſaporem ac graveolentiam ſuam, interne rarius, quam illud, praefcribitur, ſed ſaepius inter emplaſtra, reſolvendis tumoribus duris, aut membris paralyticis imponenda, recipitur, immo interdum utiliter quoque ſuffimigiis uterinis, in paſſione hyſterica, obſtructione fluxus menſtrui et ſterilitate proficuis, admiſcetur.

CAP. XXXX.

De Sagapeno et Asa foetida.

§. I.

GUMMI SAGAPENVUM sive SERAPINVUM OFF.
est lachryma concreta resinoso-gummea, coloris fusci, vel ex rufo flavescens, saporis acris et amaricantis, odoris, si prunis iniicitur, instar porri aut allii, gravis atque virosi. Adfertur ex Aegypto, et in Persia, India orientali etc. ex inciso quodam frutice ferulaceo, nondum tamen Botanicis satis noto, exstillare dicitur. Optimum iudicatur pellucidum, ac pallide flavescens, quod asam foetidam et non-nihil quoque galbanum redolet.

§. II.

Partes gummosae maiori quidem copia, quam *resinosae*, adsunt, virtute tamen hisce longe inferiores reperiuntur. Solutio aquosa prima turbida est, et odore debili balsamico, similique sapore, subamaricante paullulum remixto, pollet. Extractum spissatum, cuius circiter drachmas duas, totidemque scrupulos ex dimidia sagapeni uncia impetravi, colorem pallidum, ad flavedinem vergentem, odorem debilem, et saporem blande balsamicum, subacrem et subamaricantem obtinet. Solutio spirituosae prima, licet coloris saltem pallide flavescens sit, et odoris fere nullius, satis acrem, mordacem et amarum saporem possidet. Extractum inspissatum specificum adhuc sagapeni odorem spirat, et maiori amaritie, minori contra acredine, quam tinctura, instructum deprehenditur. Vncia dimidia drachmam unam et grana triginta sex de-

dit. Vtrique principio fixo parum *olei essentialis aetherei* inhaeret, quod vires medicas multum intendit.

§. III.

Valide irritando, abstergendo, atque discutiendo operatur, et iure igitur inter efficacissima attenuantia, resolventia et aperitiva referri meretur. Conducit specificè in refractariis obstructionibus viscerum, hepatis nempe, lienis, mesenterii, renum et uteri, adeoque in hydrope etiam, obstructione mensium, fluore albo, calculo, epilepsia hysterica, etc. nec minus in hemicrania rebeli, asthma pituitoso, aliisque adfectibus pituitosis. Abstergit praeterea mucum primae culinae, nec raro proinde in torminibus ventris, ceterisque ventriculi et intestinorum morbis, ex cruditatum viscidarum colluvie resultantibus, cum fructu exhibetur. Cum aliis, huic vel illi morbo adpropriatis, ordinario in formam pilularem redigitur, et a granis quatuor ad scrupulum dimidium praescribitur. Gravidæ ab interno eius usu abstinere debent, quoniam foetum et sanguinem fortissime pellit, ac facile proinde abortum provocat. Externe inter suffimigia uterina, et emplastra resolventia ac maturantia, quorum activitatem valde auget, recipitur.

§. IV.

ASA sive ASSA FOETIDA OFFIC. *stinkender Asandt, oder Teufels-Dreck*, est concretum resinoso-gummeum, mediocris tenacitatis, coloris ex albido flavescens aut rufescens, vel subfusci, immo interdum nigricantis, odoris ingrati, ad allium vel porrum accedentis, saporis acris, amaricantis ac nauseosi.

§. V.

§. V.

Planta, cuius radix sauciata succum hunc resinoso-gummeum fundit, a KAEMPFFERO, *Assa foetida Dysgunensis umbellifera, levistico affinis*, a LINNAEO autem *Ferula foliolis alternatim sinuatis obtusis*, adpellatur, et in sola Persia provenit, ubi, ita narrante vix allegato KAEMPFFERO (x), duo saltem locorum tractus eam alunt, videlicet 1) campi montesque circa *Heraat*, emporium provinciae *Chorasaan*, et 2) iugum montium in provincia *Laar*, quod a flumine *Cuur* usque ad urbem *Congo*, secundum Persici sinus tractum, extenditur, duobus, alibi tribus, pluribusve parafangis a littore. — — — Crescit promiscue in tesquis et crepidinibus, ubicunque avulsa semina (pastinacae nostratis seminibus haud dissimilia,) ventus protulerit; uberius vero et saepe ex pedali intervallo in locis, qui quodammodo premuntur in planitiem, quippe semini retinendo, et ob meliorem fundi conditionem fovendo, aptioribus etc. Radix pastinacae radicem forma aemulatur, crassitie autem longe superat, et foris praeterea nigricante colore est. Certa eius aetas postulatur: Quadriennio enim minor parum lactescit, nec unquam secatur, quo autem vetustior et maior est, eo maiorem succi lactei, seu lachrymae copiam impertitur. Succus, uti vix laudatus Auctor porro refert, ex utriculis radice recens emanans, candidissimus, liquidus, et pinguis est, flori lactis dulcis exakte simillimus, adeoque omnis exfors lentoris, ad aëris vero solisve contactum, colorem subfuscum induit, et coalescens lentorem quoque. Foe-

R 2

rem

(x) In *Amoenit. exot. Fasc. III. pag. 539. et 542.*

rem Asam testatur. At ille in recenti lachryma vehementissimus est, cum eo, quem concreta et antiquior redolet, qualem Europa recipit, nullo modo comparandus. Vna drachma, recens effusa, maiorem spargit foetorem, quam centum librae vetustioris, quam siccam venundant aromatarii nostrates etc.

§. VI.

Ex *partibus terrestribus*, aliisque recrementitiis, *oleosis*, *gummosis* ac *resinosis* conflata reperitur. Oleum essentiale, licet exigua copia inhaereat, reliquis partibus fragrantiam et praecipuam activitatem conciliat; hinc quo vetustior asa, eo debilior. Oleo, respectu virtutis, portio resinosa, quae maiori acrimonia poliet et amaritiae, succedit, licet mole minori, quam gummosa substantia, adsit. Aquosum infusum primum colore pallide flavo, ac simul turbidum est, fortemque allii odorem spirat, ac valde nauseosum saporem balsamicum obtinet. Sub evaporatione copiosas particulas oleoso-spirituosas constanter eructat, quare postea etiam inspissatum extractum, quod coloris sordide lutei est, ad fuscum nonnihil vergentis, parum amplius olet, et debilem duntaxat ac nauseosum saporem amaricantem linguae imprimit. Solutio spirituosa prima, quae flava, et post refrigerationem nonnihil turbida est, porrum redolet, et ingrati cepacei ac simul acris saporis sensum in gustus organo excitat. Tinctura haec sub evaporatione constanter quoque asae odorem specificum spirat, eundemque etiam massa inspissata retinet, quae caeteroquin colore flavo-fusco est, et, praeter proprium asae saporem nauseosum, pariter resinoso-amaricantem possidet.

det. Vncia asae foetidae dimidia saltem scrupulos quatuor et grana aliquot extracti resinosi dedit, et inde igitur constat, quod maxima eius pars gummosa sit.

§. VII.

Potentissima virtute discutiente, nec contemnenda pariter abstergente et antispasmodica gaudet, adeoque specificè etiam colicae flatulentiae, passioni hystericae, a causa frigida oriundae, sterilitati, suppressioni mensium, hydropi humido et tympanitico, asthma pituitoso, obstructioni hepatis, lienis ac mesenterii, epilepsiae, aliisque convulsionibus mederi creditur. Pellit praeterea foetum et secundinas, vermes necat, adpetitum venereum excitat, et, vario- las quoque atque morbillos, provide tamen ac modice usurpata, expellit. Indis, praesertim Benianis, creber, uti KAEMPFERVS testatur (y), asae foetidae usus est, etiam in cibis pro condimento. „Hoc, addit, referenti Gar-
„ciae aegre credidit Cl. Renodaeus; nam: si hoc,
„ait fabula non est, ex duabus alterum coniecto: aut
„asam foetidam in India non foetere, aut Indos ae-
„neum habere guttur. Mat. med. Lib. I. §. VIII.
„Cap. VIII. Degustavi hoc succo imbuta cru-
„stula, quae mihi non adeo sapiebant tenerri-
„me, ac putaveram. Persici Medici, paullo
„ante scribit, ob delicatum nationis genium, ab
„usu fere abstinent; rusticis saltem Laren- sibus in
„colicis torminibus et hydrope, praesertim in
„tympanitide curanda, usus innotuit ex consilio
„Benianorum. Retulit mihi civis Disgunensis,
„se hoc morbo tumidum, omni mane per sex
„hebd-

R 3

„hebdomades devorasse asae bolum seu pilulam
 „maiusculam, donec convaluerit: ex eo subin-
 „de sibi flatus sursum et deorsum secessisse, adeo
 „foetentes, ut ab hominum consortio toto tem-
 „pore iussus sit exulare.„ Datur in forma pi-
 lulari, a granis aliquot ad scrupulum unum, im-
 mo integram drachmam, et commode pariter in
 essentia, quae in Officinis prostat, propinatur.
 Externe inter suffimigia uterina, et emplastra
 antispasmodica, discutientia, antihysterica, car-
 minativa et roborantia recipitur.

CAP. XXXXI.

De Ladano, Caranna et Gummi Hederae.

§. I.

Duplex LADANVM, alterum nempe *purius*
 atque *praestantius*, alterum *impurius*, adeo-
 que etiam *ignobilius*, in Officinis nostris venale
 prostat. Prius, gummi-resinam inflammabilem
 sistit, quae recens molliuscula est, tenax, inter
 digitos calidos lentescens ac picis instar ductilis,
 inveterata autem durior atque friabilis, coloris
 gryseo-rufescentis, aut rufo-nigricantis, sapo-
 ris subamari leniterque balsamici, odoris haud
 ingrati ac satis, si accenditur, fragrantis; poste-
 rius subtili arena aliisque quisquiliis terrestribus
 valde permixtum, adeoque etiam valde durum,
 nigricans, parum amplius odoratum ac fere in-
 sipidum existit. Frutex, cuius folia sub arden-
 tissimo caniculae calore gummeo-resinosum hoc
 concretum extrudunt, in Creta aliisque maris
 Aegei Insulis, et passim quoque in Hispaniae ac
 Lusitaniae montibus crescit, et a TOVRNEFOR-

TIO *Cistus ladanifera Cretica flore purpureo vocatur.* Collectores rustici plerumque, ad pondus augendum, minutissimam quandam arenam nigram ac ferrugineam resinae recenti admiscent, et inde etiam fit, ut Ladanum nigrum ignobilius in Officinis saepius, quam purius rufo-nigricans, reperiatur.

§. II.

Ex pluribus *partibus resinosis*, quam *gummosis*, *oleo aethereo* paullulum impraegnatis, constat, multasque praeterea quisquilias arenoso-terreas continet. Portio magis resinosa, in spiritu vini solubilis, in una uncia plerumque drachmas quinque vel sex, et portio gummosa, in aqua solubilis, circiter drachmam unam pondere aequat; quod reliquum est, recrementum mere terreum et arenosum sistit. Solutio aquosa prima turbida est, coloris pallide lutosi, saporis debilis amaricantis, odoris, ferme instar herbae Nicotianae, nonnihil ingrati. Extractum inspissatum saturatiori quidem colore, pallide nimirum ac fordide fusco gaudet, respectu saporis et odoris autem infuso longe adhuc debilius deprehenditur. Tinctura spirituosae prima colorem aureum, saporem ex acriusculo leniter balsamico et amaricante mixtum, et odorem balsamicum, parum tamen gratum, obtinet. Massa, post evaporationem relicta, colore flavo-fusco est, odorem nauseosum, instar tabaci, spirat, et debilem atque ingrate balsamicum saporem possidet, tenacissimeque linguae ac faucibus sub degustatione adhaerescit. Docent descripta examina: 1) Ladanum ob ignobiles debilesque vires commode ex Officinis exulare posse; 2) activitatis intuitu primo portionem spirituoso-oleo-

R 4

fam

sam, deinde resinofam, tandemque gummosam collocandam esse.

§. III.

Raro hoc concretum interne adhibetur, licet tinctura spirituosa, a guttis 2. ad 30 propinata, aliquam virtutem confortantem nervinam atque cephalicam exserere valeat; sed externum plerumque usum invenit, et inter emplastra roborantia, massas pro pastillis ac bacillis odoratis, et tingendi quoque sine inter balsama nervina et cephalica externa recipitur.

§. IV.

CARANNA OFF. est massa gummeo-resinosa, recens tenax et picis instar ductilis, vetustior dura, friabilis, coloris gryseo fusci aut flavo-ferruginei, odoris, dum accenditur, fragrantis, saporis viscoso-resinosi et debilis balsamico-amaricantis. Arbor, quae fauciata hanc lachrymam fundit, in regno Mexicano praecipue crescit, et a C. BAVHINO *Caranna Monardi*, ab incolis autem, teste HERNANDEZIO, *Flahvelitoca Quahvitl*, i. e. *arbor insaniae*, adpellatur.

§. V.

Conflata reperitur ex *partibus gummeis, resinosis et oleosis essentialibus*. Oleum essenziale aethereum, quod colore flavo, odore grato aromatico, et sapore acri atque amaro gaudet, fixis principiis gummeo-resinosis unice propemodum (licet non adeo magna quantitate inhaereat) odorem, saporem ac vires conciliat. Solutio aquosa aurei coloris est, odoris resinoso-balsamici, saporis amari ac leniter, quamquam ingrate, balsamici. Cum infuso extra-

ctum

Etum ipsum convenit, praeterquam quod flavo-subfusco colore tinctum sit. Pendet ex integra carannae uncia circiter drachmas tres. Tinctura spirituosae prima, colore saturate aureo donata, odore grato ac forti resinoso-balsamico, et sapore acri, amaricante atque balsamico pollet, ita tamen, ut amarities praedominium obtineat. Inspissatione eius in arena calida maximam partem peracta, extracto resinoso parum olei essentialis aromatici, acri et satis amaro sapore praediti, supernatabat, eodemque ablato, massa tenax, flavo- et subfusco - albicans, relinquebatur, quae naribus adhuc gratum quidem ac debilem odorem balsamicum, linguae autem nullum singularem, ac mere duntaxat resinosum saporem imprimebat. Linguae, palato et dentibus tenacissime adhaerescit, et ex uncia una ferme drachmas sex pendet. Vnde manifestum est, substantiam resinosam maiori copia, quam gummosam, carannae mixtionem ingredi, et saporem nihilominus, odorem atque virtutem medicam praecipue, uti antea dictum, a mixto oleo essentiali dependere.

§. VI.

Multa haec gummi-resina cum galbano et tacamahaca communia habet, rarissime nihilominus interne exhibetur, sed emplastra duntaxat traumatica, nervina, antispasmodica et discutientia, in vulneribus nervorum ac tendinum, debilitate articulationum, tumoribus et catarrhis frigidis, spasmo ventriculi, lienteria, vomitu, dolore dentium etc. proficua, ingreditur, et suffimigiis quoque uterinis et roborantibus nonnunquam additur. Si usus internus in morbis rheumaticis et convulsivis placet, sub

forma pilulari, a granis aliquot ad scrupulum semissem, exhiberi poterit.

§. VII.

GUMMI HEDERAE OFFIC. quod in India et alibi ex trunco et ramis *Hederae arboreae* C. B. prodire dicitur, est massa dura, compacta, magis resinosa, quam gummosa indolis, coloris extus obscure rubiginosi aut fusco-nigricantis, intus flavo-ac rubro-fusci splendentis, saporis resinoso-terrestris et subadstringentis, odoris, si accenditur, ingrati balsamici.

§. VIII.

Plures, quod dictum fuit, *partes resinosas*, quam *gummosas*, in mixtione fovet, quibus multae quidem molecule recrementitiae terrestres, nihil vero olei substantialis aetherei mixta reperiuntur. Solutio aquosa prima colore dilute aureo est, et odore debili balsamico. Massa spissata ex uncia gummi una vix drachmam unam pondere aequat, et colorem flavo-fuscum, odorem ferme nullum, et debilem et nauseosum saporem balsamicum obtinet. Solutio spirituosae prima, cuius color rubicundus est, fortiolem, quam aquosa, odorem resinoso-balsamicum spirat, et saporem subacrem atque nonnihil amaricantem linguae imprimit. Evaporata massam relinquit rubro-fuscam, et paullulum nigricantem, quae, intuitu odoris et saporis, cum tinctura convenit, praeterquam, quod uterque debilior existat. Ex uncia gummi una drachmas quinque impetravi.

§. IX.

Viribus non adeo singularibus pollet, et commode igitur ex Officinis pharmaceuticis exulare posset.

posset. Numeratur inter subadstringentia, et emplastris stypticis atque traumaticis additur. Nonnulli istud inter eiusdem quoque virtutis pilulas recipiunt; ast parum auxilii ab usu eius interno expectandum est.

CAP. XXXXII.

De Gummi Anime, Elemi et Olibano.

§. I.

GUMMI ANIME OFFIC. est concretum mere resinofum, friabile, et nonnihil hinc inde pellucidum, coloris albicantis aut flavescentis, odoris, praesertim prunis iniectum, grati balsamici, saporis nullius singularis. Dividitur in *orientale et occidentale*: Hoc ex Virginia, Nova Hispania et Brasilia adfertur, ibidemque ex vulnerata arbore siliquosa quadam, incolis *Ietaiba*, LINNAEO *Hymenaea* dicta, exstillat; illud vero, orientale nimirum, quod Americanum nitore superat, ac modo candidum, modo rufescentem, modo subfuscum colorem obtinet, in Aethiopia, unde nostra tamen aetate rarius advehitur, ex arbore, occidentali animiferae analoga, emanare traditur.

§. II.

Resinosa haec massa in spiritu vini rectificatissimo tota, paucis duntaxat recrementis terreis relictis, solvitur, menstrua aquosa autem parum extrahere valent. Flava solutio spirituosa blandum odorem balsamicum emittit, et linguae saporem, ex acri, amaricante et balsamico mixtum, imprimit: Infusum aquosum saltem pallide flavescens est, et licet quidem specificum sim-

plicis

plicis odorem spiret, praeter paucas tamen particulas oleoso-spirituosas, sub digestionem separatas, nullam substantiam crassiorē continet. Oleum substantiale aethereum parcissime inhaeret, adeoque nihil inde, nisi magna quantitas una vice humidae destillationi subiiciatur, elicitur.

§. III.

GUMMI ELEMI OFFIC. aequae, ac praecedens, perperam gummi vocatur: Mera quippe massa tenax, pinguis ac resinosa est, consistencia, si recentior, molliori, si vetustior, sicciori, odore gratissimo, sapore resinoso-balsamico et lenissime amaricante, colore ex albido aut sub flavo-virescente. Duplicis quoque generis est, alterum nempe *Aethiopicum*, alterum *Americanum*. Prius, quod raro tamen in Officinis nostris, licet praestantius existat, reperitur, ex olea *Aethiopica* prodit, et a quibusdam etiam *Gummi Elemi verum* adpellatur; posterius autem in Nova Hispania et Brasilia ex altius vulnerato cortice arboris cuiusdam, quae Brasiliensibus, teste MARCGRAVIO (z), *Icicariba* audit, elaboratur, et ubique in Europa venale prostat.

§. IV.

Cum *partibus resinosis*, quae apud vulgare Gummi Elemi, in Officinis nostris plerumque obvium, maximam ponderis partem conficiunt, etiam *oleosae* quaedam et paucissimae *gummosae* mixtae inveniuntur. Referente quippe NEVMANNO, ex integra libra olei essentialis uncia una destillando elici, et duae circiter drachmae, totidemque scrupuli substantiae gummeae separari possunt. Activitas praecipue in oleo latet,

(z) *Libr. saepius citate.*

latet, idemque infusis et extractis aquosis et spirituosus odorem et saporem unice propemodum largiri videtur. Tinctura spirituosa, dilute aurea, gratum spirat odorem, et acrem atque balsamicum saporem, amaricante nonnihil remixtum, possidet. Flava massa inspissata longe debilior est, et pristinum quidem odorem debilemque saporem balsamicum, nullam vero amaritiam atque acredinem retinet, et quidquid insolubile relinquitur, pulciculam forma externa aemulatur. Infusum aquosum nullo ferme colore tinctum adparet, et tenuissimae saltem flavedinis vestigia monstrat, odore nihilominus gummi satis prodit, et balsamicum quoque atque amaricantem saporem obtinet. Evaporatione inspissatum, parum extracti satis inertis relinquit: Vnde manifestum est, odorem et saporem, quo infusum gaudet, ab oleo, sub evaporatione abeunte, dependere.

§. V.

Bina haec corpora resinosa, quae valde quoad naturam et usum conveniunt, interne, ob insolubilitatem suam in ventriculo, raro vel nunquam exhibentur, sed externis solummodo usus destinantur, et inter suffimigia, massas odoratas, unguenta, balsama et emplastra, confortantis, nervinae, cephalicae, anticatarrhalis atque traumaticae virtutis recipiuntur. Interdum quoque speciebus pro suffimigiis uterinis, in sterilitate, fluore albo et chronica mensium suppressione proficuis, miscentur.

§. VI.

OLIBANVM sive THVS OFFIC. *Weyhrauch*, est corpus gummeo - resinosum, in lachrymas
maio-

maiores et minores, fragiles, pellucidas, pallide flavas, saporis resinoso - balsamici, odoris fragrantis, concretum. Duae venduntur species, quarum altera, quae optima atque purissima est, *Thus masculinum, testiculatum*, aut *Olibanum in granis*, altera, priori impurior, *Thus foemininum*, aut *Olibanum vulgare* nuncupatur. Ex Aethiopia et Arabia ubi quotannis sat magna colligitur copia, ad nos asportatur; arbor tamen, quae hanc lachrymam fundit, Botanicis nondum satis innotuit, et a Cedro folio cupressi, maiori fructu flavescente c. b. quam multi pro vera arbore thurifera habent, discernenda est. Indurata enim lachryma resinosa, quam Cedrus memorata exsudat, cum vulgari Gummi iuniperino convenit, et ab eo nonnihil tantum odore suaviori distinguitur.

§. VII.

Ex aequalibus ferme *partibus resinosis ac gummeis*, oleo aethereo parcissime imbutis, componitur, substantia tamen resinosa maiori, quam gummea, virtute pollet. Solutio aquosa turbida est, lactescens, ad pallidam flavedinem aliquantisper inclinans, odore simplicis specifico, sapore amaricante et balsamico. Idem odor et sapor etiam in inspissato extracto flavoprehenditur, praeterquam, quod amarities maior existat. Tinctura spirituosa flavescens pellucida odorem spirat balsamicum, et satis acrem saporem, balsamico et amaricante mixtum, obtinet. Sub evaporatione haec ipsa partes oleosospirituosas odoriferas maximam partem amittit; hinc ad decentem quoque spissitudinem redacta, instar cerae tenax est, et nullo amplius sapore et odore gaudet. Vnde clare patet, laudatas

par-

particulas oleoso - spirituosas, quibus utraque substantia fixa, durante mixtione naturali, parcius impraegnata est, unicam ferme, vel tamen praecipuam, activitatis et odoris fragrantis causam constituere. Externum solummodo usum haec gummi-resina in medicina invenit, et usitatissimum imprimis suffimigium praebet.

CAP. XXXIII.

De Mastiche et Gummi Juniperi.

§. I.

MASTICHE sive MASTIX OFF. est mera resina arida, dura, fragilis, in granula seu lachrymas minores, pallide flavescentes, pellucidas, debilis saporis resinoso-balsamici, odoris, dum accenduntur, fragrantis, concreta. Pro-
manat ex trunco et ramis arboris *Lentisci vulgaris* C. B. et optima species ex Insula Chio, ignobilior ex Italia, Sicilia, Lusitania etc. adfertur. In Insula Chio, ubi maxima huius resinae collectio est, incolae arbores laudatas quotannis tri-na vice, mense nimirum Martio, medio Augusti, et Septembri, coelo sereno existente, incidunt, ut naturalis balsamus mastichinus, in oblonga postmodum grana et glebulas induref-cens, largius effluat. Grana puriora et plus minusve transparentia in Officinis sub nomine *Mastichis electae* venduntur.

§. II.

Aqua resinae huic sub digestionem nil, nisi paucissimas partes oleoso-spirituosas, quae eidem debilem conciliant odorem balsamicum, eripere valet; spiritus vini rectificatissimus autem illam penitus, paucis saltem relictis partibus terreis, solvit,

solvit, et colorem inde dilute aureum, odorem gratum, et saporem acrem, amaricantem atque balsamicum nanciscitur.

§. III.

Saepius hoc medicamentum, cuius plenaria resolutio in ventriculo nunquam speranda est, externo, quam interno, usui impenditur. Interne vires roborantes et subadstringentes exercet, et a practicis contra ventriculi imbecillitatem, diarrhoeas, dysenteriam, diabetem, fluxum album et gonorrhoeam benignam praecipue commendatur. Dosis eius in pulvere ad grana tria vel quatuor, in infuso vinoso ad scrupulum dimidium, immo integrum, ascendit. Externe pulveres ad- et inspergendos, suffimigia, pulveres dentifricos, decocta vinosa, unguenta, emplastra etc. ingreditur, et, sub hac vel illa forma adhibitum, laxitati uvulae, scorbuto oris, procidentiae ani, uteri atque vaginae, nec minus herniis et articulorum debilitati egregie medetur.

§. IV.

GUMMI IVNIPERI OFF. sive SANDARACHA ARABVM, *Wacholder-Harz*, ex trunco et ramis crassioribus *Iuniperi vulgaris*, tam fruticosae, quam arboreae C.B. colligitur, et ordinario in guttas aut glebularum, modo rotundas, modo oblongas, splendidas, pallide flavescentes, saporis resinosi, odoris grati balsamici, concretum reperitur. In ventriculo nunquam penitus solvitur, sed pauxillum duntaxat substantiae oleosae a liquore gastrico extrahitur; quare externi solummodo usus est, et inter suffimigia, emplastra et alia medicamenta roborantia antiputredinosa et traumatica recipitur.

CAP. XXXXIV.

De Styrace et Tacamahaca.

§. I.

STYRAX sive STORAX OFFIC. in *solidum* et *liquidum*, ac prior rursus in *vulgarem* sive *ordinarium*, et *granulatum* sive in granis, dividitur. Granulatus, qui etiam *Styrax ruber* dicitur, nitidior, compactior, atque odoratior est, et indolem longe praestantior, quam vulgaris, obtinet, hodie tamen in Officinis pharmaceuticis, ob proventum rariorem, non amplius prostat; vulgaris autem copiose adfertur, et corpus sistit maximam partem resinofum, molliusculum, pingue, in grumos maiores et minores coactum, coloris flavo-rubescens, odoris grati ac quasi mellei, saporis moderate balsamici et subamaricantis.

§. II.

Arbor, quae utrumque Storacem solidum largitur, et C. BAVHINO *Storax folio mali cotonei* audit, in Syria, Palaestina, Creta, Persia, Italia et aliis quibusdam Europae meridionalis tractibus crescit, nullam tamen in regionibus postremis resinam foeneratur, sed illa duntaxat ex Syria aliisque Asiae locis ad nos transmittitur. Olim calamis seu Cannae fistulis inclusa adychebatur, hinc *Styracis Calamitae* nomen adeptus est. Styrax in granis ex arbore incisa sponte profluit, adeoque vera lachryma indurata est, ad vulgarem vero formandum sine dubio certa hominum artificia simul requiruntur.

§. III.

Styrax solidus vulgaris, qui hoc loco praecipuum tractationis obiectum constituit, ex *partibus resinosis, gummeis et spirituoso-oleosis* constat. Oleum, ex integra libra prolectum, teste NEUMANNO (a), quatuor circiter scrupulos pendet, et tam singularis naturae est, ut simul cum aqua sub crassiori consistentia oleosa transire recuset, et tum demum transcendere incipiat, quando aqua penitus abstracta est; hinc leve etiam empyrevma contrahit. Destillatione continuata et resinae mixtione tandem destructa, primo liquor acidus, deinde oleum spissiusculum butyraceae consistentiae, quod, aqua lotum, flores quosdam, benzoinis analogos, suppeditat, succedunt. Prior, adhibita nempe libra styracis integra, ultra unciam unam, posterius ad duas ferme uncias pondere adscendit. Portio gummea quartam circiter massae partem explet, quod superest, resinosae indolis deprehenditur. Infusum aquosum, saturate aureum, ipsam gummi-resinam satis redolet, et saporem amarum, balsamicum, nauseosum obtinet. In extracto inspissato color saturatior, nimirum flavo-fuscus, amarities vero debilior est. Tinctura spiritiuosa prima colore flavo-rubesciente sese commendat, et licet quidem infuso aquoso odoris fragrantia cedat, acri tamen, amaricante et aromatico sapore pollet, et evaporata massam suppeditat, iisdem proprietatibus instructam, praeterquam, quod tinctura, intuitu saporis, remissior sit.

§. IV.

(a) L. cit. pag. 876.

§. IV.

Interne roborandi fine rarius exhibetur, externe autem inter varia suffimigiorum genera et emplastra recipitur. Conducit maxime in morbis a nervorum ac membranarum debilitate oriundis, nec contemnendam proinde opem in epilepsia, paralyfi, coryza diuturna, tussi inveterata, prolapsu uteri et vaginae, sterilitate etc. praestat. Si usus internus placet, pilulis et speciebus pro infuso vinoso misceri poterit.

§. V.

TACAMAHACA sive TACHAMAHACA OFF. non gummi est, licet vulgo ita nuncupetur, sed resina arida, retorrída, friabilis, in maiores ut plurimum glebas concreta, odoris, dum accenditur, fragrantis, saporis debilis resinoso-balsamici, et quodammodo subdulcis, coloris variegati, alibi nempe albicantis, alibi flavescentis, alibi fusci aut rufi. Magis flava magisque pellucida recentior, purior atque praestantior est, magis rufa autem, vel fusca impurior et vetustior, adeoque etiam ignobilior, iudicatur. Arbor, quae resinofam hanc lachrymam, tum sponte, tum praevia corticis incisione, fundit, in Nova Hispania et Insula Madagascar nascitur, ac Populo forma ac proceritate similis est, hinc a LINNAEO etiam *Populus foliis oblongis acutis* appellatur.

§. VI.

In spiritum vini rectificatissimum tacamahaca sub blanda digestionē tota transit, si partes terreas, aliasque quisquiliās, quae illi interdum fac copiose admixtae cernuntur, exceperis; aqua autem paucas duntaxat particulas oleosas extrahit,

trahit, et inde debilem odorem, fortemque, quamquam valde ingratum, saporem acquirit. Solutio spirituosa saturate aureo colore est, odore blande balsamico et sapore subacri atque resinoso.

§. VII.

Virtute roborante, nervina atque cephalica pollèt, nunquam tamen interne exhibetur, sed inter suffimigia solummodo, quae adfectibus arthriticis, oedematosis, catarrhalibus et rhevmaticis egregie medentur, nec minus inter cerata et emplastra, capiti, temporibus, abdomini, articulationibus aliisque partibus, contra cephalalgiam, hemicraniam, vertiginem, epilepsiam, ventriculi imbecillitatem, profluvia alvina, flacciditatem ligamentorum etc. imponenda, recipitur.

CAP. XXXXV.

De Asa dulci.

§. I.

ASSA sive ASA DULCIS, *Asa odorata*, *Gumi mi Benzoe* OFFIC. *Benzoë*, *wohlriechender Asandt*, est resina arida, fragilis, flavo-fusca, aut subfusco-rufescens, moleculis albicantibus plus minusve distincta, saporis resinoso-balsamici atque subdulcis, odoris, si accenditur, fragrantissimi. In Officinis duplex species, non natura quidem et origine, sed puritate saltem discrepans, venditur, altera nempe *ignobilior* subfusco-rufescens aut rufo-nigricans, nullis plane, vel saltem paucissimis ac valde exiguis moleculis candidis instructa, altera praestantior

ex

ex frustulis candidis maximam partem coagmen-
tata, quae *Benzoe amygdaloides* adpellatur.

§. II.

Arbor benzoifera, quam LINNAEVS *Lau-
rum foliis enerviis obverse ovatis utrinque acutis in-
tegris annuis* vocat, in regno Siamensi et Insulis
Iava et Sumatra crescit, immo in Virginia et-
iam adolescere dicitur. Referente HERMANNO
NICOLAO GRIMMIO (b), formae egregiae est,
mediocri altitudine ac viri plerumque crassitie.
Quando ad quintum vel sextum aetatis suae
annum pervenit, incolae eam circa ramorum
principium secundum longitudinem, nonnihil
tamen oblique, ad lignum usque, incidunt; quo
facto, praestantissima haec lachryma inde effluit,
et a Sole postmodum atque aëre coagulatur ac
condensatur. Recentissime collecta, albo co-
lore est, viscosa, glutinosa, et pellucida, tem-
poris vero tractu flavedinem contrahit, et iusto
diutius quoque in arbore relicta, vento flante,
arenulas, aliasque quisquiliis, quae ipsam im-
puriorem reddunt, recipit. Quantitas, quam
incolae ex integra eiusmodi arbore impetrant,
nunquam ultra tres libras pondere adscendit.

§. III.

Particulis oleosis et salinis acidis essentialibus
haec resina impraegnata est, quae coniunctim,
sub blanda sublimatione, expulsa, unione sua
flores, teneritudine, candore, forma, atque
splendore flosculos nivales aemulantes, seu re-
ctius, candidissimum, acre, odoratissimum, sal

(b) In *Miscell. A. N. C. G. Dec. II. Ann. II. Ob-
servat.* 152.

volatile oleosum formant. Quando hi flores destillationis ope eliciuntur, impuriore sunt, et libra una duas circiter uncias largitur. Oleum, quod floribus succedit, partim essentiale, partim empyreumaticum est, et adhibita vix memorata asae dulcis quantitate, novem drachmas plerumque pondere aequat (c). Prorsus destructa mixtione naturali, multum quoque acidi expellitur. Aqua calida nullum singularem ingressum habet, et aliquas solummodo particulas salino-oleosas separat, indeque satis fortem benzoës odorem specificum, et debilem quoque saporem consequitur; spiritus vini rectificatissimus autem penitus eam, remanentibus duntaxat partibus recrementitiis, solvit, et in tincturam flavo-rubicundam, sapore subacri, subdulci et temperate balsamico praeditam, redigit.

§. IV.

Virtute stimulante, incidente, resolvente, abstergente, adeoque etiam diuretica et pectorali, medicamentum hoc, praesertim in tincturam spirituosam redactum, sese magnopere commendat, et specificè imprimis adfectibus pulmonum ac renum pituitosis, cachexiae, morbis venereis, tumoribus frigidis glandularum, et febribus intermittentibus quotidianis atque quartanis medetur. Interne ordinario tinctura laudata, a guttis 20 ad 30 et ultra, exhibetur; infusa vinosa autem rarissime ipsa resina ingreditur. Quod flores quoque attinet, illi multis compositionibus dosi minori addi possunt. Pro usu externo inter massas odoratas, bacillos, alia-

(c) Conf. NEVMANNI *Praelect. chymico-pharm.* pag. 581.

aliaque suffimigiorum genera, nec minus inter unguenta, balsama et emplastra nervina recipitur, immo tinctura inter selectiora ac tutiora cosmetica locum sibi vindicat, et, aquae cuidam destillatae infusa, eidem non gratum solummodo odorem, sed lacteum quoque colorem conciliat.

CAP. XXXVI.

De Gummi Lacca.

§. I.

LACCA neque gummi est, licet ita nuncupetur, neque perfecta resina, sed potius singularis quaedam substantia resinoso-ceracea, coloris rufi, aut fusco-rubentis, saporis resinosi, odoris, si accenditur, fragrantissimi. Partim vegetabilis, partim animalis prosapiae est, ita tamen, ut copiosior materia fixa ceracea plantarum, subtilior vero materia tingens animalium progenies sit. Nam in Bengala, regno Siamensi, Insula Madagascar, aliisque Indiae orientalis locis certae formicae alatae, rubrae, grandiores, substantiam hanc resinoso-ceraceam, ex plantis colligunt, et arborum ramis adponunt, certasque inde, easque parvas et oblongas, cellulas, quae favorum cellulis non dissimiles sunt, ac primum ovulis earum, deinde exclusis vermiculis, sine dubio domicilia praebent, formant; quemadmodum hoc posterius lacca in ramulis, quae diffracta numerosas eiusmodi cellulas monstrat, satis comprobare videtur. Massae huic resinoso-ceraceae, quae initio pallida est, tincturam postea rubicundissimae

chrysalides, a formicis oriundae, et in cellulis relictæ, communicant, dum singularem nempe succum rubrum emittunt, qui caloris ope totam massam, vel maximam tamen eius partem, sensim penetrat. Alii mortuas demum chrysalides rubedinem massae resinoso-ceraceae conciliare, arbitrantur; verum, prior opinio propius, quam posterior, ad veritatem accedere videtur, quoniam chrysalides ordinario non moriuntur, sed tandem, exuviis sive involucris depositis, iterum in formicas alatas transformantur. Lacca, quae in tractibus montanis colligitur, melior atque rubicundior est, quam illa, quae in locis planis et maritimis occurrit, quoniam formicae alatae montanae ex praestantioribus floribus victum et struendi domicilii materiem petunt. Arbor, cuius ramis insecta memorata massam hanc praecipue adglutinare solent, *Iuiuba medica*, itemque *Ber indica fructu iuiubino*, vel simpliciter *Ber* aut *Bar* vocatur. Non credendum interim est, formicas alatas unice in huius arboris ramis parva sua alvearia struere, sed subinde pariter, quamquam rarius, collectam materiam in alias arbores deferunt, immo, baculis ligneis, in terram defixis, interdum adponunt.

§. II.

Triples reperitur species, *Lacca* nimirum in *Ramulis*, *Granis* et *Tabulis*. Lacca in ramulis sive baculis, quod ex praecedentibus facile patet, sola primordialis ac proprie nativa aestimanda est, et inde demum ab incolis lacca in granis et tabulis conficitur. Laccam nempe, a ramis separatam, contundunt grossiuscule, et postquam parum tincturae, quam pannis colorandis impendunt, inde extraxerunt, residuum

fic-

ficcant, ac postea pro lacca in granis vendunt. Ad parandam vero tertiam speciem blandum ignem adhibent, et debite colliquefactam ac percolatam marmori infundunt, ut diffuat, et post refrigerationem in tabulas plus minusve pellucidas indurescat. Interdum, quamquam rarissime, etiam *Lacca in guttis* occurrit, quae, referente P. TACHARTO (d), ita paratur: Infundunt primo laccam vulgarem, a ramulis avulsam, et in mortario contusam, aqua fervente, ac toties hanc infusionem repetunt, donec omnis tinctura extracta sit. Deinde tincturam collectam caloris solaris ope nonnihil inspissant, inspissatam in linteum immittunt et igni admovent; sic, accedente leni compressione, guttulae pellucidae, quae induratae laccam constituunt optimam, transeunt.

§. III.

Lacca primordialis, hoc est, in ramulis sive baculis, in spiritu vini rectificatissimo solvitur quidem, lente tamen ac difficile, et solutio praeterea filtrum aegerrime penetrat; in aqueis vero menstuis nulla propemodum, vel saltem parcissima, solutio contingit. NEVMANNVS ex integra libra uncias quindecim extracti spirituosi, et novem solummodo drachmas extracti aquosi obtinuit (e). Lacca in tabulis, quam ipse examini subieci, spiritu vini promptius solvitur, solutio nihilominus valde turbida est, et paullo difficilior quoque per chartam bibulam traicitur. Post filtrationem aliquam sortitur

S 5

pellu-

(d) Vid. *Histoire de l'Acad. Royal. des Sciences de Paris*, Ann. 1710.

(e) L. cit. pag. 681.

pelluciditatem, et color, antea subfuscus, in elegantiores flavo-rubicundam mutatur, ita tamen, ut paullulum adhuc ad fuscum inclinet. In filtro nil, nisi partes quaedam impurae nigricantes, remanet. Sapor tincturae filtratae amarus atque acris est, odore autem magis spiritum vini, quam laccam, prodit. Aqua simplex, licet satis diuturna adhibeatur digestio, nullam solutionem praestat, sed limpida permanet, insipida ac ferme inodora. Evaporatione eius peracta, nihil relictum cernitur, nisi paucissima materia gryseo-albicans, quae fundum quidem et latera vitri crusta tenerrima obducit, nullum tamen, absterfa ac degustata, saporem, nullumque odorem obtinet.

§. IV.

Rarissime hoc concretum, si tincturam eius, quae vires roborantes et subadstringentes exercere creditur, exceperis, interne exhibetur, sed externe saltem, confortandi scopo, inter massas odoratas, aliaque suffimigiorum genera, nec minus inter pulveres dentifricios et electuaria, quae contra vacillationem dentium et putredinosam gingivae laxitatem praescribuntur, recipitur. Tinctura quoque, cum spiritu salis ammoniaci vinoso inde parata, in scorbuto oris egregie prodest.

CAP. XXXXVII.

De Pice tam sicca Navali quam Liquida.

§. I.

PIX SICCA, vulgo *Pix navalis*, *Schiff-Pech*, dicta, est substantia oleoso-gummeo-resinosa, nigricans, splendens, odoris balsamici, sapo-

saporis resinoso - amaricantis; PIX LIQUIDA autem, *Theer*, habitu externo magis balsamata nativa aemulatur, et corpus liquidum spissiusculum, empyrevmaticum, gummeo-resinoso-oleosum, fortiori, quam praecedens, odore, et maiori pariter amaritiae praeditum, constituit.

§. II.

Pix solida ac liquida, sub ea forma, qua prostant, in arboribus nunquam occurrunt, sed eodem ferme tempore, eademque operatione, eliquatione nimirum et destillatione per descensum, e radicibus, et schidiis sive segmentis trunci arborum pini atque abietis, resina largius instructis, parantur. Quando in principio lignae strui, furno peculiari inclusae, ignis blandus admovetur, oleum liquidius et phlegma destillant, et in loco furni excavato infimo colliguntur: aucto postea caloris gradu, oleum spissius empyrevmaticum, sive pix liquida et pix ordinaria, quae post refrigerationem facile ab invicem separari possunt, sequuntur. Phlegma, destillationis ope expulsum, *particulis tenerrimis oleosis et salinis acidulis* valde turgidum est, nec infimum proinde locum inter medicamenta sudorifera et antiputredinosa meretur; oleum liquidius vero, post rectificationem in vesica, pro *oleo pini* venditur, hinc tempestive etiam, antequam pix liquida accedat, removetur.

§. III.

Maxima picis, tam solidae, quam liquidae, quantitas ex Norwegia, Suecia, Russia et Polonia ad alias gentes transvehitur, quoniam regiones memoratae sylvis valde abundant, et uberimus in illis pinorum atque abietum proventus est.

est. Multum quoque in Germania nostra, praesertim in Thuringiae et Hercyniae sylvis, eliquatur, et postrema species pici Norwegicae, quae vulgo optima creditur, bonitate parum vel nihil cedit.

§. IV.

Pix solida, quod pridem ex praemissa definitione patet, ex *partibus resinosis, gummeis et oleosis*, quibus *terrestres et salinae acidulae* addi poterunt, componitur. Portio resinosa maxima est, huic gummosa et oleosa succedit. NEVMANNVS ex unciiis duabus unciam unam cum scrupulo semisse extracti primi spirituosum, et unciam dimidiam olei, ab extracto separati, impetravit. Cum ordinem inverteret, ex aequali pici quantitate duae drachmae cum duodecim granis extracti aquosi primi, et uncia una ac drachmae duae extracti spirituosum secundi collectae fuerunt; quod reliquum erat, ex partibus terreis insolubilibus constabat (f). Oleum memoratum indole sua olea essentialia aetherea quodammodo aemulatur, nec cum oleo itaque, quod sub violenta demum destillatione sicca, adeoque naturali mixtione penitus destructa, cum empyrevmatico quodam liquore salino-sulphureo-aquoso prodit, confundi debet. In priori enim leviora saltem adustionis vestigia notantur, posterius autem valde empyrevmaticum est. Indicata principia constitutiva etiam in pice liquida, sub longe tamen alia proportionem, deprehenduntur. Resinosae nempe ac gummosae partes minori, salino-acidulae et oleosae autem maiori quantitate adsunt, ita, ut pix liquida iure oleum empyrevmaticum, *particulis resinosis*

(f) L. cit. pag. 290.

resinosis, gummeis, spirituosis ac valde activis salinis acidulis remixtum, nuncupanda sit.

§. V.

Vfus picis solidae navalis magis mechanicus, quam medicus est. Rarissime enim, vel nunquam, ob insignem tenacitatem suam, a Medicis circumspēctis interne praescribitur, sed externe solummodo emplastra discutientia, maturantia et conglutinantia, nec minus sic dictos *dropacismos*, quorum effectus in tinea capitis maligna et paralyſi membrorum notissimus est, ingreditur. Cum pice liquida nostro aevo aliter in hoc passu comparatum est, postquam usus eius internus primum in Anglia, posteaque ubivis ferme locorum celebratus fuit (g). Praeparatur inde infusum aquosum, quod vulgo *Aquam picis liquidae, Theer - Wasser*, vocant, et quidem sequenti modo: Recipitur libra una picis liquidae, eidemque in vase apto quatuor librae aquae purae frigidae adfunduntur, ac probe cum eadem, mediante continua cum cochleari aut baculo ligneo agitatione, per quinque circiter aut sex horae minuta, miscentur: Quo facto, vas tegitur operculo, et per tres dies ac noctes relinquitur in quiete, ut pix liquida ad fundum sece-

(g) In variis Americae tractibus usus aquae picis liquidae internus, teste *Dn. GEORGIO BERCKELEY*, diu pridem invaluit. Inde illum auctor laudatus, qui integrum de eo Tractatum conscripsit, in Hiberniam tranſtulit, unde postmodum ad Anglos et reliquas gentes Europaeas pervenit; quemadmodum plura de hisce, et singularibus imprimis aquae memoratae viribus, in allegato Libello videnda sunt.

secedere possit. Peracta sufficienti extractione ac praecipitatione, aqua supernatans, citra ullam vasis motitationem, despumatur, blande decantatur, et in vitris mundis, debite obturatis, ad usum reponitur. Quando maior quantitas, una vice, et in eodem vase, praeparatur, diuturnior quoque, et materiae quantitati proportionata, agitatio requiritur, ita, ut, adsumtis v. g. libris duabus picis liquidae et libris octo aquae simplicis, decem vel duodecim horae minuta miscelae impendenda sint.

§. VI.

Modice hac ratione aqua simplex *particulis oleoso-spirituosis balsamicis, salinis acidulis et tenerioribus quibusdam resinoso-gummeis* impraegnatur. Partes oleoso-spirituosae et resinoso-gummeae non tantum ex odore, sapore, et colore flavescente, aut flavo-rubente, patent, sed destillatione pariter manifestae redduntur. Transit enim in receptaculum, blando tamen igne adhibito, aqua gravioris, quam infusum, odoris et saporis balsamici, et in fundo materia levis, rara, nigricans, resinoso-gummea, relinquitur, quae, uti quondam *Domin. Profess. QUELLMALZ* observavit (h), superfusae aquae fontanae saporem amarum communicat, et Syrupo violarum colorem viridem inducit. Viridis hic color testatur quidem de salis alcalici praesentia, non credendum tamen est, hoc dudum adfuisse in infuso, sed summe potius probabile est, istud sub finem destillationis, cum materia sicca evaderet, interveniente partium meta-

(h) Vid. GEORGE BERCKELEY *Nachricht von Theer-Wasser*, pag. 79. in *Appendice*.

metamorphosi ac nova compositione, genitum fuisse. In infuso enim nullae partes alcalicae, sed potius acidulae sese manifestant: sapor nempe acidulus est, et in Syrupo violarum, addito hoc infuso, confestim color rubicundus nascitur, immo, oleum tartari per deliquium, modica quantitate eidem instillatum, lenem effervescentiam excitat.

§. VII.

Domin. BERCKELEY, et complures alii, multas ac plane eximias vires medicas, diaphoreticas nempe, diureticas, purificantes, antiputredinosas, traymaticas, attenuantes, aperitivas, roborantes, stomachales, pectorales, uterinas, antiscorbuticas etc. huic infuso tribuunt, idemque proinde adfectibus scabiosis, cachecticis, catarthalibus, rhevmaticis, arthriticis et antiscorbuticis, nec minus gonorrhoeae virulentae, aliisque symptomatibus venereis, itemque hydropi, dolori nephritico et colico, passioni hypochondriacae atque hystericae, fluori albo, pleuritidi, peripneymoniae, asthmati, obstructioni viscerum, exulcerationi renum, intestinorum, pulmonum etc. imbecillitati ventriculi, febribus intermittentibus atque continuis malignis, numerosisque morbis aliis egregie mederi, et specificè imprimis ad malignitatem variorum ac reliquorum exanthematum, tum praeservandam, tum subigendam, valere, testantur. Alii contrariam tueri sustinent sententiam, nec adeo singularem illi virtutem adscribendam esse, existimant. Quod me attinet, viam mediam hoc loco tutissimam iudico. Certo namque certius est, infusum hoc activis principiis, tam fixis resinoso-gummeis, quam volatilibus oleoso-spiritu-

rituosis balsamicis et salino - acidulis, turgidum esse, et quoscunque igitur motus naturales, blande agitando, leniterque stimulando, in fluidis ac solidis intendere, humores, tum commovendo, tum diluendo, attenuare, partes putridas destruere, fervorem bilis refrenare, et se- et excretiones augere, adeoque succis depurandis, obstructionibus tollendis, morbisque ideo multis ac variis profligandis, existere aptissimum, praesertim, cum indolem satis temperatam obtineat, quoniam particulae fixae resinoso-gummeae, et volatiles oleoso-inflammabiles calidiores, larga aquae copia et refrigerantis salis aciduli miscela sufficienter contemperantur.

§. VIII.

Medicamentum hoc quocunque anni tempore in usum vocari, idemque, pro morborum discrepantia, nunc diutius protrahi, nunc arctioribus temporis limitibus includi potest. Hauritur vel frigidum, vel tepidum, prout scilicet aegrotantes illud melius perferunt. Quantitas quotidiana pro subiectorum et ventriculi imprimis diversitate variat, generalius tamen apud adultos a libra dimidia ad integram, immo duas interdum libras adscendit, et, in duas, tres, quatuor, portiones primarias divisa, mane et vesperi, et prima, secunda, aut tertia hora post prandium, non uno tamen haustu, sed successive adsumitur. Apud multa subiecta in principio, praesertim tempore matutino, nauseam et ventriculi dolorem provocat, quae incommoda sensim tamen, vel sponte, vel imminuta infusi quantitate, vel sumto prius ientaculo, cessant.

§. IX.

Auctor antea laudatus externum quoque huius aquae usum in ulceribus, refractariis, putridis, malignis, si saepiuscule nimirum eadem eluantur, saluberrimum pronuntiat, immo, magnum ab illa, sub balnei tamen forma adhibita, auxilium in adfectibus scabiosis, paralyticis, rhevmaticis, et spasmodico-convulsivis partium externarum exspectat. Lavamentum ex una parte picis liquidae et partibus duabus aquae ebullientis praeparatur, et, diuturniori agitatione cum baculo ligneo fortius redditum, post decursum sex vel octo horarum decantatur; ad praeparationem balnei autem, quod debilius esse debet, alia picis et aquae proportio requiritur, et uni picis liquidae parti quinque ad minimum aquae ferventis partes superfundendae sunt.

CAP. XXXXVIII.

De Terebinthina.

§. I.

QUATUOR TEREBINTHINAE species passim in Pharmacopoliis venales prostant, *Terebinthina* nimirum *vera*, *laricea*, *abiegna* et *pineae*. *Terebinthina vera* seu *Veneta Veterum*, vulgo *Terebinthina Chia* et *Cypria* dicta, liquor oleoso-resinosus est, valde spissus ac glutinosus, splendens, transparens, coloris albicantis, aut pallide flavescentis, ad viridiusculo-coeruleum non-nihil inclinantis, saporis resinoso-subacris atque lenissime amaricantis, odoris debilis acriusculo-balsamici.

§. II.

Post collectionem intra modicum temporis spatium adeo ut plurimum, cum exiguo flavedinis augmento, spissescit, ut consistentia sua non amplius balsamum liquidum, sed molliusculam potius resinam referat; hinc non mirandum, quod Terebinthina Chia et Cypria liquida, eaque genuina, in Officinis nostris pharmaceuticis rarissime vel nunquam reperiatur: Nec reticendum quoque est, differentiae quidquam Terebinthinam Chiam et Cypriam intercedere. Chia enim odore et sapore propemodum caret, et recens subcoeruleo-candidi coloris est, Cypria autem flavescit aliquantulum, et, quantum mihi quidem constat praeter saporem subacrem, leniterque amaricantem, paullo fortiolem quoque odorem acriusculo-balsamicum spirat.

§. III.

Arbor, cuius truncus et rami crassiores, terebra profundius et ad ipsam plerumque medullam usque vulnerati, hoc balsamum satis magna copia fundunt, *Terebinthus vulgaris* C. B. et TOVRNEF. est, et passim in Insulis Chio et Cypro, unde unice propemodum nostro aevo Terebinthina vera ad alias gentes transfertur, nec minus, quamquam rariori proventu, in Arabia, Lybia, Syria, Iudaea, aliisque nonnullis regionibus orientalibus sponte nascitur, immo in Hispania, Lusitania et Gallia Narbonensi frequens obvia est, ubi nullum tamen balsamum, vel saltem ignobilius, adeoque Terebinthinae orientali viribus nequaquam aequipa-

ran-

randum, inde elicitur (i). Sub perpetua frondium viriditate ad pyri mediocris magnitudinem excrefcit, et faepe etiam, teste CLVSIO (k), maxima ex parte solum fruticat. Corticem habet cinereum, craffum, hiulcum, ramos patulos, folia alternatim coniugata, rigida, firma, laurinis haud diffimilia, minora tamen magisque obtufa. Flores, initio Maii in fummis ramulis racematim prodeuntes, in terebinthis mafculinis ftaminei funt, purpurafcentes ac ftriles, in foemineis deftituti ftaminibus atque frugiferi; fiquidem posterioribus hifce fructus fuccedunt, racematim pariter crefcentes, parvuli, subrotundi, contactu pingues ac refinofi, testamembranacea unicapsulari purpurafcente aut flavescente, subacida, ftyptica, obducti, nucleumque continentes medullofum, lenticulae fimilem, corpori nutriendo minime quidem aptum, quibusdam nihilominus viribus medicis inftitutum: „Eftur, „fcribit DIOSCORIDES (k), fructus eius ftomacho tamen nocet, ciendae urinae et calefaciendo aptus; Venerem idem adiuvat, et contra „phalangiorum morfus utiliter in vino bibitur etc.,

§. IV.

Modicam duntaxat *falis acidi essentialis* quantitatem terebinthina vera in mixtione fua recon-

T 2

di-

(i) Terebinthos fauciatas in Gallia, Hifpania, et Lufitania nullam plane terebinthinam fundere, nonnulli referunt; aft experientiae iftud refragari, LOBELIVS testatur, qui ex vulneratis terebinthis in fylva Valena, circa Monfpelium, terebinthinam promanaffe obfervavit. Conf. GEORGE FROY *Mat. med. Tom. II. pag. 496.*

(k) In *Operibus, Lib. I. pag. 78.*

ditam gerit, *oleo aethereo* autem, quod, humida destillatione prolectum, tenue admodum, leve, aquae instar limpidum, nec ingrati odoris est, valde praegnans reperitur. GEOFFROY enim, quum Terebinthinae Chiaae libras duas et semissem, citra ullum additamentum, destillationi in retorta subiiceret, olei tenuioris limpidi et aquei coloris uncias novem, olei flavescentis uncias quinque, olei spissioris rufescentis uncias viginti duas, et liquoris acidi saltem grana quinquaginta impetravit. Caput mortuum, in retorta superstes, vix drachmas septem cum dimidia pendebat, et nihil prorsus salis fixi, licet adhuc per octo horas calcinatum fuisset, aquae superfusae communicavit (1). Oleum, quod addo, sub solitaria hac destillatione expulsum, quoad totam quidem molem suam aethereum essentialē aestimari nequit, sed, igne aucto, ipsius tandem resinae mixtio destruitur, et istud quoque oleum, quod antea ad resinam formandam concurrebat, elicitur; certo nihilominus certius est, novem olei limpidi uncias primum prodeuntes, et aliquam pariter olei flavescentis partem, veri olei aetherei essentialis indolem obtinere, et hoc igitur elementum in Terebinthinae Chiaae libra una ad quatuor uncias adscendere.

§.

V.

Quando oleum aethereum humida statim destillatione evocatur, minori quidem copia in receptaculum transcendit, limpidissimum tamen, tenuissimum, mobilissimumque est, et aqua praeterea, quae oleum comitatur, eiusdemque translationem adjuvat, oleoso-acidulo spirituosius particulis valde referta deprehenditur, sua-

(1) Vid. *Mat. med.* Tom. II. pag. 497. (X)

que virtute diuretica, sudorifera, antiputredinosa et antiscorbutica sese magnopere commendat. In vesica aut cucurbita massa tenax resinosa, flava aut flavescens, remanet, quae *Terebinthina lota*, et si ulteriori coctione in vase aperto oleo suo magis spoliata, adeoque macrior ac rubro-fusca reddita fuerit, *Colophonium* audit.

§. VI.

Priscis temporibus *Terebinthina Chia* et *Cypria* saepissime contra multos morbos, tam interne, quam externe adhibita fuit, deinde autem, postquam variae *Terebinthinae* spuriae species, sub forma liquidiori non copiosius solum, sed longe minori etiam pretio comparandae, et simili nihilominus natura, iisdemque, immo maioribus, viribus medicis donatae, ubivis prope modum locorum surrogatae fuerunt, usum rariorem et habuit, et etiamnum habet, ita ut amplius nullum fere interni usus compositum pharmaceuticum, quam theriacam et mithridaticum *Damocratis*, ingrediatur. Quare hoc etiam loco de usu et virtutibus eius nihil addam, sed scitu in hac parte necessaria sub descriptione *Terebinthinae lariceae*, quae nostro aevo *Chiae* et *Cypriae* vices plerumque subit, et utramque activitate medica superat, recensebo.

§. VII.

Terebinthina laricea, *Terebinthina Veneta offic. moderna*, est liquor oleoso-resinosus, lentus, tenax, melle tamen, si recens, tenuior, ac magis minusve, vitri fere instar, transparens, coloris candidi, aut pallide flavescens, odoris fragrantis, acriusculi ac paullulum gravis, saporis acris, amaricantis.

§. VIII.

Ex fauciata larice, quam BAVHINVS *Laricem folio deciduo coniferam* vocat, quaeque in monte Apennino, et Alpibus Carinthiacis, Sti-riacis, Sabaudis, Gallicis, Sibiria etc. copiosa crescit, tempore verno et autumnali haec Terebinthinae species evocatur, et subinde etiam, quamquam minori quantitate, sponte profluit. Certa tamen arborum aetas postulatur; in vetustioribus enim, quarum trunco ac ramis crassioribus dudum fungus notissimus, *Agaricus dictus*, hinc inde adcretus cernitur, fluere desinit. In principio candida est, et oleosae propemodum fluiditatis, deinde autem flavescit paullatim ac spissior evadit.

§. IX.

In spiritu vini rectificatissimo, nulla etiam digestionem calida in auxilium vocata, satis cito atque perfecte solvitur, et cum adfuso oleo vitrioli adeo incalescit, ut vitrum, ebullitione durante, vix tangi queat. Post ebullitionem spissescit admodum, nigramque picem colore ac consistentia aemulatur, deinde nihilominus sensim sensimque aliquam fluiditatem recuperat.

§. X.

Terebinthinam Chiam et Cypriam non acrimonia solum, amaritie et fragrantia, sed *salis quoque acidi essentialis* copia longe superat, et subtili pariter ac valde activo oleo aethereo abundat. Sub humida quidem destillatione libra una duas saltem uncias et semissem olei limpidissimi aetherei reddit: Sin per se autem, citra aquae adfusionem, destillationi in balneo vaporis sub-iicitur, longe maior quantitas prodit. Obser-
vante

vante enim GODOFREDO (m), librae duae et unciae undecim, per balneum vaporis destillatae phlegmatis subacidi drachmam unam et dimidiam, olei tenuissimi autem ac limpidissimi uncias decem, et drachmas sex cum dimidia dederunt. Massa residua, in retortam postmodum translata, igne gradatim aucto, ulterius uncias duas totidemque drachmas liquoris aqueo-acidi, uncias duodecim, drachmas duas et grana quinque olei flavescentis, et uncias sedecim atque semissem olei rufi spissioris praebuit. Massa nigra, splendens, spongiosa, laevis, in retorta superstes, ac pondere suo adhuc drachmas sex et grana duodecim aequans, post fortem ac paulo diuturniorem calcinationem in crucibulo, insipida prorsus ac fusco-rubella facta, nullum elixiviata sal fixum largiebatur, et vix amplius grana viginti duo pendebat.

§. XI.

Multipli atque egregia virtute medica, abstergente nimirum, antiputredinosa, traumatica, diaphoretica, diuretica (n), et pectorali gaudet, et interne igitur, febre tamen, inflamma-

T 4

ma-

(m) Vid. *Mat. med. Tom. II. pag. 501.*

(n) Terebinthina paullo largius adsumpta, urinam forti odore violaceo imbuat, et, frequenti experientia teste, materiam sabulosam ac pituitosam, in renibus aut vesica coacervatam, valide exturbat, hinc admodum circumspecte in usum trahenda est, quoties latentium calculorum grandiorum suspicio adest, ne unus eorum aut plures, violentius in ureteres, collum vesicae, aut urethram protrusi funestam, aut valde tamen periculosa, urinae suppressionem excitent.

matione ac plethora absentibus, a scrupulo dimidio ad drachmam unam inter bolos et eclegmata recepta, vel ovi vitello admista, rarius sub forma emulsionis, contra pulmonis, hepatis, lienis, renum, vesicae, aliarumque partium internarum exulcerationes, tussim itemque inveteratam, fluorem album refractarium, gonorrhoeam virulentam, incipientem hydropem ascitem, anasarca, nephritidem sabuloso-pituitosam, ischuriam et dysuriam immo contra ipsos nonnunquam dolores arthriticos, non sine effectu insigni usurpatur. Movet quoque alvum, si copia maiori, ad drachmas scilicet duas aut tres, adsumitur. Apud subiecta sensibilia ac calidiora, nec minus in casibus plerisque, ubi mitiora postulantur, terebinthinae nativae integrae plerumque *terebinthina lota*, oleo suo aethereo, seu elemento maxime activo (o), potissimam partem spoliata, substituitur, et ordinario sub forma pilulari, a scrupulo dimidio ad scrupulos duos, exhibetur.

§. XII.

Viribus terebinthinae, tum integrae, tum lotae, internis haud inferiores sunt externae. Siquidem prior unguenta et emplastra, posterior sola emplastra, quae partibus tumidis, dolentibus, inflammatis, itemque ulceribus, ac vulneribus, emolliendi, resolvendi, discutendi, digerendi, expurgandi, et consolidandi fine, adplicantur, creberrime ingreditur. Liquida subinde etiam in urinae suppressione, exulceratione

(o) Qui plura de potentibus et eximiis huius olei viribus medicis scire cupit, *Chemiae BOERHAVIANAE Tomum secundum* evolvet, et quae sub *Processu XXXV.* dicta occurrunt, attente legat.

tione intestinorum et dysenteria, clysteribus additur: Probe tamen notari debet, in morbo postremo non statim in principio, sed mitigata prius febre, ac penitus sublata intestinorum inflammatione, in usum vocandam esse.

§. XIII.

Terebinthina abiegna, sive *abietina*, lariceae quidem analogae est, recens nihilominus eandem fluiditate, pelluciditate, amaritie et odoris gratia superat. Duplicis praeterea generis, altera videlicet fragrantior ac virium quoque intuitu praestantior, altera paullo ignobilior reperitur. Haec e caudice arboris ramisque profunde vulneratis copiose effluit; ista pauca admodum quantitate a pastoribus otiosis e tuberculis vesiculosi, intra corticem locatis, vacuo cornu vaccino, quod lachrymam emanantem simul excipit, exprimitur.

§. XIV.

TOURNEFORTIUS hanc arborem, in multis Helvetiae, Germaniae, aliarumque regionum tractibus montanis satis frequentem, *Abietem*, *taxi folio*, *fructu sursum spectante*, CASP. BAVHINUS autem *Abietem conis sursum spectantibus* sive *marem* vocat. In Canada, quod paucis addendum duco, ex abiete, quae PLUCKENETUS *Abies minor*, *pectinatis foliis*, *conis parvis subrotundis* audit, itidem terebinthinae species elicitur; at magis haec ipsa cum terebinthina laricea, quam abiegna nostrate, convenit, ac vulgo *Balsamum Canadense* dicitur.

§. XV.

Partibus spirituosius et tenerioribus oleosis aethereis haec terebinthina magis, quam species praecedens

cedentes, turgida est, et inde etiam ratio petenda erit, quod recens terebinthina laricea paullo liquidior, fragrantior, calidior, et in operando potentior existat, licet quoad usum caeteroquin atque virtutes adeo cum illa conveniat, ut in locum eius, tam interne, quam externe, commodè surrogari possit.

§. XVI.

Ab abiegna terebinthina, sive consistentiam, sive odoris gratiam ac virium medicarum praestantiam spectes, *Terebinthina pinea*, *Terebinthina communis*, quam vulneratae variae *Pini sylvestris* species largiuntur, notabiliter recedit. Admodum enim lenta, tenax, ponderosa ac crassa est, pelluciditate praeterea, licet albicans sit, destituitur, et naribus odorem gravem balsamico-resinosum imprimit. Rarius itaque nostro aevo, ob ignobiliorem suam indolem et eminentem imprimis tenacitatem, quae promptam atque sufficientem resolutionem in ventriculo impedit, interne adhibetur, sed plerumque externis duntaxat usibus impenditur.

§. XVII.

Expositis quatuor notioribus terebinthinae speciebus adhuc *Balsamum Terebinthi Persicae* addi meretur, quod duplex est, alterum nempe *vulgatius*, a terebinthina Chia, quoad consistentiam, saporem, odorem et colorem candidum, parum vel nihil distinctum, alterum *praestantius*, Opobalsamo, quod circa Mechem in Arabia colligitur, fragrantissimo odore valde analogum. Prius, referente KAEMPFFERO (p), ex arbore fauciata copiosissime elicatur, et sponte pariter, Syrio

(p) In *Amoenit. exot. Fasc. II. pag. 414.*

Syrio aestuante, e rimis nodisque stirpium putrescentibus promanat; posterius vero subinde saltem atque parcissime e notabili quadam extuberatione, seu pila in nonnullis terebinthis sine pediculo extremis fere furculis adhaerente, extrahitur. Pila haec, quae pugni circiter magnitudine est, rotunda, ex pluribus tuberculorum spiris, instar cristae galli gallinacei, concreta, foris carmesino colore suo oculis blanditur, intus autem albicans est, et substantiam fungosam ac fragilem obtinet.

§. XVIII.

Arbor memorata, quam vix allegatus KAEMPFERVS *l. cit.* *Pistaciam sylvestrem* vocat, in desertis atque petrosis montium recessibus circa Schamachiam Mediae, Schirasum Persidis, in Luristano atque Larensi territorio, praesertim in monte petroso circa Majin, pagum celebrem, una diaeta diffitum Schiraso, copiosa nascitur, et terebintho Indicae Theophrasti, seu Pistaciae Dioscoridis, tum magnitudine, tum totius ac partium forma, persimilis est, praeterquam, quod, teste eodem auctore, flosculos fragrantiores, nuces vero praeparvas insipidas ferat.

§. XIX.

Accolae montis Majinensis, sylvestribus hisce pistaceis, uti dictum, feracissimi, terebinthinam corio et pellibus subligatis, vel luto subducto in forma nidi hirundinei exceptam atque collectam, non adservant liquidam, nec aliorum quoque sub primitiva consistentia transferunt, sed alii eandem statim in ipso monte, alii, qui prope habitant, domi suae leni coctione, citra ullam tamen aquae adfusionem, et citra conspicuam
pariter

pariter ebullitionem, adeo spissant, ut refrigerata picem albam futoriam colore ac consistentia referat. Liquida enim nullibi a Persis, qui usum eius vel ignorant omnino, vel parvi pendunt, desideratur, sed sola inspissata, resinae mastichinae aemula, emtores invenit, et ubique in Officinis et myropoliis Turcarum, Persarum et Arabum venalis prostat.

§. XX.

Ad nos, quantum mihi quidem constat, haec terebinthina inspissata nunquam adfertur, sed Persiae tantum, Indiae, Turciae et Arabiae incolis pro masticatorio servit, quo alii, praesertim mulierculae circa Indum, sine intermissione utuntur, eiusdemque usui saepe saepius tantopere adsuescunt, ut aegerrime illo carere possint. Gratum ori halitum, dentibusque firmitatem ac albedinem conciliat, et appetitum quoque nonnihil sufflaminare, lymphamque salivalem largius eliciendo catarrhos tollere dicitur. De usu balsami fragrantioris, quod e pila, pistaceis quibusdam adnata, evocatur, KAEMPFERVS nihil addidit, istud nihilominus a fraudulentis subinde ignaris pro vero Opobalsamo vendi, suspicor, quoniam hoc ipsum odore non minus, quam consistentia valde aemulatur.

CAP. XXXXIX.

De Balsamo Copaiivo.

§. I.

BALSAMVM COPAIIVM, alias etiam Balsamum de Copaiba aut Copaiva, Balsanum Copahu et Copais, Balsamum Brasiliense etc. dictum, est

est liquor resinoso oleosus, flavescens, fragrans, saporis acris, amari, aromatici. Recens pallidam duntaxat flavedinem obtinet, et oleum fluiditate sua perfecte aemulatur, diutius vero, praesertim in vitro obiter saltim obturato, adservatum, magis paullatim glutinosum atque tenax evadit, et colorem aureum acquirit, immo temporis successu in resinam compactam, splendenter, pellucidam, gummi copal, aut purissimo succino flavo haud dissimilem, mutatur.

§. II.

Subinde in Officinis, praeter verum hoc balsamum Copaivum, adhuc species quaedam ignobilior venalis prostat, quae genuino balsamo longe crassior ac glutinosior est, albicans praeterea, minus transparens, saporis ingrati amari, odoris nonnihil terebinthinati. Secundum GODOFREDI (q) sententiam haec ipsa vel coctione saltim extracta, vel rectius, plane adulterina est. Nam odor mangonium satis detegit, nec solum igitur suspicari, sed certius omnino credere licitum erit, eandem terebinthinae et balsami veri miscelae suam debere originem.

§. III.

Adfertur balsamum genuinum ex Brasilia, ubi ex arbore quadam, quam incolae *Copaiba*, Botanicorum vero quamplurimi, cum RATIO, *Arbo-rem balsamiferam Brasiliensem*, fructu monospermo, appellant, tanta copia, si iusto scilicet tempore, fervente nimirum aestate, circa caudicem ad medullam usque terebra perfoditur, emanat, ut, teste

(q) L. cit. pag. 486.

teste MARCGRAVIO (r), intra trium horarum spatium novem canthari, vel, uti PISO magis determinate refert (s), duodecim librae colligi queant. Arbor haec sylvestris atque procera est, et in Insula Maranhon magis, quam in praefectura Pernambucensi, luxuriat. Cortex, truncum rectum ac crassum ut et ramos ambiens, colorem cinereum, lignum vero, duritiae fagino aequale, rubrum, quasi miniatum, obtinet. Folia, pediculis, digitum longis, insistentia, subrotunda sunt, ovata, quatuor aut quinque digitos longa, duos, vel, ubi latissima sunt, duos cum semisse lata, superius viridiora, inferius dilutiora, nervo et venulis rufescentibus donata. Flores, in summitate ramulorum, ubi folia frondium figura ad crescunt, prodeuntes, mediocri magnitudine gaudent, et ex quinque petalis componuntur. Florem fructus subrotundus, baccae lauri, vel rectius, avellanae magnitudine ac forma, excipit, initio viridis, post maturitatem nigricans, paucissima carne subdulci atque eduli instructus. Sub pulposa hac substantia lapis durus ovalis latet, et hic rursus nucleum album, farinacei saporis, esui tamen minus aptum, includit.

§. IV.

Plus olei aetherei, quam balsama reliqua, in mixtione fovet, et unica eiusdem libra civilis sub destillatione humida quatuor, quinque, immo sex uncias olei limpidissimi reddit. Massa resinosa, in vesica superstes, aquae innatat, totam-

(r) In *Histor. nat. Brasiliae*, Lib. III. Cap. XVII. pag. 131.

(s) *L. cit. Lib. IV. Cap. IV. pag. 57.*

tamque superficiem eius, in crustam tenacem expansa, tegit. Satis forti adhuc odore balsamico pollet, et egregium proinde emplastrorum traumaticorum ingrediens constituit.

§. V.

Virtute diuretica terebinthinam aemulatur quidem, in operando tamen, ob parciores salis acidi essentialis inhaesionem, mitius apprehenditur; respectu virtutis nervinae autem, antiputredinosae atque traumaticae, iure terebinthinae praefertur, et fructu proinde maiori in cachexia, tussi inveterata, phthisin minitante, asthma pituitoso, epilepsia cacochymica, dysenteria, lienteria, coeliaca, nephritide pituitoso-sabulosa, gonorrhoea virulenta, fluore albo, adfectibus quibusvis ulcerosis et vulneribus, tam interne, quam externe, usurpatur (t). Interne, a guttis aliquot ad scrupulum

(t) „Non solum mirifica, PISO *l. cit. scribit*, pollet vi mundificandi et consolidandi, et ad quaevis vulnera prima intentione restituenda, morsusque serpentum curandos, et cicatrices tollendas: sed et ab omnibus incolis pariter et a me interne exhibitum, insignem praebere utilitatem, observatum fuit. Pectori, ad stomachum languidum, ventri ad colicos frigidos cruciatus, illinitum conducit: guttulae aliquot convenienter exhibitae per os, robur addunt visceribus, illisque tonum reddunt: fluxiones muliebres, cursus ventris et gonorrhoeas quoque sistunt. In anum per clysteres, in penem per syringam cum saccharo ex aqua plantaginis, vel oleo rosarum dissolutum, adversus eadem mala prospero successu

lum integrum, vel cum vino aut ovo forbili exhibetur, vel bolis, electuariis ac pilulis additur; externe autem vel per se cum linteo carpto, aut turunda, vel linimentis, unguentis, emplastris, immo clysteribus mixtum, partibus debilitatis, ulcerosis ac vulneratis applicatur.

§. VI.

Balsamo Copaivae sic dictum BALSAMVM RAKASIRI analogum est, sapore tamen, odore atque virtute medica praestantius existit, et eminentes imprimis vires in gonorrhoea exercere dicitur. Fluit ex arbore Americana adhuc ignota, ac raro ad gentes externas defertur, adeoque rarissime etiam in pharmacopoliis venale prostat.

CAP. L.

De Balsamo Peruviano.

§. I.

Duplex BALSAMVM PERUVIANVM in eisdem cognominis regione Americana ex eadem arbore ab incolis extrahitur, alterum videlicet, quod in Officinis nostris rarissime reperitur, *album*, alterum, ubivis venale, *fuscum*, seu *nigrum*, aut rectius, *subrubro-nigricans*. Prius sponte ex inciso arboris cortice profluit, et satis fluidum est, terebinthina longe tenuius, pelu-

„cessu iniicitur.„ Pisoniano huic virtutum testimonio ista pariter; quae FRID. HOFFMANNVS in *Observat. physico-chymicis select.* pag. 22. de viribus et usu huius balsami attulit, addi merentur.

lucidum, fragrantissimum, saporis acriusculo-amaricantis, coloris albidus, nonnihil tamen ad subflavum inclinantis. Posterius, ope coctionis cum aqua, ex foliis, cortice atque ligno, tum caudicis, tum ramorum, dissectis, elicitur, et propter immixtas igitur partes resinoso-gummeas, et aliquam pariter substantiae spirituosae sub coctione iacturam, valde crassam consistentiam et obscurum colorem subrubro-nigrificantem acquirit; quoad saporem tamen atque odorem, si vigoris gradum exceperis, cum albo convenit.

§. II.

Nonnulli praedictis speciebus adhuc tertiam, quam *Balsamum Indicum siccum*, itemque *Opo-balsamum* vocant, addunt: Verum, cum haec ipsa compacta, sicca ac vera resina sit, locum inter balsama huius census occupare nequit, sed rectius resinarum catalogo inseritur. Originem suam, POMETO referente (u), succo lacteo debet, qui e ramis arboris resectis exstillat, et, vasis exceptus, blandi caloris ope ad desideratam spissitudinem atque duritiem redigitur. Colore gaudet rufescente, et odorem, si prunis iniicitur, benzoinum, longe tamen adhuc gratiorem, spirat.

§. III.

Arbor, balsama descripta foenerans, non tantum in regno Peruviano, sed in Brasilia quoque aliisque Americae meridionalis regionibus nascitur, et ab incolis *Hoitziloxitl*, ab HERNA-

DEZIO

(u) In dem aufrichtigen Materialisten und Specerey-Haendler, pag. II.

Carib. Mat. M. II. Tom.

U

DEZIO *Arbor Balsami*, itemque *Balsamifera prima*, et ab aliis denique *Cabureiba* appellatur. Ad mali aurantiae magnitudinem plerumque adsurgit, ac folia, amygdali foliis similia, paullo maiora tamen, rotundiora, magisque acuminata, habet, floresque luteos, floribus Digitalis forma haud dissimiles, fert, quibus semina albicantia, oblonga ac paullulum contorta succedunt.

§. IV.

Balsamum fuscum sive nigricans in spiritu vini rectificatissimo, si genuinum existit, et paulisper adhuc liquidum, satis promte solvitur, nec rationem itaque cognosco, cur BERNHARDVS VALENTINI aliique scripserint, balsamum hoc in calido quidem vini spiritu solvi, post menstrui tamen refrigerationem confestim secedere, ac rursus ad superficiem enatare (x). Balsami albi solutionem, propter ipsius balsami defectum, haecenus nondum suscipere potui, credo nihilominus, eandem promte pariter, immo longe promptius, quam balsami nigri solutionem, succedere. Balsamum album enim ex solo oleo aethereo et fixa substantia resinosa constat, nigri seu fusci vero mixtionem, praeter partes oleosas et resinosas, multae insimul gummosae ingrediuntur. Libra una balsami fusci, observante HOFFMANNNO (y), unicam duntaxat unciam olei rubri, fragrantissimi, in spiritu vini, difficilius paullo solubilis, sub humida destillatione reddit; album ex adverso plus continere, vero simillimum est. An hoc posterius autem post separationem, sacchari

(x) In der Natur - und Materialien - Kammer, pag. 405. §. 8.

(y) Vid. Observat. physic. chym. select. pag. 71.

chari instar, uti PAVLVS HERMANNVS (Z) refert, coagulabile sit, experientia destitutus certo adfirmare nequeo.

§. V.

Balsamum Peruvianum utrumque, praesertim album, ob blandam suam indolem, et eximiam virtutem traumaticam, nervinam, antiputredinosam, pectoralem, stomachalem et diureticam, singulis balsamis haecenus descriptis praeferri meretur, ac sese magnopere imprimis in epilepsia idiopathica aliisque adfectibus convulsivis, a cacochymia et nervorum debilitate oriundis, nec minus in ventriculi imbecillitate, lienteria, coeliaca, diarrhoea chronica, exulceratione intestinorum, renum, vesicae, pulmonum, caeterarumque partium, tam internarum, quam externarum, gonorrhoea virulenta, adfectibus scabiosis, tussi inveterata et asthma puitoso commendat. Datur interne a guttis aliquot ad scrupulum semissem, immo integrum, cum ovo sorbili, aut iusculo, aut saccharo, aut melle rosarum, aut syrupo quodam adpropriato, vel dosi refracta pilulis, bolis et electuariis additur, vel vini etiam spiritu solutum sub tincturae forma exhibetur. Externe ulceribus, et nervis atque tendinibus punctis laceratisque, cum linteo carpto applicatur, et creberrime pariter inter linimenta, unguenta, et emplastra, non tantum consolidandi sine in capitis aliarumque partium ulceribus ac vulneribus, sed roborandi etiam scopo in convulsivis ac paralyticis adfectibus, imbecillitate articulationum, rupturis membranarum similibusque solidorum vitiis adhibenda, recipitur.

U 2

CAP.

(Z) In *Cynof. Mat. med.* pag. 275.

CAP. LI.
De Balsamo Tolutano.

§. I.

BALSAMVM TOLVTANVM siue de TOLV, recentissime collectum, spissiusculum quidem ac valde tenacem sistit liquorem, odoris suavissimi, ad gummi benzoini et corticis aurantiorum odorem accedentis, coloris spadicei aurei, saporis subdulcis haud ingrati, mediocrem tamen hanc fluiditatem non adeo diu retinet, sed intra breve tempus, praesertim, si in parvis cucurbitis, in quibus ordinario ad gentes exterarum transmittitur, adservetur, adeo spissescit, ut ceram aut resinam molliusculam consistentia sua aemuletur, quin tandem, maiori exsiccatione accedente, nonnihil fragile evadat: Vnde haud mirandum est, quod in Officinis nostris rarissime vel nunquam sub forma liquida occurrat, quodque Scriptorum aliqui istud *Balsamum solidum* appellaverint.

§. II.

Adfertur ex Americae meridionalis provincia Tolu, seu Honduras Hispanorum, inter urbes Carthagenam et Nomen Dei (*Nombre de dios*) sita, ibidemque ex tenello cortice arboris cuiusdam, sub maximo Solis fervore inciso, exstillat, et, cochlearibus, e cera nigra paratis, exceptum, in parvas cucurbitas, vel alia etiam vascula transfunditur. Arbor, quae LINNAEO *Toluifera* audit, nondum satis descripta est, et NICOLAUS MONARDES, celebris quondam Medicus Hispalensis, solummodo, illam pinis pumilis similem esse, ac multos ramos, foliis

(Ce-

Ceratiae similibus, perpetuoque virentibus vestitos, quaquaversum spargere, refert (a).

§. III.

Quamquam hoc balsamum, praesertim recentius, fragrantissimum sit, *substantiali* tamen oleo aethereo non adeo dives reperitur, sed *pars resinosa* maximam ponderis partem explet; hinc facile etiam, uti antea dictum, emplastri instar spissum, immo temporis successu duriusculum ac paullulum fragile redditur. In spiritu vini rectificatissimo caeteroquin, calore accedente, perfecte ac satis cito solvitur, eumque colore flavescente, odore grato, et subdulci atque balsamico sapore imbuat.

§. IV.

Virium intuitu balsamo Peruviano nisi superius, certo tamen haud inferius est, immo a quibusdam, praesertim paullo adhuc liquidum, ipsi balsamo de Mecha, respectu scilicet virtutis antiputredinosae, vulnerariae atque nervinae, aequiparatur. Liquidi usus, tam internus, quam externus, cum usu balsami Peruviani perfecte convenit, spissum vero et induratum vel in spiritu vini solvitur, et inde nascens tinctura ad guttas 20. 30. 40. exhibetur, vel pilulis ac bolis additur, et externe pariter vel solum sub forma emplastri adplicatur, vel aliis emplastris et unguentis traumaticis, discutientibus atque nervinis miscetur (b).

(a) *Simpl. med. Libr. II.*

(b) Plura de Viribus et usu huius balsami apud MORNARDUM *l. cit.* videri poterunt.

CAP. LII.

De Opobalsamo.

§. I.

Nulla prorsus differentia, si naturam spectes, OPOBALSAMVM sive *Balsamum Orientale verum* et *Balsamum Aegyptiacum*, *Memphiticum*, *Judaicum*, *Ieruchuntinum*, *Syriacum*, *Arabicum*, *de Mecha*, et *de Gilead* intercedit, sed distincta haec Synonyma tantummodo a diverso loco natali desumta sunt. Arbusculae enim, quae leviter incisae praestantissimum hunc liquorem balsamicum fundunt, antiquissimis temporibus unice in Arabia felici, ubi adhuc hodie circa Meccam, Medinam, et alibi crescunt, sponte provenerunt, et inde postmodum in Palaestinam (c), Syriam et Aegyptum transplantatae fuerunt, in quibus regionibus tamen nostra aetate nullae amplius, sive temporis successu ob culturam neglectam emortuae, sive studiose ab hominibus, praefertim

(c) Olim in Palaestina, circa oppidum Hierichum, opobalsamum copiose collectum fuisse IUSTINVS testatur: „Opes genti (*Israeliticae*), in „*Trogi Pompeii Hist. Epitom. Lib. XXXVI. Cap. I.* „scribit, ex vectigalibus opobalsami crevere, quod „in his tantum regionibus gignitur. Est namque „vallis, quae continuis montibus, velut muro „quodam, ad instar castrorum clauditur. Spatium loci ducenta iugera nomine Hierichus dicitur. In ea sylva est, et ubertate et amoenitate „insignis: siquidem palmeto et opobalsamo distinguitur. Arbores opobalsami formam similem piceis arboribus habent, nisi quod sunt humiles magis et in vinearum morem excoluntur. „Hae certo anni tempore balsamum sudant.,,

fertim belli tempore, exstirpatae atque deletae fuerint, reperiuntur, et licet quidem Scriptores quamplurimi, qui in Aegyptum, aliasque regiones orientales itinera susceperunt, multa de hortis balsamiferis Matheranis, circa Cairum sitis, referant, secundum aliorum nihilominus testimonia, hic pariter vel nullas omnino (d), vel saltem paucissimas arbusculas balsamiferas superesse, certum est.

§. II.

Arbuscula haec, quam C. FAVHINVS *Balsamum Syriacum, rutae folio*, BELLONIVS *Balsamum, lentisci folio, Aegyptiacum*, et PROSP. ALPINVS simpliciter *Balsamum* (e) vocat, ordinario ad cytisi vel ligustri altitudinem excrescit. lignumque album et inodorum habet. Ramuli lenti, resinosi, odorati, quorum tenuiores, pennam anserinam, rarius digitum minorem, crassitie aequantes, sub *Xylobalsami* nomine afferuntur, duplici cortice tenui, externo scilicet subrubente seu rufo, interiori virescente, fragrante, saporis aromatici, cincti sunt, foliisque perpetuo virentibus, forma rutae folia aemulantibus, vestiuntur. Flores ex albo purpurei, acaciae floribus haud dissimiles, odorem fragrantissi-

U 4

mum

(d) Conf. GEOFFROY *Mat. med. T. II. p. 475.*

(e) Arabes arbusculam, quae fauciata verum *Opopobalsamum* fundit, *Ballassan, Belossam*, itemque *Balsam* vocant; hinc balsami nomen priscis temporibus soli balsamo Arabico, Iudaico et Aegyptiaco proprium erat, deinde autem Scriptores physici ac medici idem aliis quoque crassiusculis atque fragrantibus arborum succis resinoso-oleosis, opobalsamo natura ac viribus quodammodo analogis, imposuerunt.

num spirant, iisdemque folliculi succedunt seu baccae, oblongae, subrotundae, piso minores, ex nigro rubescentes aut fuscae, quae, praeter paucam medullam, albicantem, oleosam atque balsamicam, semina flava, acria, amara, odorata, suaveolente ac spissiusculo succo oleoso turgida, continent, et exsiccatae notissimum *Carpobalsamum* constituunt (f).

§. III.

Opobalsamum vel sponte e caudice et ramis huius arbusculae, Iunio, Iulio et Augusto leviter incisus, effluit, vel blanda coctione cum aqua ex foliis et ramusculis elicitur. Prius, quod nobilissimum est, et, exigua admodum quantitate collectum, ad Principum duntaxat et Magnatum quorundam orientalium manus pervenit, recens, olei amygdalarum aut olivarum vix expressi instar, tenue ac fluidum est, coloris albicantis, aut levissime flavescentis, odoris acutissimi ac suavissimi, ad citri et nonnihil quoque terebinthinae odorem accedentis, saporis acris et aromatici, cum amaricante et subadstringente paullulum mixti; temporis vero successu terebinthinae consistentiam consequitur, fragrantia minuitur, et color in viridiusculo-aureum mutatur. Haud dissimilia etiam, sive fluiditatem, sive colorem ceterasque proprietates spectes, apud *opobalsamum*, quod sub blanda ebullitione primum ad aquae superficiem adsurgit, observantur, et tertia saltem species; sub protractiori ac fortiori coctione expulsa, initio statim spissiuscula, minus odorata, adeoque ignobilior ac minus pretiosa est.

§. IV.

(f) Conf. PROSP. ALPINI *Dialog. de Balsamo*, Cap. VI.

§. IV.

In nostris Officinis pharmaceuticis genuinum Opobalsamum, ob pretii magnitudinem et proventum parcissimum, aliasque causas indicatas, rarissime, vel rectius nunquam, reperitur, sed quaevis corpora balsamica, tam fluida, quam sicca, quae pro eo venduntur, vel prorsus fictitia sunt, vel aliis tamen plantis suos natales debent. Sic dictum enim *Balsamum Indicum siccum* mera resina est, nec etiam ex Arabia aut Aegypto, sed ex America adfertur, ibidemque, uti *Cap. de Balsamo Peruviano* pridem dictum fuit, blanda inspissatione e succo lacteo paratur, qui ex ramis arboris, unde balsamum Peruvianum stillat, penitus resectis elabitur, et balsamum liquidum de Mecha, in Pharmacopoliis pariter venale, quod spissiusculum est, terebinthina tamen paullo liquidius, flavescens, saporis acris et amari, odoris fragrantis, ex terebinthina, balsamo de copaiva, et oleo citri Italico compositum videtur. Balsami genuini criteria, a Scriptoribus plerisque adducta, hoc loco addere supersedeo, quoniam, pro meo iudicio, fallacissima sunt, et adulterii itaque suspicionem perfecte tollere nequeunt.

§. V.

Quoad elementa ac vires medicas multa quidem cum recenti ac satis adhuc fluido balsamo Tolutano communia habet, isto tamen ceterisque balsamis descriptis longe praestantius esse creditur. DIOSCORIDES (g), pluresque scri-

U 5

pto-

(g) „Vires, scribit in Oper. p. m. 39. in tota balsami natura efficacissimas habet liquor, egregia ad calefaciendum potestate. Muliebribus, refrigeratis

ptores, tam veteres, quam recentiores, magnis laudibus virtutem eius alexipharmacam, antiputredinosam, vulnerariam, diureticam, pectoralem et uterinam extollunt, praestantissimumque istud effectum, tum interne sumtum, tum externe adplicatum, in peste, ictu ac morfu scorpionum, serpentum, aliorumque animalium venenatorum, in dysenteria itemque, gonorrhoea, fluore albo, asthma pituitoso, phthisi incipiente, scirrhus ac crudo pulmonum tuberculo, ulcere hepatis, renum atque vesicae, vulneribus et plerisque aliis adfectibus, ab exulceratione, corruptione putredinosa, vel viscidioris etiam pituitae adaccumulatione oriundis, exerere, testantur. Non praetermittenda quoque est singularis eius virtus cosmetica, qua sese valde imprimis apud mulieres Asiaticas commendat. Cutem enim nitidiorem reddere, et valide contra rugas defendere, habitumque vultus iuvenilem diu conservare, credunt, si cutis eodem frequentius in balneo calido inungatur (h). Eodem modo, quo balsama reliqua, interne et externe adhibetur, ac dosis, si usus internus placeat, a guttis aliquot ad scrupulum unum, immo drachmam semissem, adscendit.

CAP.

„ratis locis medetur, cum cerato ex rosa facto
 „appositus. Trahit idem menses, secundas et
 „foetus. Solvit inunctus in accessionibus febrium
 „cum tremore algores. Sordida purgat ulcera,
 „potus urinam ciet, maturat et concoquit: angu-
 „stis spiritus accommodatus est. Subvenit et cum
 „lacte his, qui aconitum biberint: nec minus et-
 „iam venenatorum morsibus. Miscetur idem aco-
 „pis, malagmatis et antidotis: habetque in uni-
 „versum vires balsami liquor efficacissimas etc.,

(h) Conf. GEOFFROY *L. cit.* pag. 480.

CAP. LIII.

De Liquidambaro.

§. I.

LIQUIDAMBARVM, *Liquidambar, Ambarum liquidum, Ambra liquida*, est succus resinoso-oleosus, ex flavo-rubescens, terebinthinam consistentia, ambram vero et styracem specifico suo odore fragrante aemulans, saporis acris aromatici.

§. II.

Colligitur in Virginia, Mexico aliisque Americae meridionalis regionibus, ubi ex arbore fluit, quam incolae *Xochiocotzo - Quahuatl*, botanici vero cum *RAIO*, *Styracem aceris folio*, itemque *Platanum Virginianam aceris foliis*, vel etiam, praeunte *LINNAEO*, *Liquidambar foliis palmato-angulatis*, appellant. Arbor haec, recto caudice assurgens, admodum ramosa ac vastae magnitudinis est, fortemque odorem balsamicum, qui maxime in cortice residet, longe lateque spargit. Folia, in tres pluresve cuspides divisa, in ambitu serrata, tres circiter pollices lata, in superiori superficie albicantia, in inferiori obscuriora, aceris foliis similia reperiuntur. Fructus, flori, haecenus nondum descripto, succedens, rotundus est, simulque aculeatus, ex pluribus capsulis seminalibus, flavescen- tibus, prominentibus, et in acumen desinentibus, compositus, in quibus semina oblongo-subrotunda latent.

§. III.

III §. III.

Triplex datur liquidambari Species. Prima, quae veram, genuinam ac nobiliorem ambram liquidam constituit, sponte ex cortice arboris inciso emanat: Altera, eaque ignobilior priori, coctione cum aqua ex cortice et ramulis minutim dissectis extrahitur, et tertia denique, quae interdum, quamquam nostro aevo rarissime, ad Europaeos sub olei nomine transfertur, a balsamo, sponte post corticis incisionem elabente, recentius collecto et in quiete aliquamdiu relicto, separatur, ac nihil aliud est, nisi pars liquidior, fragrantior, magisque oleosa, quae, paulatim subsidente parte crassiori, supernatat. Hisce quodammodo etiam *Liquidambarum solidum* iungi poterit. quod ab incolis subinde blanda inspissatione e balsamo liquido eum in finem paratur, ut facilius aliorsum transferri possit.

§. IV.

Raro hoc balsamum nostra aetate in Officinis venale prostat, rariusque in usum medicum vocatur, licet sese grata fragrantia sua, quae olim eminentem illi inter odora locum conciliabat, satis commendet, et terebinthinam quoque, tum per se illitum, tum iuxta etiam quantitate inter unguenta et emplastra receptum, virtute antiputredinosa, discutiente, vulneraria ac roborante superet. Vsus eius internus Medicis haecenus parum placuit; hinc multa etiam de eodem dicere supersedeo, ac paucis saltem moneo, illud in hoc passu partim terebinthinam, partim balsamum de copaiva aemulari.

CAP. LIV.

De Styrace Liquido.

§. I.

STYRAX LIQVIDVS genuinus ac purus, a subsidentibus scilicet partibus faeculentis decantatus, liquorem exhibet semipellucidum, lentore atque tenacitate terebinthinae similem, coloris fusci, vel ex fusco rubentis, vel etiam, si plures impuritates retinuit, cinereo-fusci, odoris fortis, non adeo tamen grati balsamici, ad styracis solidi odorem nonnihil accedentis, saporis oleoso-acriusculi et aromatici.

§. II.

Circa originem eius Scriptores dissentiunt, dum alii hoc balsamum naturale esse, et, aeque, ac balsama reliqua, ex certa atque distincta arbore stillare perhibent, alii contrarium defendere sustinent, idemque ad balsama mere factitia referre non dubitant. Pro meo iudicio utriusque sententiae patroni diverso respectu veritatem tuentur: Certo enim certius est, styracem liquidum, in Officinis venalem, saepissime quidem arte compositum esse, suumque odorem specificum styraci solido, diversimode praeparato, vel etiam liquidambaro, terebinthinae aliisque liquidis oleosis aut resinoso-oleosis addito, debere; ast simul tamen concedi debet, styracem quoque liquidum nativum reperiri, qui, sic consentibus multis, post trunci et ramorum incisionem ex eadem arbore fluit, quae styracem solidum foeneratur, vel potius, uti, praeunte IACOBO PETIVERO. GODOFREDVS cum maiori probabilitate refert, aqua marina ex detra-

Et o atque contuso cortice arboris cuiusdam, quae *Rosa Mallos* appellatur, et in rubri maris Insula *Cobros* crescit, excoquitur. Verum tamen, sic eius verba sonant (i), Iacobus Petiver, Pharmacopoeus Londinensis, Regiae Societatis Socius, et sagax naturalis historiae scrutator, *Actis Philosoph. Reg. Soc. Lond. No. 313.* refert, styracem liquidum, à Turcis et Arabibus *Cotter-Mija* dictum, succum esse cuiusdam arboris, *Rosa Mallos* dictae, quae in Insula *Cobros* maris Erythraei nascitur, trium dierum itinere ab urbe *Suez* distante. Huius arboris corticem singulis annis deglubunt, et contusum in aqua marina coquunt, usque ad visci consistentiam: tum resinofam substantiam supernatantem colligunt. Verum cum adhuc multum crassamenti seu corticis pulverati contineat, eam denuo aqua marina bulliente liquant, et percolant. Sic defaecatam resinam et crassamentum faeculentum residuum seorsim doliolis includunt, et *Moccam Arabiae* emporium transvehunt.

§. III.

Quoad proprietates externas, elementa, virtutes et usum cum ambra liquida, caeterisque balsamis descriptis valde quidem convenit, propter frequens nihilominus adulterium rarissime nostra aetate in usum trahitur, et interdum solummodo externe contusionibus, ulceribus putridis atque vulneribus, imminente imprimis sphacelo, sub forma unguenti, adplicatur.

CAP.

(i) In *Mat. med. Tom. II. pag. 493. sequ.*

CAP. LV.

De Semine Foeniculi et Anisi, tam vulgaris,
quam Chinenfis.

§. I.

Duplex FOENICULI semen in Officinis pro-
 stat, alterum scilicet *dulce, Creticum, Flo-*
rentinum, alterum *vulgare Germanicum* c. B. Hoc
 apud nos in hortis colitur, et alibi etiam in lo-
 cis sylvestribus sponte crescit; illud autem ex
 Italia, maxime autem ex Hetruria et territorio
 Romano, adfertur. Semina huius oblonga sunt,
 coloris subviridis, striis tamen eminentibus, spa-
 diceo albicantibus, aut pallide flavescentibus di-
 stincti, saporis dulcis ac simul acriusculi, odoris
 grati aromatici. Semina foeniculi vulgaris cum
 praecedentibus quidem conveniunt, paullo ta-
 men longiora ac minus crassa sunt, et dulcedine
 minori, acredine ex adverso maiori gaudent.

§. II.

Turgent foeniculi, praesertim Romani, se-
 mina, oleo dulci et aromatico, indeque praecipuam
 suam virtutem mutuant. Duplicis tamen id ip-
 sum generis esse videtur: Alia enim portio, ea-
 que maxima, fluidior atque spirituosior est, et
 humida itaque destillatione separatur; altera ve-
 ro crassior atque viscidior existit, et expressio-
 nis aut extractionis beneficio in apricum deduci-
 tur. Oleum destillatum aethereum, in calore
 satis fluidum est, et colorem flavescentem, odo-
 rem fragrantem, dulcissimumque ac simul acrem
 aromaticum saporem obtinet, in frigore au-
 tem coagulatur, et albedinem induit, ita, ut
 magis

magis butyrum aut aliam quandam pinguedinem, quam oleum, referat. Materia oleosa viscosior, sub infusione spirituosam simul extracta, blanda instituta evaporatione, sensim a massa resinosa secedit, adeoque quoad maximam partem colligi potest. Post oleum, intuitu virtutis, *principium resinosum* collocandum est, in *gummoso* autem parum vel nihil activitatis latet. Nam flavescens infusum spirituosum primum satis fortem foeniculi odorem spirat, et acrem aromaticum saporem, dulci mixtum, possidet. Perseverant etiam hae dotes in flavo-fusca massa spissata, et odor solummodo, propter partium oleosarum ablationem, debilior evadit: Infusum vero aquosum primum debilem quidem foeniculi odorem, ast ingratiorem, eructat, et in sapore parum saltem dulcedinis, nihil autem acridinis sese manifestat. Extractum vix melioris conditionis est, et, licet quidem semen foeniculi paullulum adhuc redoleat, nullum tamen saporem possidet singularem, sed eodem rob sambuci quodammodo aemulatur. Ex uncia seminis una tres ferme drachmas extracti spirituosum, et paullo maiorem extracti aquosi primi quantitatem impetravi.

§. III.

Commovendo, discutiendo, roborando ac leniter quoque, ob dulcedinem, demulcendo haec semina operantur, adeoque stomachali, carminativa, pectorali et anticatarrhali virtute sese magnopere commendant, immo interedulcorantia, antinephritica et galactophora locum obtinent; unde saepe etiam et cum fructu haud spernendo in torminibus ventris, adfectibus frigidis flatulentis, vertigine stomachali, inflatione ven-

ventriculi post pastum, coryza, raucedine, tussi, asthma, tumoribus glandularum, nephritide pituitoso-sabulosa, stranguria etc. in usum vocantur. Interne sub forma infusi, tam vinosi, quam theeformis aquosi, usurpantur, vel pulveribus subtilioribus et grossiusculis, nec minus morfulis, bolis atque electuariis adduntur, vel integra etiam manducantur. Externe vapor decocti in visus imbecillitate conducit, et ipsa semina recentia contusa, partibus sugillatis, et mammarum tumoribus imposita, multum ad sanguinem extravasatum, et lac coagulatum discutiendum ac resolvendum valent.

§. IV.

Cum Foeniculi feminibus SEMINA ANISI VULGARIS CLUSII, tam minora, quam maiuscula, quoad principia constitutiva, naturam, vires et usum valde conveniunt, adeoque multa de iis dicere haud attinet. Parva sunt, subrotunda, et in acumen desinentia, striata, colore subviridi, aut subviridi-spadiceo, odore grato atque fragrante balsamico, sapore subdulci et aromatico. In Thuringia et territorio Bambergeni Anisum copiose in agris feritur, indeque magna feminis quantitas aliorum evehitur: crescit tamen in multis quoque regionibus aliis, et illa imprimis species optima iudicatur, quae ex Insula Malta adfertur, ubi, ob studiosam culturam, magna huius feminis copia quotannis colligitur.

§. V.

Virtus horum feminum medica unice ab *oleo essentiali aethereo* et *substantia fixa resinosa* dependet; in parte *gummea* enim, etiamsi in uncia una

Carth. Mat. M. Tom.

X

drach.

I
I.

drachmas duas ac totidem ferme scrupulos pondere attingat, nulla activitas notatu digna deprehenditur. Oleum essentiale aethereum largius quidem inhaeret, non adeo copiose tamen post humidam destillationem colligitur, quoniam difficilius separatur, multumque, ad superficiem ob eandem ferme cum aqua gravitatem specificam adfurgere renuens, in aquae poris remanet. In calore perfecte liquidum est atque subflavum, in frigore autem, aequae ac foeniculi oleum, in massam pinguem albissimam coagulatur. Praeter oleum aethereum, parum quoque *olei crassioris*, expressione duntaxat separabilis, adest, ita tamen, ut hoc magis in parte seu substantia seminis interiori, illud magis in cortice hospitetur. Paucis caeteroquin hoc loco referendum censeo, paleam, post seminum excussonem relictam, multo maiorem olei aetherei copiam, quam ipsa semina, sub humida destillatione reddere, et hoc ideo, ob vile pretium, ordinario venale proflare. Fluiditate quidem oleum ipsius seminis genuinum superat, nec ullum coagulum spontaneum subit, saporis tamen gratia et indolis nobilitate illo longe inferius reperitur.

§. VI.

Inspissata substantia fixa resinosa, cuius circiter drachmam unam et grana viginti octo ex integra seminis uncia impetravi, nigricans est, odoris balsamici specifici, et saporis dulcis atque aromatici, cui lenissima tamen amarities admixta sentitur. De viribus nihil addam, quoniam semen anisi, uti antea pridem monui, foeniculi semini haud dissimile est, et commode in eius locum surrogari potest. Praescribitur in infuso
vinoso

vinoso et aquoso theeformi, rarius in decocto, et subinde etiam masticatoriis atque pulveribus pepticis grossioribus, sive sic dictis *Trageis*, miscetur.

§. VII.

ANISVM STELLATVM, sive *Semen Badian*, *Stern-Anis*, ex India orientali et Russia adfertur. Planta, cuius genus tamen et specifici characteres nondum satis innotuerunt, in China, Tartaria orientali et Insulis Philippinis habitat, et LINNAEO *Badianifera*, PLUCKENETO *Evonymo affinis philippina anisum spirans*, et aliis quoque *anisum stellatum*, itemque *anisum peregrinum Indicum*, *Chinense*, *exoticum Insularum Philippinarum* etc. audit. Ad usum medicum magis capsulae feminales, quam nuclei inclusi sive ipsa semina, expetuntur, quoniam longe maiorem prae hisce activitatem possident. Capsulae hae, quae ordinario ex sex, septem, vel octo radiis, ad unum centrum coeuntibus, constant, durae atque foris rugosae sunt, coloris rubiginosi, odoris fragrantis, saporis subdulcis et aromatici. In radiis memoratis semina oblonga, depressa, laevia, splendentia, flavo-subfusca latent, quae substantiam molliorem sive pulpam albicantem, pinguem, sapore dulci atque subacri aromatico praeditam, includunt.

§. VIII.

Magna, respectu principiorum, similitudo aniso vulgari et Chinensi intercedit, ac *partes oleosioresinosae* in posteriori paullo calidiori duntaxat indole esse videntur. Semina plus olei aetherei sub humida destillatione reddunt, quam capsulae feminales, et hae ex adverso acriorem substantiam

tiam resinofam continent. Adest quoque in utrisque copiosum *principium fixum gummosum*, quod valde tamen debile reperitur, adeoque parum, vel nihil, ad virium augmentum confert. Nam rubro - fuscum extractum aquosum primum, cuius dimidiam ferme unciam ex integra uncia capsularum impetravi, debilem saltem odorem, debilemque saporem aromaticum possidet; extractum spirituosum vero, licet vix drachmas duas pondere attingat, longe maiorem energiam odore non minus, quam sapore suo prodit.

§. IX.

Circa vires nihil singulare dicendum restat, quam quod simplex hoc, si maiorem operationis vigorem exceperis, perfecte in hoc passu cum semine foeniculi et anisi vulgaris conveniat. Praescribitur in pulvere, a granis aliquot ad scrupulum semissem, nec raro pariter, dosi tamen largiori, infusis vinosis et aquosis theeformibus additur. Locum quoque inter masticatoria moderata tuetur, multumque ad foetorem oris corrigendum, nec minus, si impraegnata nimirum saliva ad ventriculum defluat, ad digestionem promovendam, flatusque discutiendos, valet.

CAP. LVI.

De Semine Coriandri et Nigellae Romanae.

§. I.

SEMINA CORIANDRI OFFIC. sive *Coriandri maioris* C. B. *Schwindel - Koerner*, sunt rotunda, striata, subfusca aut subfusco - albicantia saporis

poris et odoris aromatici. Planta apud nos in hortis colitur, alibi etiam, v. g. in Alsatia, in arvis feritur, immo in Italia hinc inde sponte provenit. Quando haec femina adhuc recentia sunt, odorem gravem, cerebro et nervis quodammodo nocivum, spirant, hinc exsiccata solum, halitu viroso impetuosiori sensim orbata, usui medico interno impenduntur.

§. II.

Continent *partes oleosas, resinosas ac gummeas*: Oleum essentiale aethereum parcius inhaeret, nec adeo larga quoque substantiae gummeo-resinosae collectio sub extractione observatur. Extracta et spissata portio gummosa rob sambuci odore et sapore aemulatur, ac parum activa existit, in substantia resinosa autem, aethereo tamen oleo adhuc praegnante, multum virtutis latet. Nam flavescens infusum spirituosum gratum feminis odorem specificum emittit, et acrem aromaticum saporem possidet. Massa spissata balsamicum quidem odorem retinet, respectu saporis autem, qui saltem subacris est, debilior deprehenditur; manifesto documento, oleum essentiale praecipuam odoris, saporis et activitatis causam materiale constituisse.

§. III.

Refertur hoc semen inter medicamenta stomachalia, carminativa, et cephalica, nec raro proinde contra ventriculi imbecillitatem, adfectus flatulentos, vertiginem stomachalem, incipientem cataractam, coryzam diuturnam, et memoriae debilitatem praescribitur. Plerumque adsumitur conditum, vel infusis vinosis et pulveribus grossioribus, rarissime autem deco-

Etis, additur. Externe epithematum discutientium ac roborantium ingredientia auget.

§. IV.

SEMINA NIGELLAE ROMANAE ODORAE LOB. five *Nigellae flore minore simplici candido* C.B. *Roemischer Schwarz-Kümmel*, angulosa sunt, nigra, saporis aromatici subacris, odoris fragrantis. Planta alibi solummodo in hortis, alibi etiam in arvis feritur.

§. V.

Scatet hoc semen *principiis fixis*, tam *resinosis*, quam *gummeis*, et modicam pariter *olei essentialis* quantitatem in mixtione fovet. Oleum partim *mobile aethereum* est, partim *crassius unguinosum*: Hoc expressione, aut extractione cum spiritu vini, illud destillatione humida separatur; virium tamen ratio praecipue ad oleum aethereum et ex parte quoque ad fixam substantiam resinofam, quae amaricans et subadstringens deprehenditur, redit, portio gummea autem, ob inertiam suam, vix annotationem meretur, licet notabili quantitate inhaereat, ac pondere suo ultra drachmas duas in una feminis uncia adscendat.

§. VI.

Tribuuntur huic simplici vires discutientes, roborantes, anodynae, anticatarrhales, cephalicae, anthelminticae, carminativae, uterinae et specifica galactophorae, adeoque, sub pulveris aut infusi vinosi forma, nonnunquam contra vertiginem, coryzam rebellem, cephalalgiam rheumatico-catarrhalem, febres quartanas, colicam hystericam, fluorem album etc. nec minus

nus ad sanguinem congruatum dissolvendum, fluxum menstruum et lochialem promovendum, uberiolemque lactis proventum procurandum, exhibetur. Externe in gravedine, coryza, hemicrania, vertigine, fufurro aurium, obauditione, aliisque capitis adfectibus, praesertim catarthalibus, multum prodest, quando inter epithemata sicca, cucuphas, pulveres errhinos et suffimigia recipitur. Fumus quoque, per infundibulum admissus, vermiculis, in dentibus cariosis hospitantibus, inimicus est, eosque necat, vel tamen e nido suo exturbat.

CAP. LVII.

De Semine Cinae, Rutae et Tanacetii.

§. I.

SEMEN CINAE corpuscula seu granula exhibit parva, oblonga, ex squamosis quasi funiculis, uti HERMANNVS loquitur (k), compacta, colore ex viridi flavescente, odore balsamico, nonnihil tamen ingrato, sapore subacri, amaro et pariter balsamico praedita. Dicitur etiam *Semen Zinae, Sinae, Chinae, Semen Santum, Santonicum, Semen Zedoariae, Semen Lumbricorum vulgare, Semen contra Vermes, Sementina* etc.

§. II.

Rarissime, vel nunquam, perfecte purum ad nos defertur, sed aridis foliolis, paleis, arenulis, aliisque quisquiliis, quin diversarum prorsus plantarum seminibus plerumque remixtum

X 4

vendi-

(k) In *Cynos. Mat. med.* pag. 151.

venditur; quod puritatis vitium subinde quidem mercatorum fraudibus, frequentius tamen singulari colligendi modo, a TAVERNIERO descripto (1),tribuendum est. Plantae enim, quae parva haec semina largiuntur, in pratis crescunt, et, cum horum thecae, et vicina foliola, superveniente maturitate, cito exarescant, adeoque priores semina facile excidere permittant, incolae binarum sportellarum ope excutere illa coguntur; hinc aliter fieri nequit, quin arida foliola, frustula capsularum feminalium, aliaque heterogenea, sub percussione deiecta, sportellarum altera, qua semina excussa praecipue excipere solent, simul colligant.

§. III.

Circa plantae memoratae determinationem, quod nostro aevo, quo frequentes pridem peregrinationes in quoscunque terrae angulos institutae fuerunt, utique mirandum est, auctores valde dissentiunt. Praeter DIOSCORIDEM enim, multi recentioris aevi Scriptores, hanc plantam absinthii speciebus accensent, eamque cum CASP. BAVHINO plerumque *Absinthium Santonicum*, *Iudaicum* et *Alexandrinum* vocant. CLEYERVS, Dn. de IAGER et complures alii eandem inter Abrotani species referunt, immo nonnulli, uti v. g. ETTMVELLERVS (m), semen cinæ modernum neque absinthii, neque abrotani Santonici, sed tanaceti semen esse, opinantur. Similis dissensio etiam circa patriam occurrit. Vix laudatus enim TAVERNIERVS, nec minus POMETVS, LEMERY etc. herbam santo-

(1) In *seinen Reisen*, P. II. Lib. III. Cap. XIII.

(m) In *Operibus*, in *Comment. Ludov.* pag. 560.

fantonicam in Persia, praesertim Caramania et
 prope Russiae limites, nec minus in regno Tar-
 tarico Boutan sive Boutang crescere testantur:
 Alii Palaestinam, Aegyptum, et Arabiam, alii
 Chinam et quasdam Indiae orientalis provincias,
 patriam illi assignant, et alii denique, quorum
 relatio tamen neotericorum experientiae pror-
 sus repugnat, in Galliae provincia Xantonge,
 unde etiam hoc semen Xantonicum dictum pu-
 tant, uberrimum eius proventum esse, perhi-
 bent (n). Difficile igitur est, sub tanto aucto-
 rum dissensu, certi quidquam determinare; diffi-
 teri tamen nequeo, sententiam eorum mihi re-
 liquis videri probabiliorem, qui herbam Santo-
 nicam abrotani speciem esse, nec in una solum,
 sed pluribus regionibus orientalibus, maxime
 autem in Persia, et magnae Tartariae regno
 Thibet sive Boutan, quod in Chinae et Indiae
 confiniis iacet, provenire tradunt. Nam, teste
 allegato *Domino de IAGER*, qui diu in India
 vixit, et plantam Santonicam saepissime pro-
 priis lustravit oculis, hanc et abrotanum maxi-
 ma, quoad formam externam, similitudo inter-
 cedit. „Ratio, in *Epistola quadam ad Domin.*
 „GEORG. EVERHARD. RYMPHIVM *missa* (o),
 „scribit, cur sementinam abrotani, minime ve-
 „ro absinthii speciem esse credam, huius plantae
 „forma externa nititur, quam plus vice simplici
 „vidi, et hoc pariter me impulisse fateor, ut
 „vocabulum Arabicum *Sjehh*, sive *Seheha*, uti
 „posuit illud Rauwolffius, per *abrotanum* inter-
 „pretari maluerim, quam *absinthium Seriphium*,
 X 5 „quo-

(n) Vid. VALENTINI *Mus. Museor.* p. 137. *sequ.*

(o) Epistola haec in *Appendice vix allegati Musei
Museorum Valentini* extat, et ordine tertia est.

„quoniam notabilis differentia, uti dictum, circa formam observatur, et mihi in Persia praeterea et Golkonda relatum fuit, utramque absinthii speciem, in pharmacopoliis venalem, non *Sehehh*, aut *Seheha*, sed *Affintien*, quod ultimum vocabulum a Graeco ἀψίνθιον derivatum, est, adpellari.,

§. IV.

Valde denique diffformes auctorum sententiae circa principia activa reperiuntur. Saepius v. g. allegatus HERMANNVS feminibus hisce salia fixa tribuit, alcalicae procul dubio indolis, quoniam vermium nidum, quem non solum putridum, sed etiam acidum iudicat, destruere testatur. NICOLAUS LEMERY contrariam ferme, vel admodum tamen diversam, fovet sententiam, et semina haec copioso oleo et sale volatili essentiali instructa esse, tradit. Verum enim vero, laudati Scriptores et reliqui omnes, qui ipsis largiuntur assensum, a veritatis tramite plus minusve defleunt, uti hoc spagyrica examina, quae cum semine hoc suscepi, satis superque confirmant. Primo nempe quatuor uncias humidae destillationi in cucurbita vitrea humiliori subieci, at nihil prorsus olei essentialis inde prodiit, licet aqua prolecta forti odore balsamico imbuta esset. Non credibile quoque videtur, oleum aethereum substantiale e longe maiori seminis quantitate copiose proditum esse. WEDELIVS enim ex integra libra vix aliquot guttulas obtinuit, et NEVMANNVS pariter in aqua destillata levissimum duntaxat oleosi principii vestigium deprehendere potuit (p):
Vnde

Vnde luculentissime patet, oleum illud, quod in Officinis quibusdam pro oleo Cinae venditur, non verum atque essentiale eius oleum aethereum esse, sed aliud plane, super semina Cinae solummodo abstractum.

§. V.

Quum unam deinde eiusdem feminis unciam cum aqua simplici aliquamdiu in blanda digestionem collocarem, infusum obtinui fusco-rubescens, sapore valde amaro ac moderate simul balsamico et odore satis forti, ipsius feminis odori simillimo, praeditum, quod, evaporando ad iustam consistentiam redactum, extractum praebuit, coloris fusci, ad nigrum nonnihil inclinantis, odoris debilis, saporis amari atque balsamici. Pendebat circiter drachmas tres, et grana aliquot. Residuum siccatum, superfuso vini spiritu, adhuc scrupulum unum extracti resinosi reddidit. Alia uncia feminis, cum spiritu vini digestionem temporariae primum subiecta, tincturam suppeditavit flavo-brunneam, quae magis vini spiritum, quam semina, redolebat, et sapore balsamico praecedens infusum aquosum superabat, amaro autem paullo inferior erat. Extractum inspissatum fusco-nigricans, cuius pondus ad drachmas duas et semissem adscendebat, odorem paullulum quidem ingratum, fortiores tamen, quam ipsa tinctura, spirabat, et sapore satis quoque amaro atque balsamico, propius praeterea, quam in extracto aquoso, ad specificum feminis saporem accedente, donatum erat. Ex residuo, iteratae infusionis ope cum aqua simplici, adhuc drachmam integram extracti gummosi impetravi. NEUMANNVS, uti in saepius allegatis *Praelectionibus chymico-pharmaceuticis*,

ticis, pag. 780. testatur, maiorem extracti, tam aquosi, quam spirituosi primi, quantitatem obtinuit; cuius differentiae ratio, sine dubio diversae adhibiti feminis puritati, maturitati, ac bonitati adscribenda erit.

§. VI.

A Medicorum plerisque Cinae semini solae vires anthelminticae adscribuntur, immo sunt, qui, praeunte THEODORO ZWINGERO (q), medicamentum hoc, absentibus vermibus, noxium magis, quam utile, futurum, quin ipsos vermes, quod ROCHAS credidit (r), procreaturum, existimant. Attamen, priores virtutem huius feminis cancellis iusto arctioribus includunt, et posteriores sententiam tuentur, rationi non minus, quam experientiae valde contrariam. Haec quippe docuit manifeste atque creberrime, Cinae semina non solis viribus anthelminticis, sed egregiis quoque roborantibus, discutientibus, carminativis et antiputredinosi instructa esse. Nec ratio quoque, principiorum indole nixa, ullo modo refragatur, sed valde potius experientiam confirmat. Nam volatile principium balsamicum discutiendo aequae, ac confortando operatur, et fixa principia resinoso-gummea, balsamico pariter atque amaro sapore donata, roborandi virtutem non solum valide augent, sed putridam etiam saburram, sive illa in prima culina, sive alibi stabuletur, destruunt, et imminentem humorum corruptionem prohibent.

§. VII.

(q) Vid. *Theat. botan. Lib. III. Cap. CIII.*

(r) Vid. VALENTINI *Mus. Museor. pag. 133.*

§. VII.

Ex virtutibus hisce generalioribus variae demum virtutes specialiores deducendae sunt, stomachalis nimirum, carminativa, uterina, cephalica, nervina et pectoralis. Dum blanda enim balsamica et amara haec semina ventriculi tunicas roborant, et viscidas atque corruptas cruditates, in eodem collectas, corrigunt, appetitum augent, et motum peristalticum, quo digerendi facultas praecipue nititur, vegetiorem reddunt, et, quum flatuum quoque proventus uberior ordinario mucidis impuritatibus, et inde continue nascenti materiae rudi perspirabili, nec minus debili vi expultrici, sive debili contractioni, quae tunicarum flacciditatem frequentem agnoscit causam, tribuendus sit, in clara pariter luce positum esse, reor, cur semina haec flatus discutiant, ac novam, eamque largiorem, eorum genesin avertant. Pari propemodum ratione virtutes uterinae, pectorales, nervinae, cephalicae, explicandae erunt. Nihil quippe nervis, meningibus cerebri, aliisque partibus membranaceis magis amicum est, nihil quoque vividam earum oscillationem melius excitat, restituit, auget, quam blanda balsamica et modice amara, quae absque impetu operationem suam exercent. Nihil denique vegetum pulmonum motum efficacius conservat, et molestum atque perniciosum pituitae decubitus impedit, quam laudatae indolis medicamina, immo, nullum pharmacorum genus uteri statum magis illibatum praestat, et fluxus menstrui inordinatum successum, aut plenariam suppressionem, quibus plerumque spasmi hysterici superveniunt, melius avertit, quam temperata eiusmodi discutientia ac roborantia.

§. VIII.

§. VIII.

Antiputredinosae et stomachali virtuti maximam partem superstruenda est specifica virtus anthelmintica: Maximam, inquam, partem; inficias enim ire nequeo, eandem simul quoque a singulari sapore et odore, quo semina haec ab aliis corporibus balsamicis et amaris sese distinguunt, derivandam esse. Prompta videlicet vermium in canale intestinali exclusio, vegetum eorum incrementum, et stupenda nonnunquam multiplicatio, plures habent causas, quarum praecipuae tamen ad ventriculi imbecillitatem, saburrae putridae et viscidae adaccumulationem, et bilis, ceu egregii vermium antidoti, inertiam redeunt. Singulis hisce vitiis semen fantonicum medetur: Specifici quippe veneni instar vermes, qui odorem et saporem eius perferre nequeunt, enecat, cruditates viscidas ac putridas, quae nidum et amicum pabulum hostilibus hisce incolis praebent, abstergit et corrigit, bili inertii pristinam amaritiem naturalem reddit, et ventriculum rursus atque intestina ita roborat, ut prior debite resolvendis esculentis, posteriora autem impuritatibus, post chyli praeparationem relictis, promovendis ac tempestive expellendis sufficiant. Praestat tamen eidem semper laxantia, v. g. rhabarbarum, radicem mechoacannae albae, Mercurium dulcem, et similia addere, ut vermes occisi, una cum saburra heterogenea et inimica, eo citius atque certius excludantur, nec priores forsan, quando, post necem suam diutius retenti, in foetidum liquamen putredine resolvuntur, humores corrumpant, adeoque plus, quam antea, sanitati noceant. Necesse praeterea est, ut huic pharmaco, si vermium causa exhibendum est, semper dulcia quaedam misceantur,

tur, quo vermes eo melius ad degustandum antidotum alliciantur, nec, inimicum saporem et odorem confestim percipientes, ab esu plane abstineant.

§. IX.

Vsus huius medicamenti specialior latius extenditur, idemque cum insigni omnino fructu in adfectibus flatulentis et spasmodicis, nec minus in morbis singulis, qui ex atonia partium solidarum et humorum spissitudine nascuntur, adhiberi potest. Praeter cardialgiam igitur, colicam, passionem hypochondriacam et hysteri-
cam, huc pariter apoplexia pituitosa, debilitas memoriae, vertigo, variae otalgiae, odontalgiae ac cephalalgiae species, epilepsia stomachalis et verminosa, tussis pituitosa, asthma frigidum humorale, varia adpetitus atque digestionis vitia, profluvia alvina, diabetes, fluor albus, febres intermittentes, cachexia vulgaris et icteritia, gonorrhoea benigna etc. referri merentur. Exhibendi forma variat: Nunc enim saccharo obductum adsumitur, nunc pulveribus additur, nunc rotulas, morsulos, et electuaria ingreditur, nunc in infuso aut decocto, quae, pro morbi ac scopi differentia, modo cum aqua aut cerevisia, modo cum lacte aut vino paranda erunt, nunc denique sub tincturae forma propinatur. Fateri tamen cogor, praestantiores hoc medicamentum simplex vires edere, si in substantia exhibetur, aut inter eiusmodi compositiones, in quibus nullius principii iacturam facit, nec naturalis quoque mixtionis destructionem patitur, iusta quantitate, quae generatim a granis aliquot ad integram drachmam adscendere potest, recipitur.

§. X.

§. X.

Ob virium analogiam Cinae semini SEMINA RUTAE HORTENSIS LATIFOLIAE, et TANACETI VULGARIS LVTEI C. B. iungi possunt: Notandum tamen, apud priora virtutem magis in capsulis seminalibus, quae valde fragrantibus sunt atque oleosae, quam in ipsis seminibus, latitare. Dantur in pulvere et infuso vinoso.

CAP. LVIII.

De Semine Apii, Petroselini et Dauci, tam vulgaris, quam Cretici.

§. I.

SEMINA APII PALVSTRIS sive *Apii Officinarum* C. B. parva sunt, striata, coloris subfusco - aut subflavo - spadicei, odoris fragrantissimi, saporis amaricantis et aromatici. Gaudent *principiis activis oleosis, resinosis, et gummeis*, praecipua tamen virtus oleo ingenita reperitur. Oleum partim *crassius et ignobilius unguinosum* est, partim *nobilius essentiale aethereum*. Illud expressione difficile separatur, et simul cum substantia resinosa extrahendum est, hinc pondus quoque exacte determinari nequit; hoc autem, destillando ex integra seminis libra prolectum, unam ferme drachmam pendet, Non contemnenda quoque virtute pars resinosa instructa deprehenditur. Nam flavescens infusum spirituosum primum fortem, eumque specificum, diffundit odorem balsamicum, et acris, amaricantis, aromatici, saporis sensum in gustus organo excitat. Massa spissata similis conditionis est, prae-

praeterquam, quod amarities atque acredo aromatica maior adhuc, quam in infuso, existat. Aliter de satis inerti portione gummosa sentiendum erit: Haec enim, post infusi aquosi inspissationem, acriusculo duntaxat, subamaricante ac debili sapore balsamico pollet. Ex seminis uncia una scrupulos quatuor et grana duodecim extracti spirituosus primi, et drachmas duas ac totidem ferme scrupulos extracti aquosi primi obtinui.

§. II.

Pertinet hoc semen ad sic dicta quatuor femina calida minora, et magnopere imprimis, ob vires suas discutientes, carminativas, aperitivas et diureticas, in obstructione viscerum, calculo, suppressione urinae, adfectibus flatulentis, torminibus ventris, tumore mammarum, a lactis coagulatione oriundo, asthmate pituitoso, hydropo, praesertim ascite, cachexia et plerisque uteri morbis frigidis praedicatur. Plerumque infusis vinosis additur, et interdum quoque in pulvere, a granis aliquot ad scrupulum integrum, praescribitur.

§. III.

Cum Semine Apii palustris SEMEN PETROSELINI OFFIC. sive *Apium foliis caulinis linearibus* LINN. sive *Apium veri Hortensis* MATH. convenit, paullo remissiores tamen vires obtinet, et dosi igitur largiori in morbis vix memoratis exhiberi potest. Parum quoque, vel nihil, naturae nimirum ac virium intuitu, SEMINA DAVICI VULGARIS CLVS. et TOVRNEF. sive *Pastinaca*

cae tenuifoliae sylvestris Dioscoridis C. B. *wilder- und cretischer Mohren-Kümmel*, differunt. Haec ex Insula Creta sive Candia, Italia, aliisque regionibus calidioribus, adferuntur, et corpuscula sistunt oblonga, in altera tamen extremitate acutiora, striata, villosa, subluteo-incana, odoris modice fragrantis, saporis acris aromatici; illa autem apud nos passim in locis aridis campestribus, ubi planta crescere amat, colliguntur, et praecedentibus paullo minora sunt, compressa, villosa, cinerea, odoris et saporis aromatici debilioris. *Principium oleoso-resinosum* in semine Dauci Cretici, quod solum examini chemico subieci, valde activum est, *gummeum* vero, ob inertiam suam vix considerationem meretur. Extractum quippe spirituosum primum, colore saturate aureo donatum, ex seminis uncia una circiter drachmam unam cum semisse pendet, et odorem quasi melleum spirat, ac satis acrem, subamaricantem, et aromaticum saporem linguae imprimit; aquosum vero, brunneo-nigricans, debili sapore suo rob sambuci quodammodo aemulatur, et post aliquam moram levissima saltem acredinis vestigia monstrat, pondere tamen spirituosum superat, et, recepta aequali seminis quantitate, ultra drachmas tres gravitate sua adscendit. Eodem modo, quo Apii semina, et in iisdem quoque morbis, Dauci utriusque semina in usum vocantur, plus tamen, quam illa, in nephritide pituitoso-sabulosa, stranguria et doloribus post partum praestare creduntur.

CAP. LIX.

*De Seminibus Carvi, Cumini, Ammeos,
Anethi et Levistici.*

§. I.

SEMINA CARVI OFFIC. five *Cumini pratensis*
C. B. *Wiesen-Kümmel*, parva sunt, oblonga,
tenuia, striata, paullulum incurva, fusca, saporis
et odoris aromatici. Planta sponte in pratis
crescit, et hinc inde pariter, praesertim in Thuringia
et Franconia, in arvis feritur.

§. II.

Quatuor seminibus calidis maioribus adnumerantur, creberrimeque, ob validas ac satis egregias vires discutientes, commoventes, roborantes, stomachales, carminativas et uterinas, in morbis variis, maxime autem in vitiis digestionis, adfectibus flatulentis, torminibus ventris, tympanitide, vertigine stomachali, singultu, obstructione hepatis et lienis, morbis pectoris pituitosis, passione hysterica, fluore albo, doloribus post partum, suppressione lochiorum etc. in usum trahuntur. Dantur per se cruda aut condita, vel iusculis, aliisque esculentorum generibus adduntur, vel coquuntur cum cerevisia, et vino quoque, quae exhibendi forma intuitu effectus optima est, infunduntur. Externe epithemata partibus fugillatis et mammis, a lacte coagulato tumefactis, nec minus abdomini, praesente passione quadam flatulenta, diarrhoea, dysenteria, vel urgentibus etiam torminibus ventris, imponenda, ut et similis virtutis emplastra ingrediuntur.

§. III.

Memoratarum virium ratio ad *oleum essentielle aethereum* et ex parte quoque ad *fixam substantiam resinofam* redundat, a parte *gummea* autem non adeo singularis effectus exspectandus erit. Oleum, quod rubri coloris est, fragrantissimum, valdeque calidum existit, et notabili quantitate, si semina matura sint, sub humida destillatione prodit. Tinctura spirituosa prima, colore flavo-viridescente tincta, odorem feminis specificum, quamquam debiliorem, emittit, et aromatico pariter atque specifico sapore simplex satis prodit. Massa spissata parum, vel nihil, differt, et maiori saltem acredine aromatica praedita sentitur. Infusum aquosum primum, quod coloris rubro-fusci dilutioris est, fortiori quidem odore specifico, quam tinctura spirituosa, gaudet, saporem vero longe debiliorem obtinet, eumque ut et odorem, ablatis nimirum post inspissationem partibus oleosis aethereis, ita amplius amittit, ut simplex inde vix, aut ne vix, cognosci queat. Recepta uncia feminis una, pondus extracti primi spirituosi circiter scrupulos quatuor et grana aliquot, extracti aquosi autem drachmam unam et grana viginti septem aequat.

§. IV.

SEMINA CUMINI sive CYMINI OFF. *Garten-Kümmel*, carvi feminibus maiora sunt, oblonga, subfusca, striis tamen subluteo-albicantibus praedita, odoris et saporis ingrati aromatici. Planta, quae *Cuminum* sive *Cuminum sativum* L. B. est, apud nos in hortis et alibi etiam in agris feritur, in India autem, Persia, aliisque regionibus calidioribus sponte crescit. Optima semi-
nis

nis species ex Italia et Insula Malta, ubi, ob sedulam in agris culturam, uberrima eius collectio est, adfertur.

§. V.

Aequae, ac praecedentiae, ad quatuor semina calida maiora referuntur, in naturali tamen mixture sua *principia oleoso-resinosa-gummea* paullo ingratiore fovent; quemadmodum hoc odor eorum, si nonnihil saltem digitis terantur, nec minus infusi utriusque, maxime autem aquosi, sapor et odor abunde confirmant. Nauseosi huius odoris et saporis origo partim in volatili portione oleoso-spirituosa, partim in fixa resinosa quaerenda videtur. Extractum enim aquosum, saturate fuscum, exeuntibus sub evaporatione particulis volatilibus, satis iucunde olet, et debilem ac satis gratum saporem balsamicum, cui lenissima acredo admixta est, possidet; spirituosum vero flavo-fuscum magis ipsius seminis odorem specificum spirat, et ingratum quoque, subacrem, amaricantem, aromaticum, saporem linguae imprimit. Prius, recepta seminis uncia una, drachmas tres et grana aliquot, posterius solummodo scrupulos quatuor et grana octodecim pondere suo attingebat. In extracto aquoso parum amplius virtutis latet, et virium itaque ratio unice ferme ad principia resinoso-oleosa redit. Quoad virtutes et usum cum feminibus carvi conveniunt, paullo mitiorem tamen operationem, ob parciorem olei aetherei inhaesionem, exercere creduntur.

§. VI.

SEMEN AMMEOS sive AMIOS; quod hoc pariter loco, propter magnam naturae analogiam,

giam, collocari meretur, duplicis generis est, alterum nempe *vulgare*, alterum *Creticum*, sive *verum*. Semina *Ammeos vulgaris* DOD. sive *Amnios maioris* C. B. parva sunt, striata, cinereo-sublutea, amara, acria et modice fragrantia. Planta, quae haec semina fert, apud nos in hortis colitur, in Italia vero in locis campestribus citra culturam nascitur. Semina *Ammeos veri* sive *Cretici* forma externa a praecedentibus parum quidem differunt, colore tamen spadiceo et maiori fragrantia, longeque acriori sapore aromatico gaudent. Planta, quae maxime in Apulia, Creta, Syria, Aegypto et Aethiopia provenire traditur, est *Ammi Creticum aromaticum* LOB. *Ammi parvum foliis foeniculi* C. B. *Foeniculum annuum origani odore* TOURNEF. *Cuminum Aethiopicum* DIOSC. etc.

§. VII.

Semen Ammeos Cretici sive Cumini Aethiopici frequentius, quam semen Ammi vulgaris, in usum medicum trahitur, quoniam *principiis oleosis essentialibus et resinoso-gummeis* nobilioribus instructum est. Olei aetherei quantitas modica est, fixa vero substantia resinoso-gummea mixtionem satis copiose ingreditur. Ex uncia enim seminis una scrupulos quatuor et grana duodecim extracti spirituosus primi, et aequalem ferme quantitatem extracti aquosi primi impetravi. Massa flavo-rubescens, magis resinosa, virtute, uti clare e sapore eius valde acri aromatico cognoscimus, praepollet, gummea fusco-nigricans autem debilior est, et amaricantem duntaxat ac modice acrem aromaticum saporem obtinet. Odor aromaticus, qui praecipue ab oleo aethereo, ceu principio primario, depen-

dependet, sub infusi utriusque evaporatione adeo imminuitur, ut in extractis, ad iustam consistentiam reductis, lenissimus saltem balsamicus, non amplius tamen, praesertim in extracto aquoso, specificus, remaneat.

§. VIII.

Optime in pulvere, tam subtiliori, quam grossiusculo, praescribitur, a granis aliquot ad scrupulum unum, nec minus in infuso vinoso, a scrupulo dimidio ad drachmam semissem, immo integram. Vires generaliores itidem discutientes, calefacientes, roborantes, carminativae, stomachales et uterinae sunt; hinc in praecedentium quoque locum commode surrogari, et in iisdem morbis, in quibus illa profunt, exhiberi possunt. Notandum saltem, semen Ammeos Cretici paullo calidioris naturae esse, et dosi proinde comparative minori aëgris exhiberi.

§. IX.

De SEMINIBVS ANETHI HORTENSIS C. B. et LEVISTICI VULGARIS MATH. multa subiungere supervacaneum duco, quoniam, respectu naturae, virium atque usus, a descriptis carvi seminibus parum distincta sunt: Monuisse saltem sufficiat, *oleum essentiale aethereum* in mixtione paullo parcius, quam apud semina carvi, hospitari, halitumque seminis anethi, praesertim recentis, de indole narcotica nonnihil participare, et contusum igitur, ad somnum conciliandum, infantum temporibus subinde applicari.

CAP. LX.

De Baccis Lauri et Iuniperi.

§. I.

BACCAE LAVRI oblongae sunt, rotundae, sub tenui pellicula nigricante nucleum includentes geminum, subfuscum, odoris aromatici, saporis acris, amaricantis, oleosi, ac pariter aromatici. Arbor, quae has baccas fert, est *Laurus vulgaris* C. B. sive *Laurus vulgatio* *baccifera* LOB. In Lusitania, Hispania, Italia, aliisque regionibus calidis maxima ubertate, ac passim sponte, adolescit; apud nos autem solummodo hortorum incola est, sedulamque culturam postulat.

§. II.

Praeter inutiles *partes terreas*, et *fixum principium gummeo resinofum*, duplex oleum, alterum nempe *crassius unguinosum*, expressione separandum, alterum *subtile, aethereum, valde aromaticum*, in mixtione naturali foveant. In aromatico hoc oleo essentiali praecipua virtutis ratio latet; hinc, eodem prorsus separato, vires valde imminutae sentiuntur. Oleo succedit *substantia fixa resinosa*, et postremo demum loco *pars gummea*, quae pura ac solitaria admodum iners reperitur, collocanda est.

§. III.

Militant hae baccae inter activa roborantia, stomachalia, carminativa, uterina atque bezoardica, et egregie proinde adfectibus flatulentis, vitiis appetitus atque digestionis, frigidisque uteri morbis, nec minus paralyfi, catarrhis capitis

pititis atque pectoris, doloribus post partum, quin ipsis febribus malignis, medentur. Dantur in pulvere ad grana aliquot, vel etiam sub forma infusi vinosi, a scrupulo dimidio ad drachmam semissem. Varias praeterea compositiones pharmaceuticas ingrediuntur, nec raro quoque esculentis difficilioris resolutionis, condimenti loco, adduntur. Si in pulvere exhibentur, doses moderatae esse debent, ne viscoso suo oleo ventriculo molestiam adferant, et nauseam, vel ipsum vomitum excitent. Externe inter epithemata, unguenta et emplastra nervina, stomachalia et carminativa, immo, inter infusus uterinos recipiuntur.

§. IV.

BACCAE JUNIPERI OFFIC. sunt *Juniperi vulgaris fruticosae* C. B. baccae rotundae, nigricantes, vel rectius, fusco- aut coeruleo-nigricantes, quae sub tenui pellicula pulpam fragrantem, acrem, subdulcem, aromaticam includunt, cui tres acini oblongi triangulares ingeniiti haerent. Crescunt hi frutices arborescentes, sive arbores fruticosae, in plerisque regionibus septentrionalibus, et in Germania quoque nostra hinc inde, maxime autem in Vogtlandia, satis uberem earum proventum observare licet. Baccae altero demum anno ad iustam maturitatem perveniunt, hinc quovis tempore in fruticibus hisce tum fructus maturi coeruleo-nigricantes, tum virides immaturi conspiciuntur.

§. V.

Sapor, odor ac tota virtus unice in pulpa resident, quae sola ex gratis et activis principiiis resinosis, gummeis, et oleosis composita est. No-

tandum tamen, fragrantiam et acrimoniam aromaticam praecipue ad substantiam resinoso-oleosam, saporis vero dulcedinem unice ad partem gummeam redundare. Oleum, quod vesiculis exiguis, per pulpam dispersis, inclusum est, et temporis successu in resinam siccam induratur, destillatione humida elicitur, et aqua specificè levius, flavum, fragrantissimumque deprehenditur. Libra baccarum una, si perfectam maturitatem adeptae fuerint, circiter drachmas tres largitur. Tinctura spirituosa prima coloris aurei est, odoris grati balsamici, saporis subacris, subamaricantis et aromatici. Post evaporationem relinquit massam duplicis generis, alteram nimirum flavam, semiliquidam, dulcem, oleosam, alteram tenacem, resinosam, dentibus atque palato valde adhaerentem, subfusco-viridescentem, saporis resinosi et nonnihil aromatici. Vnde liquido constare arbitror, quod oleum essenziale in baccis hisce partim mobilius aethereum, partim crassius, magisque viscosum existat. Vncia baccarum una mihi massae utriusque, coniunctim lance examinatae, unciam dimidiam et aliquot grana suppeditavit. Infusum aquosum primum, si baccae integrae recipiuntur, pellucidum est, pallide rubrum, odoris balsamici, saporis balsamico-subdulcis, paullum tamen nauseosi, et in recessu subamaricantis. Sin baccae vero dissectae adhibentur, solutio, etiam filtrata, post digestionem turbida ac fordide sublutea deprehenditur, et maiori, quam praecedens infusum, fragrantia atque gratiori pariter dulcedine aromatica pollet. In extractis inspissatis levissima haec differentia vix amplius animadvertitur, et massa utraque rob sambuci odore aemulatur, gratumque saporem subdulcem,

cem, aromatico nonnihil remixtum, linguae imprimit. Non differt quoque quantitas, dum prior aequae, ac posterior, recepta baccarum uncia una, tres ferme drachmas pondere attingit.

§. VI.

Inter efficacissima ac plane eximia medicamenta stomachalia, carminativa, pectoralia, diuretica, uterina, antiscorbutica et bezoardica vilissimi hi fructus sibi locum vindicant, multumque auxilii, quum operationem suam blande discutiendo, abstergendo, demulcendo ac roborando absolvant, ab usu eorum in ventriculi imbecillitate, lenteria, coeliaca, adfectibus flatulentis, hydrope humido et tympanitico, dysuria, nephritide pituitoso-sabulosa, obstructione mensium, tussi, asthmate, raucedine, aliisque morbis catarrhalibus, nec minus in scabie vulgari et scorbutica, peste, ceterisque febribus malignis expectandum est, si, pro aegritudinum diversitate, modo per se comedantur, modo sub forma infusi, cum vino aut aqua fervente parandi, exhibeantur. Vsum quoque egregium atque amplissimum sic dictum *Rob* in praxi obtinet (s), et frequentissime imprimis bolis

- (s) „Hoc ipsum, FRIDERICVS HOFFMANNVS
 „in *Observat. physico-chymicis*, pag. 12. scribit,
 „medicinam praebet ad roborandum imbecillem
 „ventriculum, ad tonum restituendum deiectum
 „intestinalem in alvi fluxibus, ad praeservationem
 „a calculo, ab hydrope, praestantissimam. Com-
 „mode solvitur in vino Hispanico, vel alio dulci
 „et potente, et cochleatim offertur post cibum
 „assumptum, vel ante lecti introitum. Hoc me-
 „dica-

bolis et electuariis stomachalibus, pectoralibus et diureticis additur. Externe ipsae baccae epithemata sicca discutientia, carminativa ac roborantia, nec minus suffimigia ac balnea uterina etc. ingrediuntur, et multum praeterea, si cum vino coquantur, idemque tepidum aliquamdiu in ore detineatur, in odontalgia rheumatico - catarrhali atque scorbutica prodesse solent.

CAP. LXI.

De Nuce Moschata et Mace.

§. I.

NVX MOSCHATA sive MYRISTICA, vel *oblonga* est, vel *rotunda*: Illa, quae etiam *mas* vocatur, arboris sylvestris progenies est, et odore ac sapore penitus propemodum caret; unde raro etiam, vel nunquam, ad externos transmittitur; haec autem, quae vulgo *foemina* audit, nucleum compactum, pinguem, in superficie nonnihil rugosum, odore grato, sapore oleoso - aromatico, et colore foris cinereo - ferrugineo, intus pallide flavescente, venulis spadiceis distincto, donatum, sistit, et ubique apud pharmacopoeos et aromatarios venalis prostat.

§. II.

„dicamentum iuvat fenes, quibus vesicae vitia et
 „in urinae emissionem difficultates, nec non imbecillitates ventriculi et intestinorum valde familiares sunt, et nostra opinione hoc Rob supergreditur vires olei destillati, quoniam illud magis temperatum, hoc vero calidum est.

§. II.

Arbores, quae nucem hanc proferunt, in Insula Banda Indiae orientalis nascuntur, et folia, mali Persicae foliis haud dissimilia, breviora tamen, latiora et magis subrotunda, nec minus florem rosaceum, valde odoratum, habent, cui nux succedit, triplici integumento, pulposo videlicet, filamentoso, et duriori corticoso sive lapideo cincta. Integumentum primum pulposum in principio, aequè, ac apud nuces iuglandium nostrarum, viride est, deinde autem, maturitate superveniente, hinc inde maculas flavo-purpureas sortitur, ac sensim dehiscit; quo facto, secundum integumentum, sive cortex filamentosa, aut potius ramoso-reticulata, pinguis, oleosa, purpurea, odoratissima, quae *Macis* est, in conspectum prodit. Haec putamini tertio duriori, quod nucem ipsam proxime ambit, solummodo laxè adhaeret, ac facile proinde detrahitur. In principio, uti vix dictum fuit, macis purpurei coloris est, postea autem, quando nimirum aëri libero exponitur, et blando calore siccatur, flavum induit. Nuces maturae, remoto duplici hoc integumento, tandemque diffracto putamine duriori, eximuntur, et, postquam per horas aliquot in saturata aqua calcis vivae maceratae, atque obiter iterum aqua pura ablutae fuerunt, siccantur, ut diutius a corruptione immunes persistant. In India persaepe pariter integri fructus, virides tamen ac paulo iuniores, saccharo condiuntur, quoniam ita praeparati diutissime perdurant, et saporis non minus atque odoris suavitate, quam egregia etiam virtute analeptica, stomachali et aphrodisiaca sese commendant.

§. III.

§. III.

Ad formandam nucis myristicae mixtionem *partes terreae, gummeae, resinosae et oleosae* concurrunt. Partes terreae, quae dimidiam ferme ponderis partem constituunt, per se inertes sunt, sub unione vero cum reliquis principiis ad augendam virtutem subadstrictoriam aliquid conferunt. In substantia fixa gummea solitaria parum quoque activitatis deprehenditur, et inspissatum igitur extractum aquosum, quod, adsumpta una nucum uncia, circiter drachmas duas et scrupulum unum pendet, debilissimum saltem odorem spirat, et adeo debili quoque sapore balsamico-subamaricante pollet, ut simplex inde vix amplius cognosci queat. In extracto spirituofo primo, resinoso magis, quam gummeo, maiorem quidem virtutem delitescere, odor fortis specificus et sapor amaricans, aromaticus atque subadstringens testantur, praecipua nihilominus odoris, saporis, ac virium ratio ad oleum essentialiale redit, quod duplicis generis est, alterum nempe *crassius, unguinosum*, alterum *subtilius, aethereum*. Hoc destillatione humida elicitur, et in integra nucum libra circiter unciam dimidiam vel drachmas quinque pondere aequat; illud vero exprimitur, et tanta copia adest, ut plerumque quatuor, quinque, immo sex, unciae colligantur. Quando hoc posterius aqua tepida aliquamdiu lavatur, et residuum postea spiritu vini rectificatissimo extrahitur, portio liquidior, flava, pinguis, odorata, penitus separatur, nihilque remanet, nisi massa solidior, insipida, inodora, sebum aut potius ceram albam colore ac consistentia aemulans, nec in aqua amplius, nec spiritu vini solubilis, quae parandis balsamis spissiusculis externis creberrime excipien-

piensis loco infervit, et ideo etiam *Mater balsamorum* vocatur. Silentio quoque praetermittere nequeo, olei aetherei destillati moleculas diversae subtilitatis et diversae pariter gravitatis specificae esse, idemque eapropter aquae partim innatare, partim in eadem fundum petere.

§. IV.

MACIS ab ipsa nuce myristica, intuitu principiorum, vix discrepat, praeterquam, quod *oleum essentiale aethereum*, et *fixa substantia resinosa* mixtionem paullo maiori quantitate ingrediantur, et haec in uncia una circiter ad drachmas duas et grana sedecim, illud vero in libra integra ad drachmas quinque, immo sex, pondere adscendat. Notandum tamen, partem resinosam nunquam perfecte puram obtineri, sed multis particulis oleoso unguinosi, sub extractione cum spiritu vini simul solutis, nec evaporatione prorsus auferendis, remixtam esse. In parte gummosa nil singulare quaerendum est, eademque, seorsim considerata, tota ferme iners deprehenditur, ac valde debili saltem sapore balsamico - subamaricante, non amplius tamen specifico, gaudet.

§. V.

Eminent bina haec simplicia inter medicamenta aromatica, et frequentem usum, ob vires suas roborantes, stomachales, carminativas, cephalicas, cardiacas et uterinas, in multis morbis, ex humorum viscositate, partiumque solidarum flacciditate oriundis, maxime autem in appetitus atque digestionis vitiis, adfectibus frigidis flatulentis, vomitu, lenteria, coeliaca, aliisque profluviiis alvinis, torminibus ventris, nec minus

minus in palpitazione cordis, syncope, debilitate memoriae, paralyfi, vertigine, atque cephalalgia stomachali, suppressione mensium, fluore albo, prolapsu uteri atque vaginae, sterilitate, torpore venereo etc. inveniunt. Macis paullo calidiorem indolem possidet, ac confortando imprimis, commovendo et discutiendo operationem suam exercet; nux myristica vero, quae temperatior existit, praeter discussionem, commotionem etc. blandam quoque adstrictionem praestat. Adduntur condimenti loco esculentis, vel manducantur, vel vino infunduntur. Nux moschata interdum quoque, nunc sibi relicta, nunc antea paullulum tosta, inter pulveres recipitur. Dosis in genere a granis aliquot ad drachmam semissem adscendit. Externe ad ingredientia emplastrorum, nervinae, cephalicae, stomachalis atque carminativae virtutis, pertinent, et subinde etiam decocta vulneraria vinosa atque unguenta ingrediuntur. Olei destillati et expressi usus, qui late quoque patet, in libris pharmaceuticis videndus est.

CAP. LXII.

De Pipere, Cubebis, et Amomo spurio.

§. I.

In Officinis nostris pharmaceuticis triplex PIPERIS species prostat, PIPER videlicet ROTUNDUM NIGRUM, sive *Melanopiper*, PIPER ROTUNDUM ALBUM, sive *Leucopiper*, et PIPER LONGUM, sive *Macropiper*. Piper nigrum grana sistit rotunda, rugosa, nigricantia, minoris ferme pisi vulgaris magnitudine, odore fragrante,

grante, et sapore valde acri ac fervido aromatico praedita. Planta, quae in plerisque Indiae orientalis locis, maxime autem in Malabaria, Insulisque Sumatra, Java, Sunda, etc. nascitur, farmentosa est, volubilis, hederæ arboreae instar, arbores aliasque plantas, immo perticas, in terram defixas, scandens. Folia eius ampla, valde nervosa, ovata, antèrius tamen cuspidata, et flores, in spicam dispositi laxiorem, monopetali, campaniformes esse dicuntur. Baccae brevibus insident petiolis, et aggregatione sua, fere instar fructuum grossulariae non spinosae, racemos, arctiores tamen, ex triginta, quadraginta, quinquaginta, immo pluribus granis compositos, formant. In principio virides sunt, et aequali superficie, deinde rubrae evadunt, tandemque, ad perfectam nempe maturitatem perductae, decerptae, ac soli per aliquot dies expositae, nigrescunt, et rugositatem aliquam contrahunt.

§. II.

Grana *Piperis albi* a praecedentibus figura orbiculari, magnitudine, odore et sapore parum vel nihil differunt, non rugosa tamen sunt, sed laevia, compactiora, gryseo-albicantia. Circa originem eorum Scriptores dissentiunt: Alii enim, Piper album a nigro sola maturitate discrepare, opinantur; alii istud ex Pipere nigro arte produci, nihilque aliud esse contendunt, nisi piper nigrum, macerationis temporariae et agitationis beneficio in aqua dulci aut salsa marina decorticatum, et alii denique illud a diversa quidem planta, non genere tamen, sed specie saltem nonnihil a priori distincta, provenire statuunt.

tuunt (t). Pro meo iudicio sententia postrema rationi et experientiae magis, quam reliquae, consentanea est, eidemque proinde subscribere nullus dubito.

§. III.

(t) „Quidam, HEISTERVS in *Dissertat. de Piperi*, pag. 10. scribit, ope muriae corticem inde „(a *Pipere scilicet nigro*) separari, atque sic album „ex nigro praeparari perhibent, sed sine ratione. „Verum GARCIAS (in *Histor. aromat. Lib. I.* „pag. 22), et STAPELIVS contrarium sustinet, „docetque (Comment. in Theophrast. p. 1180), „haec duo piperis genera omnino a diversis pro- „venire plantis, quae vero tam parum differrent, „ut vitis baccis albis et nigris, quae ante fructus „imatos vix distingui possent, refertque STA- „PELIVS, se a nautis, et navigantibus, qui ex „India orientali redierunt, utriusque huius pipe- „ris ramulos et racemos integros accepisse, bac- „cis maturis onustos, qui illos secum ex India illa „attulerant, ubi non solum ex illis intellexit, ho- „rum ramulorum plantas, unde eos decerpserunt, „revera diversas esse, et alteras piper nigrum, al- „teras album, sine omni praegressa praeparatione „et sine omni arte proferre, se ipsum quoque, quod „distinctae sint plantae, ex ipsis illis ramulis satis „perspicue cognoscere potuisse, scribitque insu- „per, se ex illis peregrinantibus intellexisse, bac- „cas utriusque huius plantae principio, et quando „nondum maturae sunt, virides esse, postea vero „illas rubrum, et postquam siccae fiunt, nigrum, „has autem album colorem induere, forte sicuti „in ribesiis videmus, baccas eorum immaturas „omnes virides esse, postea autem quando matu- „rescunt, vel album, vel rubrum, vel etiam ni- „grum

§. III.

Piper longum forma plane singulari gaudet, fructumque exhibet siccum, durum, teretem, cylindraceum, unciam aut sesquiunciam circiter longum, coryli, aut rectius, betulae iulum figura sua quodammodo aemulantem, ex numerosis granulis minoribus, papaveris aut sinapi semina magnitudine aequantibus et vermiculato plexu dispositis, compactum, coloris grysei, odoris aromatici, saporis acerrimi, urentis. Planta praecedentibus, quae piper rotundum nigrum et album proferunt, crescendi quidem modo haud dissimilis esse dicitur, folia tamen dilutiori viriditate gaudent, nec ovatam, sed cordatam figuram obtinent. Nascitur in Iava pluribusque Indiae orientalis locis, et in Bengala imprimis uberius eius proventus observatur.

§. IV.

Quoad naturam, principia activa et vires medicas, descriptae tres piperis species conveniunt,

Z 2

ac

„grum colorem induere, pro diverso illarum
 „plantarum sive fruticum genio, quae specie dif-
 „ferunt, vel, ut aliis magis placet, tantum unius
 „speciei varietates sunt. Ita ut haec duo piperi
 „quidem ad unum revera genus pertineant, quia
 „sibi invicem et foliis, et modo crescendi, et bac-
 „cis, excepto colore, similes sint, adeoque non
 „nisi specie, sicuti ribesia, diversi coloris fructibus
 „tantum a se invicem differant: Rariores vero
 „esse plantas piperis albi in India, quam nigri,
 „ita ut in Malavar illud non nisi Magnatum men-
 „sis, teste Garcia, inferatur, qui hoc etiam nigro,
 „aliter quam Dioscorides fecit, multum praefert,
 „libro citato pag. mihi 89 etc.”

ac sola tantum acredo fervida in pipere longo paullo maior, quam in utroque rotundo, existit. *Principia activa* partim oleosa, partim gummeo-resinosa sunt. Oleum essentiale aethereum, quod aquae constanter innatat, et pallide aureo colore donatum cernitur, piper odore quidem et sapore prodit, immo solum odoris specifici rationem continet, non acerrimum tamen, uti HEISTERVS, in *Dissertat. allegata*, pag. 31. retulit, sed adeo potius temperatum est, ut guttula degustata lenem duntaxat ac gratam acrimoniam aromaticam, citra ullum molesti ardoris aut mordacis puncturae sensum, linguae ceterisque oris partibus imprimat, quid? quod, aqua destillata, etiamsi piper valde redoleat, multasque, separatione peracta, moleculas oleosas retineat, acredine prorsus destituta ac pene insipida deprehenditur. NEVMANNVS ex integra piperis nigri libra, sub destillatione humida, olei drachmas duas cum semisse prodire perhibet (u): Atamen, assensum illi in hac parte praebere nequeo. Allegatus HEISTERVS enim ex libra una vix drachmam impetravit, et ego pariter quatuor solummodo scrupulos ex aequali quantitate elicere potui: Credo tamen, in mixtione piperis plus olei hospitari, quoniam sub destillatione et separatione multum receptaculo et vitro hypocleptico adhaeret, multumque etiam, uti antea dictum, in aqua remanet.

§. V.

Non residet quoque fervida piperis acredo in parte eius gummea, sed unice in substantia resinosa quaerenda est. Nam portio gummea (prius tamen extracta resinosa), iterata aquae
simpli-

(u) L. cit. pag. 985.

simplicis infusione feparata, odore, sapore et virtute penitus ferme caret, immo, ipsa infusa et extracta aquosa prima, licet aliquam substantiae resinosae partem, intimius gummosae implicitam, simul contineant, debilem duntaxat saporem acrem, debilemque odorem aromaticum possident: Infusa contra et extracta spirituosa linguam, palatum, fauces ac labia tantopere urunt ac pungunt, ut inflammatio fere metuenda sit. Ardor quoque satis diu perdurat, et magna salivae viscidae copia elicitur. Notandum tamen, piper longum in hoc passu piper nigrum rotundum, et hoc iterum album nonnihil superare. Quantitates substantiae resinosae ac gummeae in triplici specie parum differunt, et uncia piperis una plerumque drachmam unam et grana aliquot extracti primi spirituosissimi, et dimidiam ferme unciam extracti aquosi primi largitur.

§. VI.

Ad calidissima ac potentissima medicamenta aromatica, quae vehementer partes solidas urendo ac pungendo, valideque humores attenuando operantur, piper referri meretur, adeoque magnam sub usu interno circumspeditionem postulat. Conducit saltem subiectis frigidis phlegmaticis, nocet vero siccis, cholericis, plethoricis, et in iis itaque morbis solummodo locum invenit, qui ex humida partium solidarum flacciditate, et frigida, mucida, crassa, humorum dyscrasia nascuntur. Specificè imprimis convenit in vitiis digestionis, ex collecta copiosa faburra pituitosa oriundis, nec minus in refractaria febre quartana, cachexia, oedemate membrorum, catarrhis rebellibus, fluore albo diuturno etc. multumque etiam in principio hydropis

utricularis prodesse creditur. Piper rotundum nigrum frequentissime, album rarius, longum vero nunquam, apud nos cibis condimenti loco additur. In medicina autem usus longi et rotundi utriusque aequae frequens est. Datur in infuso vinoso, rarius in pulvere, et si in substantia illud adsumere placet, integra rotundi grana, et longum grossiuscule saltem contusum, deglutire praestat. Subtilis enim piperis pulvis ventriculi rugis altius immergitur, et facile, dum pertinaciter adhaerescit, eminenti ardore suo inflammationem, aliaque prava pathemata, praesertim apud subiecta sicciora ac sensibilia, producere valet. Dosis semper moderata esse, et a paucis granis ad dimidium solummodo scrupulum adscendere debet. Externe cataplasmata et emplastra rubefacientia, nec minus pulveres et decocta, in paralyti linguae, laxitate uvulae, intumescencia glandularum salivalium, odontalgia frigida catarrhali etc. adhibenda, ingreditur.

§. VII.

A pipere ordinario CVBEBAE OFF. sive *Cubebae vulgares* C. B. *Cubeben*, *Hauptkörner*, forma et indole non adeo multum discrepant. Baccae enim rotundae sunt, magnitudine piperis granis nunc aequales, nunc paullo maiores, rugosae, caudatae, seu tenui pediculo instructae, coloris fusci, vel albicantis, vel fusco- aut gryseo-nigricantis, odoris fragrantis, saporis aromatici ac valde acris. Cortex scabra exterior nucleum rotundum, laevem, compactiorem, foris fusco - rufescentem, intus albicantem, includit, et acrior propemodum, quam ipse nucleus, deprehenditur. Nonnulli, quod addere placet, cubebas etiam *Piper caudatum* vocant. Adferuntur ex India orientali,
et

et copiosius imprimis in regno Pegu, Insulisque Ceylon et Iava proveniunt. Planta, quam HERMANNVS itidem ad frutices scandentes atque volubiles refert, specie saltem, non genere, a planta pipifera, differre dicitur.

§. VIII.

Valde activa *principia oleoso-resinosa* in mixtione fovent: Activa, inquam, oleoso-resinosa; *gummea* quippe *substantia*, licet largiori iis quantitate, quam resinosa, inhaereat, aequae, ac in praecedentibus simplicibus, admodum iners reperitur, et debilem suum odorem, debilemque saporem subacrem atque amaricantem paucis quibusdam particulis oleosis, post evaporationem infusi aquosi primi in extracto relictis, partim etiam mixtis miculis nonnullis resinosis debet. Oleum essenziale aethereum, quod parca saltem quantitate sub humida destillatione elicitur, suaveolens est, et indole temperata piperis oleo non dissimile existit. Hoc igitur praecipuam fragrantiae, substantia fixa resinosa autem praecipuam acredinis rationem in se continet. Nam infusa et extracta spirituosae ipsas cubebas specifico sapore acri, aromatico et amaricante perfecte produnt, immo extractum mixtum resinoso-gummeum, post olei destillationem in vesica aut cucurbita residuum, pristinam cubebarum acridinem linguae imprimit, et fragrante saltem odore aliquantulum orbatum deprehenditur. Vncia cubebarum una plerumque drachmas duas cum semisse extracti primi spirituosi, et drachmas tres extracti aquosi primi largitur.

§. IX.

Mucum, aliosque humores viscidos cubebae potentissime dissolvunt, ac vegetam in solidis

oscillationem, moderatiorem tamen quam piper vulgare, excitant; hinc inter pectoralia quoque, anticatarrhalia et stomachalia medicamenta eminent, et magnam imprimis efficaciam in tumore glandularum salivalium, laxitate uvulae, paralyfi linguae, raucedine refractaria, tussi, dyspnoea, asthma, catarrho suffocativo, a tenaci pituita, partiumque solidarum flacciditate oriundis, nec minus in cephalalgia et hemicrania rheumatico-catarrhali, fufurro aurium, adfectibus soporosis, rebelli febre quartana, cruditatibus ventriculi pituitosis, vertigine stomachali, cachexia, hydropse ascite recentiori etc. monstrant. Plerumque per se manducantur, vel vino infunduntur, vel grossioribus pulveribus immo herbae Nicotianae, in fumum vertendae, modica quantitate miscentur. In substantia a granis aliquot ad scrupulum semissem, in infuso autem a scrupulo uno ad drachmam integram exhiberi possunt.

§. X.

Piperi et Cubebis, ob magnam naturae analogiam, AMOMVM SPVRIVM, quod alias etiam *Piper Tavasci*, *Piper Chiapae*, *Pimenta de Chapa*, et adhuc frequentius *Piper Iamaicense* adpellatur, commode pariter hoc loco iungi posse, censeo. Arbor, quae hunc fructum, mox uberius describendum, profert, in variis Americae regionibus, maxime autem in Insula Iamaica, nascitur, et LINNAEO *Myrtus foliis alternis*, SLOANIO *Myrtus arborea aromatica foliis laurinis latioribus et subrotundis* audit. Baccae maturae nigrae sunt, splendentes, in parte superiori parva corona instructae, iuniperi baccis adhuc maiores; immaturae vero, quas incolae

lae ordinario decerpere et aliorum transmittere consueverunt, minores paullo, viridesque reperiuntur, et sub exsiccatione demum ad solem primo flavum, tandemque fusco-nigricantem colorem adquirunt. Sub cortice pulpam subviridem, quae binos acinos continet, includunt, et odore denique atque sapore suo caryophylla aromatica, immo nonnihil simul nucem moschatam, cinnamomum, piper, et baccas iuniperi aemulantur.

§. XI.

In Anglia hoc piper lamaicense magni aestimatur, et frequentissime, propter indolem paullo temperatiorem maioremque saporis et odoris gratiam, piperis vulgaris loco, ad cibos condiendos adhibetur, tutiorisque praeterea usus medici esse creditur. Principia eius activa magis cum principiis caryophyllorum, quam piperis ordinarii, conveniunt, acredo tamen, quae in *parte fixa resinosa* potissimum latet, multo remissior deprehenditur. Quod *essentiale* autem *oleum aethereum* attinet, cuius dimidia circiter drachma ex integra libra sub destillatione humida prodit, illud intuitu odoris, saporis ac gravitatis specificae, genuino oleo caryophyllorum valde analogum est. Ad bina haec principia vires medicae, quae aequae, ac in pipere et caryophyllis, calefacientes, roborantes, stimulant, stomachales, carminativae etc. sunt, unice redeunt. In *parte fixa gummea* enim, quae pura ac penitus a moleculis resinoso-oleosis liberata, admodum inertem saporem possidet, nulla virtus singularis quaerenda est, licet in uncia cocculorum una duas ferme drachmas pondere suo aequet, et resinofam ideo, cuius una circiter drachma inde separari potest, quantitate superet.

CAP. LXIII.

De Cardamomo.

§. I.

In Officinis nostris pharmaceuticis ut plurimum quidem tres CARDAMOMI, *strictius sic dicti*, species, *Cardamomum* nempe *longum maius*, *rotundum* sive *medium*, et *longum minus* BONTII, venales prostant; postrema tamen species, propter odorem ac saporem gratiorem, potissimum in usum medicum trahitur. Praecipuum caeteroquin distinctionis memoratae fundamentum in diversa capsulae seminalis magnitudine ac forma quaerendum est. Nam capsulae seminales *Cardamomi longi maioris* filiquosae, graciles, triquetrae, striatae, fractu contumaces, sesquiuncialis plerumque longitudinis, coloris subfusci dilutioris, ad gryseum ac pallide lutosum vergentis, sunt, ac grana pressa, angulosa, ex albo rufescentia, et sapore atque odore debili aromatico praedita, continent. *Cardamomum rotundum* seu *medium* BONTII et *Officinarum*, folliculos sistit rotundos, ex albo rufescentes, in quibus tria tantum grana maiuscula gryseo-fusca, in latere externo inaequalia atque sphaeroides, in interno plana et magis minusve depressa, firmiter tamen, interiecta pellicula alba, invicem cohaerentia, et corpus globosum compositione sua formantia, latent. Penetrante haec grana sapore et odore aromatico - camphorato gaudent, et utroque celebre *oleum Caieput* valde aemulantur. *Cardamomum* denique *longum minus* filiquas exhibet triquetras, longo maiori multo breviores, pallide subluteas, in tria loculamenta distinctas, quibus semina seu granula angulosa, rugo-

rugosa, fusca, aut fusco-nigricantia, aut luteo-rubentia, odoris grati, saporis acris, aromatici et lenissime duntaxat camphorati, includuntur. Quamdiu haec grana in siliquis suis delitescunt, praestantiora sunt et obscurioris coloris; exempta vero ac magis siccata intra breve tempus multum de virtute sua amittunt, et colorem rufo-aut subluteo-albicantem sortiuntur.

§. II.

Singulae hae Cardamomi species ex India orientali, ubi in regionibus Cananor, Calecut et Cochin China praecipue crescunt, adferuntur, et plantae etiam, quae illas gignunt, celsitudine tantum et fructus seu capsulae feminalis figura ab invicem discrepare dicuntur. Cardamomum minus, quod in *Horto Malabarico Elettari* vocatur, a STEPH. FRANCISCO GEOFFROY, ex Opere laudato, in *Materia medica* (x), sic describitur: „Radix est oblonga, unciam aut sesquiunciam „crassa, geniculata, tortuosa, albicans: ex la- „teribus innumeras fibrosas emittit radículas, „quibus veluti pedibus late proserpit. Caules, „qui e radice emergunt, rotundi, glabri, viren- „tes, latum ferme pollicem suo emetiuntur dia- „metro: stipite simplici, instar Arundinis, cuius „texturam aemulantur, surgentes ad duodecim „circiter pedum altitudinem, albicante vappida- „que medulla, lignosis filamentis instructa, farcti, „foliorum basi, quae superioribus radicum geni- „culis innititur, theciformibus suis involucris in- „sistunt. Folia magna, quatuor scilicet spitha- „mas longa, quatuor uncias lata, viridia, pa- „rallelis exilibusque venis striata, cum costa me- „dia in adversa parte viridi diluta, in obversa vi- „ridio-

(x) Tom. II. pag. 369.

„ridiore; odore et sapore forti, subacri, aro-
„matico. Praeter caulem arundinaceum, ex
„radicum geniculis sub terra delitescentibus, plu-
„rimae prodeunt gemmae cuspidatae, viridescen-
„tes, quae in surculos sesquispithamam longos
„excrescunt; suntque illi succincti, geniculati,
„in articulis gaudentes foliaceis vel membrana-
„ceis integumentis, quae sicca ex albo rufescunt,
„et e commissuris laterales simplicesque pedun-
„culos eructant, qui sub foliosis capsiformibus-
„que tegumentis (quibus arcte vestiuntur) flo-
„rum fructuumque germina recludunt. Flores
„uni fructigero racemo, vel radicali surculo plu-
„res, plerumque tres quatuorve, eiusdem oblon-
„gis foliolis veluti capsulis involuti, primum ap-
„parent: hoc autem aperto involucro, tetrape-
„talus visui sese offert flos, cuius tria petala ma-
„gnitudine conveniunt, oblongo-angusta, viri-
„di - albicantia, membranosa; quartum, quod
„prioribus ex adverso iacet, tenui stylo lingula-
„que donatur, paullo latius ac minus oblongum
„est, interius situm, et viride: lingula oblongo-
„angusta est, crassiuscula, interiore facie, quae
„intimo foliolo ex adverso opponitur accumbit-
„ve, sulco striata, in supremo apice bifida, di-
„lute rubescens, suoque sulco exilem candican-
„tem stylum, qui in tenue planumque desinit ca-
„pitulum, recipit. Floris vigore cessante, com-
„plicantur petala fructuum apicibus perpetim in-
„sidentia, calyxque in fructum intumescit, qui,
„ubi adoleverit, in orbem distenditur, convolu-
„tis florum foliis etiamnum comatus. Fructus
„radicalibus fructipromisque racemis appendent,
„qui uvis et forma et sapore haud perperam assi-
„milantur; orbiculati enim sunt, et grate sub-
„acidi, viridi, crassiusculo, carnosio, aqueoque
„cor-

„cortice obducti, striis admodum tenuibus iuxta
„longitudinem pertexti: in tres dividuntur locu-
„los cancellatim distinctos, ita ut quodlibet in-
„tersepimentum in sui medio membranacea fibril-
„la bifecetur, sicque seminum conceptacula effi-
„ciuntur. Semina triangularia, aromatica, ru-
„fa, sex ordinibus disposita, pressis planisque
„lateribus fructus insident, et medio stylo trigo-
„no, cui mediante membranaceo septo affigun-
„tur, cuspidibus suis adhaerescunt. Fructus ma-
„turi, debito tempore lecti in aprico exsiccantur
„solo, ubi cortex, qui primo crassus est viridis-
„que, extenuatur et ex rufo albescit etc.,

§. III.

Praeter copiosas partes terreas, cardamomi grana principium camphorato-spirituosum, oleum aethereum, et fixam substantiam resinofam ac gummeam in mixtione sua continent; virtus tamen elemento oleoso et camphorato-spirituoso, et quoad partem quoque satis acri atque urenti principio fixo resinoso adscribenda est; substantia gummea autem tota propemodum iners deprehenditur. Ex libra una civili granorum Cardamomi minoris, teste NEVMANNO (y), drachmae quinque aut sex, et ex aequali quantitate Cardamomi rotundi, sicuti ipse expertus sum, circiter drachmae tres olei humida destillatione eliciuntur; in granis Cardamomi longi maioris autem tanta eius penuria reperitur, ut sumtus destillationis compensare nequeat. Oleum, ex rotundi aequae, ac longi minoris cardamomi granis prolectum, aqua quidem specificè levius, flavescens, fragrans et acre aromaticum est, prius tamen

(y) In Praelect. chemico-pharmaceuticis, p. m. 668.

tamen multo fortiozem odorem ac saporem camphoratum obtinet, et utroque celebre oleum Caieput tantopere aemulatur, ut aliqui, hoc ipsum ex granis cardamomi rotundi in India destillari, certo crediderint: attamen vero sententiam illam minime consentaneam esse, quondam in *Dissertatione de Oleo Kaiuput* fusius demonstravi.

§. IV.

Grana cardamomi minoris non tantum ad praestantiora ciborum condimenta spectant, sed activis etiam medicamentis cephalicis, cardiacis, stomachalibus, carminativis et uterinis calidioribus accensentur, et in vomitu igitur pituitoso, imbecillitate ventriculi, adfectibus frigidis flatulentis, palpitatione cordis, lipothymia, vertigine, suppressione mensium ac pluribus morbis, a partium solidarum laxitate, et dyscrasia lymphae mucida potissimum oriundis, haud contemnendum persaepe auxilium ferunt. Interne plerumque sub forma infusi vinosi adhibentur, et crebro pariter inter pulveres grossiusculos, morculos, electuaria et pilulas recipiuntur. Grana cardamomi rotundi praecedentibus adhuc potentiora sunt, iisdem tamen virtutibus gaudent, et, tanquam medicamenta, eodem quoque modo usurpantur, inter condimenta ciborum autem, ob saporem nimis camphoratum, rarius locum inveniunt. Grana denique cardamomi longi maioris intuitu usus medici vix annotationem merentur, ac propter inertiam suam commode ex Officinis exulare possent.

§. V.

Expositis haecenus Cardamomi strictius sic dicti speciebus etiam CARDAMOMVM PIPERATVM

TVM CORDI, quod Scriptorum plerique etiam *Melegettam*, *Meleguettam*, *Maniguettam*, et *Grana paradisi* vocant, addi meretur. Sistit hoc grana seu semina angulosa, cardamomi minoris granis maiora, coloris extrinsecus fusci aut subfusco - rufescentis, intus albi, odoris aromatici, et saporis, aequae propemodum, ac piperis grana, acerrimi ac valde urentis. Adfertur ex Guinea, Madagascar, Ceylona etc. et planta, quae istud generat, LINNAEO *Amomum caule racemoso* audit. Capsulae folliculosae, quibus haec grana includuntur, tumidae, globosae atque subrubrae sunt, et ovum columbinum magnitudine superare dicuntur; unde a nonnullis quoque haec cardamomi species *Cardamomum maximum* appellatur.

§. VI.

A pipere rotundo, intuitu naturae, principiorum ac virium, grana paradisi parum recedunt, et paullo duntaxat temperatiora sunt. Activitas eorum non tantum ad *oleum essentiale aethereum* et *fixam partem resinosa*, sed ad *gummeam* pariter *substantiam* redit. Nam extractum aquosum primum, obscure ac fordide fuscum, in superficie albis maculis passim distinctum, satis acrem ac fervidum saporem possidet; licet infuso et extracto spirituosissimo primo in hac parte non equiparandum sit: quippe quae urentem atque acerrimum saporem gustus organo imprimunt. Ex uncia una circiter drachmam unam et grana aliquot extracti aquosi, et drachmam unam scrupulumque semissem extracti spirituosissimi primi impetravi. Notandum tamen, me extractioni non grana contusa, sed integra adhibuisse.

§. VII.

§. VII.

Militant magis inter condimenta ciborum, quam medicamenta, piperi rotundo nihilominus in casu quocunque substitui, et eodem quoque modo in usum trahi possunt. Nonnulli, semina haec inter grana piperis et cardamomi minoris, respectu virtutis, medium quasi locum tenere, et hisce potentiora, illis remissiora esse, non sine ratione credunt.

CAP. LXIV.

De Araco aromatico.

§. I.

ARACVS AROMATICVS, vulgo *Vanilla* et *Vaniglia* dictus, siliqua est paullulum compressa, angusta ac pene teres, sex circiter uncias longa totidemque lineas lata, nonnihil rugosa, molliuscula ac valde pinguis oleosa, fragilis nihilofecius et exterius quasi coriacea, intus vero pulpa subrufa et innumeris feminibus minutissimis, nigris, splendentibus, referta, coloris rufescentis, saporis pinguis subacris aromatici, odoris fragrantissimi, ac balsami Peruviani odori simillimi. Tanta, quod addere expedit, memorata odoris fragrantia, praesertim in siliquis recentioribus, reperitur, ut cerebrum nonnihil turbet, et apud subiecta plethorica ac cholericam capitis dolorem excitet; unde parca etiam dosi Choccolatae, cuius ingrediens satis gratum persaepe constituit, misceri debet.

§. II.

Planta, quae odoratos hosce fructus siliquosos foeneratur, in regno Mexicano ac Peruviano crescit,

crefcit, et RAIÖ *Volubilis filiquofa Mexicana* foliis plantaginis, LINNAEO *Epidendron foliis ovato-oblongis, nervofis, feffilibus, caulinis, cirrhis fpiralibus* dicitur. Scandit arbores et truncum ramosque earum amplectitur. Folia habet, plantaginis quidem foliis forma fua haud diffimilia, longiora tamen, pinguiora, et faturatius virentia. Flores, quibus filiquae defcriptae fuccedunt, colore nigricante gaudent. In Infula San-Dominicana etiam Vanigliae fpecies, a PLUMIERIO uberius defcripta, nafcitur; aft valde haec ipfa quoad florem et fructum a legitima Mexicana ac Peruana difcrepat. Vanilla enim San-Dominicana flores fert ex albo fubvirides, filiquasque odoris plane expertes; Mexicana vero ac Peruana flores, uti dictum, nigricantes et filiquas fortiter ac grate olentes generat.

§. III.

Principio fpirituofö ac refinöfo - oleöfo, quod totum fpiritu vini extrahi poteft, hae filiquae admodum turgidae funt, et *ficcum* quoque *fal volatile oleofum*, floribus benzoinis analogum, in naturali mixtione fua continent. Poftremum hoc principium activum fub tempeftate calidiori nonnunquam fponte fecedit, et fub pulveris tenerrimi falini forma ad fuperficiem extruditur. Tacitus caeteroquin praeterire nequeo, filiquas hafce, ob indolem fuam nimis pinguem atque oleofam, corruptioni adeo obnoxias efle, ut diu confervari aut aliorum per mare transmitti nequeant, nifi totae fubtili facchari Canarienfis pulveri immergantur, et contra aëris liberioris accessum probe defendantur.

§. IV.

Virtute quidem calefaciente, discutiente, roborante, stomachali, carminativa et emmenagoga Vaniglia pollet, ac commode igitur et cum emolumento, in morbis variis, electuariis, ac morfulis addi, vel sub tincturae etiam aut infusi vinosi forma interne usurpari posset, rarissime nihilominus in usum medicum trahitur, sed subinde tantum, sicuti antea pridem dixi, Choccolatae ingrediens constituit, et eum in finem modica quantitate miscetur, ut gratum illi odorem balsamicum conciliet, et sebaceam simul pinguedinem nucleorum cacao aromatica sua indole nonnihil corrigat.

CAP. LXV.

De Castoreo.

§. I.

CASTOREVM sive CASTORIVM, *Biebergail*, adhuc integrum, hoc est, nondum in frustra dissectum, duos folliculos glanduloso-membranaceos denotat, oblonge rotundos, in inguinibus Castoris (z), ovi gallinacei, immo interdum

(z) Castor, qui etiam *Fiber*, itemque *Canis Ponticus*, germ. *Bieber*, dicitur, amphibium quadrupes est, pilis mollissimis, coloris partim fusci, partim grysei, vestitum, ac plene adultum Suis sex circiter mensium magnitudinem habet. Capite, quod dentibus longis et acutis armatum est, inurem Alpinum, vel lutram, cauda vero, quasi squamosa et ordinario pilis denudata, piscem refert.

dum anserini, magnitudine, naturaliter prognatos, paullulumque post excisionem brevi fumigatione in camino exsiccatos, adeoque nonnihil corrugatos, intus materia pingui oleosa, melleae in principio consistentiae melleique coloris, hinc inde instructos, valde graveolentes, coloris flavo-fusci, vel rubro - aut fusco - nigricantis, saporis subacris et amaricantis nauseosi.

§. II.

Folliculi hi sive bursulae, quas Veteres et nonnulli pariter neotericorum pro testiculis castorum falso habuerunt, et germanico proinde idiomate *Biebergail* adpellarunt, apud castores mares aequae, ac feminas reperiuntur, et peculiaris substantiae corpora sunt, a testiculis plane diversa. Veri enim testes, apud castores mares obvii et ovum columbinum magnitudine vix aequantes, specifico castorei odore et sapore penitus destituuntur. Texturam praeterea vasculoso-tubulosam obtinent, et ita intra abdominis cavitatem locati sunt, ut citra necem animantis excindi nequeant; memorati folliculi autem utrinque in inguinibus, alter nimirum in dextro, alter in sinistro inguine, statim sub cute excrescunt, nec ullo modo cum mentula communicant. Praeter binos hosce folliculos maiores, duo adhuc minores adsunt, qui mera tamen pinguedine repleti inveniuntur.

A a 2

§. III.

fert. Pedes breves sunt, anterioresque melis vel canis, posteriores anseris vel oloris pedibus non dissimiles deprehenduntur. Conf. HILSCHERI *Dissertat. de Castorii natura et genuino in praxi medica usu*, pag. 5.

§. III.

Laudata amphibia in ripis fluminum maiorum atque lacuum sua exstruunt domicilia, et in Prussia atque Polonia circa Vistulam, in Moscovia, Siberia et Tartaria circa Borysthenem, Duinam, Tanaim, Obium, Wolgam et Pontum Euxinum, in Gallia circa Rhodanum, nec minus in Canada et Nova Anglia magno imprimis numero occurrunt, immo, ipsa Germania nostra passim circa Rhenum et Albim castores, quamquam nostra aetate perpauca, alit. Victum suum magis in terra, quam aqua, quaerunt, et arborum corticibus praecipue delectantur.

§. IV.

Pro regionum atque climatum diversitate castorei bonitas differt. Optimum censetur Prussicum et Polonicum, huic Russicum succedit, et infimo demum loco Americanum collocatur. Prussicum genuinum reliquas species penetrante odore et sapore, viribusque medicis superat: Genuinum, inquam; castoreum enim ad illas merces pertinet, quae a fraudulentis, lucri maioris causa, creberrime corrumpuntur. Massam scilicet ex gummatibus, gummi ammoniaci v. g. opopanace, sagapeno etc. componunt, eamque pinguibus folliculis castorinis postea insuunt. Mangonium hoc odor et sapor detegunt, qui in castoreo genuino longe fortiores, quam in adulterino, deprehenduntur. Subinde etiam, ad pondus augendum, arenam, globulos plumbeos et similia corpora ponderosa immittunt, quae fraudes, nisi folliculi aperiuntur, non facile detegi possunt.

§. V.

§. V.

Circa designandas partes castorei constitutivas, praesertim activas, Scriptores medici plus minus dissentiunt. Alii enim eidem, cum HERMANNO (a), *sal volatile penetrantissimum, pinguedini inclusum*, aut cum LEMERIO (b), *copiosum ac penetrans oleum*, alii cum ETTMÜLLERO (c), et VALENTINO (d), *sal volatile oleosum*, vel etiam, uti HILSCHERVS fecit (e), *partes salinas volatiles, sulphur copiosum explicantes*, tribuunt. Quod me attinet, nullas particulas salinas explicitas admitto, sed castoreum, stricte ita dictum, massam nempe fuscam, exsiccatione induratum, adeoque fragilem, folliculis inclusam et adhaerente pinguedine liberatam, folisque membranulis tenerrimis permixtam, ex partibus terreis, resinosis, gummeis seu mucilagineis, et oleoso-inflammabilibus constare, arbitror. Oleum aethereum substantiale tam exigua quantitate adest, ut vix, aut ne vix, in mole conspicua monstrari queat, nisi magna castorei quantitas una vice humidae destillationi subiiciatur; adeo tamen subtile est, adeoque spirituosius particulis refertum, ut unica guttula, in halitus resoluta, magnum aëris spatium specifico castorei odore replere valeat. Huic igitur principio odor et vires, quibus totum castoreum eiusdemque extracta pollent, unice adscribi merentur. Inertes partes terreae dimidium ponderis expleant, gummeae autem ac resinosae ita invicem

A a 3

mix-

(a) Vid. *Cynos. Mat. med. pag. 309.*(b) *Materialisten-Lexicon, pag. 261.*(c) *Coll. pharmaceut. in Schroeder. sub voce Castor.*(d) *Mus. Museor. p. 474.*(e) *Diss. cit. p. 15.*

mixtae inveniuntur, ut pondera earum exacte determinari nequeant. Observante enim NEVMANNO, una castorei uncia, sive aqua primum, sive spiritu vini rectificatissimo extrahatur, drachmas duas et scrupulum unum extracti suppeditat, ita tamen, ut spirituosum primum unguinosum et satis quoque, ob retentas implicitasque multas particulas oleoso-spirituosas, activum, aquosum vero fragile, siccus et saporis non minus, quam odoris intuitu longe debilius reperiatur. Extracta secunda, propter inertiam suam, nulla amplius consideratione digna sunt, immo ipsa extracta prima odore et virtute spoliantur, quando aqua simplex semel vel aliquoties ab illis abstrahitur, adeoque partes oleoso-spirituosae, quae solae, uti aeterea dictum, activitatis et fragrantiae rationem in se continent, penitus separantur.

§. VI.

Multi maximis hoc pharmacum laudibus extollunt, multi prorsus contemnunt; hi illud medicamentum famosum quidem, ast nimis fumosum esse, et citra artis medicae detrimentum ex Officinis pharmaceuticis exulare posse, credunt (f); illi ex adverso vires plane egregias fedat.

(f) „Castorium, RIVINVS scribit, sane mulierculis, quibus suaveolentia displicent, negare non lim: si modo Medici politiores non delectentur eiusmodi fordibus. Sit ita egregie foetere, necare vermes, expellere omnis generis exanthemata pollere facultatibus nervinis et uterinis, quid tum postea? non desunt alia, etiamsi castoreo carerent Officinae etc., Vid. *Dissert. eius in Medicament. officinal. censura*, Cap. II. de nauseosis, §. 8.

sedativas, anodynas, antispasmodicas, nervi-
 nas, cephalicas, carminativas, uterinas, anti-
 hystericas eidem adscribunt, adeoque usum eius
 in morbis variis, maxime autem in convulsioni-
 bus partium, epilepsia, apoplexia, adfectibus
 soporosis, vertigine, paralyfi, palpitatione cor-
 dis, cardialgia, colica, passione hypochondria-
 ca, suffocatione hysterica, singultu, et cachexia
 virginum praestantissimum esse, contendunt.
 „Vis eius, ETTMÜLLERVS *loco vix allegato in-*
 „quit, fundata est in sale admodum oleoso acri
 „et penetrante et sensus graviter afficiente. Vn-
 „de imprimis ad affectus nervinos dolorosos et
 „capitis multum valet, ubi sensuum hebetatio
 „adeft, quos fortiter ferit, spiritus etiam anima-
 „les torpidos excitat, indeque in lethargo, pa-
 „ralysi, apoplexia, epilepsia et quibusvis affecti-
 „bus convulsivis, tam internis, quam externis,
 „aphonia, castorium frequentissimi et egregii usus
 „est, quocunque modo adhibitum, immo est
 „nobilissimum remedium carminativum et fla-
 „tuum discussivum, unde in affectibus intestinc-
 „rum et abdominis torminosis et flatuosis, infla-
 „tione stomachi v. g. colica flatulenta, passioni-
 „bus hystericis, suffocatione hypochondriaca etc.
 „sacra anchora est, sive externe appensum, sive
 „interne propinatum, acidum in primis viis,
 „praeprimis ex pancreate, et quocunque in cor-
 „pore humano corrigit, motusque convulsivos
 „potenter sistit et compescit. Vltterius in au-
 „rium tinnitu, asthma convulsivo, epilepsia
 „uterina, aliisque morbis uteri, in specie pro
 „usu pellendi foetum et secundinas, ciendi men-
 „ses suppressos, et cum difficultate ac variis ab-
 „dominis pathematibus fluentes, sistendi mulie-
 „rum dolores post partum et promovendis lo-

„chiis aperto consilio datur, et cum myrrha
„sociatur.“

§. VII.

Pro meo iudicio utriusque sententiae patroni, hi laudando nimium, illi vituperando, iustos limites transgrediuntur. Pollet omnino castoreum, propter tenerrimum mobilissimum principium suum oleosum et expansivum spirituosum, viribus discutientibus, commoventibus et anodynis, ideoque in morbis memoratis aliisque, supposita tamen frigida magis, quam calida causa materiali, non contemnendum praestare valet auxilium: Quod in iis autem promiscue, hoc est, praesente causa quacunque, in usum trahi possit, concedere nequeo, dum adfectus memorati persaepe a causa calida biliosa, vel etiam ab abundantia, orgasmo et congestione sanguinis, similibusque causis, quae expandentia minime perferunt, nunc proxime, nunc remote, oriuntur. Pro usu interno pulveribus, quidem, electuariis ac pilulis ad grana aliquot, additur, optime tamen essentia eius, a guttis decem ad triginta, exhibetur. Externe inter odoramenta antihysterica locum occupat, nec raro etiam emplastra et unguenta roborantia, nervina, antispasmodica, antepileptica etc. itemque pulveres errhinos atque cephalicos ingreditur.

§. VIII.

Cum ipso castoreo, quoad principia volatilia, AXVNGIA sive PINGVEDO CASTORINA, quae in folliculis minoribus sola reperitur, in maioribus vero substantiae duriori seu castoreo proprie ita dicto, passim adhaerescit, indeque
abra-

abraditur, liquatur, posteaque seorsim adservatur, convenit. Penetrantem enim castorei odorem et saporem specificum possidet, nec ullo igitur modo dubitandum est, quin simillimis particulis oleoso - spirituosus, similibusque viribus instructa sit. Interne ob nauseam, quam adsummentibus creat, nunquam praescribitur; externe autem frequentissime unguentis nervinis, antiparalyticis, antispasmodicis, antepilepticis, anticolicis etc. miscetur, immo haud raro per se contra singultum et colicam flatulentam, convulsivam, hystericam, regioni umbilicali et hypochondriis, vel spinae etiam dorsali, praesente epilepsia, inungitur.

CAP. LXVI.

De Moscho et Zibetho.

§. I.

MOSCHVS, *Biesam*, est substantia grumosa, sicca, contactu tamen nonnihil pinguis, sanguini exsiccato et in frustula minima diffracto quodammodo similis, coloris fusco - aut ferrugineo - nigricantis, saporis subacris et amaricantis, odoris balsamici fragrantissimi.

§. II.

Eximitur e naturali quodam folliculo, rotundo, duro, piloso, qui apud sic dictam *Capream* sive *Dorcadem moschiferam* (g), in abdomine

A a 5

prope

(g) Animal moschiferum neque capris sylvestribus, nec dorcadibus perfecte accenseri posse, sed singulare quadrupes esse, tum corporis totius, tum partium

prope inguina, ovi gallinacei magnitudine, excrescit. Vivunt haec animalia in regnis Thibet, Pegu, Tunquin, pluribusque Chinae et Indiae orientalis tractibus, immo in Sibiria et Tartaria notabili hinc inde numero obvia sunt. Moschus orientalis, praesertim in regno Thibet collectus, moschum Russicum, ex Sibiria etc. allatum, partium volatilium subtilitate ac copia, adeoque odoris etiam fragrantia, longe superat, et multo cariori proinde pretio venditur. Fraudulenti praestantiores moschum orientalem viliori Russico, vel etiam, ad pondus augendum, sanguine siccato, terra Iaponica, stercorebus murium etc. miscent; quae mangonia, si materiae peregrinae quantitate modica additae fuerint, interdum difficillime cognoscuntur.

§. III.

partium nonnullarum forma a capris et dorcadibus distinctum, quidam rerum naturalium Scriptores dudum agnoverunt: „Animal Moschi, „IO. CYPRIANVS in *Cont. Histor. Animalium* „FRANZII *Tom. I. pag. 749. inquit*, i. e. pretiosi ac suavis odoriamenti illius in India, Tartaria, Sina, Aldrovandus capris accenset, alii capreis annumerant, alii leporis aut vulpis figura describunt. Qui inter diversas eius ab auctoribus productas icones eam, quae exactissima putatur a LVCA SCHROECKIO Med. Doct. et „Phyfico Augustano, recentissimo solertissimoque „Moschi scrutatore, intuetur, inter capras non refert, nec inter capreolos, cum barba et cornibus careat, exertos etiam dentes, quibus animal „moschiferum instructum, capreolorum, dorcadum, cervorumque genus nullum ostendat. „Cruribus et pilis capreolum repraesentat, vultus „lupinus est, collum camelinum etc.,

§. III.

Scatet singulare hoc concretum *particulis tenerrimis, mobilissimis, fragrantissimisque oleoso-spirituosis*, quae fixiori matrici *gummeo-resinoso-terreae* plus minusve involutae sunt, indeque sensim exhalando secedunt, et aërem circumfufum aliaque corpora, quibus sese insinuant, specifico moschi odore valde imbuunt. Subtilitas earum maxima ac prorsus stupenda est: Vnicum quippe moschi granum per aliquot annos fortem odorem indefinenter diffundit, et integram pulveris cuiusdam inodori libram, si tritura intimius misceatur, odore fragrante impraegnare valet. Moleculae fixae *resinoso-gummeae* unam, *terreae* inertes alteram ferme totius ponderis partem dimidiam constituunt. Priores odoratissimo principio volatili admodum turgidae et tantopere invicem mixtae inveniuntur, ut aqua non minus, quam spiritu vini rectificatissimo maximam partem solvi possint; *gummea* tamen sive *mucilaginea* substantia paullo maiori quantitate, quam *resinosa*, adesse videtur, quoniam moschi drachma una plerumque grana viginti quatuor extracti primi aquosi et unicum solummodo scrupulum extracti spirituosi primi suppeditat (h). De volatilibus *particulis salinis*, quae *oleoso-spirituosis inflammabilibus* sociatae censentur, multa addere nolo, quum natura earum nondum satis innotuit. Si paucis tamen, quid sentiam, dicere licet, *urinosae* illas indolis esse, arbitror. Credo quoque, praeter *urinosas* massae fixiori tenerrimas quasdam *ammoniacales* inhaerere, quoniam adfuso oleo tartari per deliquium halitus urinosi vestigia notantur,

(h) Conf. NEVMANN. *L. cit. pag. 1289.*

tur, et tenerrimum praeterea sal ammoniacale, nisi omnium, certe tamen plerarumque, partium animalium mixtionem ingreditur.

§. IV.

ZIBETHVM, *Zibeth*, est substantia unguinosa, pallide flavescens, consistentia mel aut butyrum aemulans, saporis subacris, odoris balsamici fragrantissimi. Pretiosa haec pinguedo apud *Animal Zibethicum*, quod nonnulli, propter aliquam formae similitudinem (i), etiam *Felem* aut *Catum Zibethicum*, *Catum odoriferum* etc. vocant, e sanguine, et quidem in certo folliculo glanduloso, apud mares inter anum et penem, apud foeminas inter anum et pudenda, adeoque in perinaeo, naturaliter sito atque in duos loculos diviso, secernitur, indeque, largius collecta, vel sponte per ductum excretorium effluit, vel ab ipso animante, quamprimum in loco memorato molestum sentit pruritus, vi exprimitur, arborumque truncis et ramis aliisque corporibus solidis sub folliculi prurientis affricu illinitur, vel certis etiam temporibus, apud

- (i) Animalia zibethica in India orientali, China, Brasilia, aliisque Asiae, Africae et Americae regionibus, sylvarum incolae sunt, et magis vulpem, quam felem, corporis forma referunt. Caput habent longum, dentes nigros et acutos, pedes breves, caudam prolixam ac satis pilosam. Pelle teguntur cinerei coloris, striis tamen ac maculis nigris, praesertim apud femellas, eleganter distincti. Animalia admodum fera sunt, et capta igitur cancellisque inclusa difficiliter paullo mansuescunt. Zibethum orientale, quod addere placet, occidentali sive Americano praestantius esse dicitur.

apud capta nimirum, cancellisque inclusa atque nonnihil cicurata haec animalia, e laudatis loculis, parvi cochlearis ope, eximitur. In locis sylvestribus collectio non taediosa solum, sed etiam parcissima est, quoniam animalia zibethica, ex antris suis egressa, hinc inde curstant, arboresque scandunt, et promanantem itaque, vel expressam, materiam unguinosam sparsim et exigua tantum copia arboribus etc. affricant. Initio, quod adhuc monendum duco, zibethum colorem albicantem habet, aliquamdiu vero adfervatum, flavescentem, tandemque subfuscum induit.

§. V.

Ex duplici saltim principio, altero nimirum *spirituoso mobilissimo, oleoso-inflammabilis naturae*, altero *crassiori, pingui, unguinoso* constat. Hoc involucrum quasi seu receptaculum constituit, illud massae fragrantiam et praecipuam activitatem largitur. Portio spirituosa, iterata destillatione humida, maximam quidem partem a spissiori substantia separatur, et aquam transtillantem odore fragrantissimo imbuit, ob summam tamen teneritudinem ac mobilitatem in molem conspicuam redigi, adeoque relativum pondus eius determinari nequit.

§. VI.

Parum discriminis, intuitu virium et usus, moschum et zibethum intercedit, praeterquam, quod zibethum odore suo facilius, quam moschus, nauseam creet. PAVLVS HERMANNVS et plures alii moscho vires analepticas, cardiacas, antihystericas et antispasmodicas tribuunt, et nonnulli eum magnopere imprimis in retentione

tione secundinarum ac partu difficili, ad necessarias uteri contractiones suscitandas, commendant: Verum enim vero, memorata cum limitatione aliqua accipienda esse, arbitror. Nam moschus aequè, ac zibethum, laticem nervorum spirituosum, sanguinem ceterosque humores mirifice expandit, et ingenti hac expansione persaepe capitis dolorem, vertiginem, ac lipothymiam, apud plethorica imprimis subiecta, provocat, immo solus odor eorum multis, tam masculini, quam feminini sexus, hominibus, maxime autem feminis hystericis, adeo adversatur, ut eundem citra animi deliquium summamque anxietatem diu perferre nequeant: Vnde a providis etiam Medicis odoratissima haec simplicia raro interne quantitate maiori, et rarius adhuc sola praescribuntur, sed aliis ut plurimum praeparatis atque compositis, tam interni, quam externi usus, spiritibus v. g. aquis spirituosis, rotulis, morsulis, speciebus, balsamis liquidis et spissiusculis, unguentis, emplastris, massis suaveolentibus, pulveribus cypriis etc. dosi valde exigua adduntur. Notandum tamen moschum zibetho in hoc passu praeferrì, et longe frequentius laudatum medicaminum condimentum odoriferum constituere.

CAP. LXVII.

De Naphtha sive Petroleo.

§. I.

NAPHTHA, *Oleum petrae, Petroleum, Oleum terrae, Axungia Macrocosmi*, est oleum minerale nativum, nunc candidum prorsus et aquae instar

instar limpidum, nunc aurea aut pallidiori saltem flavedine succinea, nunc rufo aut nigricante colore tinctum, fortissimoque odore bituminoso, et acri, amaricante atque balsamico sapore praeditum.

§. II.

Auctorum nonnulli inter *Naphtham*, *Petroleum* et *Oleum terrae* discrimen faciunt, et oleum albicans, quod aquam simplicem puram pelluciditate sua aemulatur, et ordinario, praesertim si adhuc recentius existat, admodum tenue, valde spirituosum ignisque rapacissimum, et suaviori praeterea odore donatum reperitur, *Naphtham*, oleum minus spirituosum, flavi, aurei, aut rufi coloris, *Petroleum*, et subnigram denique, aut rufo - nigricantem eius speciem, praecedente paullo rursus spissiore, graveolentem et spirituofo elemento parum praegnantem, *Oleum terrae* adpellant. Verum enim vero distinctio haec mihi non adeo necessaria videtur, dum hic originaliter nullum essentiale discrimen subest, sed differentia, quae circa consistentiam, puritatem, colorem, odorem, caeterasque proprietates, sensibus obvias, occurrit, solummodo accidentaliter deprehenditur. Siquidem noto notius est, naphtham, quae in fovea aut in alio primae scaturiginis loco aquea prorsus limpiditate gaudet, progressu temporis, si negligentius in vasis non satis obturatis adservetur, succineam, quin auream, flavedinem contrahere, ac multum quoque de pristina fluiditate, volatilitate et promptissima inflammabilitate amittere. De reliquis speciebus, aurei nimirum, rufi et nigricantis coloris, multa dicere supersedeo, quoniam ex primordiali earum consistentia spissiori
con-

confestim patefcere arbitror, quod color fatu-
rator atque obfcursor tantummodo adventitius
exiftat, et unice immixtis corpufculis terreis,
fulphureis, lapideis, femimetallicis, aliisque
heterogeneis mineralibus adfcribendus fit.

§. III.

Hinc inde hoc oleum in variis regionibus,
praefertim calidioribus, vel folitarium e tellu-
ris visceribus prodit, vel aquae fcaturiginum ac
puteorum maiori aut minori copia innatat. Olim
naphtha, quae circa Babylonem, Sufam, Arbec-
lam et Ecbatana fcaturiebat, ob subtilitatem,
volatilitatem, facillimamque inflammabilitatem
fuam admodum celebris erat (k), noftra autem
aetate maxima eius quantitas venalis in Mediae
citerioris, hodie *Sjirwaan* dictae, peninfula *Okéf-
ra*, non adeo procul ab urbe Bakú, nec minus
in Italiae Ducatu *Mutinenfi* ac *Placentino* colligi-
tur. In memorata peninfula *Sjirwaaneni*, fe-
cundum *KAEMPFERI* relationem, non tantum
tenuiffimae, valde fpirituosae, valdeque inflam-
mabilis naphthae albae, fed ignobilioris etiam
magisque terreftreis nigrae proventus uberrimus
eft: De proventu, *fcribit* (l), pretioque naph-
thae haec accepi: „Sudare in dies operarios
„duos et triginta, omnes pagi adiacentis inco-
„las, quibus fingulis quolibet mense numeran-
„tur Abaffi feptem, aliis octo, i. e. imperiales
„circiter duo: Quotidie rhedas hinc dimitti
„octoginta, fingulas utribus onuftas, pro varia
„magnitudine, feptem vel octo; quorum mini-
„mi denos, maximi vicanos et amplius capiant
„Man

(k) Vid. *PLUTARCHVS in Vita Alexandri*.

(l) In *Amoenit. exot. Fasc. II. pag. 278*.

„Man seu Batman mensurae Tabrifiensis, quae
„novem libris Belgicis aequivalet. Calculus eo
„recideret, ut circiter 8 ad 10000 Batmanni hau-
„riantur et divehantur quotidie; pro quibus ta-
„men 100000 liberaliter supponebant operarii:
„Vnde annum redditum aerario Regio, detractis
„impensis, exsurgere affirmabant septem mille
„Tomanorum. Venditur hic Batman unus albae
„naphthae uno *Siai*, i. e. imperialis circiter octa-
„va parte; atrae naphthae paullo minus. Sed
„ego hos pretii et proventuum numeros pro-
„veris non venditabo, quod, linguae Turcicae
„ignarus, in inquirendo interprete usus sim, in
„vernacula regionis non satis versato., Non
prodit in peninsula Okésra, quod addendum
censeo, oleosum hoc liquidum ad terrae super-
ficiem, sed utraque eius species ex puteis pro-
fundis, in quibus, per terrae venas indefinenter
affluens, sensimque ac quasi guttatim illapsa, in
molem maiorem coit, aptis vasculis ab operariis
exhauritur. KAEMPFERI tempore putei naph-
thae albae, numero pauciores, in loco erant,
qui informem lacus vel piscinae speciem refere-
bat, circiter quinquaginta passus in latitudine,
centum in longitudine continentem, littore ge-
minam orgyiam demisso infra communis soli su-
perficiem. Fundus ex argilla limosus et lubricus
erat, nec etiam, nisi in medio, aqua falsa, ad
palmae profunditatem, stagnabat. Similes effos-
sae naphthae nigrae cisternae angustae, numero
longe quidem plures, ast praecedentibus minus
profundae, in alio peninsulae loco reperiaban-
tur, et quidem in campo, ab occidente ad orien-
tem aliquot centenis passibus protracto, cuius
tota superficies ex profuso sensimque exsiccato
atque concreto hoc oleo atricolor existerat, et

Carib. Mar. M. II. Tom. B b quasi

quasi pice obducta videbatur. In districtu *Ru-duun*, Kirmanensis provinciae, Auctor laudatus naphtham nigram rivulo etiam, et in Sjirwaa-nensi provincia aquae torrentis cuiusdam, qui a septentrione fluvium *Kuur* intrat, innatantem conspexit, et adeo quidem copiosam, ut inde, si incolis placeret, cum fructu colligi posset (m).

§. IV.

In Ducatu Italiae Mutinensi duo loca diversa sunt, in quibus ditiores petrolei scaturigines reperiuntur, nimirum in *Monte Festino*, et in sterili quadam *Valle*, quae montem *Cibium* sive *Zibinium* et duo alios montes praealtos interiacet, ac duodecim circiter miliaribus Italicis, montem Appenninum versus, Mutina distat. In posteriori hoc loco petroleum e ventre rupis praeruptae, quae in imo vallis sita est, ac, leni curvatura meridiem respiciens, ad satis longum spatium exporrigitur, cum aqua candicante, cui innatat, erumpit, et inde, largius in foveis collectum, extrahitur. BERNARDINI RAMAZZINI tempore in hac valle tres olei scaturigines erant, quarum una, eaque vetus et originaria, petroleum rufi coloris, altera paullulum nigricans suppeditabat. Colligendi modus, narrante eodem Auctore (n), sequens est: „Situlam ligneam in aquam demittunt, ac parumper inclinant, in qua manuali herbarum fasciculo, scoparum ad instar, Petroleum innatans cum aqua sensim deducunt, aquam exinde, foramine in fundo situlae aperto, a Petroleo facili negotio

(m) *L. cit. pag. 274. et 277.*

(n) *Tractat. de Petroleo montis Zibinii, in Oper. pag. 352.*

„gotio fecernunt. Ex fonte originario, qui, „teste FRANCISCO ARIOSTO (*non Medico, uti „aliqui perhibent, Ferrariensi, sed Iureconsulto*), „anno 1464. primum innotuit (o) Petrolei sex li- „bras, plus minus, ut aiunt, qualibet vice edu- „cunt, quod bis in hebdomade exequi solent, „reliqui fontes pauperiores sunt, immo alter ex „his, utpote effoetus, ostio aperto iacet, cui- „que expositus. „ Ab oleo montis Zibinii pe- „troleum montis Festini quoad puritatem atque „colorem notabiliter distinctum reperitur: Illud „enim rufum vel nigricans, hoc albidum et aquae „instar limpidum est. Non prodit etiam, ut prae- „cedens, ad ipsam telluris superficiem, sed pro- „pe oppidum *Monfestinum* ex pluribus puteis, qui „in parva montis planitie, prati instar virentibus „herbis contecta, ad septuaginta circiter ulnarum „profunditatem fodiuntur, ab operariis, funis „ductorii ope demissis, extrahitur. Aquae ut- „plurimum innatat, subinde tamen etiam perfecte „purum et penitus ab aquosi laticis societate libe- „rum, e venis terrae in puteos confluit. Quan- „do in puteis memoratis olei scaturigines post „breviora aut longiora temporis intervalla exsic- „cantur, novi putei effodiuntur. Quavis hebdo- „made plerumque viginti librae petrolei ex pu- „teis illis colliguntur, collectionis tamen nego- „tium periculo non penitus vacat, quia operarii „interdum per copiosissimas ac valde penetrantes „exhalationes inflammabiles suffocantur. Oleum „hoc, quod caeteris adiungere expedit, tam can- „didum, tam purum, et tam leve est, ut omni- „bus liquoribus aliis innatet aut supernatet; unde „non facile etiam ab adulteratoribus corrumpi „potest.

B b 2

§. V.

(o) *Tract. de Olei Monzibinii ortu et virtute.*

§. V.

Cum naphtha montis Festini *Petroleum Placentinum*, quoad candorem, pelluciditatem, subtilitatem et spirituosam indolem, perfecte convenit. Colligitur illud in monte *Ciaro*, duodecim circiter milliaribus Italicis a Placentini Ducatus metropoli diffito. In illo nimirum monte, sicuti in *Commercio litterario Norimbergensi* (p), ex *Academiae Regiae Parisiensis Commentariis* (q), narratur, Ardesiae dantur cinereae, horizontaliter propemodum positae, argillam speciemque selenitae, qui calcariae naturae esse videtur, commixtam habentes: Ardesiae hae perpendiculariter et tam alte ab operariis perforantur, donec aqua inveniatur, quae petroleum, inter strata et fissuras ardesiarum contentum, secum in puteos effossos deducit. Extractio olei cum pelvibus ex orichalco conflatis suscipitur, quando sufficiens quantitas eius, quovis utplurimum octidui spatio exacto, in aquae fontibus confluit. Post extractionem facillime quidem ab aqua separari potest, praestat tamen copiam eius superfluam, nec statim ideo nec paullo post vendibilem, in aqua dictorum fontium relinquere, quoniam ibi longe melius ac citra virium iacturam, quam in vitris, conservatur, quorum vulgaria opercula arrodit ac corrodit, et intra modicum itaque temporis spatium maximam partem in auras aufugit. Praecaveri caeteroquin hoc dispendium poterit, quando vitra vitreis etiam pistillis clauduntur.

§. VI.

(p) *Ann* 1743. *Hebd.* 29. *pag.* 231.(q) *Ann.* 1736.

§. VI.

Non tantum Persia et Italia naphtham, tam nobiliorem, quam ignobiliorem, incolis suis foenerantur, sed oleosum hoc liquidum, uti supra pridem dixi, in pluribus globi terraquei regionibus, quamquam minori ut plurimum copia, obvium est. In Scotia v. g. quae regio lithantracibus abundat, aquae fontis cuiusdam, duobus circiter milliaribus Edinburgo distantis, petroleum nigricans guttatim innatat (r). In Sicilia hinc inde, et in Gallia prope *Claromontium*, *Alverniae urbem*, nec minus in Languedocia inferiori prope *Vicum Gabianum*, non longe a *Bliteris* (*Beziers*) diffitum, petrolei rufi et nigricantis scaturigines sunt (s). Sumatra, magna notissimaque Indiae orientalis Insula, naphthae nobilioris, magnique ab incolis aestimatae (t), feracissima est, nec ipsa etiam Germania

B b 3

nia

(r) Vid. GVALT. CHARLETONI *Schediasma de Variis fossilium generibus.*

(s) Conf. STEPHANI FRANCISCI GEOFFROY *Tract. de Materia medica, Tom. I. pag. 157.* It. BOVILLET *Memoire sur l'Huile de Petrole en général, et particulièrement sur celle de Gabian, Beziers 1752.*

(t) „Hoc oleum, IACOBVS BONTIVS scribit,
 „a Barbaris in tanto pretio habetur, ut Rex Achi-
 „nensis, qui potentissimus est huius Insulae Ty-
 „rannus, sub capitali poena istud evehi inde pro-
 „hibeat, ita ut incolae nocte intempesta, si quae
 „nostra, aut Anglorum navis eorum littoribus ap-
 „pellat, ad nos istud furtim deferant. Hoc ole-
 „um partibus affectis illitum miraculi instar ae-
 „gros

nia nostra hoc naturae thesauro penitus caret, sed in Alsatia superiori, prope *Geesbach*, in *valle S. Lamperti* seu vulgo sic dicta *valle iecoris* (*Leberthal*, *Loeberthal*) (u), et alibi petroleum, quamquam paullo impurius, e telluris gremio emergit.

§. VII.

Peculiari prorsus ac quasi hermaphroditica natura hoc oleum gaudet, dum proprietatum suarum aliis olea aetherea, aliis olea essentialia unguinosa aemulatur; quemadmodum hoc ex sequentibus, quae gravitatem, volatilitatem, inflammabilitatem ac solubilitatem recentis ac purioris naphthae candicantis concernunt, clarius patebit:

- I. Naphtha alba, recens ac probe adhuc spirituosus, insigni plane tenuitate ac tanta levitate donata reperitur, ut non solum aquae et ipsi alcoholi, sed, sicuti antea pridem de petroleo montis Festini retuli, omnibus aliis liquoribus spirituosus innatet, aut perfecte supernatet. Probat etiam hanc naphthae levitatem, partiumque subtilitatem ac mobilitatem, eminens eius volatilitas: Recentissima enim, uti supra §. VII. dictum fuit de Placentina, intra modicum tempus e vitris apertis aut obiter saltim obturatis, quoad maximam aut satis tamen notabilem par-

„gros consolatur. Odore porro est gravi, non
 „tamen fastidioso. *Op. de Hist. nat. et Medicina*
 „*Indiae orientalis*, Lib. II.

(u) Conf. IOH. BOECLERI *Cynos. Mater. med.*
Tom. I. pag. 856.

partem, in auras avolat, immo, admoto tantum calore, ad ducentesimum thermometri Fahrenheitii gradum evecto, in ebullitionis seu coctionis motum ruit.

II. Aquae instillata adeo diffunditur, ut unica guttula magnum superficiei spatium obducatur, et, luce clariori admissa, varios colores ostendat.

III. Sub frigore etiam saevissimo nunquam coagulatur, sed pristinam fluiditatem suam retinet.

IV. Odor eius fortissimus est, et diutissime etiam in corporibus, quae ea fuerunt imbuta, perdurat; cuius veritatis testem non meam duntaxat, sed aliorum quoque, et laudati imprimis RAMAZZINI experientiam, adducam: „Odorem adeo gravem, „*hic Auctor inquit* (x), exhalant hae petrolei scaptensulae (*loquitur autem de puteis petrolei montis Zibinii*), ut in illis diutius „immoranti graves capitis dolores subori- „antur; hinc per aestatem, ob partium volatilium promptam diffusionem, Petrolei „collectio operarios non parum infestat, „quod hyeme non sic evenit, quin procul „ab ipsis fontibus ad integrum fere stadium „petrolei odor tam manifeste percipitur, ut „pro ductore esse possit ad locum, unde „emanat. Mirari autem non semel subiit, „quomodo, cum petroleum ex partibus ita „volatilibus constet, illius odor pene in- „eluibilis sit, ut quotiescunque aliquid illo „semel imbutum fuerit, odorem tamdiu „servet etc.,

B b 4

V.

(x) *L. cit. pag. 351.*

V. Cum oleo terebinthinae, thymi, lavendulae, caeterisque oleis essentialibus, aqua specificè levioribus, promptam atque perfectam miscelam subit; hinc illam terebinthinae quoque oleo subinde a fraudulentis adulterari, experti auctores referunt. Miscetur etiam facillime cum spiritibus acidis, ast nunquam, uti alia quaedam olea aetherea, ab illis, etiamsi concentratissimi sint ac potentissimi, accenditur, sed solummodo spissius redditur. Vidi quoque ipse, spiritum nitri fumantem, modica quantitate mixtum, post aliquot hebdomadam decursum in petrolei flavi vulgaris superficie siccam, solidam ac satis densam cuticulam subluteo-albicantem, quae sub leni vitri inversione olei subiecti motum penitus impendebat, produxisse.

VI. Corpore flammante propius admoto, in ipsa aqua accenditur, ac tota comburitur, immo flammam facis accensae aut lampadis, licet ad unum, duos, tres, pedes remota sit, per copiosas exhalationes suas, praesertim si vasculum, in quo continetur, paululum, igne leniori subdito, calefactum fuerit, avide ad se rapit, et accensa penitus deflagrat. Sed requiritur naphtha alba, recentior, studiose adservata et spirituofo elemento suo valde adhuc turgida: Negligentius enim custodita atque vetustior, vel ignobilior tantum ac crassior, flava, rufa, aut nigricans tantam flammam alliciendi ac concipiendi, tantamque deflagrandi promptitudinem haudquaquam possidet. Confirmat dicta saepe allegatus KAEMPFERVS observatio-

vatione sua: „Spiritus, *sic relatio eius sonat* (y), haec Naphtha (*Sjirwanensis scilicet*) spargit subtilissimum, cuius ope flammam ardentis foci, vel lampadis momento rapit, ac semel accensa inextinguibilis deflagrat; velut idem de Naphtha circa Ecbatana prolixè refert Plutarchus in vita Alexandri §. XII. Incendium autem in liquore succedit recentissimo, non in eo, qui dudum haustus et cum neglectu asservatus est, minus in eo, qui ab aquosa limpидitate sua in succineam defecit flavedinem. Est enim hic liquor oleosus instar spiritus rectificati tenuissimus, pellucidus, penetrantissimus, ac flammae rapax etc.,

VII. In spiritu vini, etiam rectificatissimo, per se non solvitur, sed nonnullae tantum particulae spirituosae a massa eius secedunt, et liquidum memoratum odore imbuunt: Potest tamen eidem additamento quodam ac certa encheiresi talis conciliari solubilitas, ut quoad integram molem suam, aequè ac olea aetherea vegetabilium, perfectam cum rectificatissimo vini spiritu societatem subeat. Procedendi modus ad sequentia redit (z): Miscetur primo, sensim tamen atque guttatim, ne nimia vasis incallescencia exoriatur, una pars olei vitrioli puri, pellucidi ac probe adhuc fuman-

B b 5

tis,

(y) *L. cit. pag. 275.*

(z) Conf. FRID. AUGUSTI CARTHEUSER *vermischte Schriften aus der Naturwissenschaft, Chymie und Arzeneygelahrheit. Zweites Stück, pag. 109.*

tis, cum octo partibus spiritus vini rectificatissimi, et menstruo huic paullatim postea aliqua petrolei portio instillatur, sic confestim, identidem in auxilium vocata vitri motitatione, solutio olei accidit, et clara inde, pellucida atque aurei, si vulgare petroleum flavum adhibitum fuerit, coloris tinctura nascitur. Tinctura haec essentiae succini simillima est, odor tamen eius fortior et sapor magis igneus, aromaticus atque nonnihil acidus reperitur. Si aqua frigida illi infunditur, mixtura protinus turbida, crassior, lactescens, evadit, et oleum, a menstruo rursus secedens, iterum ad superficiem enatat. Alia notantur phaenomena, quando memorata tinctura pellucida paullatinae evaporationi in arena modice calida subiicitur. Abeunt nimirum subtiliores olei particulae cum spiritu vini in auras, et superstes portio gravior ac crassior cum acido vitrioli in massam resinofam brunneam aut rufo-nigricantem, illi, quae post commixtionem concentrati acidi vitriolici et olei cuiusdam aetherei vegetabilis generari solet, haud dissimilem, coalescit. Vnio caeteroquin partium petrolei et spiritus vini in tinctura pellucida ac sibi relicta satis firma esse videtur, quoniam in illa, si in vitro probe obturato et in loco quieto collocato adservetur, nulla singularis partium separatio spontanea contingit, sed pelluciditas tantum post tempus diuturnius nonnihil minuitur.

VIII. Mediante destillatione solitaria ex retorta, arenae balneo imposita, nihil phlegmatis,

gmatis, nec quicquam etiam salini acidi ex petroleo puro separatur, sed istud integrum in receptaculum transcendit, et pauxillum duntaxat materiae spissae subfusci coloris in vasis retorti fundo relinquit (a): Vnde iterata etiam destillatione non praestantius redditur, sed odor magis potius magisque debilitatur, et vires eius hac igitur ratione non exaltantur, sed imminuuntur.

§. VIII.

Principia constitutiva seu elementa, quae mixtionem naphthae ingrediuntur, tenacissime cohaerent, nec facile igitur chemicae diacriseos ope seiungi et in aprium deduci possunt: Valde probabile tamen, quin extra omnem dubitationis aleam mihi positum esse videtur, oleum hoc ex iisdem pariter principiis, e quibus, interveniente nexu intimiori, quaevis alia olea nasci solent, ex *teneriori* nimirum ac *simpliciori substantia inflammabili* sive *sulphurea*, *sale acido minerali primo*, et *aquae ac terrae* pauxillo generari. Multum sane lucis, uti ego quidem opinor, circa hoc momentum sic dicta *Naphtha chemica*, quae ex oleo vitrioli fortissimo et spiritu vini rectificatissimo parari et ex arctius proinde coalescentibus particulis acidis atque sulphureis gigni solet, foeneratur. Sistit hoc fluidum, cuius specialem praeparationem, sola miscela et destillatione absolvendam, Chemicorum recentiorum plerique descripserunt, oleum aethereum tenuissimum, aromaticum, fragrantissimum, coloris nunc albicantis seu potius aquae in-

(a) Conf. *Memoires de l'Acad. Royal. des Sciences de Paris*, Ann. 1715.

instar limpidi, nunc flavescentis aut viridiusculi. Quoad partem aliquam, eamque subtiliorem, aquae initio statim innatat, quoad alteram vero, praecedente paullo crassiolem, in ea sub destillatione subsidet, deinde autem, facta nimirum separatione et partis utriusque commixtione intimiori, totum aqua specificè levius ac valde volatile deprehenditur. Facillime, etiam aquae infusum, a candelae flamma, aliquot adhuc digitis remota, accenditur, totumque, nullo cinere, nulla fuligine relicta, lucidissima flamma consumitur. Non indissolubile tamen in spiritu vini est, ut naphtha nativa mineralis, sed totum in eo solvitur.

§. IX.

Vsus naphthae partim mechanico-oeconomicus, partim medicus est. In Persia artifices nobiliori naphtha alba vernicem suam, cui praestantiam vasisque ea obductis insignem nitorem conciliat, attemperant, ignobiliorem nigricantem vero, cuius proventus, uti supra dictum fuit, in peninsula Okésra uberrimus est, incolae Mediae omnes ad flammam lampadum, facumque alendam adhibent, et pro simili pariter usu magnam eius quantitatem ex oppidis Bakú et Sjamachia per mare Caspium in Hircaniam, Vsbeciam, Circassiam et Dagestanam transferunt (b): Immo alibi, in Alsatia v. g. superiori, ruricolae petroleum impurum, cuius in antecedentibus quoque (§. VI.) mentio facta fuit, picis liquidae loco rotarum inunctioni impendunt (c). De reliquis eius usibus oeconomicis
et

(b) Vid. KAEMPFERVS *L. cit.* pag. 276. et 278.

(c) Vid. BOECLERVS *L. cit.* pag. 896.

et mechanicis nihil amplius addo, sed ad exponendum usum medicum transeo. Audiamus primo nonnulla virtutis variae, medicamento huic ab aliis Auctoribus adscriptae, elogia. DIOSCORIDES naphthae Babylonicae, quam aequae, ac Pissasphaltum et Asphaltum, ad bituminum classem retulit, bituminisque Babylonici destillationem esse dixit, magnam ad curandos morbos varios efficaciam tribuit: „Contra oculorum suffusiones, *sic sese versio dictorum latina habet* (d), et „albugines efficax est. Potest omne bitumen inflammaciones arcere: glutinat, discutit, molli, facit ad muliebrium locorum in foeminis „strangulationes et procidentias: in quem usum „apponitur, suffitur et olfactandum naribus ad „movetur. Suffitu idem comitiales quo lapis „gagates modo deprehendit. Bibitur ciendis „mensibus cum vino et castoreo utiliter. Prodest diutinis tussibus, spiritus angustiiis, suspiriis, serpentium moribus, coxendicis et lateris doloribus. Datur deglutiendum coeliacis, et ad dissolviendum concretum sanguinem utiliter bibitur. Clystere infunditur contra intestinorum tormina cum ptisana liquefactum. A capite in subiectas partes destillationes suffitu „sanat, et dentium dolorem circumlitum mitigat etc., FRANCISCUS ARIOSTVS adhuc longius laudando progressus est, et montis Cibirii oleum in epilepsia, paralyti, defluxionibus catarrhalibus, tussi, asthma, frigiditate stomachi, adfectibus flatulentis, colica, passione iliaca, colluvie primae culinae verminosa, doloribus dorsi et articulorum arthriticis, doloribus vesicae, renum atque matricis, in dysuria itemque,

(d) *Lib. de Mat. medica, p. m. 103.*

que, stranguria, suffocatione hysterica, febre quartana, ulceribus recentibus et antiquis, scabie ac pluribus morbis aliis eximias plane vires exerere, non adfirmavit tantum, sed specialibus quoque exemplis, in *Opusculo suo de Oleo Monzibinio* adductis, probare annisus est (e). FERNELIVS illud in epilepsia, spasmis, paralyssi, et adfectibus uteri frigidis laudat (f), et saepius allegatus RAMAZZINVS denique, qui in hac tamen parte encomiastes Ariosto longe moderatior est, usum olei montis Cibirii, tam internum, quam externum, in nervorum distentionibus, doloribus arthriticis, citra inflammationem saevientibus, nec minus in adfectibus hystericis, lumbricis, ulceribus inveteratis, et sicca imprimis scabie similibusque morbis cutaneis, valde proficuum existere, experientia iterata edoctus, testatur (g).

§. X.

Quod me attinet, adducta Scriptorum quorundam testimonia nec reiicere penitus, nec simpliciter etiam admittere audeo, sed cuncta, quae de usu petrolei ac viribus medicis in antecedentibus et alibi in publicis Medicorum monumentis dicta occurrunt, ad limites paullo arctiores ordinemque meliorem revocanda esse, arbitror. Petroleum enim, praesertim recentius atque subtilius candicans, elemento suo spirituosissimo valde adhuc turgidum, naturae admodum calidae
et

(e) Vid. BERNARD. RAMAZZINI *Opera*, pag. 322. *sequ.*

(f) In *Methodo medendi*, Lib. VII. p. m. 414.

(g) *L. cit.* pag. 357.

et magnae activitatis pharmacum est, quod interne sumtum, sanguinem, fluidum nerveum et quascunque corporis humores reliquos magnopere commovet, partem cruoris salino-oleoso-inflammabilem evolvit, expandit, et substantialiter auget, adeoque calorem mirifice intendit, putredinem porro non arcet solum, sed dudum quoque exortam rursus corrigit, laticem seroso-lymphaticum tenuiorem dissipat, spissiore atque coagulatum dissolvit et attenuat, partes solidas exsiccat, et singulari quodam stimulo, ad ardoris ideam apte fortassis referendo, ad contractiones et oscillationes velociores non minus, quam validiores incitat, et virtutem igitur diaphoreticam, diureticam atque tonicam, e quibus et praecedentibus reliquis, adhibita rationali interpretatione et adplicatione, vires antispasmodicae, pectorales, carminativae, stomachales, emmenagogae, antihystericae et traumaticae (h) derivari possunt, exerit. Vnde clare etiam patescere opinor, oleum hoc sub tempestivo ac congruo usu interno morbis multis ac variis valide mederi, sub intempestivo autem et incongruo magna aegrotantibus incommoda ac detrimenta-

(h) Viribus memoratis adhuc singularis virtus anthelmintica adiungi meretur. In Aegypto, referente *Dno. D. FRIDERICO HASSELQVIST*, Medici oleum hoc contra taenias imprimis, quae vermium species in intestinis incolarum crebro hospitatur, saepe saepius interne, cum eximio prorsus effectu, adhibent. Per triduum plerumque, Luna decrescente, illud ad guttas aliquot propinant, et deinde, dato laxante, vermem occisum frustulatum per alvum expellere student. Vid. *Itinerar. eius pag. 589. sequ.*

menta inferre posse. Pro meo igitur iudicio ad securiorem usum eius internum praecipue requiritur, ut parcius et pro una dosi ad pauciores tantummodo, quatuor nimirum, quinque, sex, septem, vel subinde etiam octo, novem ac decem guttulas, in vino, aut ptisana, infuso theiformi, iusculo etc. propinetur, et in iis duntaxat morbis, qui motuum languorem et partium solidarum humiditatem nimiam, laxitatem, flacciditatem, torpidamque contractionem, sanguinis itemque ac lymphae muciditatem atque lentorem, laticis serosi abundantiam, partium oleoso-inflammabilium in cruore penuriam atque depressionem, et obstructions vasorum, meatuum ac viscerum, a crassa ac copiosa impuritate pituitosa oriundas, vel putridulam humorum dyscrasiam, aut ulcerosam solidorum corruptionem absque febre et graviore inflammatione, vel mucidam quoque ac pravam saburram, in prima culina coacervatam, causas proximiores atque praecipuas agnoscunt, in usum trahitur.

§. XI.

Vsus petrolei externus in nostris regionibus interno longe quidem frequentior, intuitu aegritudinum tamen, quibus opitulatur aut opitulari creditur, non tam amplius reperitur. Vulgo a Scriptoribus, tanquam remedium efficax et rectificato succini oleo, cui natura simillimum est, nisi praeferendum, certe tamen aequiparandum, contra fordida ulcera antiqua et refractariam malignioremque scabiem siccam, contra frigidiore itemque adfectus arthriticos, paralyticos, oedematosos, et intestinorum flatulentos, contra spasmos et convulsiones, odontalgiam

giam porro, ventriculi imbecillitatem, coeliacam, procidentiam ani, fluorem album muliebrem, prolapsum uteri et vaginae, suppressionem fluxus menstrui et hysteralgiam suffocatoriam, immo ad scirrhi exquisiti augmentum impediendum, et, saeviente frigore hyemali, praesertim cum oleo terebinthinae aut raparum mixtum, ad avertendam novam pernionum exulcerationem commendatur, ac modo per se partibus affectis illinitur, aliove modo adplicatur, modo aliis linimentis, unguentis et emplastris maiori aut minori quantitate additur, vel in nonnullis etiam morbis, procidentia ani v. g. uteri et vaginae, fluore albo et suffocatione hysterica, candenti filici aut lateri infusum, sub forma suffimigii adhibetur, quin naribus in lipothymia et suffocatione hysterica solius odoratus gratia admovetur, et subinde etiam in coeliaca ad guttas aliquot clysteribus additur. Haud levi caeteroquin cautione circa externum quoque usum eius, praesertim in scabie, tumore membrorum oedematoso, doloribus articulorum arthriticis et paralyti, opus est; dum saepe omnino metuendum est, ne igneo stimulo suo, quem partibus inunctis imprimit, motum tonicum fibrarum in adfectibus prioribus, in scabie nimirum, oedemate et arthritide, invertat, et perniciosum materiae subsistentis regressum ad interiora suscitet, vel nimium quoque exsiccando partis paralyticae ariduram et rigiditatem articuli tumidi atque dolentis in arthritide augeat, aut dudum in hac posteriori praesentem inflammationem valde intendat, quin nondum exortae occasionem largiatur.

CAP. LXVIII.

*De Pissasphalto, Asphalto et Mumia
minerali Persica.*

§. I.

PISSASPHALTUM, *Pittasphaltum*, quod alii etiam *Picem mineralem*, nec non *Malcham*, *Berg-Theer*, vocant, est substantia bituminosa spissiuscula, tenax, mediae inter petroleum et bitumen solidum consistentiae, coloris rufi aut nigri, odoris balsamico-bituminosi. Picem liquidam (*Theer*) toto habitu externo valde aemulatur, calore tamen facile liquidius redditur, frigore autem condensatur, et, flamma admota, promte accenditur. Spissiore consistentiam suam, qua sola sese ab oleo terrae, seu subnigra aut rufo-nigricante petrolei specie nonnihil distinguit, procul dubio a partibus terreis accipit, quae petroleo in locis subterraneis paullo largius admistae fuerunt; unde copiosum quoque densumque fumum atrum sub deflagratione eructat, et post eam aliquam cineris terrestres partem relinquit.

§. II.

In variis regionibus e rupibus stillat, vel hinc inde etiam tardiori flumine e terra emergit, et magna imprimis copia in *Avernia*, Galliae provincia, et in agro Romano prope vicum *Castro*, colligitur. Si recens est, non spernendam resolvendi ac maturandi virtutem obtinet, et a nonnullis igitur ad anthraces et bubones maturandos, tumores resolvendos, dolorem ischiadicum et catarrhales affectus discutiendos, et partes

partes luxatas post repositionem denuo roborandas, externe adhibetur (i), immo cadaverum quoque pollincturae impendi potest.

§. III.

Nobilior quoque, spissior ac sensim paullo indurefcens Pissasphalti species sic dicta MUMIA MINERALIS PERSICA esse videtur, cuius KAEMPFERVS sequentem nobis descriptionem dedit: „Est nostra, *inquit* (k), quam inducimus, Mumia, succus bituminosus, ex petrosa montis superficie exsudans; foeda sutoriae picis facie, colore, densitate, et quodammodo quasi lentore; recens dum rupi adhaeret ea liquidiior: ad calorem tractabilis est, olei gaudens consortio, aquae misturam respuens, inodorus prorsus et Aegyptiacae Mumiae substantia persimilis. Carboni iniectus sulphuris spirat graveolentiam, ex Naphtha nonnihil attenuatam, naribus non omnino molestam; odore affini, quem vel Naphtha arida, vel Asphaltus, vel Veterum Mumia Aegyptiaca, addo, vel Ambra nigra suffumigando spirant etc. Diversae bonitatis reperitur, et a Persis proinde in *primariam* et *secundariam* distinguitur: Illa, quae ob parciorem proventum suum et praestantiam unice ad aulam Regiam defertur, et rarissime igitur ad gentes externas pervenit (l), in

Cc 2 angu-

(i) Conf. GEOFFROY *Tract. de Materia medica* Tom. I. pag. 159.

(k) *L. cit. pag. 517. sequ.*

(l) Mumiam hanc mineralem Persicam adhuc hodie ab Aegyptiis usui medico-chirurgico identidem

angusta quadam caverna, in provincia *Daraab*, unius diaetae intervallo ab urbe *Dara*, sub praerupti Caucasii montis radice, in petram, putei instar, ad geminae circiter orgyiae profunditatem, demissa, colligitur; haec vero inter *Laram Darabumque* urbes in eodem montium tractu sparsim e rupibus exsudat et a lateribus earum praeruptis, quibus ob lentorem atque tenacitatem facile adhaerescit, abraditur.

§. IV.

dem impendi, FRIDERICVS HASSELQVIST testatur; probabile tamen mihi videtur, non primariam, sed, ob causam supra indicatam, solummodo secundariam ad illos transferri. Descriptio caeteroquin Auctoris allegati cum KEMPERIANA huius Mumiae descriptione quoad potiora convenit: „Mumiae mineralis nomine, „in *Itinerario suo, vers. Germ. pag. 574. scribit*, „in Aegypto venit massa quadam bituminosa, „splendens, nitida, sub dentibus friabilis, atra, „tere inodora. Ex Persia provenit. Pretiosissima est, quippe quae in Aegypto venditur 3 a 2 „usque ad 4 vel 5 nummis aureis (*Sequin*), prout „rara vel bona est; ambra grysea longe carior, „hinc a magnatibus Aegypti et totius Turciae, inter reliqua eorum reponitur cimelia. — — — „Mumiae vero nostrae mineralis usus est, ut perhibetur, traumaticus. Si experientia respondet „narrationi Aegyptiorum, summum quidem hoc „erit vulnerarium, hucusque a mortalibus detectum. Faciunt vero unguentum ex Mumia minerali pulverisata cum ol. olivarum rumpunt „crus gallinae et ligando unguentum applicant, si „vera sit mumia, intra trium horarum spatium crus „callo obducitur et sanatur, et hic quidem est modus

§. IV.

Mumia primaria, quae, affirmante Auctore laudato, vera atque nobilior Veterum Aegyptiorum et Arabum Mumia est, non tantum praestantissimam ad condienda defunctorum corpora materiam constituit, sed, propter eximiam quoque virtutem suam travmaticam inter efficacissima hominum vivorum medicamina militat. Si aliqua enim portio eius, cum sufficiente butyri quantitate liquata, interne, ad quatuor circiter, quinque, aut sex grana, una vice adsumitur, sanguinem, post contusiones aut casum ab alto extravasatum ac coagulatum, potenter resolvit, et mirifice pariter viscerum apostematibus atque ulceribus, ut et rupturis internis medetur. Parem, immo longe adhuc maiorem ac plane miraculosam efficaciam in luxationibus membrorum et ossium fracturis monstrat, quando

Cc 3

do

„dus examinandi dictam mumiam; quod si hoc
 „non edat specimen, vix ullius aestimatur. Ho-
 „minis vero os fractum intra XXIV. horarum spa-
 „tium sanum et integrum fieri debere eodem re-
 „medio, contendunt. Mumiam ipsam vidi, et
 „visam descripsi, experimenta vero facta non sub
 „oculis viderunt, ob caritatem ac raritatem reme-
 „dii: vidisse autem illa et obstupuisse mihi adseru-
 „erunt Chirurghi et Pharmacopoei Cairenses, quo-
 „rum probitas fidem illis adhibere suadet. Bitu-
 „minis certe est species, sed an ulla ex detectis,
 „haud facile dicam, si non prima LINNAEI S. N.
 „quae eadem est, ac naphtha Auct. Solis calore
 „indurata. *Mumiam mineralem* dicunt Aegyptii,
 „ob similitudinem exactam cum Massa illa, quae
 „ex cranio cadaverum conditorum corporum quo-
 „tidie in Aegypto eximitur etc. „

do usus externus interno iungitur, et unguentum, ex mumia cum butyro liquefacto, aut, secundum HASSELQVISTII relationem, cum oleo olivarum paratum, parva saltem quantitate membro luxato aut ossi fracto post reductionem decentem adplicatur. Mumia secundaria sive ignobilior iisdem quidem virtutibus pollet, in operando tamen praecedente multo segnior deprehenditur; quemadmodum plura de omnibus hisce apud KAEMPFERVM, qui ipse nativi huius balsami vires examini subiecit, videri possunt.

§. V.

A Pissasphalto BITVMEN IYDAICVM, *Asphaltum, Karabe Sodomae, Iuden-Pech*, consistentia saltem et largiori partium terrearum commixtione distinctum est. Substantiam enim sinit solidam, splendentem, fragilem, inflammabilem, coloris nigri, aut rufi, aut purpureo-nigrantis, odoris, praesertim si incalescit, aut igne liquatur, aut flamma admota accenditur, ingrati sulphureo-bituminosi. Optimum iudicatur purpureo-nigricans ac splendens, deterius sordide atque obscure nigrum. In regionibus variis, Transylvania v. g. Gallia, Helvetia, prope urbem Neocomium etc. e collibus eruitur, et maiori adhuc copia in Iudaea, ex mari mortuo seu lacu Asphaltite, et nonnullis pariter lacubus Sinensibus, quorum aquae post suum e fundo adscensum innatat, colligitur. Initio adhuc nonnihil molle ac lentum est, deinde autem magis magisque indurescit. Liquefactum aut pulverisatum cadaverum conditurae inservit, et emplastra etiam resolventia, roborantia ac glutinantia ingreditur.

CAP. LXIX.

De Succino et Ambra.

§. I.

SVCCINVM, *Bernstein, Agtstein*, est bitumen minerale, durum, splendens, nunc opacum, nunc plus minusve pellucidum, eminente vi electrica praeditum, coloris vel flavi aut flavescentis, vel albi, vel flavo-rubicundi, immo interdum, tametsi paullo rarius, subflavo-viridescens, odoris, si prunis iniicitur, aut panno saltem villoso etc. fortius affricatur, grati balsamici. Dicitur etiam *Carabe, Karabe, Electrum, Ambra citrina* etc.

§. II.

In variis quidem regionibus, Anglia nimirum, Polonia, Hungaria, Moravia, Bohemia, Italia, Silesia, Saxonia, Marchia Brandenburgica, nec minus circa mare Balthicum in Finnonia, Livonia, Curlandia, Holsatia, Dania, Suecia etc. maiora et minora succini frusta persaepe reperta fuerunt, immo hodiernum in tractibus arenosis subinde reperiuntur, aut fortuito etiam inter arandum ac fodiendum e terra eruuntur, nullibi tamen in recensitis telluris tractibus tanta copia occurrunt, ut pharmacopoei et artifices necessariam inde quantitatem petere possent, sed sola Prussia gentibus plerisque copiam desideratam largitur. Hic enim a piscatoribus e mari Balthico prope littora Sudavica singularibus rebus copiose extrahitur, partim etiam, postquam, borea aut zephyro flante, a commoti pelagi undis maior vel minor portio in littus eiecta fuit, ex arena colligitur, partim in Sam-

biae locis quibusdam, a mari magis minusve diffitis, e tellure, cuius viscera venae bituminosae succiniferae hinc inde perreptant, effoditur. In stratis sive venis hisce, quae ex arena, vitriolo martiali, aut eius tamen minera et nigra materia cespitosa-bituminosa, petroleo praegnan- te, lignumque fossile habitu externo atque forma aemulante, constant, illud quoque succinum, quod in fundo maris reperitur, suos natales habet, et inde saltem ab aqua marina, per subterraneos cuniculos intrante, eluitur: Hinc ratio quoque manifesta est, cur succinum maiori duntaxat copia prope littora obvium sit, in locis vero maris Balthici, a promontorio Sudavico, laudatisque venis succiniferis longius remotis, rarius inveniat.

§. III.

Ad naturalem succini mixtionem, sive album, sive aureum, flavescentem, flavo-subviridem, aut flavo-rubicundum, sive alium adhuc colorem (m) obtineat, semper *petroleum* et *acidum vitrioli*, vel, uti recentiorum nonnulli defendere sustinent (n), *acidum salis* concurrunt, ita tamen, ut parum quoque *terrae* et *aquae* in confor-

(m) Quamvis HARTMANNVS octoginta succini species, colore plus minusve distinctas, reperiri, in *Historia Succini Prussici* referat, certo tamen certius est, omnes ac singulas de albo, flavo, rubente et viridiusculo colore praecipue participare, et praedictam igitur varietatem a singulari saltem ac diversissima colorum memoratorum exaltatione atque miscela dependere.

(n) Vid. *Celeb. VOGELII Institut. Chemiae*, §. 625. pag. 307.

confortium recipiant. Petroleum, cuius color varius ex praecedentibus clare dudum innotuit, cum parte terrea basin praebet, et praecipuam diversi coloris rationem in se continet, acidum vero, sub halitus aut tenuis liquoris forma paulatim sese insinuans, massam terreo-oleosam in corpus solidum coagulat. Initio, hoc est, post primam coagulationem, frustra succini, quod variae observationes abunde comprobant, aliqua adhuc mollitie ac friabilitate gaudent, et in aqua demum marina, vel sensim quoque in ipsis stratis aut venis cespitoso-bituminosis perfecte indurescunt.

§. IV.

Laudata succini elementa quoad qualitatem et proportionem destillatione sicca facile demonstrantur. Quando succini enim portio in retortam vitream aut terream loricatam, carbonibus immediate imponendam, absque additamento immittitur, et ignis successive augetur, primo liquor spirituosus aqueo-acidulus cum oleo subtiliori, leviori, volatiliori, clariori, flavescente, deinde oleum rubicundum mediae consistentiae, tandemque crassius, gravius, fusco-nigricans prodeunt. Oleo maximam partem expulso, sal siccum, volatile, albicans, pingue, acidulum, adscendit, et collo retortae, partim etiam receptaculi lateribus, adhaerescit, ac nihil itaque, nisi pauca materia carbonaria terrestris, in retortae fundo remanet. Observante NEV-MANNO (o), libra una succini vulgaris duodecim fere uncias olei, unciam unam cum semisse phlegmatis, unciam unam capitis mortui terrestris, et quatuor circiter drachmas cum dimidia

C c 5

salis

(o) Vid. *Lect. eius de Succino.*

salis aciduli suppeditavit. Quicquid circa totum pondus deficit, procul dubio ad volatilia principia aqueo-salino-oleosa pertinet, ac partim per vaforum commissuras exhalando penetravit, partim in vasis, parietibus hinc inde adhaerescens, relictum fuit.

§. V.

Eximias plane vires nervinas, cephalicas, cardiacas et uterinas bituminosum hoc concretum in corpore humano exerere, et urinam quoque, foetum, et secundinas potenter pellere, Medicorum plerique haecenus crediderunt. Verum, si de succino, in substantia exhibito, sermo est, assensum meum simpliciter largiri nequeo, quoniam in ventriculo, etiamsi in tenerimum pulverem redactum sit, a liquore gastrico nunquam perfecte solvitur, sed modica saltem subtilioris ac volatilioris substantiae oleoso-spirituoso-inflammabilis odoratae portio extrahitur, partim etiam blando ventriculi calore expellitur, et in halitum activum tenerrimum mutatur. Pars rudior indissolubilis vasa bibula et lactea subire nequit, et necessario iterum cum excrementis alvinis excludi debet, pars resoluta autem atque halitiosa ad sanguinem quidem, tum filtrando, tum inhalando penetrat, ibidemque lenissimam commotionem ac discussionem praestat: An inde autem laudatae vires nervinae, cephalicae, cardiacae, diureticae, uterinae atque pellentes sufficienter deduci possint, iudicent sagaciores. Ego sane rationem sufficientem non invenio, et succinum itaque inter debilia ac parum activa nervina referendum esse, arbitror. Nolo tamen dicta ad tincturam extendere, quae mobilibus particulis oleoso-inflam-

flammabilibus largius impraegnata est, et vegetiorem omnino operationem exercet, praesertim cum activitas eius spiritus vini connubio ac simul inhaerente sale alcalico, quod plerumque sub extractione additur, haud parum intendatur. Externe succini integri usus maioris ferme momenti est, dum usitatissimum praestantissimumque suffimigiorum ingrediens constituit, quae contra aërem corruptum, dolores partium rheumaticos, catarrhos, tumores partium oedematosos, et frigida uteri vitia in auxilium vocantur.

§. VI.

Ad bituminum mineralium censum AMBRAM SOLIDAM quoque referre nullus dubito, etiam si Scriptorum aliqui de animali, alii de vegetabili eius origine tam multa ac varia tradiderint, ut numerosissimae inde hypotheses enatae fuerint (p). Pro meo iudicio Ambra, striete ita nuncupata, non genere, sed saltem specie a succino differt, et corpus sistit opacum, splendore destitutum, leve, siccum quidem ac fragile, contactu tamen nonnihil pingue, ad ignem facile liquefcens, totum fere inflammabile, in manu calida, cerae instar, mollescens, raro laevis, sed difformis plerumque superficiei, odoris suavissimi, saporis nullius singularis, coloris vel albi, vel grysei, vel flavescentis, cinereo-nigricantis, fusci, nigri aut variegati. Ambra grysea, praesertim striata, aut maculis albicantibus,

(p) Plura de diversis opinionibus, quae circa originem ac genesin Ambrae successive innotuerunt, in KLOBII *Ambrologia*, *Pharmacopoea Wirtenbergica*, et plenius adhuc in NEVMANNI *Lectione de Ambra* videri possunt.

tibus, vel flavescentibus vel nigricantibus donata, censetur optima, nigra vero et perfecte alba ignobilior existit (q). Subinde rostra et ungues avium, spinae piscium, aliaque heterogenea inhaerent, nec raro etiam frusta maiora et minora foris crusta nigricante obducta sunt.

§. VII.

Adfertur Ambra praecipue ex India orientali, ubi in variis oceani locis, maxime autem iuxta promontorium Comorinum, prope littora Aethiopiae et Iaponiae, circa Insulas Sumatram, Borneo, St. Laurentii, Mauritii et plerasque Moluccanas, a piscatoribus, nautis, aliisque ex aqua marina, cui per intervalla, praegressa imprimis forti pelagi agitatione, hinc inde frusta minora et maiora (r) innatant, extrahitur,

(q) „Ambrae, KAEMPFERVS in *Amoenit. exot.* pag. 633. scribit, ex venarum subterranearum „diversitate multa varietas est, et suis quaeque regionibus propria; adeo ut ex eius inspectione etiam natale littus, quo recepta sit, a gnaris cognosci possit; perinde ut exercitiores oenopoeae vini degustati provinciam indicant. Alia „enim bitumini crudiori, asphalti, vel naphthae „atrae exsiccatae similior est, adeoque nigrior, „densior, gravior, vel minus; alia ex nobiliorum „particularum admissione, candidior, carior, levior, vel minus; alia saepe fungosa admodum, ut „acutissimus *Scaliger*, Serapionem amplexus, Ambra non inepte pro fungo maris habuerit etc. „

(r) De grandioribus Ambrae frustis, quae aliquot libras, quin integrum centenarium etc. pependunt, NEVMANNVS L. cit. multa exempla specialia, ex aliorum scriptis collecta, attulit.

hitur, vel subinde etiam in littore, eiusdemque cavernis reperitur. Sensim frustra memorata e fundo maris, postquam a subterranea sua minera, undis imprimis vehementius saevientibus, violenter avulsa et abrepta fuerunt, ad superficiem adsurgunt, eorundemque alia in matrice sua dudum indurata prodeunt, alia, quod inhaerentia heterogenea, maxime autem spinae piscium et parva avium rostra satis testantur, aliquantulum adhuc mollia in aquam transferuntur. Orca, animal marinum ex piscium cetaceorum familia, ambrae frustra, aquae innatantia, per saepe deglutire, nec raro iterum evomere, aut per alvum reddere dicitur; hinc ambram quoque in folliculo seu cystide quadam ventriculi apud pisces hosce generari, multi, quamquam absque sufficienti ratione, crediderunt. Ambra caeteroquin, ab orca prius deglutita, ac denuo eiecta, vel etiam ex pisce occiso exempta, reliquis ambrae genuinae speciebus longe ignobilior est, quoniam odorem debiliorem, foetido peregrino mixtum, spirat, et rariorem praeterea friabilioremque texturam obtinet (s).

§. VIII.

(s) „Postremae notae, *sunt iterum verba* KÆM-
 „PFERIVS *l. cit. p. 635.* ea censetur ambra, quae
 „in intestinis balaenarum invenitur; virtute quip-
 „pe sua plurimum ibidem imminuta. *Mokos*, ce-
 „ti genus, trium, et ad summum quatuor orgyia-
 „rum longitudinis, circa Iaponiam capitur; cuius
 „intestina frequentissime ambram exhibent: estque
 „latentis nota, si intestinum solventibus illico oc-
 „currat grumosa, calcique similis materia. Fre-
 „quens est in Iaponia, quae in balaenae extis in-
 „venta, vel cum excrementis, dum viveret, in
 „mare

§. VIII.

Collectores et mercatores fraudulentī ambra genuinam, praesertim recentem, massae farinaceae instar molliusculam, variorum corporum miscela persaepe corrumpunt, vel plane spurium ex pice, cera, resina, storace, ladano, benzoe, succino, moscho, ligno aloes similibusque componunt, et ignaris seorsim pro vera vendere, vel genuinae tamen miscere haud erubescunt. Emtor itaque, si fraudes crassiores evitare velit, ad habitum externum, consistentiam, liquefendi promptitudinem, colorem, saporem et specificum imprimis odorem, quem ambra integra non minus, quam prunae aut metallo candefacto imposita, diffundit, probe attendere debet; suffitus enim adulteria optime detegit, reliqua criteria saepissime fallunt: „Non est melior, *crebro allegatus* KAEMPFERVS *l.c.* „pag. 635. *inquit*, bonitatis et constantior nota, „quam si candenti laminae eius granula aliquot „imponantur, quo ipso suffitus prodit adulterium et cineris paucitas bonitatem etc.,

§. IX.

Monstrante analysi chemica, ambra eadem quidem principia, quae succinum, possidet, circa proportionem tamen discriminis quidquam observatur, oleumque comparative maiori, terra ex adverso longe minori quantitate mixtionem ingreditur. HERM. NICOLAUS GRIMMVS, in India orientali tunc temporis degens, aliquando unciam unam ambrae gryseae destillationi

„mare egesta fuit; unde vulgari lingua Iapones „ambra appellat *Kusura no fun*, i. e. stercus „balaenarum etc.,

tioni siccae subiecit, indeque, igne gradatim aucto, primo *liquorem aqueum*, deinde *liquidum spirituosum* et *oleum* prodiisse, tandemque pauxillum *salis sicci* sublimatum fuisse, testatur. Producta haec perfecte cum succini dissoluti productis conveniebant, praeterquam, quod oleum paullo gratiorem odorem diffunderet. Residuum picem habitu externo referebat, et plures sine dubio partes volatiles oleoso-salinas reddidisset, si adhibito intensiori ignis gradu, destillatio diutius protracta fuisset. Ambra grysea enim paucissimas saltem partes terreas continet, et quoad totam ferme molem in phlegma, oleum et sal volatile acidulum resolvi potest; quemadmodum hoc NEVMANNVS expertus est (t), cum unicam ambrae gryseae drachmam simili modo destillaret, et adaequatum in fine ignis gradum adhiberet. Obtinuit enim scrupulos duo cum dimidio olei, grana quinque aquae, grana duo salis aciduli volatilis et unicum solummodo granum materiae siccae, pulverulentae, terrestres. Bina grana, quae deficiunt, sine dubio invisibili exhalatione consumpta fuerunt. Sal siccum volatile, praesertim si parva ambrae quantitas destillationi subiicitur, non semper seorsim in conspectum venit, sed, penitus translatum, phlegmati immergitur et maiorem illi acorem conciliat.

§. X.

Quando ambra cum aqua simplici digeritur, vel plane coquitur, nonnihil quidem, resinae instar, liquefcere incipit, solutionem tamen respuit, et aquam suavi duntaxat odore imbuit. In spiritu vini rectificatissimo pariter, tam puro, quam


(t) L. cit. pag. 1419.

quam tartarifato, nunquam penitus, blanda solummodo digestionem in auxilium vocata, dissolvitur, sed modica saltem portio, quae menstruo fragrantiam debilemque saporem balsamicum communicat, extrahitur: Sin coctio autem protractior, optime in cucurbita, alembico testata, peragenda, accedit, et menstruum praeterea nonnihil simul oleosum adhibetur, tota ferme solvitur, et tincturam valde activam largitur.

§. XI.

Liquido ex praedictis patescere arbitror, quod in ventriculo nulla plenaria ambrae, in substantia adsumtae, solutio, sed aliqua tantum, longe tamen copiosior, quam apud succinum, partium subtiliorum extractio contingat, et quod medica igitur activitas unice a separatis et extractis tenerioribus hisce particulis expectanda sit. Hae ipsae enim ob teneritudinem suam ac mobilitatem facile ad sanguinem trans-eunt, eundemque, ut et fluidum nerveum, blande agitant atque expandunt, motumque circula-rem vegetiorem reddunt, et generali hac operatione moderatas quasdam vires nervinas, cephalicas, cardiacas, analepticas, aphrodisiacas, aliasque, quae ambrae vulgo adscribuntur, omnino exerere valent. Succino in hoc passu praeferrere quidem meretur; cavendum tamen, ne vires eius ultra iustos activitatis terminos, uti fieri solet saepissime, extendantur. Sola interne praescribitur rarissime, sed aliis duntaxat medicamentis compositis, ad augendam magis, aut conciliandam odoris suavitatem, quam virtutem, refracta dosi additur. Tinctura frequentiore fere usum invenit, et maiorem quoque effectum edit, praesertim si solutis et extractis particulis largius impraegnata sit.

SECTIO



SECTIO XV.

DE

AMARICANTIBVS, AVSTERIVSCVLIS, BLANDE BALSAMICIS, ACRIVSCVLIS, SVBDVLCIBVS, TERREO - AVT MUCILAGINEO - SVBADSTRINGENTIBVS, ALIISQVE, SAPORE MIXTO DONATIS.

CAP. I.

De Natura, Differentia atque Virtute diversorum horum Simplicium in genere.

§. I.

Simplicia huius Sectionis, specialius in sequentibus describenda, odore et sapore plus minusve ab invicem distincta inveniuntur, ac iure igitur sub diversis classibus collocanda sunt. Sapor quippe, qui primum hoc loco differentiae fundamentum suppeditat, in aliis *amaricans*, immo in quibusdam *satis amarus*, in aliis *austerus* vel *austeriusculus*, in aliis *blande balsamicus*, et in aliis denique *subdulcis*, vel *acriusculus*, vel *terreo - aut mucilagineo - subadstringens*, rarissime tamen purus ac solitarius, sed alio aliisque saporibus, v. g. praedominans amarus aut amaricans *salso*, vel *austeriusculo*, *subacri*, *subdulci*, *balsamico*

mico etc. *austerus* et *austeriusculus amaro* aut *amaricante*, vel *balsamico*, *acriusculo*, *subdulci* etc. magis minusve remixtus est. Nonnulla eorum, quod diffiteri nequeo, ad amara quidem, austera et balsamica, in praecedentibus pertractata, referri potuissent: Verum enim vero, quum odor balsamicus in nonnullis longe remissior, in aliis fugacissimus existat, et sapor amarus etiam atque austerus in plerisque, quae illum possident, vel admodum debilis, vel alio, uti dictum, sapore valde remixtus inveniatur, seiungere illa, et seorsim in hac Sectione describere, consultius duxi.

§. II.

Principia fixa, *resinosa*, *gummea*, aut *mucilaginea*, quibus *insipida* et *inodora subadstringentia* praedita sunt, plerumque valde terrea et inertia reperiuntur; hinc gustus quoque et olfactus organis non adeo singularem sensum post separationem imprimere multo minus eminentem in corpore humano mutationem producere valent. *Austeriuscula* et *amaricantia* quoad partes activas cum austeris et amaris fortioribus conveniunt; quare repetere hoc loco, quae alibi sufficienter de iis dicta fuerunt, supervacaneum iudico: Sufficiat adiecisse, haec, cum saporis sint debilioris, minorem principii primarii quantitatem in mixtione reconditam gerere, vel illud tamen, si sit resinoso-gummeum, siue gummeo-resinosum, longe remissioris indolis existere. Eadem propemodum de *austeriusculo-amaricantibus*, *amaro-austeris*, tum inodoris, tum simul odoratis balsamicis, dicenda erunt. Inodora enim sola principia fixa gummeo-resinosa, aut resinoso-gummea, vel resinoso-gummeo-terrea, speci-

specificè tamen distincta, fœvent; odorata autem, licet parum vel nihil olei substantialis ætherei, recepta etiam notabili quantitate, sub destillatione humida reddant, tenerrimum tamen, mobilissimum, fugacissimumque principium balsamicum cum aqua transmittunt, et decoctum, in cucurbita aut vesica relictum, fixis partibus, tam gummosae, quam resinosae indolis, adeo imprægnant, ut similis conditionis extracta inde blanda evaporatione parari queant. Nonnulla etiam inter ea occurrunt, quae *sale quodam salso* modice instructa sunt.

§. III.

Insipida terreo-resinosa et terreo-resinosogummea, lenissime saltem, austeriuscula, pure talia, paullo fortius partes corporis solidas constringunt, et aliquantulum proinde, maiori nimirum vel minori adstrictione mediante, flacciditatem earum corrigunt, adeoque roborant paullulum, vim contractilem ipsamque contractionem, absque humorum exagitatione, augent, leniterque urinam pellunt: Hinc iure inter blanda traumatica, diuretica, et tonica referuntur, et in variis itaque morbis, qui mitiora roborantia et adstringentia postulant, non sine fructu adhibentur. Eximiam quoque opem subinde in ulceribus ac vulneribus consolidandis, nec non sanguine congrumato et diabete, ferunt.

§. IV.

Ab hisce plus minusve, respectu videlicet virium medicarum, austeriusculo-amaricantia, tum inodora, tum simul odorata balsamica, distincta inveniuntur. Propter amaritem enim atque volatilis principii miscelam simul blande ab-

stergunt, discutiunt, lenissimam diaphoresin atque diuresin movent, tutius ac certius roborant, et plus igitur ad humores purificandos, quam mere austeriuscula, valent; praesertim cum virtus adstrictoria valde moderata sit, ac sese in recessu demum nonnihil manifestet.

§. V.

Vires non contemnendas in genere exerere creduntur in coryza, febre catarrhali, adfectibus pectoris, tussi v. g. asthma, phthisi incipiente, rauedine, nec minus in sanguinis ac lymphae impuritate, variisque inde propullulantibus adfectibus scabiosis, rhevmaticis, arthriticis, catarrhalibus, obstructionibus viscerum chronicis, suppressione consuetarum se- et excretionum, doloribus variarum partium, calculo, dysuria, ischuria, cephalalgia, febribus continuis, praesertim malignis, et sic porro. Nonnulla quoque eorum, licet sanguini purificando parum caeteroquin inserviant, egregie ac plane specificae, uti v. g. cortex Peruvianus, febres intermittentes, praesertim refractarias quartanas, fugant; immo quaedam, temperata nimirum balsamica, quae, ob principii austeriusculi absentiam, nullum plane adstrictionis effectum edunt, potentius paullo humores, interveniente leni diaphoresi atque diuresi, heterogeneis quisquiliis liberant, et auxilium ideo in scabiosis potissimum, venereis, similibusque adfectibus ferunt; quemadmodum plura de singulis hisce in statim subsequente tractatione speciali videnda sunt.

CAP. II.

De Radicibus Paeoniae et Nymphaeae.

§. I.

RADIX PÆONIAE MARIS FOLIO NIGRICANTE SPLENDIDO C. B. tuberosa ac crassa est, foris subfusca, intus pallida, versus peripheriam tamen venulis rufescentibus passim distincta, saporis post exsiccationem mucilagineo-terrei, lenissimeque in recessu adstringentis, odoris nullius. Recentissime effossa saporem debilem subdulcem, lenissima acredine mixtum, et parum quoque odoris obtinet. Planta apud nos solummodo in hortis colitur, et radices tempore vernali, antequam germina protrudant, effodiuntur.

§. II.

Praeter rudiores partes terreas et solubilia principia terreo-resinoso-mucilaginea, nihil amplius singulare in radice exsiccata demonstrari potest, nullamque ideo rationem solidam invenio, cur multi Medicorum huic simplici vaporosum pariter principium activum adscripserint, indeque virtutes varias derivare ausi fuerint. Vires sane, quas exerit, unice a memoratis principiis fixis, maxime autem a resinoso, dependent, etiamsi in hisce etiam non adeo magna activitas, quod examina probant, delitescat. Nam infusum aquosum primum, obscure fuscum, odore ferme destituitur, et inertis saltem sapore nauseoso gaudet. Extractum inspissatum, cuius drachmas duas et aliquot grana ex uncia radices una impetravi, deterioris fere conditionis est, nec ullum odorem ac saporem memorandum

olfactus gustusque organis imprimit. Tinctura spirituosa prima colorem pallide flavescentem obtinet, odore solum vini spiritum prodit, et sapore acriusculo donata est; quae acredo tamen magis a menstruo, quam soluta substantia resinosa, derivanda est, quod clarius postea ex flavo extracto inspissato cognoscere licet: Hoc quippe non amplius acrem, sed debilem amaricantem et satis adstringentem saporem austriusculum possidet, debilemque odorem balsamicum spirat. Vncia radice mihi binas ferme drachmas suppeditavit.

§. III.

Nonnihil haec radix partes corporis solidas roborat et adstringit, adeoque locum omnino inter blanda nervina, antepileptica, antispasmodica, et lenissima styptica, utiliter interdum aperitivis, incidentibus, abstergentibus ac discutientibus, in vasorum ac viscerum obstructionibus, haemorrhagiis exorbitantibus, variisque profluviiis ferosis, diabete v. g. vomitu, diarrhoeis, gonorrhoea benigna etc. refracta dosi addenda, tueri potest. Probabile praeterea est, subtilem terram farinaceam, si in pulvere nempe propinatur, praeternaturale ventriculi acidum paullulum extinguere, et hac quoque ratione aliquid ad curationem epilepsiae infantilis, ex acriori primae culinae acido saepissime oriundae, conferre. Optime in pulvere, a granis aliquot ad scrupulum integrum, nec minus in infuso vinoso, a scrupulo uno ad drachmam unam, exhibetur; infusa eius aquosa autem et sic dicta *Faecula*, quae in Officinis prostat, nullius ferme utilitatis sunt.

§. IV.

§. IV.

RADIX NYMPHAEAE, tam LVTEAE, quam ALBAE, MAIORIS C. B. *Seeblumen - Wurzel*, crassa est, fungosa, levis, foris partim flavescent, partim subfusca, intus pallida, odoris nullius, saporis terreo - subadstringentis, et in recessu quoque lenissime amaricantis. Planta in lacubus, piscinis et fluviis rivulisque lente decurrentibus crescit, ac flores magnos rosaceos, luteos vel candidos, profert; radicem descriptam tamen saepius Nymphaea flore albo, quam luteo, Pharmacopoeis largitur, licet utrique, intuitu naturae ac virium, nihil plane discriminis intercedat.

§. V.

De volatili sale alcalico, quod porosae et laxae huius radice substantiae inhaerere PAVLVS HERMANNVS retulit (a), multa dicere superfedeo, dum imaginarium hoc loco principium est, nec unquam in hac radice demonstrari potest. Probandi quidem sine praecipitationem allegat, quam radix pulverisata in acidis solutionibus praestare consuevit: Verum fallaciam hic circa causam committi, certo certius est. Non salinae enim particulae alcalinae, sed terreae, quas solvens acidum promte adgreditur, molecularum antea solutarum secessum atque descensum efficiunt. Suffragatur mihi STAHLIVS, quando de simili plantarum subadstringentium etc. effectu ita scribit (b): „In plantis traumaticis adstringentibus, plantagine, D d 4 „sym-

(a) L. cit. pag. 68.

(b) In Fundament. Chemiae dogmatico - experimentalis, pag. 86.

„symphyto, et consolidis etc. sal alcalinum
„subtile agnoscunt autores, quia talia decocta
„solutiones metallorum, cum acidis factas, in
„specie Mercurium sublimatum, aqua calida in
„liquorem redactum, praecipitant. Suo interim
„loco relinquendum, an non potius subtilissima
„terrea adstringentium similium portio hoc per-
„agat, nihil contribuyente salina eorundem, nisi
„ut terram sibi antea combinatam potentiori aci-
„do passive relinquat etc.„

§. VI.

Partibus terrestribus rudioribus ac prorsus inertibus solubilis quaedam *substantia resinogummea*, quae subtiliores moleculas terreas in arctius consortium recepit, mixta reperitur; portio mere gummea tamen parum activa existit, et sola igitur resinosa praecipuam virtutis rationem in se continet. Nam flavum infusum aquosum primum vappidum est ac nauseosum, nullumque singularem saporem et odorem possidet. Materia quoque, sub digestionem magis minusve soluta, nunquam tota per chartam bibulam transit, sed aequae, ac apud infusum aquosum radicis poeoniae, praeter rudiores partes terreas, crassa mucilago albicans in filtro remanet. Solutio filtrata et inspissata massam relinquit flavo-fuscam, quae, una radicis uncia extractioni adhibita, duas ferme drachmas pendet, et valde debilem solummodo saporem subsalsum et subamaricantem linguae imprimit. Tinctura spirituoza prima dilute aurei coloris est, odoris nullius singularis, debilisque saporis subacris. Evaporata extractum foeneratur flavo-subfuscum, quod debilem odorem emittit, et saporem subsalfo-amarum ac lenissime adstringentem obti-

obtinet. A simili igitur radicis poeoniae extracto paullulum differt, quippe quod magis austerrum, minus amarum deprehenditur.

§. VII.

Blande hoc simplex abstergit, leniterque roborat et adstringit, adeoque in iisdem affectibus, in quibus poeoniae radix commendata fuit, auxilium spondet, si nimirum in infuso vinoso, a drachma una ad unciam dimidiam, praescribitur. Nonnulli radicem hanc antacida etiam atque temperante virtute praeditam esse, et nimias vigilias specificè compescere, perhibent: Verum hae vires imaginariae sunt, nec solidum in principiis activis fundamentum inveniunt.

CAP. III.

De Radicibus Rubiae Tinctorum et Anchusae.

§. I.

RADIX RUBIAE TINCTORVM SATIVAE C. B. *Färberröthe-Wurzel*, oblonga est, tenuis, intus et extus fusco-rubicunda, saporis terreo-subadstringentis, odoris nullius. Planta, ob frequentem radicis usum apud tinctores, in regionibus variis, maxime autem in Silesia et Belgio, studiose in agris colitur. Radix recens, praeter saporem terreo-adstringentem, debilem quoque subdulcem et subamaricantem possidet, qui amplius tamen in siccata et aliquamdiu adservata vix, aut ne vix, sentitur.

§. II.

Volatilibus principiis penitus destituitur, et *fixa* tantum terreo-resinoso-gummea in mixtione
D d 5 foveat.

fovet. Activitas ad utramque substantiam fixam, magis tamen ad terreo-resinosam, quam gummeam, redit. Infusum aquosum primum rubro-nigricantis coloris est, ac nullo singulari sapore, nulloque, nisi debili saltem nauseoso, odore pollet. Sub evaporatione odor paullo fortior evadit, et nauseosus in blande balsamicum mutatur. Inspissata massa subrubro-nigricans debilem odorem balsamicum non amplius emit, saporem tamen terreo-salsum, subadstringente nonnihil mixtum, obtinet. Tinctura spirituosae prima, saturata et elegantissima rubedine sese commendat, et evaporata extractum relinquit coloris flavo-et rubro-subfusci, odoris nullius singularis, saporis subadstringentis et lenissime simul amaricantis. Ex uncia una radice duas circiter drachmas extracti primi aquosi, et quatuor scrupulos totidemque grana extracti primi spirituosi impetravi.

§. III.

Vulgo haec radix quinque radicibus aperientibus minoribus adnumeratur, viresque eidem potentes in sanguine congrumato, vulneribus, oppilatione renum viscerumque reliquorum tribuuntur. Verum, si dicere licet, quid ipse sentiam, Scriptores de viribus memoratis hyperbolice locutos esse, pronuncio. Concedo quidem, principia huius radice solubilia ad minutissima vasa sanguifera et lymphatica penetrare (c), et aliquam virtutem aperitivam, travi-

(c) Eminentem hanc penetrandi facultatem *color ruber* probat, quem radix pulverisata, nec minus decoctum et extracta eius, farinae, furfuribus, aliis-

maticam ac forsan etiam diureticam et antiputredinosam in corpore edere posse, memoratas tamen vires potentes existere, analysi chemica et ipsa observatione practica aliter edoctus, nego. Tota certe huius radicis actio ad debilem quandam abstersionem et adstrictionem redundat, indeque auctior solidorum contractio, cum subsequente blanda humorum resolutione, vegetiori circuitu, et paullo largiori lotii in renibus fetet excretionem, unice derivanda est. Datur in decocto aquoso et adhuc melius in infuso vinoso, a drachma una ad unciam dimidiam, nec raro etiam, quamquam minus apte, pulveribus additur. Externe decocta et unguenta vulnerariae et adstringentis virtutis ingreditur.

§. IV.

RADIX ANCHUSAE OFFIC. five ALCANNAE SPURIAE, oblonga est, nunc tenuis, nunc mediocriter crassa, intus lignosa et alba, foris fusco-rubescens, odoris nullius, saporis terreo-subadstringentis. Planta, quam C. BAVHINVS *Anchusam floribus puniceis*, IOH. BAVHINVS *Anchusam Monspeliacam*, et TOVRNEFORTIVS *Anchusam vulgatiorem* vocant, in Italia, Gallia, Silesia etc. crescit, et ab *Alcanna vera*, quae Indiae orientalis, Aegypti ac Syriae incola est, et WALTHERO *Athenna* sive *Henna Arabum*, C.

BAV-

aliisque pabuli speciebus mixta, ac porcis, catulis, gallinis, columbis etc. per aliquod tempus crebro et copiose ad devorandum oblata, ossibus inducunt; quemadmodum plura de hisce in IOH. BENI. BOEHMERI *Dissert. de Radicis Rubiae tinctorum effectibus in corpore animali*, 1751. Lipsiae habita, videri poterunt.

BAVHINO *Ligustrum Aegyptiacum latifolium*, et
LINNAEO *Laesonia ramus inermibus* audit, di-
stincta est.

§. V.

Interior Anchusae substantiae lignosa plane
iners deprehenditur, solusque cortex tingendi
facultatem ac vires medicas obtinet; hinc poste-
rior ordinario etiam detrahitur et seorsim in
usum vocatur. Gaudet *principiis fixis*, tam *re-
sinosis*, quam *gummeis*, quae, confirmante extra-
ctione, eiusdem ferme virtutis sunt. Extractum
aquosum primum, cuius tres ferme drachmas ex
una corticis uncia impetravi, coloris rubro-fusci
est, saporis in principio subdulcis, deinde acri-
usculi et subadstringentis, odoris nullius singu-
laris. Extractum spirituosum primum, cuius
pondus, recepta vix memorata corticis quanti-
tate, circiter ad scrupulos quatuor et aliquot
grana adscendebat, rancidum unguentum quo-
dammodo redolet, et saporem subdulcem, ama-
ricante atque austeriusculo remixtum, colorem-
que rufo-subfuscum possidet. Tinctura spiri-
tuosa adhuc liquida, quod addere placet, satu-
rata et elegantissima rubedine oculis blanditur,
quae postea tamen in extracto valde minuitur.

§. VI.

Respectu virium medicarum cum radice ru-
biae tinctorum maximam partem convenit, su-
amque operationem blande adstringendo, abster-
gendo, immo aliquantulum demulcendo absol-
vit, et cum maiori fortassis emolumento, quam
illa, in suppressione urinae, obstructionibus vis-
cerum chronicis, ex partium solidarum atonia
potissimum promanantibus, nec minus in hae-
mor-

morrhagiis immodicis et variis profluviis serosis, quoties nempe subadstringentia tuto admittuntur, in usum vocari potest. Interne in decocto aquoso et infuso vinoso, a drachma una ad unciam dimidiam et ultra, exhibetur. Externe unguentis, quae contra sanguinem congruatum, contusiones, casum ab alto etc. commendantur, per saepe additur.

§. VII.

Radici Anchusae seu Alcan-nae spuriae RADIX ALCANNAE VERAЕ quoad naturam ac vires medicas analoga est, rarissime tamen ad nos deferitur; in regionibus orientalibus autem inter cosmetica militat, et creberrime ab incolarum plerisque, aequae ac folia plantae (d), ad ungues fulvo colore tingendas adhibetur.

CAP.

(d) „Folia, Doct. FRIDERICVS HASSELQVIST „in Itinerario suo, vers. Germ. pag. 503. scribit, „in pulverem subtilissimum redacta, in aquam fermentem infunduntur, ea quantitate, ut fiat pasta, „quae alligatur unguibus manuum et plantis pedum, et per noctem integram manet, color inde efficitur fulvus, qui orientalibus populis in „dictis partibus in deliciis est. Durat color per „tres vel quatuor septimanas, antequam illum renovare opus est. Vfus in Aegypto adeo antiquus, ut ungues Mumiarum eodem tinctas ob- „servaverim. Ingenti copia ex Aegypto quotannis portatur pulvis, ut divitiae appellari possit „possessio plantae. Nomen Arab. *Chenna.* „

CAP. IV.

De Contrayerva et radice Caryophyllatae.

§. I.

CONTRAYERVA OFFIC. quam alii etiam *Radicem yervam*, i. e. contra venena, *Radicem bezoardicam*, *alexipharmacam*, *Cyperum longum* *odorum Peruanum* etc. *Peruanische Gift-Wurzel*, vocant, radix oblonga est, tenuis, nodoso-fibrosa, foris subflavo - aut subsusco-rubescens, intus albicans, odoris debilis aromatici, saporis acriusculo - subadstringentis. Planta in nonnullis regni Peruani tractibus praecipue crescit, et LINNAEO *Dorstenia scapis radicatis*, C. BAVHINO autem *Cyperus odoratus Peruanus* dicitur.

§. II.

Principium volatile balsamicum in radice siccata et diutius adservata nulla consideratione dignum est, sed activitatis ratio unice ad *substantiam gummeo-resinosam* redit, ita tamen, ut resinosa longe iterum gummosae praefenda sit. Fuscum enim infusum aquosum primum odorem nauseosum spirat, et debilem solummodo saporem amaricantem, lenissima ac vix sensibili acredine mixtum, possidet. In extractio fusco-nigricante amarities, quod utique mirandum, vix amplius sentitur, pungens vero acredo fortior existit. Tinctura spirituosa prima solum vini spiritum odore prodit, et amaricante ac satis acri pungente sapore, quo radicem pimpinellae aut pyrethri quodammodo aemulatur, pollet. Ardens ac morsicans haec acrimonia in massa spissata potentior evadit, et haec ideo extractum aquosum in hoc passu notabiliter superat.

§. III.

§. III.

Blande abstergendo leniterque irritando operationem suam exercet, et specificè imprimis a Scriptoribus medicis in febribus malignis pestilentialibus, purpuratis, petechialibus, variolosis etc. ad exanthemata expellenda, commendatur: An vero etiam, uti vulgo creditur, contra palpitationem cordis, dolores pleuriticos, melancholiam, febres intermittentes, dysenteriam, vermes intestinorum, philtrea ac varia venena multum valeat, iuste dubito. Recipitur inter pulveres et tincturas alexipharmacæ virtutis, et per se quoque in infuso vinoso, ad unam alteramve drachmam, præscribi potest.

§. IV.

RADIX CARYOPHYLLATAE OFFIC. sive VULGARIS C. B. *Benedikten- oder Naegelin-Wurzel*, minimi plerumque digiti crassitie est, multasque fibras tenues emittit, quibus maior virtus, quam trunco sive capiti, ingenita reperitur. Colorem foris nigricantem, intus rubescentem, possidet, et manducata linguae saporem terreo-austerum adstringentem, naribus, præsertim in tractibus calidioribus nata, aut contusa, odorem gratum caryophyllaeum imprimit. Planta passim sponte crescit, et loca imprimis humida atque umbrosa amat.

§. V.

Nonnulli huic radici et contrayervæ maximam quoad principia similitudinem intercedere, arbitrantur; sed falsum hoc esse, analysis chemica docet. Prior enim, præter subtile et parcissime inhaerens principium odoratum oleoso-spirituosum, fixam substantiam resinoso-gummeam ter-

terreo - austeram ac satis adstringentem, posterior autem subacrem ac leniter amaricantem continet. Infusum aquosum primum (loquor nunc de sola radice caryophyllatae) coloris flavo - et rubro - subfusci est, odoris grati caryophyllaei, saporis balsamico - austeriusculi. Similis conditionis spissatum quoque extractum existit, praeterquam quod odor debilior, quam in infuso, sapor vero austerus fortior deprehendatur. Tinctura spiritiuosa prima colore saturate aureo et sapore pariter balsamico - austeriusculo pollet, odore autem magis spiritum vini, quam radicem, prodit. Massa spissata, quae subfuscum colorem obtinet, sapore austero ac simul leniter balsamico lenissimeque amaricante gaudet, et odorem caryophyllaeum, quem spiritus vini in tinctura quasi occultaverat, fortius iterum spirat. Substantia gummea resinofam quantitate superat, et ex uncia radice una ad quatuor circiter aut quinque scrupulos pondere adscendit.

§. VI.

Parcissimum principium oleoso - spirituosum balsamicum sub operatione in corpore non adeo singularem considerationem meretur, sed praecipua virium ratio ad fixas partes terreo - resinoso - gummeas, quae solida satis valide adstringunt et hac constrictione roborant, referenda est. Specialius igitur haec radix in morbis singulis, qui proxime ex tunicarum, membranarum etc. flacciditate nascuntur, prodesse consuevit, multumque etiam ad ulcera ac vulnera consolidanda, profluvia itemque serosa sistenda et haemorrhagias cohibendas valet: An vero, quod multi tamen credunt, in arthriticis pariter
ac

ac convulsivis adfectibus, nec minus in febribus malignis singulare auxilium ferat, experientia nondum fatis probatum esse, arbitror. Interne in infuso vinoso, aut, quod perinde videtur, in decocto aquoso, ad unam alteramve drachmam praescribitur. Externe decoctis traumaticis et stypticis additur, vel pulverisata, depurandi ac consolidandi scopo, ulceribus cacoëthicis inspergitur.

CAP. V.

De radicibus Bardanae, Taraxaci et Tussilaginis.

§. I.

RADIX BARDANAE MAIORIS OFFIC. sive LAPPAE MAIORIS C. B. *grosse Kletten-Wurzel*, oblonga est, crassa, foris nigricans, intus alba, saporis subdulcis, modice amaricantis et lenissime simul adstringentis, odoris nullius. Planta hinc inde circa vias, sepimenta, aedificia etc. copiose crescit, et in solo sicciori ac macriori laeta imprimis incrementa capit.

§. II.

Principiis activis mere fixis, pluribus tamen *gummeis*, quam *resinosis*, gaudet. Vna quippe uncia mihi quinque ferme scrupulos extracti primi aquosi, et quinquaginta circiter grana extracti primi spirituosii suppeditavit. Extractum subluteo - fuscum aquosum odorem debilem balsamicum, fere instar panis melliti, spirat, ac saporem subsalsum, subdulci et subadstringente nonnihil mixtum, possidet. Tinctura spirituosa prima colore dilute aureo est, odore nauseoso, sapore subacri ingrato. Massa inspissata flavo-

subfusca quoad odorem cum tinctura convenit, et sapore subsalfo, leniter amaricante ac subadstringente pollet.

§. III.

Vires medicae, quod examina docent, ad utrumque principium redeunt, et leniter abstergentes, resolventes, roborantes ac diureticae sunt. Specialiorem igitur usum, sub decocti nimirum aquosi, aut infusi vinosi forma, ad unam alteramve drachmam, immo unciam praescripta, in morbis singulis invenit, qui mitiora remedia postulant, et valde imprimis in adfectibus arthriticis, rhevmaticis, nephriticis, scabiosis, scorbuticis et venereis commendatur, sanguinemque congrumatum praeterea dissolvere dicitur. Plerique sudoriferam quoque virtutem illi tribuunt, de qua tamen paullo aliter sentio, eamque non adeo singularem esse arbitror. Commode radici sarsaparillae substitui potest, quoniam eadem praestat, immo maiorem, quam illa, in depurandis humoribus effectum edit.

§. IV.

RADIX TARAXACI OFFIC. oblonga est, ramosa, digiti minimi crassitie, foris subfusca, intus pallida, saporis amaricantis leniterque adstringentis, odoris nullius singularis. Planta, CASP. BAVHINO *Dens leonis latiore folio* dicta, ubivis obvia est, et aequae, ac radix recens, succo lacteo turget.

§. V.

A praecedente natura, principiis activis et virtute parum differt. Substantia gummea enim, aqua simplici extracta et evaporatione postmodum

dum condensata, massam fusco-nigricantem exhibet, odore debili balsamico, quasi melleo, et sapore degustationis initio subdulci, postea satis amaricante praeditam. Flavo-fuscum extractum spirituosum primum cum aquoso maximam partem convenit, praeterquam, quod sapor subdulci et amaricanti adhuc lenissime adstringens sociatus reperiatur. Si radix bonae notae est, et integra eius uncia utrique extractioni impenditur, pondus extracti aquosi primi ad binas ferme drachmas, resinosi magis seu spirituosi autem ad unam circiter drachmam adscendit.

§. VI.

Militat inter mitiora aperitiva, diuretica et purificantia, quae operationem suam blande abstergendo leniterque adstringendo ac roborando absolvunt: Vnde protinus quoque constat, quod ab usu eius interno in obstructionibus viscerum, ictero, calculo, nephritide sabuloso-pituitosa, tussi mucida, asthma, scorbuto, caeterisque adfectibus chronicis, sub Bardanae descriptione pridem recensitis, auxilium non plane spernendum expectandum sit. Datur, ut praecedens, in infuso et decocto.

§. VII.

Descriptis Bardanae et Taraxaci radicibus
RADICEM TVSSILAGINIS VVLGARIS C. B.
Huflattich-Wurzel, quae tenuis est, longa, pallida, odoris nullius, saporis mucilagineo-subadstringentis ac debilis balsamici, nullus dubito adiungere. Tanta enim sub exploratione principiorum chemica inter hanc et taraxaci radicem, intuitu odoris, saporis ac virium, similitudo deprehenditur, ut practico alteram in locum alte-

rius tuto ac citra ullam deliberationem surrogare liceat. Scio quidem, Medicorum plerosque radici tussilaginis maiorem virtutem demulcentem, adeoque maiorem quoque atque specificam virtutem in morbis pectoris, tussi v. g. phthisi, etc. adscribere; at scio etiam, specificam hanc praerogativam nullius momenti esse, et taraxaci radicem in memoratis aliisque pectoris adfectibus idem praestare auxilium. Frequentius in decocto, cum aqua, lacte, cerevisia, aut vino parando, quam in infuso praescribitur, et dosi quoque ultra unciam adscendere potest.

CAP. VI.

De radice Vincetoxici et Pareira Brava.

§. I.

RADIX VINCETOXICI OFF. *Schwalbenkraut-Wurzel*, ex communi capitulo multas fibras tenues, sive radículas minores emittit, quae intus candido, foris pallide flavescente aut subfusco colore gaudent, et saporem subdulcem, acriusculo et amaricante mixtum, debilemque praeterea ac nauseosum odorem balsamicum possident. Planta in locis sylvestribus crescit, et a C. BAVHINO *Asclepias flore albo*, et ab aliis etiam *Hirundinaria* appellatur.

§. II.

Partes oleoso-spirituosae balsamicae valde exigua quantitate mixtionem ingrediuntur, fixae resinoso-gummeae autem copiosius inhaerent, et praecipuas huic radici vires largiuntur. Ex uncia radicis una duas ferme drachmas extracti aquosi

aquosi primi, et drachmam circiter unam extracti spirituosi primi impetravi. Infusum aquosum pallide flavesceus paullulumque turbidum est, et odorem nauseosum similemque saporem subdulcem, acriusculo nonnihil remixtum, obtinet. Sub evaporatione satis fortem, eumque initio nauseosum, postea gratum balsamicum, odorem emittit, et, plene tandem planeque inspissatum, massam suppeditat fuscam, odore debili et panis melliti instar satis grato, et sapore balsamico-subdulci, lenissimeque in recessu amaricante, praeditam. Tinctura spirituosa dilute aurea naribus debilem odorem nauseosum, linguae balsamico-subacrem saporem imprimit, et evaporata extractum relinquit flavo-rufescens, odoris debilis nonnihil ingrati, saporis balsamico-subdulcis et in recessu acriusculo-amaricantis. Docent haec examina, utramque substantiam fixam existere quidem activam, resinofam tamen gummeae nonnihil praeferendam esse. Particulae volatiles oleoso-spirituosae humidae destillationis beneficio facile separantur, in molem tamen conspicuam congregari nequeunt; hinc easdem quoque ex aquae destillatae fragrantia magis suspicari, quam demonstrare licet.

§. III.

Inter blanda stimulantia, resolventia, diaphoretica, diuretica, anticatarrhalia, et bezoardica haec radix collocatur, et singularem imprimis efficaciam in tumoribus glandularum, scrophulis, adfectibus mucidis, hydrope, obstructione viscerum, nephritide sabuloso-pituitosa, cachexia et chronica mensium suppressione ostendere creditur. Datur interne a drachma una ad unciam semissem in decocto aquoso et vinoso, nec

raro etiam pulveribus additur. Externe lavamenta vulneraria et gargarismata, contra anginam spuriam, paralyfin linguae, et tumores glandularum salivalium adhibenda, ingreditur.

§. IV.

RADIX PAREIRAE BRAVAE, magna, crassa et lignosa est, colore foris ferrugineo-nigricante, intus subluteo, sapore dulcamaro, odore nullo. Pareira brava nomen Lusitanicum est, ac Vitem sylvestrem denotat. Planta enim, quae passim in Brasilia et Mexico nascitur, vitis instar scandens atque volubilis est, et Brasiliensibus *Caapeba*, PLUMERIO *Clematis baccifera glabra et villosa, rotundo et umbilicato folio*, et RAI O *Convolvulus Brasilianus, flore octopetalo, monococcos* audit.

§. V.

Nulla principia activa volatilia possidet, sed vires eius unice a *fixa substantia resinoso-gummea* deducendae sunt. Infusum aquosum primum colore dilute aurantio est, et saporem quidem amaricantem, nullum vero odorem memorabilem obtinet. Post inspissationem odore penitus destituitur, et saporis amaricanti debilis dulcedo admixta sentitur. Tinctura spirituosa prima, saturate fusca, solum menstruum redolet, et saporem, ex acri, amaricante et subdulci mixtum, gustus organo imprimit. Evaporatione peracta, sapor in fusco-nigricante massa spissata aliquantulum mutatus et sub degustationis initio subadstringens et amaricans, postea vero subdulcisprehenditur. Satis interea ex descriptis examinibus constat, quod virtus quaedam principio utrique, maior tamen resinoso, quam gummeo, ingenita sit.

§. VI.

§. VI.

In principio de eximia ac valde potenti huius radicis virtute diuretica et lithontriptica multus ubique fermo fuit; verum, quum Medici circumspecti postea observarent, vires elogio longe inferiores esse, rariusque, vel nunquam, effectum voto ac spei perfecte respondere, fama sensim rursus decrevit. Nostra aetate Medici rationales blandas duntaxat vires abstergentes, aperitivas ac diureticas huic simplici tribuunt, idemque proinde in cachexia, ictero, hydrope, suppressione urinae, nephritide pituitoso-fabulosa et adfectibus scorbuticis, rheumaticis et arthriticis aliquid auxilii praestare posse credunt. Plerumque sub forma pulveris, a drachma dimidia ad integram, in vehiculo vinoso exhibetur, vel vino etiam aut aqua fervente, recepta tamen maiori quantitate, infunditur.

CAP. VII.

De radicibus Chinae et Sarsaparillae.

§. I.

RADIX CHINA seu rectius CHINAE OFFIC. *Pocken - oder Schweifs - Wurzel*, crassa est, tuberosa, inaequalis, texturae lignoso-farinaeae, coloris intus pallide rubescentis, foris rufi vel fusci, aut ferrugineo nigricantis, saporis terrei inertis, odoris nullius. Adfertur ex India orientali et occidentali, et ideo etiam in *orientalem* sive *Chinam veram*, quae melior iudicatur, et *occidentalem* sive *Pseudochinam*, quae ignobilior existit, dividitur. Planta, ex orientali progerminans, in China potissimum et Iapo-

nia crescit, et a KAEMPFERO, qui cunctas eius partes adcurate et prolixè descripsit (e), *Smilax minus spinosa, fructu rotundo, radice virtuosa, Chinae dicta*, adpellatur. Occidentalis vero in Nova Hispania, Peru, Virginia et Insula Iamaica gignitur, et planta C. BAVHINO *China spuria nodosa*, SLOANIO *Smilax aspera, fructu nigro, radice nodosa, magna, laevi, farinacea* audit.

§. II.

Facile haec radix, sive ex orientali, sive occidentali India allata fuerit, cariola redditur; quare homines quoque fraudulentum in Hollandia lacunas sensim natas massa quadam, ex tragacantha, bolo etc. composita, replent, coloremque nativum alia mixtura tingente restitunt; quod mangonium tamen aegrotantibus interdum valde nocivum evadere potest, quoniam, NEVMANNO suspicante (f), massae memoratae, ad pondus augendum, nonnunquam lithargyrium miscetur.

§. III.

In naturali mixtione eius nullae partes spirituosae, nullumque sal explicitum, quod HERMANNVS tamen adesse credidit (g), sed fixa tan-

(e) In *Amoenit. exot. Fasc. V. pag. 781. sequ.*

(f) *L. cit. pag. 776.*

(g) „Sarsaparillae, in *Cynos. Mat. med. p. m. 41.*
 „inquit, et chinae effectus probat sal blandum,
 „quod in farinacea sarsaparillae substantia et in
 „substantia Chinae nonnihil resinosa latet, et in
 „utriusque radice decocto manifeste se prodit.
 „Hoc cum tenuissimarum partium et sanguini
 „nostro naturali valde analogum sit, salia seu
 „spiri-

tantum ac valde iners *substantia resinoso-gummea*, copiosae *terrae teneriori* ac quasi *farinaceae* immersa, demonstrari potest. Substantiam fixam, praesertim gummosam, iure inertem voco, quoniam, confirmante analysi chemica, in infuso et extracto utroque nullus odor ac sapor singularis reperitur. Infusum aquosum quippe, licet rubro colore tinctum sit, nauseosum saltem ac vix sensibilem odorem balsamicum spirat, vappidumque saporem, instar aquae simplicis tepidae, possidet. Inspissatum extractum fusco-rubicundum deterioris ferme conditionis est, et odore non minus, quam sapore destituitur. Tinctura spirituosa prima, quae aureo colore gaudet, et itidem insipida penitus atque inodora est, evaporata flavo-rubescentem massam relinquit, in qua levia tantum odoris et saporis balsamici nauseosi vestigia notantur. Vncia radice una circiter scrupulos quinque extracti spirituosi primi, totidemque drachmas extracti aquosi primi praebuit.

§. IV.

Ingreditur haec radix notissima decocta et essentiam lignorum, sanguinemque ac lympham, propter imaginariam quandam virtutem diaphoreticam et diureticam, egregie depurare, adeoque in lue venerea, adfectibus scabiosis, scorbuto, aliisque morbis, ex humorum impuritate nascentibus, specificè prodesse, vulgo creditur:

E e 5

Ve-

„spiritus non tantum exaltat, sed et acida quaevis,
 „pertinacissime etiam remotissimis partibus inhae-
 „rentia, a quibus lues venerea, arthritis, scorbutus,
 „atrophia, phthisis, alique morbi oriuntur, in-
 „fringit, et cum blanda vi anodyna per diapho-
 „resin expellit etc.,

Verum, pro mea sententia, ratione non minus, quam experientia suffulta, nullius ferme usus est, et rectius inertibus, quam activis, medicamentis simplicibus adnumeratur. Effectus enim, a parcissimo principio volatili balsamico expectandus, tam exiguus existit, ut hunc et vulgaria virtutis elogia nulla plane proportio intercedat.

§. V.

RADIX SARSAPARILLAE sive SASSAPARILLAE OFFIC. quae Chinae radici sub usu medico plerumque iungitur, longa est, sarmentosa, rugosa, fractu tenax, calami crassitie, colore foris flavescente, vel subfusco, vel luteo- aut fusco-rubescente, intus candido, odore et sapore nullo, nisi debili farinaceo. Planta in Brasilia, Peru, Nova Hispania, Virginia ac pluribus Americae locis adolescere consuevit, et C. BAVHINO *Smilax aspera Peruviana S. Sarsaparilla*, LINNAEO autem *Smilax caule aculeato-angulato, foliis inermibus, ovatis, retuso-mucronatis* dicitur. Eligenda est radix recentior, fractu difficilis ac foris subfusca, reiicienda pulverulenta, cariota, fragilis, coloris fusci obscurioris, aut nigricantis.

§. VI.

Principiis parum quoque activis haec radix donata est, paullo potentiora tamen, quam praecedens, continet, et *resinosa* imprimis *substantia* debiles illi vires medicas, quas subinde monstrat, largiri videtur. Nam obscure rubrum extractum spirituosum primum, e rubella tinctura evaporando paratum, odore pruna cocta aemulatur, et amaricantem, balsamicum nauseosum atque subacrem saporem linguae imprimit.

primit. Sapor subacris in recessu demum sese manifestat, et fauces atque palatum aliquamdiu afficit, amaricans remissior est, et balsamicus denique lenissimus deprehenditur. In infuso et extracto aquoso primo nihil ferme virtutis latet, et utrumque sapore notabili destituitur, odoremque saltem nauseosum spirat. Vncia radice una mihi duas circiter drachmas extracti aquosi, ac totidem fere scrupulos extracti spirituosius dedit.

§. VII.

Lenissime duntaxat abstergendo ac stimulando operatur, et fortem ideo sudorem pellere nequit, Mirandum igitur, quod Medici hactenus parum activam hanc radicem inter praestantiora diaphoretica et purificantia collocaverint, eidemque specificas ac plane eximias vires in lue venerea, scabie, similibusque adfectibus, ex lymphae atque cruoris vitio oriundis, adscripserint. Radicibus bardanae, taraxaci, similibusque, nisi postponi, certe tamen non praeferrri meretur, et commode proinde cum Chinae radice ex Officinis exulare posset, praesertim, cum multae radices indigenae, utrique virtute pares, immo superiores, longeque minori pretio comparandae, substitui queant. Eodem caeteroquin modo, quo Chinae radix, interne adhibetur.

CAP. VIII.

De radicibus Apii palustris et Petroselini.

§. I.

RADIX APII PALVSTRIS C. B. *Wasser Eppich-Wurzel*, capite donata est oblongo, pollicaris plerumque crassitie, quod multas, longas
ac

ac rectas fibras, sive radículas tenuiores emittit. Colore, truncus aequae, ac fibrae, foris subluteo-albicante, intus candido, odore balsamico, et sapore subdulci acriusculo gaudent. Planta loca umbrosa, humida, palustria, amat, ac passim quoque in hortis colitur. Radix posterioris multis tutior videtur, quoniam cum specie quadam venenata, uti cum sylvestri nonnunquam evenisse traditur, confundi nequit.

§. II.

Oleo essentiali caret, et fixam solummodo *substantiam resinoso-gummeam*, odoratis *particulis spirituosis* modice impraegnata, in mixtione fovet. Portio gummosa in uncia radice ultra drachmas tres pondere adscendit, resinosa autem circiter drachmam unam et aliquot grana pendet. Infusum aquosum, quod colore pallide flavescente, odore nauseoso et sapore subdulci gaudet, post evaporationem massam relinquit luteo-subfuscam, debili odore balsamico, et dulci sapore donatam. Tinctura spirituosae prima flavescent ac parum odorata saporem subacrem, valde debili balsamico remixtum, obtinet, et inspissata extractum largitur itidem subflavum, odoris balsamici, saporis subdulcis ac leniter quoque balsamici, non amplius tamen, sicuti antea in tinctura, acriusculi. Patet inde, virtutem huius radice in utraque substantia fixa residere, et ad augmentum eius aliquid pariter principium acriusculo balsamicum volatile, quod sub evaporatione tamen maximam partem in auras dispergitur, conferre.

§. III.

A Medicis circumspiciis nunquam haec radix, nisi debite prius siccata, in usum internum

voca-

vocatur, quoniam tenerrimum principium exhalabile cerebro et nervis quodammodo inimicum creditur. Actionem suam blande abstergendo, demulcendo, lenissimeque discutiendo exercet, ac dudum proinde inter pectoralia, lenia aperitiva, diuretica et uterina locum adeptam est. Pertinet ad quinque radices aperientes, et in hydrope imprimis, obstructione hepatis, lienis ac mesenterii, nec minus in urinae suppressione et tumore mammarum, subinde post infantum ablationem nascente, specialius prodesse, gravidis autem et epilepticis nocere dicitur; quod postremum tamen magis de radice recenti, quam siccata, intelligendum erit. Interne sub forma decocti aquosi, aut infusi vinosi, a drachma una ad duas, exhibetur; externe autem, praesertim recens ac grossiuscule contusa, aut conquassata, inter epithemata, mammis induratis, aut lacte nimium turgidis, itemque scroto, praesente hydrocele et hydrope ipsius scroti, imponenda, recipitur.

§. IV.

Ab Apii radice notissima PETROSELINI VULGARIS RADIX parum differt, et in casu igitur quocunque eidem substitui potest; nostra tamen aetate magis inter esculenta ac condimenta ciborum, quam medicamenta, stricte talia, militat.

CAP. IX.

De radice Scorzonerae.

§. I.

RADIX SCORZONERAE OFFIC. sive Scorzonerae latifoliae sinuatae C. B. Spanische Haber-Wurzel, oblonga est, nunc digiti minimi, nunc
saltem

faltim calami scriptorii crassitie, colore foris pallido aut ferrugineo, intus albo, sapore subdulci mucilagineo - farinaceo, odore nullo. Planta apud nos in hortis colitur, in Hispania autem sponte in locis campestribus et sylvestribus cre-
scit; hinc vulgo etiam *Scorzonera Hispanica* appellatur. Radix recentissime effossa succo subdulci lacteo turget, qui sensim exsiccatur, et temporis progressu lenissimum saporem amari-
cantem nanciscitur. Facile praeterea cariosa evadit, quare semper recentiore, reiecta prorsus exesa vetustiori, ad usum feligere praestat.

§. II.

Recentior, integra, ac debite exsiccata, copioso *subdulci ac temperatissimo principio fixo*, tam *resinoso*, quam *farinaceo-mucilagineo* donata est; portio farinaceo - gummea tamen seu mucilaginea copia, saporis dulcedine, ac nutriendi facultate resinosae aliquantulum praepollet. Extractum enim aquosum primum, cuius quinque propemodum drachmas ex una radice uncia impetravi, contactu valde unguinosum est, coloris fusci, odoris debilis, et grati ac panis melliti instar subdulcis, saporis mucilaginei; extractum spirituosum vero saltem drachmas duas totidemque scrupulos pendebat, et saporem subdulcem, blando balsamico lenissime mixtum, linguae imprimebat.

§. III.

Inter alimenta non minus, quam medicamenta, analeptica, demulcentia ac temperantia sibi locum vindicat, et in hectica imprimis, phthisi pulmonali, tussi acri falsa, erosionem partium internarum, dysenteria, calculo, dysuria, febribus arden-

ardentibus, et affectibus scabiosis, rhevmaticis, arthriticis atque scorbuticis, singulisque morbis reliquis, ex humorum acrimonia oriundis, utilissima deprehenditur. In scriptis plerisque etiam virtus eius alexipharmaca valde laudatur; ast penitus hanc imaginariam esse, nec solide unquam e principiorum natura explicari posse, credo. Praescribitur in decocto aqueo a drachmis duabus ad unciam dimidiam, et saepe etiam iusculis ac carnibus additur. In Officinis quoque *radix condita* prostat.

CAP. X.

De radice Saponariae.

§. I.

RADIX SAPONARIAE OFFIC. longa, tenuis ac ramoso-fibrosa est, coloris extus spadiceus, intus albi, saporis debilis acriusculi, odoris nullius. Planta, inde emergens, in Germania caeterisque Europae regionibus sponte in locis humidiusculis ac herbidis, maxime autem iuxta rivulos amnesque, nec non in salicetis crescit, et hinc inde etiam in hortis colitur. IOH. BAVHINVS eam *Saponariam vulgarem*, C. BAVHINVS *Saponariam maiorem laevem*, LINNAEVS *Saponariam calycibus cylindricis, foliis ovato-lanceolatis*, et alii quoque *Struthium*. *Herbam fullonum*, *Lychnidem fulloniam* et *lanariam* vocant: „Saponaria, BOECLERVS scribit (h), appellatur, „quod Saponis instar spumeat, σπερδιον, STRUTHIVM a verbo σπενδιρεσαι, quod graecis est „lanas purgare et candidas facere. LANARIA, „quod

(h) In *Cynos. Materiae medicae*, Tom. II. Part. I. Cap. VI. pag. 472.

„quod ea mediante mudentur Lanae, LYCHNIS
„SAPONARIA dicta, LYCHNIS FVLLONIA,
„HERBA FVLLONVM, *Seiffen-Kraut*, *Wasch-*
„*Kraut*, ab extergendi facultate, qua Saponis
„ritu pannos eluit purgatque etc.,

§. II.

Multas haec radix *partes gummosas*, pauciores *resinosas* et paucissimas *mucilagineo-glutinosas* in mixtione sua fovet, nullo autem evidenti ac memorabili principio volatili donata est. Vtraque substantia fixa, gummea nimirum, promte atque perfecte in aqua sub coctione solubilis, et resinosa, valde activa est, posterior tamen priorem acredine nonnihil superat. Infusum aquosum primum coloris aurei et odoris nauseosi est, ac degustatum initio saporem subdulcem ingratum et lenissime amaricantem, deinde vero subtilem, mediocriter acrem, altius tamen penetrantem ac satis diu cum temperario incremento perseverantem, linguae imprimit. Extractum, inde evaporando paratum, subflavo-fuscum est, et debilem ac parum amicum odorem balsamicum emittit, non amplius tamen saporem amaricantem, qui in infuso aderat, obtinet, sed primum subdulci tantum et acriusculo, deinde acri fortiori ac valde penetrante praeditum reperitur, ita, ut, radicis pimpinellae recentioris, quin piperis propemodum instar, subtilis ac vividae puncturae et cuiusdam quasi ardoris sensum, per aliquot horae minuta in lingua, faucibus et palato excitet. Ex uncia radicis una drachmas tres et grana duodecim huius extracti obtinui. Tinctura spiritiuosa prima itidem aureo colore tincta cernitur, et saporem quoque ex subdulci acrem, cui initio tamen austeriusculi quidquam et amarican-

ricantis admixtum sentitur, possidet, nullum vero odorem, nisi solius spiritus vini, spirat. Acredo memorata in extracto subfusco auran-
tio, ac parum quoque odorato, notabiliter in-
crescit, ac multo maior, quam in extracto aquo-
so, deprehenditur, immo altius in fibrarum
nervearum aliarumque compagem penetrat, et
diutius illas ardore quodam atque subtili pun-
ctura adfligit. Inhaeret tamen radici resinosa
haec substantia longe minori quantitate, quam
gummea, et uncia igitur radicis una mihi solum-
modo drachmam unam et grana decem extracti
spirituosi primi dedit. Post filtrationem infusi,
tam aquosi, quam spirituosi, exigua quaedam
materiae cuiusdam mucilagineae portio in char-
ta bibula remanet. Substantia haec intuitu vi-
rium medicarum nullius quidem momenti esse
videtur, aliquam tamen hoc loco annotationem
meretur, quoniam inter principia radicis consti-
tutiva militat, nec in spiritu vini, nec aqua per-
fecte ac ita tenuiter solvitur, ut chartae bibulae
poros simul cum solutis reliquis principiis per-
meare queat.

§. III.

A principiis radicis, quod hic paucis inferere
expedit, fixa elementa foliorum valde quoad
saporem ac genium recedunt. Nam fuscum eo-
rum extractum aquosum odore suo rob sambuci
nonnihil aemulatur, ac satis forti sapore amaro,
cui nulla prorsus acredo sociata reperitur, gau-
det. Amarities haec nigricanti pariter, ac mel-
leo - ceracei odoris extracto spirituosum propria
est, paullo remissior tamen et cum aliqua, sen-
sim sub degustatione crescente, acredine mix-
ta deprehenditur. immo sapor amaricans in ni-

gricante extracto vinoso saponi subacido iunctus sentitur.

§. IV.

Speñat radix ad satis activa medicamenta attenuantia, aperitiva, diuretica, diaphoretica, sanguinem purificantia, emmenagoga et pectoralia, ac loco radicis sarsaparillae, quam virtute multum superat, in adfectibus venereis, scabiosis, scorbuticis, rhevmaticis, catarrhalibus et cachectico - oedematosis, nec minus in ischuria, dysuria, calculo, suppressione fluxus menstrui, fluore albo, tussi, asthma pituitoso, obstructionibus viscerum etc. cum fructu haud spernendo usurpari potest. Praescribitur interne in decocto aquoso, eoque nunc saturatiori, nunc diffusiori, et subinde etiam infusa theiformia ingreditur (i).

§. V.

De usu externo nihil singulare dicendum invenio, quoniam vires medicae, quae vulgo saponariae extrinsecus adhibitae a scriptoribus tribuuntur, non radici, sed foliis, quae testantibus examinibus expositis, amara, adeoque satis distincta, principia continent, et propter indolem saponaceam abstergerendi magis, quam irritandi virtute donata inveniuntur, praecipue competunt. „Decocta herba, BOECLERVS scribit (k), „optimum porrigit abstergens et exsiccans scabiem et ulcera; maculas quoque lividas et coe- „ru-

(1) Plura de Viribus et usu in *Dissertatione*, de hac Radice 1760. sub meo Praesidio habita, videri poterunt.

(k) *Lib. cit. Tom. III. pag. 473.*

„ruleas a contusione pellit, cosmeticumque prae-
 „bet remedium, ad nitorem cuti conciliandum.
 „Ptarmica quoque est, discutit tumores et ce-
 „phalalgiam sistit, in forma cataplasomatis adhi-
 „bita. Adhibetur ad saponem manuarios. Ra-
 „dix saponariae iuvare dicitur eos, quibus in
 „thorace et pulmonibus fistulae sunt, admota et
 „iniecta.,

CAP. XI.

De Radice Petasitidis et Cichorii.

§. I.

RADIX PETASITIDIS MAIORIS et VVLGA-
 RIS C. B. *Schweifs-Wurzel, Pestilenz-Wur-*
zel, vel mere fibrosa est, vel fibras tenuiores ex-
 tubere, digitum circiter crasso, emittit, et co-
 lorem foris subfuscum aut fuscum, intus album,
 odorem debilem specificum, ad balsamicum non-
 nihil accedentem, et saporem recens amarum,
 exsiccata acriusculo-amaricantem obtinet. Plan-
 ta in Germania nostra et plerisque reliquis Eu-
 ropae regionibus temperatis sponte nascitur.
 Amat loca humidiuscula ac paullulum paludosa,
 et initio veris ante foliorum eruptionem floret.

§. II.

Mixtionem eius naturalem *partes fixae gum-*
meae ac resinosae, nec non *volatiles* quaedam, quam-
 quam paucissimae, *oleoso-spirituosae* ingrediun-
 tur. Sub destillatione humida enim, recepta
 tamen maiori radice quantitate, aqua odorata
 in receptaculum transit, cui hinc inde exiguae
 moleculae oleosae, indolis aethereae, saporis
 acris et ardentis, odoris balsamici innatant.

Quantitas huius substantiae oleosae ad certum pondus revocari nequit, quoniam memoratae miculae aut guttulae pingues, ob valde exiguam copiam suam, ab aqua vix, aut ne vix, separari possunt. Principia activa fixa largius inhaerent, et ex uncia radice una circiter drachma una et scrupuli duo cum semisse extracti primi aquosi ac mere gummei, et drachma una extracti spirituosii primi magisque resinosi impetrantur. Infusum aquosum fusci coloris est, leniterque balsamicum atque radice specificum odorem spirat, et saporem amaricantem possidet. Extractum fusco-nigricans, inde evaporando paratum, debili quoque odore balsamico, et sapore, ex subdulci et amaricante quasi mixto, gaudet. Infusum spirituosum primum valde debili sapore balsamico, et specifico radice odore praeditum reperitur, ac post evaporationem extractum tenax ac glutinosum balsamico-amaricans relinquit (1).

§. III.

Olim haec radix, propter imaginariam magis, quam veram, virtutem alexipharmacam, a medicis magni aestimata fuit, nostra vero aetate paullo rarius in usum trahitur, et a iustis virium medicarum censoribus solummodo inter blanda attenuantia, aperitiva, diaphoretica, diuretica, sanguinemque purificantia collocatur. Conducit itaque in adfectibus catarrhalibus, rhevmaticis, arthriticis, scorbuticis ac scabiosis, nec minus in asthma pituitoso, obstructione viscerum,

ne-

(1) Plura de examine chemico huius radice in *Dn. Doct. BENI. CONSTANTINI MALSCH Diss. de Petasitide*, 1759. in nostra Vniversitate habita, dicta leguntur.

nephritide mucido-fabulosa, suppressione fluxus menstrui et fluore albo, immo in cachexia, leucophlegmatia, oedemate membrorum et lue venerea non contemnendum subinde auxilium ferre consuevit. Pro usu interno a drachma una ad plures in decocto aut infuso cum aqua, aut vino, aut aceto, praescribitur; infusum postremum tamen ante adsumptionem melle edulcorandum est.

§. IV.

Radici petasitidis RADIX CICHORII SYLVESTRIS sive OFFICINARVM C. B. *wilde Wegwart-Wurzel*, valde quidem analoga est, exsiccata tamen odore penitus caret, nec ulla igitur principia volatilia activa, sed *fixa* tantum *gummea* ac *resinosa* continet. Mitiolem, quam praecedens, in morbis recensitis operationem exercet, ac saepius hodie, quam illa, sub forma decocti aut infusi theiformis interne adhibetur. In Officinis etiam *Radix condita* prostat.

CAP. XII.

De Radicibus Gins-eng et Ninzin.

§. I.

RADICES GINS-ENG et NINZIN multa quidem quoad naturam, vires et usum, et nonnulla pariter quoad formam externam communia habent, respectu patriae nihilominus ac plantae, cuius partem constituunt, diversissimae sunt. Nam *Radix Ninzin*, alias etiam *Nindsin* et *Nisidita*, in Iaponia et peninsula Corea, Chinesium Imperatori tributaria, crescit, et planta inde emergens a KAEMPFFERO *Sisarum montanum*

Coraeense, radice non tuberosa, et a GRONOVIO *Sium folio infimo cordato, caulinis ternatis, omnibus crenatis*, appellatur; *Radix Gins-eng* vero, seu *Pe-Tsi Sinensium* in Tartaria orientali, et quibusdam Chinae provinciis, iisque magis borealibus, nec minus in regione novi orbis Canada habitat, et GRONOVIO atque LINNAEO *Panax foliis ternis quinatis*, P. LAFITEAU *Aureliana Canadensis*, *Sinensibus Gins-eng*, audit. In sylvis umbrosis Canadensibus posterior haec radix hinc inde per multos pridem annos tam copiose collecta fuit, ut a mercatoribus non tantum in Galliam aliasque regiones Europaeas, sed satis magna etiam quantitate et cum lucro memorabili in Chinam transvehi potuerit. Chineses initio statim radicem hanc Aurelianae Canadensis pro vera sua radice Ginseng agnoverunt, et eam proinde adhuc hodie coemere, solitoque usui impendere non dubitant (m).

§. II.

Radix Ninzin, secundum vix laudati KAEMPERI descriptionem (n), pastinacae quodammodo similis est, nunc simplex omnino, nunc inferne in duo crura divisa, triuncialis, digiti auricularis crassitie, fibris paucis capillata, carnosae, albida, ambientibus rimulis subtilissimis intercepta, odore pastinacae luteae, sapore sisari nostratis, cum minori tamen ac gratiori dulcedine, exigua ac fere imaginaria amaritudine temperata. Cum hac radice, uti antea pridem dictum fuit, *Radix Ginseng* quoad nonnulla quidem

(m) Vid. PETER KALMS *Reise nach America*, III. Theil, pag. 407.

(n) In *Amoenit. exot.* pag. 818.

dem convenit, quoad alia tamen notabiliter rursus ab illa discrepat. Pollicem nempe unum alterumve longa est, digito minimo crassitie nunc aequalis, nunc tenuior, nunc paullo crassior, leviter rugosa, nitida, et in parte infima nonnihil subinde diaphana, ut plurimum bifida, rarius multifida, inferne fibris tenuibus donata, habitu externo radicem petroselini, textura interna radicem paeoniae aemulans, colore foris rufescente, intus flavescente, odore haud ingrato aromatico, sapore acriusculo, subamaricante ac paululum pariter aromatico (o).

§. III.

Propter raritatem ac pretii magnitudinem radices hasce chemico examini nondum subieci, nec, alios quoque id fecisse, compertum habeo; hinc de principiis activis, quae maximam partem *resinoso-gummea* esse videntur, certiora tradere nequeo: Odore tamen ac sapore edoctus, credo, radicem Ginseng multo praestantiorum existere radice Ninzin, viresque medicas in hac posteriori unice nutrienti ac demulcenti substantiae fixae, in priori autem partim fixis, partim volatilibus, leniter aromatico-balsamicis, principiis, haud spernenda probabiliter abstergendi, discutiendi ac confortandi facultate praeditis, adscribendas esse.

§. IV.

Incolae Chinae, Iaponiae plurimumque Asiae regionum radicem utramque, maxime autem radicem Ginseng, cuius libra una in China tribus plerumque libris argenti venditur, tanti aesti-

F f 4

mant,

(o) Conf. GEOFFROY *Materia medica*, Tom. II. pag. 116.

mant, tantamque in virtute earum fiduciam collocant, ut illas in omnibus morbis, panaceae instar, adhibeant; quemadmodum haec ex sequenti enarratione virtutem radicis Ginseng, olim ex Iaponia transmissa et IACOBO BREYNIO a GOHLIO communicata (p), clarius patent: „Sanguinem, *sic verba sonant*, aquosum et tenuem mundificat, ac restituit in debitam consistentiam. Palpitationibus cordis et furiosis animi adfectibus medetur. Corrigit quaecunque aliorum Medicamentorum vitia et defectus. Exhilarat spiritus, cor et animum; vitam prolongat et conservat magis, quam ulla alia medicina. Cerebrum et memoriam confortat, caliginem oculorum discutit, omnia mala — — quin et illa quae ex nimia Venere exorta tollit. Sanguinem adauget, corporis lassitudines spontaneas adimit, Melancholiam corrigit, appetitum excitat, sudores promovet, vertigines et obtenebrationes visus tollit. Prodest Syncopticis, Lipothymicis, Paralyticis, Apoplecticis, Convulsis, Epilepticis, stupori et contractioni Nervorum etc. Stomachicis item et hepaticis et pneumonicis. Cutem mollem ac delicatam reddit, retorridam corporis siccitatem depellit, stomachum cibis repletum exinanit, vomitum compescit, phlegmaticos morbis sanat, febres domat, ut et stranguriam; sputum sanguinis sistit, ut et deiectiones alvi cruentas, parturientes roborat, tum in ipso partu, tum post partum. In summa pro summo habetur remedio, ad curandos et praefer-

„van-

(p) Vid. IOH. PHILIPPI BREYNIJ *Dissertat. botanico-medica de Radice Ginseng seu Nisi*, Cap. I. §. 7.

„vandos omnis generis morbos. Sumitur bis
 „aut ter de die particula ad pisi maioris magni-
 „tudinem etc.„ Elogia haec valde omnino ma-
 gna sunt; ast vera virtute longe procul dubio
 maiora. Nam, pro meo iudicio, radix Ninzin
 radici petroselini nostratis vix praeferenda vide-
 tur, et excellentiorem quoque radicem Ginseng,
 sublatis inveteratis opinionibus praeiudicatis,
 multum pariter de pristina fama sua amissuram
 esse, non sine ratione suspicor.

CAP. XIII.

*De Lichene Cinereo Terrestri et Musco
 Vulgari Clavato.*

§. I.

LICHEN CINEREVS TERRESTRIS RATT,
 quem TOVRNEFORTIVS *Lichenem pulmo-
 narium saxatilem, digitatum, maiorem, cinereum,*
 et LINNAEVS in Flora Suecica *Lichenem, folia-
 ceum, repentem, lobatum, obtusum, planum subtus
 venosum villosum, pelta marginali adscendente, ap-
 pellat,* in omnibus Europae regionibus nascitur.
 Amat loca umbrosa ac nemorosa humidiuscula,
 ibidemque, terrae proximus, circa radices at-
 que truncos arborum et passim quoque in erice-
 tis crescit. Toto quidem anno quaerentibus
 obvius est, tempore tamen pluvioso autumnali,
 magis dudum ad hyemem vergente, potissimum
 viget, adeoque tunc etiam praecipue colligen-
 dus, ac, debite prius ab adhaerentibus hetero-
 geneis purgatus, leniter statim siccandus est.

§. II.

Folia eius, dum tener est, parva sunt, deinde autem excrescunt ad longitudinem binorum ternorumve digitorum, cum latitudine unius, divisa in segmenta. Interdum sola, interdum sibi incumbentia inveniuntur. In extremitatibus emittunt parva, dura, oblonga, corpuscula, Botanicis *Peltae* dicta, quae sine dubio capsulae feminales sunt. Siccato folio cinereus color est, nigrior in superficie superiori, dilutior in inferiori. Observantur passim frequentes venae, a quibus albae fibrillulae in terram mittuntur, plantae radices (q). Quando hic lichen recens est, situm valde redolet, et hunc quoque odorem post perfectam exsiccationem nunquam penitus amittit. Sapor cum odore multa habet communia, et aequè propemodum, ac in vulgari fungo esculento, *Morchella* dicto, debilis putridulo - mucidus et lenissime in recessu acrisculus reperitur.

§. III.

Praeter copiosas partes terreas et vaporosum quoddam elementum putridulo - mucidum, fixa etiam principia resinosa ac gummea haec planta in naturali sua mixtione continet. Partes terreae inertes sunt, et nauseosum quoque principium putridulo - mucidum vaporosum, quod substantiae fixae, tam resinosae, quam gummeae, inhaeret, et cum simili vapore, quem in plerisque fungis, muscis, atque lichenibus, in solo humidiusculo atque umbroso crescentibus, deprehendimus, quoad naturam convenit, pro mea sententia nullam quoque singularem virtutem medicam.

(q) Conf. RICH. MEAD. *Oper. med.* Tom. II. Tent. 2. pag. 126.

dicam obtinet. Probabile praeterea est, non generari istud in ipsa planta, sed humori aqueo, ex terra humida, cui lichen spongiosus adnascitur, copiose intranti et putredinosa corruptela nonnihil depravato, suam genesin praecipue debere. Substantia gummea resinosa non copia tantum, sed paullulum quoque subtili ac quasi piperina acredine sua, adeoque etiam activitate medica superat. Infusum eius aquosum primum, quod aurantio colore est, valde nauseosum odorem putridulo-mucidum (*dumpfigt, schimlicht*) spirat, et gustus quoque organo similem saporem imprimit, cui debilis tamen acriusculus, non initio quidem, sed post moram aliquam perceptibilis, admixtus est. Odor ingratus sub blanda evaporatione multo adhuc fortior evadit, et inde igitur innotescere arbitror, nullam sub destillatione humida aquam aliam, nisi vappidam plane, inertem et insuavi tantum odore putridulo-mucido imbutam, in receptaculum transcendere posse. Evaporatione peracta, massa fusca seu brunneo-nigricans remanet, quae odore quidem nonnihil balsamico, est valde simul ingrato, et atriplicis foetidae aut vetustioris halecis mephitim aliquantulum aemulante, donata reperitur. Sapor eius initio dulcis, deinde autem amaricans atque subtiliter acris existit, ac fauces imprimis satis diu subtili altiusque penetrante et magis per aliquot fere minuta incremente, morsicatione sua ardore, piperis prope modum instar, adficit. Ex uncia lichenis siccati dimidia huius extracti drachmas duas obtinui.

§. IV.

Tinctura spirituosae prima colore pallide aureo gaudet, ac solum vini spiritum redolet. Sapor

por quoque nec ingratus initio est, nec mucidus, sed subtilis ac mediocriter acris, eidemque debilior mucidus sese demum post moram aliquam associat. Extractum inde paratum, quod, dimidia pariter lichenis uncia recepta, vix scrupulum unum pendet, flavo-subfusco colore tinctum est, et remissiorem in naribus odorem acrisculo-balsamicum ac quasi melleum, in lingua autem saporem modice acrem ac leniter amaricantem excitat. Acredo non tam fortis est, quam in extracto aquoso, nec tamdiu etiam post degustationem faucibus inhaeret. Corpuscula salina, quae intimiori unione sua utrique substantiae fixae acredinem conciliant, monstrante destillatione sicca, quam RICHARDVS MEAD suscepit, acidae indolis sunt. Ex unciis enim lichenis quatuor aquae acidae unciam unam, quinque drachmas, scrupulum unum et duo grana, olei, aqua gravioris, drachmas duas, scrupulum unum ac grana sedecim, et carbonis, sal fixum continentis, unciam unam, duas drachmas, scrupulum unum ac grana undecim impræparavit (r).

§. V.

In Germania nostra hoc simplex usus paullo rarioris est, in Anglia autem magni aestimatur, et sic dictum *pulverem antilyssum* ingreditur, qui ibi in Officinis pharmaceuticis ubique venalis prostat, et saepe hominibus, ab animali quodam rabido demorsis, ad hydrophobiam ac rabiem avertendam, exhibetur. Praeter plures alios etiam vix allegatus RICHARDVS MEAD singularis ac plane specificae huius virtutis prophylacticae praeconem egit, ac totam post morsum

sum virulentum praeservandi methodum ita descripsit: Mittuntur primo ex aegri demorssi brachio sanguinis unciae novem vel decem (s): Deinde pulvis memoratus, e lichenis cinerei terrestris, mundati ac ficcati uncia dimidia et piperis nigri drachmis duabus paratus, in quatuor partes aequales dividitur, quarum unam aeger ieiun-

(s) Dominus DIEDERICVS WESSEL LINDEN Dominum MEAD propter phlebotomiam, sub curae primordiis commendatam, reprehendit. Virus enim aucto per venaesectionem motu sanguinis circulari, velocius per vasa corporis circumferri et hac ratione magis pariter per totam humorum massam distribui, credit, adeoque chirurgicum hoc auxilium noxium magis, quam utile, futurum arbitratur. Vid. *Eius Anmerkungen über ROBERT JAMES neue Art die Hydrophobie etc. zu verhindern oder zu heilen*. Censura haec primo intuitu ratione non penitus destituta videtur, ast, singulis penitus pensitatis, facile contrarium elucescet. Nam primo parum refert, an virus, semel intra vasa receptum, et denuo igitur naturae ac medicaminum ope per vias urinae et poros cutis eliminandum, paullo celerius, an paullo tardius cum sanguine et lymphâ per maiores minoresve canales circumferatur. Deinde etiam certum est, venaesectionem symbolum suum, praesertim apud demorssos adultos atque plethoricos, ad inflammationem avertendam conferre. Quibus tertio accedit, quod sanguine, nimium imprimis abundante, paullulum imminuto, usus balnei frigidi, universam corporis superficiem constringentis, adeoque humores validius simul ad interiora reprimentis, multo securior, quam venaesectione omissa, evadat.

ieiunus quotidie per quatuor continuos dies mane cum dimidia mensurae lactis vaccini calidi adsumit. Consumtis quatuor his praebitis, balneum frigidum aut fontem gelidum aut fluvium omni mane ieiunus per mensem intrare ac sese totum immergere debet, ita tamen, ut, capite eminente, in aqua stet, nec ultra dimidium horae minutum, si aqua valde frigida sit, in ea commoretur. Mense exacto, non statim ab usu huius balnei desistendum, sed istud adhuc per dies quatuordecim, tribus in hebdomade diebus, repetendum erit. Minime praeterea, et curae quidem initio, vulnus, morsu inflictum, si nondum ante aegri accessum sponte coaluerit, negligi, sed dilatari paullulum, eidemque unguentum basilicum nigrum, cum paucis mercurio praecipitato rubro mixtum, adplicari oportet, ut materiae virulentae effluxus diutius perduret.

§. VI.

Cognita lichenis nostri natura et speciali post morsum virulentum usurpandi methodo, duo momenta brevem adhuc considerationem postulare videntur. Primo nimirum quaeritur: an principia huius simplicis activa ita comparata sint, ut inde specifica virtus, ipsi contra rabiem caninam adscripta, quodammodo deduci et explicari queat, et deinde, an auxilium, quod cura prophylactica, secundum normam expositam suscepta, persaepe observatum dicitur, praecipue licheni, aut magis potius piperi largius addito, et balneo frigido simul adhibito,tribuendum sit? Ad primum quaestionis membrum affirmando respondere nullus dubito. Experientia enim satis dudum comprobatum est, medicamenta, subtili ac penetrante acredine donata, acti-

activa diuretica esse; nec ignotum porro est, diuretica inter praestantiora hydrophobiae virulentae, tum avertendae post morsum, tum curandae, remedia militare. Nunc autem subiectum nostrum subtili ac satis penetrante principio acris ac satis valida proinde virtute diuretica instructum est, adeoque in propatulo etiam esse opinor, quod mediante virtute laudata demorsis nonnihil opitulari, suumque symbolum, si tempestive adhibeatur, ad hydrophobiam avertendam conferre possit. Inficias interim ire et nequeo et nolo, partem auxilii, nisi maiorem, certe tamen parem, ad balneum aquae frigidum et piper nigrum, licheni pulverisato sat larga copia mixtum, redire. Hoc enim, ob manifestam fortemque acredinem suam aromaticam et potentes inde derivandos stimulos, non tantum diuresin, sed etiam diaphoresin promovet, et utroque igitur modo, si mature nimirum et ante febris exortum adsumatur, illato virulento miasmata exturbando inservit; posterius autem, quod, teste experientia, solum haud raro demorsis opem tulit egregiam, partes corporis solidas mirifice atque celerrime roborat, adeoque efficit, ut tubuli etiam minutissimi sese fortius constringant, ac valida hac contractione non tantum humores viscidiores attenuent, sed virus quoque receptum, antequam febrem inflammatoriam accendat, et aquae formidinem suscitet, per vias urinae et sudoris expellant. Quibus accedit, quod calor naturalis, propter repentinam ac temporariam pororum a frigore occlusionem, in universa corporis peripheria subito ac notabiliter increseat, et postmodum vivida pariter actione maturam veneni exclusionem adjuvet. Probe caeteroquin circa balnei non minus, quam
pul-

pulveris prædicti usum notandum venit, festinatione opus esse, dum parum plerumque auxilii ab illis sperare licet, si virulenta materia sese altius pridem in corpus insinuaverit, et febriles igniculos iam iam suscitare inceperit.

§. VII.

LYCOPODIVM OFFIC. sive *Muscus terrestris clavatus* C. B. hinc inde in sylvis umbrosis crescit, et in Polonia imprimis, Lithuania, Vkrainia et Tartaria uberioris proventus est. In usum medicum herba et pulvis sive farina clavicularum flavescentes veniunt. Herba, quae sola hoc loco breviter consideranda est, inter specifica plicae Polonicae remedia refertur, ac frequentissime ab incolis dictarum regionum adversus foedam hanc capillorum implicationem adhibetur. Aequalem nempe foliorum brancae ursinae et lycopodii dissecti quantitatem in sufficienti aquae simplicis copia tamdiu coquunt, donec aqua colorem saturate flavum adquisiverit, vel etiam seorsim antea ex foliis brancae ursina decoctum parant, quod, dum adhuc fervet, lycopodio conciso adfundunt, et tunc rursus per breve temporis spatium ebullire sinunt. Quo facto, decoctum, addito pauxillo fermenti panifici, prope fornacem reponunt, et leni eius calore intra dies aliquot ad levem quandam fermentationem redigunt. Postea decoctum sic praeparatum, vel per se, vel cum ovis recentibus, sub iusculi forma quotidie bibunt. Eodem quoque decocto, antea per infusionem cum variis plantis aromaticis, salvia v. g. rosmarino etc. efficaciori reddito, bis in hebdomade caput lavare solent.

§. VIII.

§. VIII.

Multum quidem fiducia, uti dictum, incolae Poloniae etc. ciragra affecti, in hoc medicamento collocant: An ipsum autem auxilium exspectationi eorum saepe respondeat, nec ne, ignoro, et adhuc incertum pariter esse, credo, utrum virtus memorata magis lycopodio, an magis brancae ursinae adscribenda sit. Quicquid interea sit, encomia procul dubio vera virtute longe maiora sunt, immo diffiteri nequeo, totam virtutem specificam, lycopodio in ciragra adscriptam, mihi nondum satis probatam videri, quoniam folia huius plantae odore ac sapore penitus propemodum destituuntur, et inde etiam extracta substantia fixa resinoso-gummea non adeo singularibus viribus praeclata reperitur. Decoctum enim, colore flavo, instar vini Rhenani, tinctum, debilem solummodo ac paullo ingratum odorem herbaceum spirat, et debilem pariter ac saltim ingrate amaricantem saporem possidet. Extractum subflavo-fuscum, ob vires concentratas, magis quidem activum est, et naribus molliusculum ac parum amicum odorem balsamico-melleum, linguae autem saporem, initio subdulcem, deinde mediocriter amarum, imprimit, praestando tamen tanto auxilio, quanto ad ciragrae curationem opus est, mihi impar videtur.

CAP. XIV.

De Veronica et Betonica.

§. I.

VERONICA OFF. quae *Veronica vulgatio* folio rotundiore IOH. BAVHINI est. *Ehrenpreis*, hinc inde in sylvis et vepretis crescit, solumque

imprimis siccum, arenosum atque petrosum amat. Folia, quae sola ad usum medicum expetuntur, pruni foliis non dissimilia sunt, longe tamen minora, villosa paullulum, in margine incisa, saporis amaricantis et subadstringentis, odoris, praesertim contrita, debilis herbaeo-balsamici.

§. II.

Quando cum aqua simplici ex cucurbita destillantur, nullum quidem oleum substantiale reddunt, aquam translatam tamen mobilissimo atque tenerrimo *principio spirituofo balsamico* imbuunt, et residuo etiam decocto vires, easque maiores, largiuntur. Virtus medica enim non a solo eorum principio volatili odorato, sed simul quoque a *substantia fixa*, tam *gummea*, quam *resinosa*, derivanda est; quemadmodum hoc ex ulteriori analysi chemica luculentissime constat. Infusum quippe aquosum primum, cuius sapor amaricans, odor debilis balsamicus est, post blandam evaporationem extractum relinquit fusco-nigricans, odore balsamico et sapore amaricante, acriusculo, lenissimeque adstringente praeditum. Tinctura spirituofo prima colore gaudet subflavo-viridi, ad nigrum inclinante, odore herbae specifico balsamico, sapore subacri, cui balsamicus tamen et amaricans mixtus sentitur. Massa inspissata a tinctura liquida vix differt, praeterquam, quod color fusco-nigricans, odor autem debilior existat. Sub evaporatione constanter halitum suaveolentem emittit; hinc non mirandum, quod odor in extracto imminutus deprehendatur. Amarities, quod addere iuvat, magis in parte resinosa latet, et haec in genere etiam paullo potentior, quam gummea reperitur.

tur. Quantitas utriusque extracti ferme aequalis est, et aquosum aequae, ac spirituosum, ex foliorum ficcatorum uncia una ultra drachmas tres pondere adscendit.

§. III.

Cum foliis *Veronicae* FOLIA *BETONICAE* VVLGARIS PURPUREAE C. B. quae itidem in locis sylvestribus sponte provenit, nisi forma ac magnitudine, odore tamen, sapore, principiis ac viribus valde conveniunt. Nam tinctura spirituosa prima colore saturate viridi est, et, praeter blandum atque specificum herbae contritae odorem balsamicum, subacrem ac leniter quoque balsamicum saporem possidet. Ab initio usque ad finem evaporationis, aequae, ac apud *veronicae* infusa, odor gratus adsurgit, et nigricans massa spissata subacri et balsamico sapore pollet. Infusum aquosum primum saporem balsamico - amaricantem obtinet, lenemque, nec ingratum, odorem spirat. Extractum, quod evaporatione peracta, relinquitur, eiusdem ferme cum infuso coloris est, odoris leniter balsamici, et saporis subsalsi, balsamico - amaricantis ac paullulum in recessu adstringentis. Hoc ex uncia foliorum una circiter drachmas duas, illud, spirituosum nempe, nondum scrupulos quatuor pondere attingit.

§. IV.

Vulgaria haec medicamina simplicia, sub forma nempe decocti, vel infusi aquosi aut vinosi adsumta, non tantum blande discutiunt, abstergunt et attenuant, sed lenissime quoque adstringunt ac roborant, adeoque multum ad obstructions viscerum referandas, diaphoresin atque

diuresin augendam, et humores purificandos valent. Veronica, quae virtute paullo superior est, vulgo magis aperitiva, diuretica et pectoralis, betonica magis nervina atque cephalica iudicatur; hinc illa etiam frequentius contra obstructionem hepatis, lienis, uteri ac mesenterii, nec minus contra calculum, suppressionem urinae, hydropem, raucedinem, tussim, asthma, phthisin imminuentem, etc. haec autem frequentius contra gravedinem, cephalalgiam, vertiginem, palpitationem cordis, similesque morbos in usum trahitur. Pro meo iudicio specifica haec praerogativa nullius plane, vel non adeo magni tamen momenti est, nec singularem ideo medentes errorem commissuros existimo, si plantam utramque in adfectibus memoratis aliisque promiscue adhibeant. Externe inter decocta abstergentia ac purificantia vulneraria locum inveniunt.

CAP. XV.

De *Hedera terrestri*.

§. I.

HEDERA TERRESTRIS VULGARIS C. B. a TOVRNEFORTIC *Calamintha humilior folio rotundiore*, germ. *Gundermann*, dicta, in locis hortorum ac camporum umbrosis, maxime autem circa sepimenta, sponte luxuriat, et alibi humi serpit, alibi corpora vicina scandit. Folia, quae praecipue in usum medicum trahuntur, rotunda sunt, in margine dentata, villosa paullulum, odoris, recentia scilicet, satis fortis atque ingrati balsamici, saporis subacris et amaricantis.

§. II.

§. II.

Principia valde activa et praestantiora omnino, quam vulgo creditur, in naturali mixtione foveant. Adsunt nempe *partes fixae*, tam *gummeae*, quam *resinosae*, nec minus *volatiles* seu *spirituosae salino-inflammabilis naturae*. Hae, quod facile ex paullatina odoris imminutione cognoscitur, sub exsiccatione maximam partem in auras abeunt, et postea itaque praecipua activitatis ratio in substantia fixa, praesertim gummosa, quaerenda est; quemadmodum hoc instituta examina chemica abunde docent. Sub humida quippe destillatione aqua in receptaculum expellitur, ingrato quidem odore balsamico, nulla singulari tamen virtute praedita; in infusis vero, et inde paratis extractis longe maiores ac plane eximiae vires deprehenduntur. Infusum videlicet aquosum primum, cuius color fuscus, odor ingrate balsamicus et ipsius herbae specificus est, amaritiae moderata et subtili ac penetrante acredine pollet. Acredo haec fauces, linguam atque palatum peculiari prorsus modo afficit, et vividam fibrarum oscillationem excitat. Massa spissata, cuius drachmas tres et grana quinque ex integra foliorum uncia obtinui, fusco-nigricans est, et praeter debilem odorem balsamicum, saporem primo subdulcem et amaricantem, postea adeo acrem possidet, ut piper in hoc passu, vel potius pimpinellae radicem, nonnihil aemulari videatur. Notatu tamen dignum est, acredinem hanc in foliis anniculis multo debiliorem esse, immo in vetustioribus totam propemodum evanescere; unde concludendum, illam principio volatili, quod paullatina exhalatione consumitur, potissimum adscribendam esse. Tinctura spirituosa prima colore saturate viridi sese com-

mendat, et sapore balsamico - subacri, odore herbae specifico gaudet. Evaporata longe minorem, quam infusum aquosum, extracti quantitatem largitur, idemque remissioribus quoque viribus instructum est, et colore flavo, odore debili et sapore balsamico - amaricante donatum reperitur.

§. III.

Validius stimulando, abstergendo et attenuando, leniterque discutiendo ac roborando haec folia in corpore operantur, et eminentem ideo locum inter aperitiva, pectoralia, diuretica, et sic dicta lithontriptica merentur. Vfus specialis ad multos morbos extendi potest, et in raucedine imprimis, tussi pituitosa, asthma humorali, catarrho suffocativo, obstructione viscerum imi ventris, hydrope incipiente, nephritide pituitoso - sabulosa, dysuria, adfectibus arthriticis, suppressione fluxus menstrui, sanguine congrumato etc. plane eximius est: An vero etiam, quod multi tradunt, contra vermes intestinorum et dysenteriam, nec minus, ob blandam imprimis virtutem diaphoreticam, contra pestem aliasque febres malignas multum valeant, non negare simpliciter, nec etiam adfirmare audeo. Praescribuntur in decocto et infuso aquoso ac vinoso, a drachma una ad duas, tres, immo unciam dimidiam; decocta tamen infusis praestantiora sunt, quoniam principia fixa, quibus vires, uti antea dictum, in foliis siccatis praecipue in acceptis ferendae sunt, sub ebullitione melius extrahuntur. Externe decocta traumatica et cataplasmata, quae contra ulcera maligna, aliaque, nec non contra gangraenam, hernias, tumores scrophulosos, dolores rheumaticos etc. adhibentur, subinde ingrediuntur.

CAP. XVI.

De Chamaedry et Chamaepity.

§. I.

CHAMAEDRYS VERA AC NOBILIS OFF. five *Chamaedrys maior et minor repens* C. B. *Edel-Gamanderlein*, hinc inde in locis incultis et saxosis nascitur. Folia, quae partibus plantae reliquis virtute praepollent, et medico igitur usui praecipue impenduntur, parva sunt, oblonga, instar foliorum quercus (t), dentata, saporis balsamico-amari ac parum in recessu adstringentis, odoris, praesertim contrita, grati, quamquam debilis, balsamici.

§. II.

Principium volatile odoratum balsamicum exigua saltem quantitate in mixtione hospitatur, hinc paullatim quoque in foliis ficcatis blanda exhalatione consumitur, et sub virium itaque determinatione magis ad *substantiam fixam resinofam* ac *gummeam*, quam ad partes spirituosas respiciendum est. Portio gummea, confirman- te analysi chemica, resinofam virtute nonnihil superat, quoad copiam vero resinosae fere aequalis esse videtur, quoniam extracta idem pondus obtinent, et aquosum aequae, ac spirituosum primum binas plerumque drachmas et aliquot

G g 4

gra-

(t) Memorata foliorum quercus et chamaedryos similitudo graecae huius plantae denominationi occasionem dedit. Vocabulum Chamaedrys enim ex vocibus *χαμαί*, *humī*, et *δρῦς*, *quercus*, componitur, et *humilem* quasi *quercum* denotat, hinc a quibusdam etiam *quercula minor* vocatur.

grana pendet. Infusum aquosum primum coloris flavo-fusci est, odoris debilis balsamici, saporis amari. Massa spissata vix differt, praeterequam, quod color saturatior et sapor balsamico-amarus fortior, paullulumque in recessu adstringens deprehendantur. Tinctura spirituosissima prima colore saturate viridi (u), odore herbae specifico, et sapore balsamico-amaricante gaudet. In extracto spissato flavo-nigricante odor debilior, quam in tinctura, amarities vero potentior existit.

§. III.

Ad medicamenta resolventia, abstergentia, aperitiva, roborantia, anthelmintica, diaphoretica, diuretica, et sanguinem purificantia pertinent, multumque imprimis auxilii in adfectibus scabiosis, cachecticis, rhevmaticis, arthriticis, catarrhalibus, nec minus in febribus intermittentibus, morbis pectoris pituitosis, hydrope incipiente, ictero, suppressione urinae et fluxus menstrui, fluore albo, sanguine congrumato, et scorbuto praestant, vel tamen praestare creduntur. Praescribuntur, aequae ac veronica et beto-

(u) Folia viridia plerarumque plantarum, quod examina chemica veronicae, betonicae, roris marini, rutae, salviae, melissae, menthae, thymi, abrotani etc. in antecedentibus passim descripta, confirmant, non aquoso, sed spirituosissimo duntaxat menstruo viridem colorem communicant; unde concludere licet, quod viriditas eorum, nisi unice, praecipue tamen, a parte oleoso-resinosa pendeat. Aliquam haec observatio considerationem meretur, et circa explicandam imprimis perennem plantarum quarundam, abietum v. g. pinorum, buxi etc. viriditatem plus lucis foenerabitur.

betonica, in decocto et infuso aquoso, et nonnulli etiam folia pulverisata cum melle aut syrupo quodam miscent, maioremque a dulcamaro hoc electuario effectum in asthmate, tussi, caeterisque morbis pectoris exspectant. Externe decoctum eorum in ulceribus, praesertim cacoëthicis, laudatur, et pulvis quoque, inter emplastra receptus, aliquid ad hernias sanandas conferre dicitur.

§. IV.

CHAMAEPITYS OFFIC. *Chamaepitis vulgaris odorata flore luteo* I. B. *Chamaepitys lutea vulgaris seu folio trifido* C. B. *Erdkiefer, Schlagkräutlein*, passim in Italia, Gallia, Helvetia, Austria, Hungaria, et Anglia in locis campestribus sabulosis, ac montanis provenit, partim etiam in hortis seritur. Folia, de quibus hoc loco maxime sermo est, angusta sunt, oblonga, paullulum villosa et albescentia, odoris, instar piceae, resinoso - balsamici fatis penetrantis, saporis amari. Vocabulum Chamaepitys a vocibus *χαμαί*, *humi*, et *πίτος*, *picea*, *pinus*, originem ducit, quoniam folia piceam, uti dictum, redolent.

§. V.

Natura, principiis ac viribus folia chamaedryos valde aemulantur, plus tamen *principii volatilis balsamici* possident. Portio gummosa, aqua primum extracta, et evaporando spissata, colore flavo-fusco, ad nigrum vergente, gaudet, et, praeter debilem odorem, saporem balsamico-amarum, in recessu nonnihil adstringentem, obtinet. In infuso nondum evaporato specificus odor balsamicus paullo fortior, sapor remissior deprehenditur, nihilque austeri ama-

ritiei admixtum sentitur. Tinctura spirituosissima prima saturate viridis est, plantamque odore magis, quam infusum aquosum, prodit, et sub-acrem atque balsamico - amaricantem saporem linguae imprimit. In massa spissata color viridis in flavo-nigricantem mutatur, et sapor balsamico - amarus non amplius acriusculo, sed debili subdulci mixtus deprehenditur. Vncia foliorum una circiter scrupulos quinque vel drachmas duas extracti, tam aquosi, quam spirituosi primi, suppeditat.

§. VI.

Chamaepitys in iisdem morbis, in quibus chamaedrys utilis iudicatur, locum invenit, et altera igitur alterius defectum commode supplere poterit. Nonnulli quidem chamaepityos folia in morbis capitis atque nervorum, adeoque in apoplexia, vertigine, paralyfi, epilepsia etc. maius auxilium ferre arbitrantur: Verum enim vero, non adeo singularis huius praerogativae ratio adesse videtur, quoniam inter principia plantae utriusque activa et operandi modum parum discriminis observatur. Praescribitur pariter in decocto et infuso aquoso ac vinoso, et pleraque etiam reliqua huc transferri possunt, quae de chamaedryos usu interno §. III. dicta fuerunt.

CAP. XVII.

De Thea orientali et Teucrio vero.

§. I.

THEA VERA OFF. sive THEA ORIENTALIS apud nos folia denotat fruticis cuiusdam orientalis, Sinensibus *Thèh*, Iaponibus *Tsjja* aut *Tsjja*

Tsjaa dicti, exsiccata, vel potius lenissime tosta, plus minusve convoluta, suaveolentia, austeriusculo - amaricantia, colore vel viridi aut subviridi, vel fusco - nigricante praedita.

§. II.

Propter indicatam coloris diversitatem Thea in genere in *viridem* et *fuscam*, aut rectius *fusco-nigricantem* dividitur. Thea fusca, vulgo *Thée-Buu*, *Thé-Buh*, *Thée-Bouy* nuncupata, eandem cum thea viridi originem habet, et differentia illa, quae apud varias Theae viridis ac fuscae species venales, circa habitum foliorum externum, colorem, odorem, saporem etc. animadvertitur, partim a discrepante coeli clementia, folique natalis bonitate atque cultura, partim a differenti foliorum recentium aetate, teneritudine, magnitudine et collectionis tempore, partim etiam a multiplici hominum artificio derivanda est; quemadmodum plura de hisce in NEVMANNI *Lectione de Thea* videnda sunt.

§. III.

Collectio, referente KAEMPFFERO in *Amoenit. exot. pag. 613.* non eodem tempore peragitur, nec una absolvitur vice, sed diversis. „Qui „tertium, *inquit*, colligunt, illi auspiciu ten- „tant circa finem mensis *Songuats*, qui Iaponum „primus est, exordiens cum novilunio illo, quod „aequinoctio verno est propius, sive id in Fe- „bruarii exitum, sive Martii initium inciderit. „At hic mensis folia pauca tantum suppeditat, „eaeque perquam tenella et nondum integre ex- „plicata duorum et trium dierum; quae vero „nobilissima sunt omnium, et ob pretiosam rari- „tatem palatiis Principum ac divitibus dicanda, „unde

„unde *Thea Caesarea*, nec non *Flos theae* appellari
 „suevit. (Florum petala nemo colligit, aut lo-
 „co foliorum usurpat, quod falso persuasi sunt
 „nostrates; errorem, credo, genuisse floris no-
 „men plausibile, vel induxisse ignorantiam via-
 „torum). — — — Secunda collectio (quae
 „prima est aliis) mense secundo instituitur, i. e.
 „circa Martii finem, vel Aprilis initium; hac fo-
 „lia iam integre explicata, una, si placet, cum
 „semiexplicatis decerpuntur, ante praeparatio-
 „nem, secundum bonitatem et magnitudinem,
 „in classes feligenda. Ex his, quae nondum ex-
 „plicata sunt, bonitatem praedictorum quodam-
 „modo assequuntur, unde eodem nomine ve-
 „niunt, a caeteris, ob praestantiam, separanda.
 „Postrema et omnium uberrima collectio (aliis
 „altera) fit mense Iaponum tertio; quo expli-
 „cata folia multitudine luxuriant. Sunt, qui,
 „neglectis prioribus, unica huius mensis colle-
 „ctione omnem *Theae* claudunt absolvuntque
 „messum, cum sedula disiunctione foliorum in
 „diversas *Itziban*, *niban* et *sanban*, seu primae,
 „secundae et tertiae bonitatis classes; quarum
 „ultima exhibet folia bimestria et rigidiora, pro
 „usu plebeiorum etc.,

§. IV.

Frutex memoratus, qui triennis factus, or-
 dinario primam, septennis vero ultimam folio-
 rum lectionem patitur, in China et Iaponia, vel
 unice, vel tamen praecipue, adolescit, ibidem-
 que ab incolis maxima cura plantatur ac colitur.
 Sensim, tardo tamen incremento, viri altitudi-
 nem consequitur, et, sic describente vix allega-
 to KAEMPFFERO (x), *Frutex est folio Cerasi*,
flore

(x) L. cit. pag. 605.

flore Rosae sylvestris, fructu unicocco, bicocco et ut plurimum tricocco. Radicem habet incondite brachiatam, lignosam, superficie nigricante; Caudicem ab imo ramosum, brachiis furculisque plurimis, inordinate extensis. Cortice tegitur infirmo, exsucco, tenui, coloris badii, in caudice canescentis, in cymis tantulum herbei. Lignum ei duriusculum et fibratum est; medulla exigua firmiter adnata. Folia pediculis carnosissimis brevissimis nixa, furculos perenni, nisi decerpas, vigore inordinate occupant singula, foliis cerasi hortensis, fructu acido, substantia, figura, colore, et magnitudine, paria; ut recens nata, qualia pro interno usu carpuntur, magis fortasse folia Evonymi vulg. gran. rubr. excepto colore, referant. Flores autumno singuli geminive ex foliorum axillis prodeunt, rosae sylvestris facie, in diametrum pollicarem et amplius (vix integre) expansi, remisse fragrant, albi, hexapetali, petalis rotundis concavis: Pediculis insistent semuncialibus, ex tenui principio crassioribus, qui in squamas incerto numero (quinas et senas ut plurimum), parvulas, orbiculatas, caliculi vicem praestantes, desinunt. Fructus florem numerosus excipit, monococcus, bicoccus, et ut plurimum, ad instar seminis Ricini, tricoccus, concretus ex tribus globosis capitulis, pruni sylvestris magnitudine, ad centrum communis pediculi coeuntibus, et pulvinata depressione (qua diffringi possunt) distinctis. Constat idem ex pericarpio et nucula singulis capitulis striete inclusa. Pericarpium herbei coloris est, per maturitatem nigricans, superficie opaca, substantia pingui membranacea et quodammodo lignosa, summa facie per siccitatem (post annuam in planta moram) dehiscente, ut per singulas fissuras
pro-

promineat nucula. Nucula fere globosa est, tantum aliqua sui parte, ex accubitu compressa; corticula tegitur tenui, duriuscula, micante, spadicea et castaneae nucis simillima; qua detraeta nucleus prodit, externa superficie rufens, substantiam obtinens nucis avellanae solidam et oleosam, sapore primum vappido et subdulci, mox seminis cheiri instar amaro et valde tetrico; sed qui salivam acriter provocat, et ad fauces dilapsus nauseoso sensu, cito tamen disparente, gustantium guttura offendit etc.

§. V.

Folia recentia, etiamsi odore memorando destituantur, tenerrimum tamen principium narcoticum possident, eodemque, interne usurpata, spiritus animales turbant, nonnihil inebriant, cerebrum offendunt, et membris tremorem inducunt: Quare ut nociva ac quasi virulenta hac qualitate priventur, et melius quoque adservari ac transportari queant, ab incolis eodem die, quo ab arbuscula decerpta fuerunt, in ampla, plana, quadrata aut rotunda sartagine ferrea certi cuiusdam furni, quem, ut et totam praeparandi methodum, KAEMPFERVS *L. cit. p. 617.* prolixè pariter descripsit, modestae tostioni subiiciuntur, eaque durante constanter manu utraque huc et illuc versantur, ut aequaliter torrantur. Sufficienti tostione absoluta, rutabuli lignei ope eximuntur, ac protinus, dum adhuc fervent, in stoream effusa, strenue ab aliis, palma utraque, non quidem motu promiscuo, sed uniformi, volvuntur, ut eodem tenore contorqueantur, et crispa evadant. Post praeparationem hanc, quae toties reiteratur donec folia debite exsiccata sint, censura instituitur, et folia

craf-

crassiora, incondite volutata ac nimis adusta, a melioris notae reliquis separantur atque seorsim reconduntur: Non statim tamen usui serviunt, sed per decem, duodecim, immo plures menses adservantur, ut principii narcotici reliquiae paullatina et spontanea exhalatione auferantur.

§. VI.

Thea, descripto modo praeparata et ex China potissimum ad nos a mercatoribus translata, praeter *tenerrimum ac grate balsamicum principium oleoso-inflammabile*, e foliorum non minus, quam infusi eorum et aquae destillatae odore satis cognoscendum, *fixam quoque substantiam activam resinoso-gummeam* possidet. Pars gummea maiori quantitate mixtionem ingreditur, et tam arcte cum resinosa coniuncta est, ut haec aequae, atque illa, prima vice maximam partem tam aqua pura, quam spiritu vini extrahi possit. NEVMANNVS ex uncia una Theae viridis unciam dimidiam ac binos scrupulos extracti aquosi primi et unicum solummodo scrupulum extracti resinosi secundi, posteaque, cum aliam unciam ordine inverso exploraret, drachmas tres cum semisse extracti spirituosi primi, et scrupulos quatuor extracti aquosi secundi impetravit. Apud extracta Theae fuscae, tum intuitu quantitatis, tum qualitatis, levissimam duntaxat differentiam invenit, primumque extractum spirituosum gratius, secundum ingratus, quam apud theam viridem, esse, et principium praeterea gummosum paullo largius, resinosum vero parcius, in mixtione hospitari, observavit (y). Valde memorata examinibus, quae ipse suscepi, respondent, circa

(y) Conf. *Lect. eius de Thea.*

ca colorem tamen monendum duco, quod ille apud infusum spirituosum Theae fuscae non semper, uti Auctor laudatus retulit, viridis, sed plerumque flavo-fuscus sit. Portio resinosa potentior est gummosa, et longe maiori quoque stypticitate praedita reperitur. Nam extractum aquosum primum, adeoque magis gummeum, colorem ex flavo et rubello subfuscum obtinet, et saporem duntaxat austerum mediocriter adstringentem linguae imprimit; extractum vero spirituosum primum, cuius color pro Theae diversitate vel fusco-vel subviridi-nigricans est, sapore in principio balsamico-amaricante, deinde admodum austero ac styptico pollet. Odor balsamicus, qui in infusis, praesertim aquoso, satis fortis est, in extractis spissatis valde minuitur, ita ut in spiritoso parum duntaxat, in aquoso nihil ferme, sentiatur.

§. VII.

Apud Chinae et Iaponiae incolas infusum et decoctum horum foliorum aquosum non tantum quotidianum, communissimum, acceptissimumque potulentum constituit (z), sed medicaminis quoque vices saepissime gerit. Mentem quippe,

(z) Decocti usus apud rusticos et cives pauperiores, qui potulentum hoc toto hauriunt die, solummodo receptus est. ditiores vero infuso, quod duplici modo praeparant, utuntur. Nunc scilicet folia integra simpliciter aqua fervente, uti apud nos moris est, infundunt, tinctamque hauriunt solam, nunc autem folia, molae manualis ope in pulverem redacta, certa quantitate in vascula, calida aqua simplici repleta, immittunt, et una cum aqua sorbillant.

pe, praesertim ex foliis paratum, quae anni unius aetatem habent, exhilarare, viscerum obstructions tollere, sanguinem purificare, materiam tartaream eluere, adeoque multis morbis mederi, pluresque, calculosae imprimis et arthriticae indolis, avertere, credunt. Idem Europaei quamplurimi sentiunt, et in principio, cum illis infusum hoc innotesceret, parum abfuit, quin praecones nonnulli, mercede forsan conducti, istud universale morborum, tum curandorum, tum praeservandorum, remedium depraedicarent. Nostra aetate fama hinc inde nonnihil rursus decrevit, postquam Medici prudentiores cognoverunt ac demonstrarunt, quod laudes vulgares vera virtute superiores existant, quodque vires, quas infusum aquosum exerit, magis a copiosa aqua calida, quam ipsa thea, derivandae sint. Sententiae huic et ego subscribere nullus dubito: Certo enim certius est, aquam calidam, hac occasione largius haustam, diluendo, solvendo, eluendo, temperando, aperiendo, humectando, plus omnino efficere, quam extractas theae moleculas, quae mediante tenerimo suo principio balsamico lenissime saltem discutiunt, mediante terreo-resinoso-gummeo, austero-amaricante, autem fibras ad-et constringunt. Ex adstrictione memorata, quae in infuso tamen, ob exiguum theae iniectae copiam, non adeo valida est, virtus diuretica, quam post adstrictoriam ac leniter discutientem primariam iudico, praecipue fluit, et inde pariter, non exclusa tamen blanda discussione, quam volatile principium balsamicum praestat, cephalicam, cardiacam, pectoralem etc. deducere licebit. Iterum nihilominus iterumque moneo, sub virium plerarumque explicatione magis ad copio-

sum vehiculum aqueum, quam ipsa foliorum principia activa, quae in vulgari infuso, uti antea pridem dictum fuit, parcissime adsunt, respiciendum esse.

§. VIII.

Quemadmodum moderatus infusi laudati usus non tantum hominibus sanis prodest, sed in febribus quoque, inflammationibus, adfectibus rhevmaticis, arthriticis, nephriticis, catarrhalibus, et pectoris pituitosis, nec minus in scorbuto, obstructione viscerum, dolore capitis ac morbis compluribus, ex crassitie et impuritate humorum praecipue oriundis, valde nonnunquam utilis deprehenditur; sic abusus quoque haud parum ad sanitatem labefactandam conferre valet. Nocendi facultas ad menstruum aequae ac ipsam theam, redundat: Aqua tepida enim, theae principiis parcissime tantum, uti moris est, impraegnata, tunicas ventriculi et intestinorum valde flaccidas, imo reliquarum quoque partium solidarum compagem laxiorem reddit, si iusto largiori quantitate ac iusto frequentius adsumitur. Nascuntur inde adpetitus deiectio, prava esculentorum digestio, et viscerum atque meatuum atonia, quibus facile postmodum variae aegritudines chronicae succedunt. Vitium memoratum emendari quidem potest, quando theae folia maiori copia aquae iniiciuntur; verum contraria hoc modo qualitas nociva infuso conciliatur: Nimium nempe adstringit, et apud subiecta sensibilia anxietatem praecordiale et tremorem ventriculi, apud alia, spasms primae culinae obnoxia, cardialgiam, colicam, vel ad minimum alvi segnitiam, aut plenariam obstructionem provocat. Asthmatici quoque, phthisici,

ci, alioque pectoris morbo chronico laborantes, tam insigne auxilium, quam vulgo credunt, a potulento hoc minime exspectare debent, quoniam quotidiano, copioso et diuturno eius usu tonus pulmonum magis magisque deiicitur, et humorum itaque stagnationes, cum vasorum obstructione et mucidae impuritatis decubitu, maiora in dies incrementa capiunt.

§. IV.

Pretiosiori theae orientali Medicorum multas varias pridem plantas indigenas substituere allaborarunt, circa designandam tamen speciem optimam valde dissentiunt, et alii hanc, alii illam eius loco melius adhiberi posse, opinantur. Nolo singula haec succedanea, quae COHAVSEN in *Tratatu*, cui titulus *Neo-Thea*, maximam partem descripsit, hoc loco adducere, sed pauca tantum de TEVCRIO VERO, quod in *Actis Medicorum Berolinensium* (a) reliquis fere omnibus praefertur, subiungam. Amat haec planta sylvestris, quae a Botanicorum nonnullis etiam *Chamaedrys foemina*, ab aliis *Veronica*, *chamaedryos folio*, *frutescens et erecta* nuncupatur, elatiora ac sicciora loca montana, et ultra semicubitalem altitudinem plerumque excrescit. Folia recentia et Iulio imprimis mense, una cum flosculis, monopetalis, coeruleis, in spicam collectis, decerpta, ac leniter in loco umbroso siccata, aquam ferventem, sub infusione moderata, colore subviridi, suavi odore balsamico et longe gratiori sapore, quam veronica vulgaris et betonica, imbuunt. Valde igitur in hoc passu theam orientalem aemulantur, anologa tamen virtute. testante GOHLIO, fere

H h 2

fu-

(a) Vol. II. pag. 125. sequ.

superant. „In diffusa virium explicatione, *Au-*
„*tor memoratus L. cit. p. 134. scribit*, nihil (*Teu-*
„*crium verum scilicet*) cedit herbae Thé. Sanis
„aeque ac aegrotis sine ulla contrarietatis effi-
„cacia commendari potest. Imo observavi,
„quod illis subiectis, quibus infusum herbae ex-
„oticae Thé fuit grave et contrarium, quibus
„vertigines excitavit, nostrae plantulae extractio
„maxime accommodabilis et salutaris fuerit. Ma-
„gis et potentius diaphoretica et diuretica est,
„quam ipsa Thé. Cardialgias non movet, sed
„praesentes discutit et solvit. Quod si totum
„hominem a capite usque ad calcem variis mor-
„bis per singula capita infestatum percurrere
„vellemus, nullus erit morbus, qui non ferat
„usum infusi nostrae plantulae. Non contendo
„panacaeam hic subesse, saltem contendo nul-
„lum hic subesse, in de caetero percurandis ex
„arte morbis, offendiculum. Febribus cuius-
„cunque generis fert suppetias. Arthriticis affe-
„ctibus et Rhevmatismis videtur magis specificè
„dicata esse. Scorbuticas sanguinis inquinatio-
„nes, praeprimis feri et lymphae recrementa,
„eluit sua diuretico-diaphoretica virtute. Vis-
„ceribus laesis et suppuratione tactis aequè et
„melius, ac Veronica, balsamico-vulneraria
„occurrit efficacia. — — — Nolo diffusior
„esse in memoranda huius herbulae insigni et
„conspicua medicandi varios morbos efficacia.
„Id saltem intactum relinquere non possum,
„quod securitate usus antecellat exoticam her-
„bam Thé. Non enim indiget repositione an-
„nua, aut praevia tostione, qua perdat inimi-
„cam qualitatem, cerebrum et nervos impeten-
„di, uti Thé, sed quo recentior ad usum voca-
„tur, eo gratior est planta et eo salubrior etc.,

CAP. XVIII.

De Vva Vrsi.

§. I.

VVA VRSI, *Bärentraube, Sandbeere*, LINNAEO *Arbutus caulibus procumbentibus, foliis integerrimis*, C. BAVHINO *Vitis idaea foliis carnosus et veluti punctatis*, et CAMERARIO *Vitis idaea rubra Bavarica dicta*, in variis Europae regionibus, tam septentrionalibus, quam australibus, in Suecia nimirum, Norwegia, Russia, Austria, Styria, Carniola, Helvetia, Italia, Hispania, Gallo - provincia etc. crescit, et loca ubivis aprica, sabulosa, arida, inculta atque sterilia amat; hinc frequentius etiam in montibus, collibus et ericetis, rarius in sylvis reperitur. Folia, quae usui medico potissimum impenduntur, graminea viriditate gaudent, ac manducata satis fortem saporem styptico-amarum linguae imprimunt, odore autem penitus destituuntur.

§. II.

Principiis haec folia *mere fixis resinosis ac gummeis* donata sunt, substantia tamen gummea resinofam quantitate et virtute superat. Infusum aquosum primum colorem saturate bruneum, ac saporem valde amarum et adstringentem obtinet, odore autem caret, et sub evaporatione tantummodo lenissimum quendam ac vix perceptibilem balsamicum emittit, qui in massa spissata tamen penitus rursus evanescit. Sapor caeteroquin in hoc extracto aequae, ac in infuso, admodum amarus, atque adstringens, odor mel-leus, et color fuscus est. Infusum spirituosum secundum colore subluteo-viridescente et sapo-

re saltim amaricante gaudet, odore autem solum spiritum vini prodit. Extractum, inde evaporando paratum, subviride est, et linguae initio saporem amarum, deinde oleoso-rancidum, naribus vero odorem nullum memorabilem imprimit. Infusum spirituosum primum ab infuso aquoso primo quoad saporem et colorem differt: Hic enim obscure viridis, ille solummodo valde amarus est. Cum infuso extractum seu massa spissata convenit, praeterquam, quod amarities adhuc maior sit, et color viridis obscurus ad nigrum vergat. Quando extracto huic aqua tepida adfunditur, post temporariam macerationem maxima eius pars rursus solvitur, et ex drachma integra quatuordecim duntaxat, aut quindecim grana resinae verae in charta bibula remanent, quae colore saturate viridi tincta cernitur, et initio saltim debilem saporem amarum linguae communicat, deinde autem plane insipida deprehenditur. Infusum aquosum secundum valde iners videtur, fatuumque tantummodo saporem obtinet, post evaporationem nihilominus massam brunneo-nigricantem relinquit, quae saporem falsum habet, et perfecte siccata minutissimis crystallis salinis cubicis obsita reperitur. *Clariff. Dn. Doctor et Professor* IOH. ANDREAS MURRAY, qui folia haec adcurato examini chemico subiecit, et ea postmodum, quae observavit, plene uberrimeque descripsit (b), ex uncia

(b) In *Commentatione de Arbuto Uva ursi*, Goettinae 1765. edita. Conferri etiam poterunt, quae *Cl. Dn. Doct. CAROLVS ABRAHAMVS GERHARD* in *Tractatu suo, de hac planta-eiusdemque principiis etc. germanico idiomate exarato*, retulit.

cia foliorum una drachmas tres et grana sex extracti aquosi primi, grana quadraginta quatuor extracti spirituosii secundi, drachmas tres et grana viginti sex extracti spirituosii primi, et grana viginti sex extracti aquosi secundi impetravit.

§. III.

Eminentia ac plane singulari virtute sedativa ac diuretica pollent, et nostro igitur aevo a Medicorum nonnullis, qui, uti illustris HAE-NIVS (c) pluresve alii, ad iteratam faustamque experientiam suam provocant, in suppressione urinae et doloribus renum atque vesicae, a calculo et coacervata materia fabulosa ortis, tanquam insigne atque specificum remedium, commendantur; quemadmodum plura de hisce in Libellis, infra allegatis, videnda sunt. Exhibentur interne vel in pulvere a scrupulo semisse ad grana quindecim, scrupulum unum, quin drachmam dimidiam et ultra, vel etiam in infuso aquoso, quod minorem adsummentibus nauseam creat, et pro lubitu, aucta scilicet aut imminuta aquae adfundendae quantitate, diffusius aut concentratius reddi potest. Notandum tamen, dosin eorum in infuso altius paullo, quam in pulvere, adscendere debere, et sub usu quoque diutius continuato, identidem iuscula aliave alimenta ac medicamenta mucilaginea ac gelatinosa demulcentia adsumenda esse, ut mucus naturalis, quo viae urinariae intus obducuntur, quemque hoc medicamentum diu usurpatum nimis subinde abstergere solet, denuo restituatur.

CAP. XIX.

De *Artemisia*.

§. I.

ARTEMISIA OFFIC. sive VULGARIS I. B. *Beyfus*, in *rubram* et *albam* dividitur. Haec caulem pallidum aut ex viridi albicantem, illa spadiceum habet, et prior ideo a C. BAVHINO *Artemisia vulgaris maior*, *caule ex viridi albicante*, posterior *Artemisia vulgaris maior*, *caule et floribus purpurascentibus* appellatur. Vtraque species in hortis colitur, et passim quoque sponte crescit. Folia exsiccata debilem odorem, debilemque saporem balsamicum possident, qui in summitatibus florifero-feminiferis tamen paullo fortior deprehenditur.

§. II.

Medicorum plerique huic plantae vires plane eximias tribuunt, eamque, cum aqua aut vino coctam, in ictero, hydrope, obstructione viscerum, nephritide sabulosa, ischuria, dysuria, torminibus ventris, vulneribus venenatis, aut sclopeto inflictis etc. magnopere prodesse, et sanguinem praeterea menstruum ac lochialem, nec minus foetum et secundinas potenter pellere, tantumque in cunctis uteri morbis valere, perhibent, ut matrum et omnium passionum muliebrium exoptata obstetrix merito nuncupanda esset.

§. III.

Elogia haec et reliqua, quae adducere supersedeo, magna quidem sunt, valde nihilominus dubito, *artemisiae* folia virtutibus memoratis re
vera

vera instructa esse. Sub examine chemico enim nullum principium, cui tanta energia adscribi posset, in illis reperire potui. *Tenerrimae* videlicet atque *volatiles particulae balsamicae* paucissimae sunt, ac valde debiles, et *fixa* pariter *substantia, gummeo-resinosa* tam iners deprehenditur, ut parum inde activitatis expectandum sit. Extractum aquosum primum sapore penitus prope modum destituitur, et spirituosum primum lenissimum duntaxat ac vix perceptibilem acriusculo balsamicum obtinet. Credo itaque, artemisiae foliis torpidam solummodo virtutem discutientem et abstergentem competere, adeoque usum eorum in morbis antea recensitis non adeo magni momenti esse. Non movent me contraria Scriptorum testimonia, quum sic dictam experientiam, quam allegant, sub praeiudiciorum vigore haud raro fallacissimam esse, plus simplici vice cognoverim.

§. IV.

In China et Iaponia ex artemisiae vulgaris latifoliae, adhuc novellae, foliis, diu exsiccatis et obbletis, sic dicta MOXA, sive usitatissima ibidem cauterii actualis materia praeparatur. Moxa haec, referente KAEMPFERO (d), lanugo sive stupa mollicula est, coloris cinerei, concipiendo igni aptissima, eoque illato moderate glifens, scintilla minus conspicua, ardore temperato, progressu lento, donec in favillam tota redacta sit. Rescinditur herba multo mane, rore adhuc madens, et ad faciem domus occidentalem libero aëre suspenditur, usque dum sufficienter exsiccata sit, deinde in summo pavimen-

H h 5

to

(d) In *Amoenitat. exot.* pag. 592. sequ.

to diu fervatur, quoniam eo nobilior atque tenerior lanugo ex illa speranda est, quo magis obsoleverit; unde non desunt, qui herbam ad decennium usque reservandam curant. Praeparatio Moxae nullo artificio absolvitur: Tunduntur nempe folia primum pistillo ad molli-
 tiem rudioris stupae; deinde utraque manu agitantur et fricantur assidue, ut priori contusione iam attritis decedant duriores fibrae et recre-
 menta membranacea: quibus excussis, desidera-
 ta illa insignis teneritatis homogenea et purissi-
 ma lanugo remanet. Quando amplius pedinis
 ope carminatur, elegantior adhuc atque tenerior
 redditur, ita, ut inscius eam ex artemisia confe-
 ctam esse vix crederet.

§. V.

Tempore usus ex stupa seu mollugine lauda-
 ta parvi coni, apice acutiori, basi latiori prae-
 diti, pisumque maius aut minus sua magnitudine
 circiter aequantes, digitis formantur, et cuti,
 saliva antea nonnihil humectatae, impositi, tenui
 bacillo, ex cera pura aut hac et fragrantibus re-
 sinis etc. parato, vel ardente quadam virgula,
 aliove flammae ignisque subiecto in apice accen-
 duntur. Ignis, a fastigio sensim placideque de-
 scendens, turundulam hanc intra breve tempus
 depascit, et, cutem attingens, spadiceam aut
 fuscam, aut saltem cineritiam maculam prolucit.
 Macula haec seu stigma post inustionem ordina-
 rio, tum ad dolorem, qui sub prima tamen
 unctione satis tolerabilis esse dicitur, leniendum,
 tum blandam suppurationem promovendam, al-
 lio contuso et desuper eiusdem corticis lanella,
 in ore paullulum madefacta, contegitur, hic se-
 quenti autem vesica, circum circa forsan enata,
 forfice

forfice minutiori aperitur, et escharae alii loco folium plantaginis leniter tostum, manibusque nonnihil frictum, ut mollescat, asperiori seu fibrilloso suo latere, tandemque latere glabro ac molliori, vel etiam folium brassicae, hederæ, tussilaginis, betæ etc. immo deficientibus hisce, emplastrum sticticum Paracelsi, basiliconis, diapalmæ etc. adplicatur, ut eschara paullatim secedat, et postea pariter exortum ulcusculum consolidetur. „Non præcipitanda tamen est, „secundum WILHELMI *ten* RHYNE moni- „tum (e), escharæ ablatio, etiamsi plagulae „levissime tantum adhaereat, sed naturæ com- „mittendum illud opus, nec sistendus est saniei „fluxus; neve globulorum introductione exci- „tandi sunt fonticuli; suoapte exeat, quantum „velit, odor. Quare diutius illa folia fibrilloso „latere super escharam retinenda sunt, quia sic „insanum ichor liberius effluit; verum parte gla- „bra non ita diu, quia tunc nimis cito vulnuscu- „lum consolidant; servanda igitur super plagam „nervosa foliorum facies, et, ne illa decidant, „obliganda, vel conglutinantibus emplastris, si „ligaturas non ferat plaga, detinenda, atque mi- „nimum bis viginti quatuor horarum spatio re- „novanda sunt etc. „

§. VI.

Incolæ Chinae atque Iaponiae tanti hoc mo-
xiburium aestimant, tantamque in eo fiduciam
collocant, ut istud contra morbos multos ac va-
rios, maxime autem contra adfectus arthriti-
cos atque rhevmaticos, apud adulta non minus,
quam puerilia sexus utriusque subiecta, creber-
rime,

(e) In *Dissertatione de Arthritide*, pag. 114.

rime, nec raro vice, intra breve tempus in eodem loco iterata, in usum trahant, quin saepe etiam saepius solo duntaxat praeservandi scopo, tanquam optimum et propemodum universale aegritudinum prophylacticum, adhibeant. Vix allegatus WILHELMVS ten RHYNE remedium hoc post primum adventum suum in Indiam orientalem flocci pendebat, nec adeo multum illi virtutis tribuebat, deinde vero, non vulgarium tamen praeiudiciorum vortice abreptus, sed frequenti observatione felici coactus, honorifice admodum de illo sentire coepit, idemque in arthritide pluribusque morbis chronicis et refractariis magnopere depraedicavit (f). Auctori huic KAEMPFERVS quoque, CLEYERVS (g), pluresve alii, qui testes suscepti in India moxiburii oculati fuerunt, non promiscue tamen, sed cum prudenti hinc inde encomiorum moderatione, suffragantur, suisque relationibus multiplicem et in calidioribus potissimum regionibus satis subinde eximiam utilitatem eius confirmant; addit tamen KAEMPFERVS, Chinensium ac Iaponensium Medicos longe saepius hoc remedio ad praeservationem, quam curationem morborum, uti: „Vrunt indiscriminatim, *sic eius verba sonant* (h), infantes et senes, divites et plebeios, mares et feminas, parcunt tamen gravidis illis, quae unctioni non admodum assuetae sunt. Vstio autem artemisiialis vel ad morborum praeservationem, vel ad curationem instituitur; ad praeservationem eam praeprimis commendatam volunt Medici, et sanos potius, quam

(f) *Dissert. cit. pag. 106.*

(g) Vid. passim *Ephemerides A. N. C. Germ.*

(h) *L. cit. pag. 594.*

„quam aegros ustulandos iubent: sicuti enim,
 „aiunt, materiam medicam morbi praesentis, ita
 „futuri pharmacum esse cauterium. Qui igitur
 „in extimo oriente suae valetudini prospiciunt,
 „ii uri se singulis curant semestribus. Ea con-
 „suetudo adeo religiose viget, ut etiam homini-
 „bus, aeviterno carcere damnatis, prodire per-
 „missum sit, ad moxiburii fruendi beneficium.
 „Praeservativa ustio turundis in eodem loco ab-
 „solvitur parvulis et paucioribus, curativa vero
 „plures requirit, easque grandiculas, si vapo-
 „res ex profundo latice evocandi sunt., Incen-
 „denda turundula, quod addere expedit, pro di-
 „versa morborum imminentium aut praesentium
 „natura ac sede primaria, modo huic, modo illi
 „corporis parti, frequentissime tamen dorso,
 „utrinque prope spinam ad lumbos usque, im-
 „ponitur, ubivis tamen partes valde tendineae
 „atque nervosae, nec minus arteriae ac venae
 „maiusculae, quae moxiburium non patiuntur,
 „studiose vitandae sunt. In Officinis eorum, qui
 „in praedictis regionibus ustiones ordinario per-
 „agunt, teste laudato *ten RHYNE* (i), effigies
 „seu simulacra, ex ligno sculpta, prostant, distin-
 „ctis variegati coloris punctis signata, quibus lo-
 „ca singula, cum moxa tuto atque utiliter, tum
 „praeservandi, tum curandi fine inurenda, ita
 „monstrantur ac discriminantur, ut moxiburium
 „etiam artis tyrones, immo alii, eiusdem antea
 „plane ignari, rite, vel absque graviori tamen
 „laesione, in morbis variis instituere valeant.

CAP.

(i) *Dissertat. de Arthritide*, pag. 126. It. in *Prae-
 fatione Tractatus de Acupunctura*.

CAP. XX.

De Branca ursina Germanica.

§. I.

BRANCA VRSINA VVLGARIS sive GERMANICA, C. BAVHINO *Spondylium vulgare hirsutum*, LINNAEO *Heracleum foliolis pinnatifidis* dicta, germ. *Bärenklau*, non tantum in Germania nostra, sed in Polonia etiam, Lithuania et per totam fere Europam in pascuis, pratis atque pomariis humidiusculis nascitur, ac mense Iunio floret. Folia eius, quae potissimum in usum medicum veniunt, magna sunt, altius utplurimum laciniata, per utramque superficiem hirsuta, et obscure viridia. Saporem leniter balsamicum et amaricantem, subdulci nonnihil mixtum, possident, et odorem debilem balsamico-melleum, qui posterior in foliis siccatis multo fortior, quam in recentibus, deprehenditur, emittunt.

§. II.

Praeter tenerrimum, molliusculum ac leniter balsamicum principium volatile, haec folia etiam fixam substantiam activam, tam gummeam, quam resinofam, in mixtione sua foveant. Infusum spirituosum primum, obscure viridi colore tinctum, sapore amaricante gaudet, et odore suo partim spiritum vini, partim ipsa folia aemulatur. Massa fusca, post evaporationem relicta, debilem odorem balsamico-melleum spirat, et gustus organo primum subdulcem, ac paullo post amarum saporem imprimit. Ex uncia foliorum siccatorum una drachmam unam et scrupulos duo impetravi. Infusum aquosum primum, colore

lore flavo, ad fuscum vergente, odore plantae specifico molliusculo et sapore amaricante ingratum praeditum, extractum, inspissatione peracta, relinquit, quod saporem austeriusculo - amaricantem possidet, intuitu odoris autem cum ipso infuso convenit. Vncia foliorum una mihi circiter drachmas tres praebuit. Superat igitur hoc posterius praecedens magis resinofum quantitate, viribus autem inferius deprehenditur.

§. III.

Triplici modo, leniter nimirum attenuando, blande abstergendo ac paullulum quoque emolliendo, actionem suam haec folia sub usu interno praecipue exercent. Vires priores ex sapore amaricante, quo folia integra non minus, quam separata principia fixa gaudent, facile patescere, existimo: Quod emolliendi autem facultatem attinet, illa vaporum molliusculo balsamico - melleo, elementis fixis gummeo - resinosis satis copiose immixto, potissimum adscribenda videtur. Siquidem in plantis, simili principio vaporoso molliusculo praegnantibus, v. g. in floribus meliloti vulgaris et hortensis, floribus verbasci etc. similis quoque emolliendi virtus reperitur.

§. IV.

Pro usu interno ut plurimum in decocto aquoso et infuso aqueo - vinoso praescribuntur, et contra calculum maxime, suppressionem urinae et dyscrasiam humorum scorbuticam adhibentur: Immo incolae Vkrainiae, Lithuaniae et Poloniae frequentissime decoctum eorum, uti alibi pridem (k) fusius retuli, decocto lycopodii,

(k) In *Dissertat. de Branca ursina*.

dii, quod in sic dicta plica Polonica specificum iudicatur remedium, iungere, et, teste SEN-
NERTO (1), ex solitario etiam, per fermenti panifici additionem, potulentum quoddam medicamentosum fermentatum, *Barzsch* dictum, parare solent. Pauperes illud persaepe loco cerevisiae bibunt, et potum hunc urinam calculosque pellere, ac multum quoque contra scorbutum valere, immo aestum febrilem extinguere credunt. Vires priores quodammodo admittere possum, de virtute refrigerante antifebrili autem iustas dubitandi causas habeo, nec ullam sufficientem huius virtutis rationem in natura horum foliorum invenio. Si forsan tamen veri quidquam subesset, id unice ad saporem potulenti acidulum, ab addito fermento panifico, sub leni fermentatione inductum, referendum foret.

§. V.

Praeter Brancam ursinam Germanicam in Officinis etiam BRANCA VRSI ITALICA prostat, quae non *Spondylii* tamen, ut prior, sed *Acanthi* species est, et C. BAVHINO *Acanthus sativus seu mollis Virgilii*, LINNAEO *Acanthus foliis sinuatis inermibus* dicitur. Differt etiam haec a Germanica indole ac viribus, et propter principium suum glutinoso-mucilagineum, quo singulae eius partes instructae inveniuntur, emolliendi imprimis ac demulcendi virtutem exerit. Refertur ad quinque herbas emollientes, et iunctim ideo cum quatuor reliquis crebro, ac saepius quidem, quam Germanica, inter clysmata, fomenta, cataplasmata et balnea emollientia, demulcentia ac paregorica recipitur.

CAP.

(1) *Libr. de Febr. Cap. XIII.*

CAP. XXI.

De Alchimilla et Agrimonia.

§. I.

ALCHIMILLA VULGARIS C. B. et TOVRNEF. *Sinnau, Löwenfuss*, satis nota planta indigena est, quae in sylvis, pratis, aliisque locis herbosis, humidiusculis atque umbrosis, sponte luxuriat. Folia eius, quae sola ad usum medicum expetuntur, crispa sunt, in octo vel novem angulos obtusos divisa, aut veluti complicata, cum totidem nervis a pediculo ad extremos angulos prodeuntibus, concinne in ambitu crenata, dilute viridia, inodora, et sapore modice adstringente donata.

§. II.

Elemento volatili haec folia penitus carent, et *fixis* duntaxat *principiis activis resinosis* ac *gummeis* praedita reperiuntur, et inter haec, docente analysi chemica, resinosum potentius rursus gummoso est. Infusum aquosum primum colorem subfusco-rubrum, odorem mere herbaceum, ac saporem herbaceo-austeriusculum obtinet, et post evaporationem extractum coloris subflavo-fusci, ad nigricantem vergentis, odoris quasi mellei, non ingrati, et saporis acidulo-austeriusculi largitur. Dentibus hoc, ut et palato, ob tenacitatem quandam, valde adhaeret, ac lentius pariter saliva solvitur. Ex uncia una foliorum siccorum drachmas tres cum semisse accepi. Quando infuso, quod adhuc subiungere placet, alcali fixum liquidum infunditur, illud confestim turbidum ac crassum evadit, et colorem lutosum nanciscitur. Materia praecipitata,

quae copiosa, rara, lutea, et terreae indolis est, tarde, nec unquam perfecte ad fundum secedit, hinc modica saltem liquoris pars pristinam pelluciditatem pristinumque colorem fuscum recuperat. Tinctura spiritiuosa prima ante digestionem calidam sese amoenissimo colore viridi commendat, sub digestionem autem viridiusculo-nigricantem fortitur. Odor eius lenissime duntaxat balsamicus et sapor tam debilis est, ut a menstrui, rectificatissimi scilicet spiritus vini, sapore vix distinguere possit. Extractum vero flavo- et sub-fusco-nigricans, post blandam evaporationem inde resultans, sapore satis austero pollet, et odorem leniter balsamicum, simulque vernicis fere vulgaris instar, oleosum spirat. Vncia foliorum una mihi drachmam unam et grana quadraginta octo dedit.

§. III.

Operatio horum foliorum medica unice moderata adstrictione nititur; hinc usus eorum internus in iis morbis commendandus venit, qui a flacciditate, atonia et languida contractione partium solidarum praecipue dependent: Cuius census v. g. sunt adfectus cachectici et oedematosi, vomitus inanes, lienteria, coeliaca aliaque profluvia alvina, a sphincterum relaxatione orta, nec minus herniae, incontinentia urinae, diabetes, prolapsus ani, uteri et vaginae, fluor albus, gonorrhoea benigna, et nonnulli etiam morbi spasmodici ac convulsivi (m). Symbolum

(m) Alchimilla et quaevis subadstringentia reliqua sedandis motibus spasmodicis et convulsivis non simpliciter inserviunt, sed partium duntaxat nervo-

lum quoque suum, propter eandem subadstringendi facultatem, ad consolidanda ulcera ac vulnera, quae tenui ichore scatent, aut quorum labia nimis laxa inveniuntur, conferunt; immo in ipsis haemorrhagiis immodicis, et incongruis, si usus circumspectus accedat, non contemnendum subinde auxilium ferunt.

§. IV.

Interne plerumque sub forma decocti aut infusi aquosi ac vinosi usurpantur: Notari tamen oportet, infusum vinosum viribus decocto aquoso superius esse, et hoc rursus infuso aquoso potentius reperiri. Nonnulli etiam succum, e foliis recentibus expressum, et folia pulverisata laudant, et haec ad drachmam unam, illum ad unam alteramve unciam exhibere iubent. Verum enim vero, cum pulveris moles adsumentibus facile fastidium pariat, et folia etiam, ut ut recentissima, non adeo copiosum succum largiantur, hunc usurpandi modum parum aestimandum censeo. Externe contra uvulae relaxationem, anginam spuriam, vacillationem dentium, procidentiam ani, prolapsum uteri et vaginae, flacciditatem mammarum ac partium genitalium muliebrum, fluorem album, paralyzin membrorum, ulcerum ac vulnerum laxitatem, et morbos similes commendantur, ac modo inter gargarismata, modo inter fomenta, lavamenta, balnea etc. recipiuntur.

I i 2

§. V.

vofo - membranacearum imbecillitatem, quae plerumque horum adfectuum causa originalis est, leni ad - et constrictione corrigunt; hinc tutius quoque et cum maiori efficacia post motuum exorbitantium remissionem, adeoque post paroxysmum, quam sub turbarum vigore, adhibentur.

§. V.

Alchimillae hoc loco AGRIMONIA sive EV-PATORIUM I. B. et OFFIC. subiungi meretur, quoniam folia eius, quae maxime etiam prae partibus reliquis in usum medicum trahuntur, ab alchimillae foliis quoad naturam, principia activa et vires parum discrepant. Extractum eorum spirituosum primum nullo odore singulari gaudet, et saporem austerum, subacri et amari-cante mixtum, obtinet; aquosum vero solum saporem mediocriter austerum possidet, et odore penitus destituitur. Saliva illud, quod notatu utique dignum est, difficilius fere ac lentius, quam praecedens spirituosum, solvitur, et eodem virtute etiam multo inferius reperitur.

§. VI.

Locum haec herba inter moderata adstringentia, ac vulneraria occupat, et in adfectibus oedematosis atque cachecticis, obstructionibus viscerum chronicis, hydrope ascite incipiente, febribus lentis, a refractario viscerum infarctu potissimum oriundis, mictu itemque cruento, et ulceribus ac vulneribus haud spernendum subinde auxilium adfert. Interne sub forma decocti adhibetur, pro usu externo autem gargarismata et lavamenta travmatica ac detergentia, in angina spuria, et impuris ulceribus oris aliarumque partium proficua, ingreditur, immo interdum sola, vino tamen aut aqua prius cocta et nonnihil contusa, vulneribus atque ulceribus, mundificandi aequae, ac consolidandi scopo, imponitur.

CAP. XXII.

De Marrubio albo.

§. I.

MARRVBIVM VVLGARE ALBVM C. B. et OFFIC. *weisser Andorn*, notissima planta indigena est, ac passim circa urbes et pagos, iuxta vias publicas, iuxta sepes, muros, aedificiorum rudera, et in aliis locis incultis nascitur. Folia eius, quae sola, vel etiam, quamquam rarius, iunctim cum floribus, usui medico impenduntur, sibi invicem opposita sunt, subrotunda, in margine incisa, crassiuscula, rugosa, parum succulenta, in superficie superiori pallide viridia, ac paullulum duntaxat villosa, in inferiori autem viridiusculo-albicantia, odore, adhuc recentia tamen et nonnihil digitis contrita, acidulo-balsamico, satis grato, et sapore acriusculo-amaro praedita.

§. II.

Non tantum *substantiam activam fixam resinosa* ac *gummeam* haec folia in naturali sua mixture reconditam fovant, sed *subtili* etiam *principio volatili sulphureo-salino-acidulo*, quod sub diuturniori tamen adservatione maximam partem paullatina exhalatione consumitur, instructa sunt. Principium hoc spirituosum sub destillatione humida aquam abstractam debili quidem sapore amaricante, et satis forti odore, eoque specifico prorsus et ingrate balsamico, imbuunt, nullum vero olei substantialis vestigium in conspectum venit. Infusum spirituosum primum initio eleganti ac saturato colore viridi tinctum cernitur; ast color hic sub calida digestionem

nime perdurat, sed in obscuriorem subviridi - ac luteo - nigricantem mutatur. Sapor eius satis amarus est, odor autem tam debilis existit, ut a spiritus vini odore discerni nequeat. Extractum, cuius quatuor saltim scrupulos totidemque grana ex uncia foliorum una post blandam infusi evaporationem impetravi, odorem gratum balsamicum, quasi melleum, saporem amarum, subacri, et acidulo mixtum, et colorem flavo-atque rubello - nigricantem obtinet. Ad aliquot grana adsumtum, ventriculi tunicas vivide irritat, et apud subiecta sensibilia nauseam quandam levemque vomendi conatum excitat. Infusum aquosum primum, colore nigricante, odore herbaceo et sapore mediocriter amaro donatum, post evaporationem massam nigricantem, odoris ingrati balsamici, saporis subsalfo - amari relinquit. Activitate hoc extractum praecedenti quidem spirituofo cedit, viribus nihilominus haud contemnendis pollet. Vncia una foliorum siccorum mihi drachmas duas et semissem dedit.

§. III.

Vires abstergentes, irritantes, aperitivae, diureticae, emmenagogae, pectorales et antifebriles simplici huic medicamento adscribuntur, et propter hasce igitur in adfectibus cachecticis, oedematosis, atque hydropicis, in refractariis porro viscerum obstructionibus, ab humorum lentore et partium solidarum flacciditate potissimum pendentibus, nec minus in ischuria, dysuria et nephritide sabuloso - pituitosa, suppressione fluxus menstrui et haemorrhoidalis, chlorosi, fluore albo, febribus intermittentibus, scorbuto frigido, rhevmatismis, scabie humida, tussi

tussi mucosa, asthma pituitoso atque cachectico, et pluribus adhuc aliis morbis cum insigni nonnunquam emolumento in usum vocatur. Nonnulli marrubium in phthisi etiam pulmonali et hectica magnopere commendant, et *marcidorum* quasi *rubum* nuncupant: Verum enim vero, in his morbis aliisque pulmonum affectibus, ab ebullitione ac congestione sanguinis, aut materia tenui, acri, fortiter irritante, aut inflammatione, aut exulceratione oriundis, cum usu huius medicamenti cautius omnino mercandum esse, opinor.

§. IV.

Pro usu interno folia plerumque in infuso vinoso ad aliquot pugillos praescribuntur, et interdum pariter inter decocta aquosa recipiuntur. In Officinis aqua eorum destillata prostat, quae viribus etiam non plane destituitur, sed lenioribus diaphoreticis, diureticis, pectoralibus et pellentibus uterinis accenseri meretur. Scriptores nonnulli adplicationem externam tum foliorum recentium, tum succi expressi, in variis quoque morbis valde laudant, et priora imprimis, trita prius et cum oleo olivarum cocta, passionem iliacam, per se autem imposita, virulentum canis rabidi morsum sanare, posteriorem vero, melli depurato additum, ulcera et vulnera fordida detergere atque consolidare, immo, cum oleo amygdalarum dulcium mixtum, auribusque instillatum, otalgiam tollere, perhibent.

CAP. XXIII.

De *Anagallide*.

§. I.

ANAGALLIS, *Gauchheil*, *Geckenheil*, *Grundheil*, non Germaniae tantum, sed reliquarum pariter Europae regionum incola est, ac passim in hortis, arvis, aliisque locis campestribus sponte crescit. Duae species, non indole tamen, nec charactere botanico, sed solo floris colore distinctae, *Anagallis* nimirum *phoeniceo flore* C. B. sive *Anagallis phoenicia* mar I. B. et *Anagallis coeruleo flore* C. B. sive *Anagallis coerulea* I. B. occurrunt. Prior vulgo posteriori, quamquam absque solida ratione, praefertur, et in plerisque igitur Officinis ut plurimum sola prostat. Folia et flores, quibus intuitu naturae, principiorum atque virtutis medicae nihil prorsus discriminis intercedit, odore penitus destituuntur, gustus autem organo initio herbaceum, deinde autem, manducatione nimirum paullo diutius protracta, subacrem et amaricantem saporem imprimunt.

§. II.

Nullum principium activum volatile in naturali huius plantae mixtione reperitur, sed vires medicae, quibus pollet, *substantiae fixae resinosae* ac *gummeae* unice adscribendae sunt; portio resinosa tamen gummeam activitate superat. Infusum, ex foliis ac floribus, coniunctim receptis, aqua fervida paratum, colorem brunneum et saporem acriusculo-amarum obtinet. Idem sapor, fortior tamen, in nigro extracto, post blan-

blandam infusi evaporationem relicto, apprehenditur. Infusum spirituosum, amoeno colore viridi tinctum, sapore acri atque amaro gaudet, et extractum, evaporatione absoluta, largitur, quod sese ab eo obscuriori tantum viriditate et maiori saporis acredine atque amaritie nonnihil distinguit. *Dominus D. CAROLVS LVDOVICVS BRVCH*, qui adcuratum huius plantae examen chemicum suscepit, ex herbae huius, iunctim cum floribus siccatae, unciis duabus extracti aquosi primi drachmas sex, et spirituosi primi unciam semissem impetravit; in priori tamen partibus gummosis etiam resinosae, et in posteriori resinosis nonnullae gummosae, sicuti hoc apud quamplurima alia huius census extracta observatur, admixtae erant (n). Decenti interea experimentorum comparatione instituta, constat, in una huius plantae uncia circiter scrupulos quinque substantiae gummeae, et totidem pariter vel ad minimum quatuor scrupulos substantiae resinosae intimam cum partibus terreis unionem subire (n).

§. III.

Operationem suam hoc medicamentum praecipue attenuando, abstergendo ac leniter stimulando absolvit, et inde etiam vires eius aperitivae, diaphoreticae, diureticae ac reliquae specialiores derivandae sunt. Conducit maxime in obstructionibus et infarctibus viscerum, hydrope utriculari incipiente, passione hypochondriaca, suppressione fluxus menstrui et urinae, morbis-

Li 5

que

(n) Vid. *Dissertat. eius inauguralem de Anagallide*, anno 1758. *Argentorati habitam.*

que similibus, ac validum quoque in mania et melancholia auxilium ferre, immo post morsum canis aut alterius animalis rabidi, praestantissimum rabiei et hydrophobiae remedium prophylacticum esse dicitur (o). Pro usu interno in pulvere vel decocto aquoso aut vinoso praescribitur, et succus pariter expressus, extractum et tinctura exhibentur. Post morsum animalium rabidorum, quod addere necessum duco, pulvis integrae plantae siccatae singulis praeparatis reliquis palmam praeripit, et bis quotidie ad drachmam dimidiam in aqua sua destillata, aut proprio decocto aquoso, vel etiam in infuso Theae orientalis aut aqua simplici adsumitur, simulque vulneri, aqua prius probe eloto, semel quovis die inspergitur. Non cunctandum tamen post morsum virulentum cum usu huius remedii, ne ipsa hydrophobia ac rabies, quae semel exortae rarissime iterum tolluntur, accedant. Post adsumptionem huius pharmaci apud plerosque demorsos crebrior alvi solutio sequitur, et apud alios subinde etiam sudor foetidus erumpit. In Officinis, praeter tincturam, etiam aqua destillata prostat, quae nullius tamen, ob partium volatiliū in planta defectum, utilitatis est, et phreniticis igitur a Medicis quibusdam absque sperato effectu propinatur.

CAP.

- (o) Postremam hanc Anagallidis virtutem specificam antea laudatus *Dn. Doctor BRUCH* in *Diss. allegata* variis fausti successus exemplis confirmavit, et plura etiam de reliquis huius plantae viribus medicis attulit.

CAP. XXIV.

*De Floribus Liliorum Convallium, Persicorum,
Tiliae ac Primulae veris.*

§. I.

LILIVM CONVALLIVM ALBVM C. B. LIN-
NAEO *Convallaria scapo nudo* dictum, frigi-
darum magis, quam calidarum regionum incola
est; hinc in Germania nostra, caeterisque regio-
nibus, ad septentrionem plus minusve vergenti-
bus, uberrimus hinc inde eius proventus est.
Amat valles, sylvas caeduas, aliaque loca humi-
diuscula et nonnihil umbrosa, aprica autem et
sicciora refugit. Flores, qui prae reliquis plan-
tae partibus ad usum medicum expetuntur, odo-
rem, praesertim in paullo maiorem fasciculum
collecti, diffundunt fragrantissimum suavissimum-
que balsamicum ac paullulum simul expansivum;
unde saepius quoque et maiori copia naribus
admoti, caput nonnihil turbant, ac facile; apud
subiecta imprimis plethorica et cholericæ, cepha-
lalgiam leviolem producunt: Memoratus ta-
men odor fugacissimus deprehenditur, et post
aliquam eorum exsiccationem, vel saltem mar-
cescentiam, valde imminuitur, tandemque pla-
ne evanescit. Sapor admodum amarus est, ita,
ut flores hi multum in hac parte cum aloe com-
munia habeant. Quando siccati in pulverem re-
diguntur, idemque naribus attrahitur, vividam
titillationem, cui fortis sternutatio, immo apud
homines plethoricos haud raro narium haemor-
rhagia succedit, excitare solet.

§. II.

Praeter *tēnerrimum fugacissimumque principium oleoso-spirituosum balsamicum* in floribus hisce etiam *subtile satinum acidulum* et *valde activa substantia fixa*, tam *resinosa*, quam *gummea*, hospitantur (p). Principium balsamicum, quod odor satis prodit, cum aqua et spiritu vini alembicum sub blanda destillatione transcendit, et vehiculum utrumque grata fragrantia imbuit; oleum substantiale aethereum vero, cuius valde exigua quantitas in mixtione haeret, nunquam sub consistentia crassiori ac forma oleosa in conspectum venit, nisi una vice ingens florum copia humidae destillationi subiiciatur. RIEDLINVS ex integro florum cophino vix scrupulum semissem impe-

(p) Sal essentielle vitriolico-ammoniacale cum multo oleo acri et spisso coniunctum, quod G E O F F R O Y floribus hisce tribuit, reperire non potui, nec unquam alios istud reperturos credo. Pluribus sane simplicibus singularia eiusmodi principia, quae sicci ac violenti ignis producta, vel saepius imaginaria prorsus appellare audeo, adscripsit. Quis enim in *avena* v. g. sal ammoniacale, multo oleo involutum, in *fabis* sal urinosum volatile, in *fumaria* sal essentielle ammoniacale, cum aliqua salis mirabilis Glauberi portione et multo sulphure coniunctum, in *herba* et *radice cichorii* sal essentielle falsum vitriolico-ammoniacale, multo sulphuri involutum, in *artemisia* sal ammoniacale essentielle, cum multo sulphure crasso et multa terra coniunctum, in *radice ari* sal essentielle simile sali ammoniaco, spiritu nitri saturato, cum oleo crasso et succo viscido et mucaginoso remixtum, in *radice ellebori albi* salem alcalicum etc. inveniet ac solide demonstrabit?

impetravit. Subtile sal acidulum a partibus reliquis difficillime separatur, quoniam fixae substantiae resinoso-gummeae valde implicitum altiusque immersum est; praesentia tamen eius manifesta redditur, quando flores seorsim aqua simplici et spiritu vini per aliquot horas infunduntur ac digeruntur, posteaque solutionibus filtratis liquor alcalicus, v. g. solutio salis tartari aut cinerum clavellatorum, iusta quantitate instillatur. Ex utraque enim solutione sensim parva granula salina ad fundum deiiciuntur, quae nitroso-falsum saporem linguae imprimunt, et formam quoque crystallinam adquirunt, si decantato liquore supernatante sedimentum leniter siccatur, siccatum in aqua denuo solvitur, et solutio filtrata evaporatione blanda ad aliquam, non tamen omnimodam, siccitatem redigitur. Instillatis liquoribus acidis similis salis medii genesis neutiquam expectanda est, nullaue praecipitatio accidit, sed infusum aquosum pristinam pelluciditatem retinet, ob phlegmatis cum acido accessum, paullulum duntaxat turbatur (q). A tenerrimis hisce particulis acidulis, per totam massam resinoso-gummeam dispersis, et oleoso-inflammabili principio nonnihil contemperatis, titillatio illa, quam pulvis, naribus attractus, provocat, maximam partem derivanda est.

§. III.

Descripta principia teneriora ac volatilia oleoso-inflammabilia et acidulo-salina suam quidem laudem merentur, activitate nihilominus fixis resinosis ac gummeis aliquantulum cedere,

(q) Plura de hisce in IOH. HEINR. SCHVLZII *Dissertat. de Lilio convallium*, §. XIV-XIX. videri possunt.

dere, arbitror. Probant adfertum meum infusa et extracta aquosa ac spirituosa: Nam fuscum infusum aquosum primum blande ac grate balsamico odore pollet, et saporem amarum atque subacrem obtinet. Evaporando spissatum massam largitur, colore fusco, ad nigrum inclinate, odore balsamico, non amplius tamen adeo grato, et sapore amaro plane singulari praeditam. In tinctura spirituosa prima, quae aurei coloris est, idem adest sapor amarus, acredo autem fortior existit; in extracto contra, quod colorem flavo - subfuscum possidet, et gratum saporem, instar mellis ac cerae, spirat, acredo memorata iterum remissior, amarities maior percipitur. Non sine ratione igitur suspicari licebit, multas partes salino - acidulas volatiles, quae praecipuam acredinis causam constituunt, sub evaporatione in auras abiisse. Vtrumque extractum non amaritiae solum, sed etiam virtute aloen hepaticam aemulatur, et paullo maiori quantitate, ad scrupulum nempe integrum, aut drachmam dimidiam, adsumtum, valide abstergit, stimulat, alvumque laxat.

§. IV.

Vires medicae, quibus hi flores instructi reperiuntur, partim discutientes, nervinae atque cephalicae sunt, partim stimulant, abstergentes, laxantes, aperitivae et diureticae. Priores a nobili principio oleoso - inflammabili balsamico, posteriores a sale acidulo et valde amara substantia fixa gummeo resinosa dependent. Non perinde itaque est, an promiscue sub hac vel illa forma adhibeantur, sed ita semper praeparandi sunt, ut scopo certius satisfieri possit. Quare, si discutiendi et confortandi virtus in vertigine,
apo-

apoplexia, adfectibus soporosis, epilepsia, melancholia, debilitate memoriae, lipothymia, paralyfi, caeterisque cerebri et nervorum morbis praecipue desideratur, aquam destillatam et spiritum, a floribus recentibus semel vel aliquoties abstractum, eligere praestat, quoniam liquores hi tenerrimo principio oleoso-spirituoso balsamico valde turgidi sunt; si partes solidas autem in aliis morbis chronicis, cachexia nimirum, scorbuto, febre quartana, passione hypochondriaca etc. sub contractionis languore stimulare paullulum, alvum laxare, impuritates mucidas attenuare et abstergere, vasa obstructa reserare, et diuresin augere, animus est, decocta eorum et infusa aquosa ac vinosa, nec minus extracta, pilulis et electuariis addita, vel in vehiculo etiam congruo soluta, praescribenda erunt. Externe pulveribus errhinis et ptarmicis persaepe miscentur, et vix laudatus spiritus, non sine maximo emolumento, partibus sugillatis, convulsis, aut paralyfi affectis, adplicatur, vel in quibusdam etiam capitis morbis vertici instillatur, et temporibus illinitur.

§. V.

Ad naturam florum Convallariae nonnihil pariter FLORES AC FOLIA MALI PERSICAE accedunt. Flores albido rubentes saporem balsamico-amaricantem possident, et integri adhuc atque recentes blandum quoque odorem balsamicum emittunt. Folia saporis amaritiae flores superant, et contrita odore amygdalas amaras quodammodo aemulantur. *Principium volatile odoratum* in petalis florum subtilius, in foliis paullo crassius magisque oleosum deprehenditur. Nam aqua, in vesica cuprea aut cucurbita vitrea a
pe-

petalis florum abstracta, balsamico quidem odore ac sapore imbuitur, limpiditatem tamen retinet, nec ullum in ea olei substantialis vestigium cernitur. Contrarium quoad posteriora sub humida foliorum destillatione observatur, dum, igne gradatim aucto, aqua primum limpida, deinde lactescens, cui guttulae nonnullae oleosae innatant, transtillat. Oleum hoc colore flavo, odore grato et sapore aromatico urente gaudet, et initio, uti dictum, aquae innatat, commoto autem receptaculo, sensim ad fundum descendit. Ab aqua caeteroquin, ob pertinacem adhaesionem suam ad latera receptaculi ac vitri hypocleptici, difficillime, nec unquam perfecte, separatur; hinc pondus quoque ejus exacte determinari nequit. *Principia fixa resinosa ac gummea*, quibus intuitu virtutis medicae partes potiores deferendae sunt, parum quoque ab invicem discrepant, et sola portio magis resinosa levissimum duntaxat discrimen in foliis et petalis florum siccatis monstrat. Extractum enim utrorumque aquosum primum fusci coloris est, ac saporem ingrate amarum et odorem nauseosum obtinet, extractum autem spirituosum primum foliorum colore brunneo-viridi, et sapore acrisculo amaro, extractum florum vero colore fusco et sapore saltim amaro gaudet. Extractum aquosum primum, tam foliorum, quam florum, quantitate spirituosum primum superat, ac prius, uncia una foliorum aut florum siccatorum recepta, circiter drachmas tres et aliquot grana, posterius drachmas duas totidemque scrupulos pendet (r).

§. VI.

(r) Conf. Dn. Doct. CHRIST. SAM. VNGNAD
Dissertat. de Malo Persica, ann. 1757. hic habita

§. VI.

Viribus haec folia et flores pollent abstergentibus, aperitivis, diureticis, diaphoreticis, sanguinem purificantibus, anthelminticis, ac leniter catharticis, et interne igitur, sub forma infusi vinosi et aquosi theiformis, contra obstructions hepatis, lienis ac mesenterii, dysuriam itemque, nephritidem sabuloso-pituitosam, vermes intestinorum, adfectus scabiosos, scorbuticos et rheumaticos, similesque morbos alios, cum magno subinde emolumento adhiberi possunt. In scorbuto, praesertim calido, etiam sero lactis infunduntur, et aqua pariter destillata, syrupus et conserva eorum usum internum crebro inveniunt.

§. VII.

FLORES TILIAE FOEMINAE FOLIO MAIORI C. B. quoad *volatile principium odoratum balsamicum* praecedentibus floribus liliorum convallium et persicorum nonnihil quidem analogi inveniuntur, quoad fixa autem elementa magno-pere differunt. Substantia enim, quam aqua simplex sub blanda digestionem extrahit, satis *crassa mucilaginea* est, et fluida adhuc, praeter odorem debilem balsamicum, herbaceo-mucilagineum duntaxat saporem, amaritiei atque acridinis prorsus expertem, post perfectam vero inspissationem herbaceo-mucilagineo-subsalum possidet. Portio magis *resinosa*, spiritu vini primum extracta, post infusi evaporationem potentior reperitur, et sapore satis austero et nonnihil simul amaricante gaudet. Operationem suam, si adhuc recentes vino infundantur, partim leniter discutiendo, commovendo, et expandendo, partim incrassando, obtundendo,

Carth. Mar. M. II. Tom. K k et

et subadstringendo in corpore exercent; rarius tamen in usum vocantur, ac sola tantum aqua eorum destillata inter usitatoria medicamenta militat.

§. VIII.

Cum floribus tiliae quodammodo etiam FLORES PRIMVLAE VERIS VVLGARIS sive SYLVESTRIS conveniunt, iisdem tamen praestantiores iudicantur, quoniam odor eorum balsamicus non gratior tantum minusque expansivus est, sed in exsiccatis quoque diutius perdurat. Blandam obtinent virtutem nervinam et antepilepticam, et interdum ideo inter memorati usus infusa vinosa recipiuntur, vel aqua illorum destillata potiunculis additur.

CAP. XXV.

*De Floribus Paeoniae, Tunicae hortensis
et Rosarum.*

§. I.

FLORES PAEONIAE FLORE NIGRICANTE SPLENDIDO sive MARIS C. B. *Pfingst-Rosen*, cuius radicem in antecedentibus pridem descripsi, odorem balsamicum molliusculum spirant, et linguae saporem modice austerum imprimunt, prior tamen in siccatis ita paullatim minuitur, ut vix amplius percipi possit; quare *tenerrimum* quoque ac *fugacissimum* hoc principium spirituosoinflammabile in diutius adservatis non adeo singularem considerationem meretur, sed ad fixam substantiam resinoso-gummeam potissimum respiciendum erit.

§. II.

§. II.

Substantia gummea, quod analysis chemica monstrat, maiori quantitate, quam resinosa, mixtionem ingreditur, et virium quoque intuitu paullo potentior existit. Ex uncia florum una circiter drachmas duas et grana aliquot extracti aquosi primi, et quatuor ferme scrupulos extracti spirituosi primi impetravi. Hoc amoenissimo colore rubro oculis blanditur, ac grato, quamquam debili, odore balsamico, et austero, in recessu tamen, sacchari fere instar, simul dulci, sapore gaudet; illud rubro-nigricans est, et naribus odorem gratum, linguae autem saporem satis stypticum, subdulci pariter atque amaricante nonnihil remixtum, imprimit. Infusa ab extractis spissatis nihil differunt, praeterquam, quod color dilutior et sapor remissior sit.

§. III.

Locum hi flores inter adstringentia et nervina sibi vindicant, et in paralyfi imprimis, epilepsia idiopathica, palpitatione cordis, cachexia, herniis, ulceribus, vulneribus, haemorrhagiis, diabete, gonorrhoea benigna aliisque profluviiis serosis, si styptica nempe tuto admittant, non contemnendi usus sunt. Recentes, adeoque odorato ac paullulum vaporoso suo principio adhuc turgidi, aliquam pariter virtutem anodynam, leniterque discutientem, et maiorem, quam exsiccati, antispasmodicam atque nervinam exerunt. Pro usu interno in decocto et infuso aquoso ac vinoso, a drachma una ad duas, praescribuntur, et externe decoctis stypticis, roborantibus ac vulnerariis addi possunt.

§. IV.

FLORES, TVNICAЕ RVBRAE sive *Caryophylli hortensis*, flore pleno maiore C. B. gratiori, quam paeoniae flores, odore pollent, longe remissiore vero saporem adstringentem, lenissima amaritiae mixtum, possident. *Principium spirituosum odoratum* itidem tenerrimum ac fugacissimum est, paullo diutius tamen, quam in praecedentibus, post modicam exsiccationem remanet, adeoque propius etiam ad indolem oleosam accedere videtur. Suspiciari itaque licet, maiorem florum recentium copiam, una vice humidae destillationi subiectam, fortassis pauxillum olei substantialis reddituram esse. Dicta tamen solummodo suspicor; ex integra enim eorum libra ne miculam olei, sed aquam solummodo, balsamica fragrantia donatam, obtinui. *Substantia fixa resinosa ac gummea*, tum quantitatis, tum qualitatis intuitu, maioris momenti est. Extractum aquosum videlicet, quod ex uncia florum integra plerumque drachmas duas et aliquot grana pendet, coloris purpurei est, odoris debilis balsamici, saporis ex falso et amaricante austeri; spirituosum vero, purpureo pariter colore praeditum, saporem balsamico-amaricantem obtinet, et specificum simplicis odorem balsamico-aromaticum sensibilibus paullo, quam praecedens, spirat, minori tamen quantitate colligitur, et quatuor circiter scrupulos, uncia scilicet una florum siccorum recepta, pondere suo attingit. Sub blanda infusi utriusque evaporatione constanter odor caryophyllaeus percipitur; unde manifestum est, substantiae fixae, cessante etiam sensibili florum odore, multas particulas volatiles altius adhuc immerfas, adeoque plus virtutis ab infusis concentra-

tis,

tis, quam ab ipsis massis spissatis, expectandum esse.

§. V.

A floribus tunicae atque paeoniae FLORES ROSARVM RVBRARVM HORTENSIVM parum discrepant, multo largiori tamen ac *magis oleoso principio volatili odorato* instructi reperiuntur. *Oleum substantiale*, cuius uncia saltem dimidia, vel etiam, si flores optimi ac fragrantissimi sunt, drachmae sex ex centum libris destillando elici possunt, singularis plane naturae est. Post destillationem quippe aquae sub forma squamularum seu crustularum gryseo - albicantium innatat, et olei fluidi flavescentis habitum postea demum consequitur, quando crustulae memoratae provide auferuntur, et in vitro collectae, calore blando liquantur: In loco frigidiusculo tamen fluiditas eius non adeo diu perdurat, sed intra breve tempus rursus in massam stabilem, albam, sevo animali haud dissimilem, coagulatur; hinc vitrum quoque semper in locum calidum deferendum, vel aliquamdiu in manu calida detinendum est, quoties oleo pristinam fluiditatem pristinumque colorem subflavum reddere placet. Suavissimum caeteroquin odorem diffundit, et unica guttula, calore in vapores resoluta, integrum conclave grato rosarum odore replere valet. *Substantia fixa magis gummea*, post inspissationem infusi aquosi relicta, nigricans est, splendens, odoris debilis specifici, saporis subsalfo - amaricantis et balsamico - austeri. *Portio magis resinosa*, spiritu vini rectificatissimo primum extracta, colore flavo-brunneo, ad rursum inclinante, et fortiori adhuc sapore austero, cui moderata pariter amari-

ties admixta sentitur, gaudet. Tinctura liquida parum in principio olet, sub evaporatione autem et ultimo imprimis eius actu, singularem odorem nauseosum, ferme instar aloes hepaticae, emittit.

§. VI.

Circa operandi modum ac vires medicas apud flores tunicae atque rosarum magna analogia observatur. Leniter nempe discutiunt, abstergunt, adstringunt ac roborant; virtus abstergens tamen, cui blanda cathartica iungenda est, multo fortior in rosarum, quam tunicae floribus deprehenditur. De viribus specialibus variisque morbis, quibus specificè medentur, multa addere supersedeo, quoniam in hac parte paeoniae floribus valde respondent. Dantur saepissime syrupus eorum atque conservae, optime tamen ipsi flores vino aut aceto infunduntur. Cum rosis rubris *Rosae albae* maximam partem conveniunt, et paullo maiori saltem virtute laxante instructae dicuntur.

CAP. XXVI.

De Floribus Calcatrippae arvensis, Cyani segetum, Papaveris erratici et Boraginis.

§. I.

FLORES CALCATRIPPAE OFF. sive *Consolidae Regalis* C. B. *Ritterspornblumen*, coerulei sunt, saporis amaricantis, odoris, paullulum imprimis contriti, satis grati balsamici. Planta in arvis inter segetes sponte crescit, hinc a TOURNEFORTIO etiam *Delphinium segetum* vocatur.

§. II.

§. II.

Principia eorum activa, praesertim *fixa gummeo-resinosa*, potentiora sunt, quam vulgo creduntur. Confirmant adfertum examina chemica: Extractum enim aquosum, fusco-nigricans, odorem suavem, instar panis melliti spirat, et saporem mucilagineo-amarum obtinet. Idem odor cum sapore balsamico-amaro etiam in violaceo-nigricante extracto spirituosum sentitur; hoc tamen, quod, una florum uncia recepta, circiter drachmam unam et scrupulos duo pendet, magis roborans, illud vero, cuius pondus, supposita aequali florum quantitate, ultra drachmas tres adscendit, magis abstergens est. Infusa liquida parum discrepant, notatu nihilominus dignum est, nec aqueum, nec spirituosum menstruum coeruleo colore tingi, sed prius subrubro-fuscum, posterius flavo-viridescens esse.

§. III.

Vires medicae, quae floribus hisce jure tribui possunt, resolventes sunt, abstergentes, leniter discutientes, roborantes et diureticae; hinc effectum quoque non contemnendum ab usu eorum interno, praesertim si cum aqua aut vino coquantur, vel, quod praestare arbitror, solummodo infundantur, in obstructionibus viscerum, cachexia, sanguine congrumato, ulceribus, nephritide-sabulosa, calculo etc. sperare licet. Externe decoctis traumaticis adduntur, et contusi quoque recentes, ac debite cum melle in cataplasma redacti, multum ad curandas sugillationes valent.

§. IV.

FLORES CYNANI SEGETVM C. B. *Kornblumen*, eundem, quem *Calcatrippae flores*, lo-

cum natalem habent, et varii, nimirum, coerulei, albi, purpurei etc. coloris sunt, coerulei tamen plerumque eliguntur, et reliquis speciebus praestantiores iudicantur. Facile caeteroquin apud flores hosce coloris mutatio accidit, et in eodem loco, quo anno praeterito coerulei fuerunt, anno sequenti per saepe purpurei conspiciuntur, et vice versa. Odore gaudent debili ac molliusculo balsamico, intuitu saporis autem valde inertes reperiuntur.

§. V.

Principium volatile sub exsiccatione maximam partem evanescit, et vires itaque exiguae, quibus donati inveniuntur, in *substantia fixa, resinoso-gummea* praecipuum suum fundamentum habent. Extractum aquosum primum colorem rubro-fuscum, ad nigrum inclinantem, odorem debilem ingrate balsamicum, et saporem salsum refrigerantem, nitroso analogum ac simul austeriusculum, obtinet. Massa magis resinosa, spiritu vini primum extracta, coloris purpurei est, odoris debilis quidem, ast satis grati balsamici, saporis in principio subdulcis, postea subsalfo-austeriusculi. Vtriusque extracti quantitas longe parcius est, quam apud calcatrippae flores, gummosum tamen resinofum pondere superat. Infusa, quod rursus addere placet, nunquam amoenissimum colorem coeruleum, quo ipsi flores tincti cernuntur, sed aquosum subflavo - et rubello-subfuscum, spirituosum vero subrubro-flavescentem, nanciscuntur.

§. VI.

Praeter blandas vires abstergentes, refrigerantes, subadstringentes et valde debiles diureticas,

cas, floribus hisce vix alias notatu dignas adscribere audeo, et iuste igitur dubito, an infusum eorum aquosum et vinosum, quod Scriptores passim tamen referunt, contra icterum, hydropem, calculum, obstructionem mensium, scabiem, sanguinem congrumatum ac morbos similes, qui potentiora omnino remedia ad sui curationem postulant, multum valeat. Non nego quidem, remedium hoc aliquid ad profligandas aegritudines memoratas conferre posse, nego tamen, effectum eius, si solum adhibeatur, consideratione dignum fore. Externe recentes contusi partibus sugillatis imponuntur, et aqua destillata, quae paucissimis saltem ac vix sensibilibus particulis balsamicis impraegnata est, notissimum collyriorum refrigerantium ingrediens constituit.

§. VII.

FLORES PAPAVERIS RHOEADOS sive ERATICI, recentes rubro quidem colore suo oculis blandiuntur, respectu virtutis medicae autem non adeo singularem aestimationem merentur. Nam *volatile principium vaporosum*, quod in recentibus adest, in exsiccatis non amplius sentitur, et a torpidis etiam *principiis fixis resinosis gummeis* notabile auxilium vix, aut ne vix, expectandum est. Extractum primum aquosum, colore obscure rubro, ad nigrum inclinante, tinctum, valde iners deprehenditur, et debilem duntaxat odorem balsamicum, lenissimumque ac vix sensibilem saporem sordidum et austeriusculum, vel saltem terreum subadstringentem possidet. Extractum spirituosum primum, itidem rubro-nigricans, vix melioris conditionis est, et, praeter debilem, eumque molliusculum, odorem, debilem solummodo saporem balsamico-

subfalsum linguae imprimit. Referuntur hi flores ad subadstringentia, demulcentia atque anodyna, et subinde igitur sub forma infusi aut decocti aquosi contra tussim acrem rheumaticam, pleuritidem, adfectus arthriticos etc. quamquam absque memorando ut plurimum effectu, interne adhibentur; externe autem gargarismata, in laxitate uvulae, angina spuria catarrhali, et adfectibus faucium inflammatoriis usurpanda, ingrediuntur.

§. VIII.

FLORES, BORAGINIS sive BORRAGINIS, tam *coerulei*, quam *albi*, papaveris erratici floribus, si energia medica spectetur, adhuc ignobiliores reperiuntur. Odore enim penitus carent, et parum activam duntaxat *substantiam fixam*, nunc mere propemodum *subdulcem mucilagineam*, nunc nonnihil simul *subsalso-nitrosam refrigerantem* in mixtione sua foveant. Taedet igitur de virtute cardiaca, quam plerique in floribus hisce, praesertim coeruleis, eximiam pronuntiant, multa addere, dum plane imaginaria est, nec ullum in principiis eorum naturalibus fundamentum habet. Usurpantur plerumque conserva et syrupus, vel ipsi flores in infuso, cum vino aut aceto parando, praescribuntur. Aqua destillata, licet magnam pariter famam adeptam sit, nulla corpuscula activa continet, et vix ideo, aut ne vix, ab aqua simplici pura differt.

CAP. XXVII.

De Visco.

§. I.

VISCUM five VISCUS, *Mispel, Mistel*, est singularis planta parasitica fruticosa, ac semper virens, quae hinc inde, maxime autem in Moravia, Bohemia, Austria, Westphalia, Thuringia, Saxonia et Prussia, ramis quercuum annosiorum, nec minus pinorum, tiliarum, betularum, corylorum, malorum ac pyrorum sylvestrium innascitur, suumque alimentum partim ex aëre, partim ex arbore, cui furculi quasi instar insita est, haurit. Rami five caudices inferiores digiti plerumque crassitie sunt, duri, lignosi, compacti, colore foris gryseo-fusco, aut gryseo-nigricante, aut fusco-rubente, intus ex albido flavescente. In ramis superioribus ac lateralibus crassities cum textura lignosa magis magisque decrescit, et corticis color in mere flavum et alibi etiam in flavo-viridiusculum aut flavo-ferrugineum dilutiorem mutatur. Folia sunt bina opposita, oblonga, venosa, dura, coloris flavo-subviridis, flores vero, quibus tandem baccae subrotundae, molles, albae, aut subluteo-albicantes, materia glutinosa plenae, planumque ac cordiforme semen includentes, succedunt, monopetali deprehenduntur, pelviformes, quadrifidi, et verrucis, tanquam apicibus pulverem effundentibus, conspersi. Odore et sapore evidente rami ac folia penitus destituuntur, et ipsae quoque baccae, e quibus notissimum *Viscum* excoquitur, inertem solummodo saporem mucilagineum obtinent.

§. II.

§. II.

Propagari haec planta vulgo creditur, quando turdi, palumbae, et aves aliae, quae baccarum esu delectantur, semina, pulpa concocta, per alvum cum stercorebus reddunt, et illa fortuito in rimas corticis arborum memoratarum, ampliores tamen et semi corrupta materia lignoso-terrea, in qua planta primas agere queat radices, plus minusve repletas, illabuntur. Hic propagandi modus, quem PLINIVS dudum descripsit, verissimus quidem, ast neutiquam unicus, existit, dum Botanici et alii viri curiosi annotarunt, quod baccae etiam integrae, in avium ventriculo nondum maceratae, si ventorum impetu in alias arbores transferantur, vel ab ipsis hominibus per modum inoculationis in corticis fissuras immittantur, novam plantam generare soleant.

§. III.

Viscum quercinum, frigido imprimis ac sicco tempore hyemali, quo maxime viget, decerptum ac probe exsiccatum, speciebus reliquis ordinario praestantius iudicatur: An sufficiens autem differentiae ac praerogativae fundamentum adsit, iuste dubito; hoc vero, examinibus edoctus, certius scio, caudices crassiores magis lignosos, et ramos teneriores ac folia discriminis quidquam intercedere. Referam primo, quid apud ramos crassiores visci quercini, quod solum adcuratori scrutinio chemico subieci, observaverim. Infusum aquosum primum colore erat subfusco-rubescente, odore nauseoso, molliusculo, nonnihil quasi balsamico, sapore satis inertis et specificis ingratis. Blando calore spissatum, massam largiebatur itidem subfusco-rubescen-

bescentem, quae debili suo odore pruna, tostione exsiccata, paullulum aemulabatur, et saporem salsum, amaricante et subadstringente lenissime saltem remixtum, linguae imprimebat. Tinctura spirituosa prima, saturate flava, solum fere menstruum redolebat, ac debilem saporem balsamico-austeriusculum possidebat. Sub evaporatione singularem odorem molliusculum balsamicum emittebat, qui postea in ipso etiam extracto, cum aliquo tamen decremento, perdurabat. Color extracti flavo-rubescens erat, sapor vero satis austerus, simulque, peculiari prorsus modo, nauseosus. Quum, hisce peractis, ramulos teneriores, una cum foliis, ad similia examina vocarem, sequentia annotavi: Infusum aquosum primum brunneo-rubellum et sub effusione duntaxat flavum, debili odore nauseoso et sapore amaricante gaudebat. Extractum condensatum cum infuso maximam partem conveniebat, praeterquam, quod color saturate fuscus, et sapor amaricanti falsedo quaedam admixta esset. Tinctura spirituosa prima, colore subviridi-flavo, ad fuscum inclinante, donata, sapore et odore solum ferme menstruum prodebat, ac parum duntaxat balsamici sentiebatur; absoluta autem evaporatione, massa remanebat subviridi-nigricans, odoris ingrate balsamici, saporis amari, et lenissime in recessu adstringentis. Vncia visci una mihi drachmas duas et grana octo extracti aquosi primi et drachmam unam ac binos fere scrupulos extracti spirituosi primi dedit.

§. IV.

Quando folia et rami destillationi humidae subiiciuntur, nullum prorsus olei essentialis vestigium

gium cernitur, sed aqua prolecta nauseosum solummodo odorem spirat: Sin destillatio autem, citra aquae additionem, in retorta, arenae imposita, igne tamen moderato adhibito, sensimque aucto, suscipitur, liquor acidulus, quem aliqua olei empyreumatici portio sequitur, prodit. Monendum tamen, caudices crassiores maiorem, quam ramos tenuiores ac folia, laudati liquoris acidi quantitatem reddere. Cognoscimus caeteroquin ex hisce et praecedentibus examinibus, viscum quercinum, praeter paucissimas atque tenerrimas *particulas balsamicas*, nullas amplius volatiles activas, blando scilicet humidoque calore expellendas, in naturali mixtione sua continere, sed agendi iuvandique rationem praecipue ad abstergentia, roborantia ac plus minusve adstringentia *principia fixa gummeo-resinosa*, in ramis crassioribus falso-amaricantia atque austera, in tenuioribus vero ac foliis falso-austeriusculo-amara, redire, ita tamen, ut principium resinosum activitate gummeo multum praepolleat.

§. V.

Dominus DIEDERICVS WESSEL LINDEN viscum ex acido mucilaginoso, partibus terrestribus largius remixto, potissimam partem componi statuit, indeque unice etiam virtutem eius derivandam esse, arbitratur (s), immo alio loco (t) oleum essentiale inter principia constitutiva collocat, idemque, observata certa encheiresi, praemissa nimirum paullo protractiori visci

(s) *Anmerkungen über des Doct. IOH. GOLBATCH Mistel - Dissertation, pag. 152.*

(t) *pag. 201.*

visci maceratione in aqua falsa, sub olei ordinarii forma ac consistentia, exigua licet quantitate, elici posse, testatur. Primum adsertum simpliciter nego, et de posterioris quoque veritate valde adhuc dubito. Nam mucilago crassa copiosissime quidem in baccis adest, in foliis ac ramis autem (intelligo hic mucilaginem proprie talem) demonstrari nequit, et acidae etiam particulae, sub destillatione sicca prodeuntes, blando calore humido, qualis in animantium ventriculo reperitur, a fixa substantia resinoso-gummea nunquam penitus separantur, dum altius illi immerfae intimiusque involutae haerent, immo, quoad maximam sui quantitatem, ad formandam ipsius resinae mixtionem concurrunt. Olei denique essentialis praesentia ideo mihi maxime dubia videtur, quod ne minimum olei substantialis vestigium sub destillatione humida, quam semel cum duabus visci uncis suscepi, animadvertere potui.

§. VI.

Antiquissimis pridem temporibus fruticosa haec planta, ob divinas, uti credebant, ac plane eximias virtutes, a Druidis (u), Medicis aliisque

(u) „Non est omittenda, PLINIVS in *Histor. nat.*
 „*Lib. XVI. Cap. 44. scribit*, in ea re et Galliarum admiratio. Nihil habent Druidae (ita suos
 „appellant Magos) visco, et arbore, in qua gignantur (si modo sit robur) sacratius. Iam
 „per se eligunt roborum lucos: nec ulla sacra sine
 „ea fronde conficiunt, ut inde appellati quoque
 „interpretatione Graeca possint Druidae videri.
 „Enimvero quicquid adnascatur illis, e coelo
 „missum putant, signumque esse electae ab ipso
 „Deo

que maximi aestimata fuit, et fama eius per multa secula constanter perduravit, donec recentiori demum aevo passim elanguescere coeperit. Fateor, me ipsum ante aliquot lustra viscum, cum singulas eius partes odore ac sapore penitus propemodum destitutas deprehenderem, vix amplius inter medicamenta activa collocasse: Verum, postquam *Dominus COLBATCH* singularem eius virtutem antepilepticam in *Dissertatione allegata*, quam laudatus *LINDENIUS* ex Anglica lingua in vernaculam nostram transtulit, novis exemplis practicis corroborare annisus est, iisdemque attentionem meam rursus excitavit, exactius naturam illius ope destillationis et extractionis exploravi, et ab eo tempore de viribus, quae ipsi in torminibus infantum, asthma convulsivo, chorea S. Viti, epilepsia caeterisque convulsionibus tribuuntur, iterum honorifi-

„Deo arboris. Est autem id rarum admodum inventu, et repertum magna religione petitur: et „ante omnia sexta luna, quae principia mensium „annorumque his facit, et seculi post tricesimum „annum, quia iam virium abunde habet, nec fit „sui dimidia. Omnia sanantem appellantes suo „vocabulo, sacrificiis epulisque rite sub arbore „praeparatis, duos admovent candidi coloris tauros, quorum cornua tunc primum vinciantur. „Sacerdos candida veste cultus arborem scandit. „Falce aurea demetit. Candido id excipitur sago. Tum deinde victimas immolant, precantes, ut suum donum Deus prosperum faciat his, „quibus dederit. Foecunditatem eo poto dari cuiusque animali sterili arbitrantur, contraque venena omnia esse remedio: Tanta gentium in „rebus frivolis plerumque religio est etc.,

norifice sentire coactus sum. Recipitur inter pulveres, bolos et electuaria, ac commode pariter in decocto aquoso et infuso vinoso propinatur. Infantibus pro aetatis diversitate a scrupulo uno ad drachmam semissem, adultis vero a scrupulo uno ad drachmam integram et ultra praescribitur. Quo effectus etiam certior atque praestantior evadat, alia atque alia adpropriata, asa foetida v. g. galbanum, radix paeoniae, coccionella, grana chermes etc. eidem adduntur, et usui praeterea plerumque laxantia ac venaesectio, nisi aetas tenella obstet, ad primas vias crassiori saburra repurgandas, sanguinisque abundantiam minuendam, praemittuntur.

CAP. XXVIII.

De Cortice Peruviano.

§. I.

CORTEX PERUVIANVS, *Peruvianische Fieber-Rinde*, alias etiam *China China*, *China de China*, *Kina Kina*, *Quinquina*, *Quina Quina*, *Cinchona*, nec non *Cortex febrifugus*, *Antiquartius*, *Iesuiticus*, *Cascarilla de Oia*, *Pulvis (x) de Colentura* et *Colenturas*, *Pulvis Comitidis del Cinchon*, *Pulvis Cardinalis de Lugo* etc. dictus, corticem sistit aridum, mediocris crassitie, foris sca-

(x) In principio possessores hunc corticem magno pretio desiderantibus vendebant, et quo naturam eius atque originem eo melius celarent, ordinario in pulverem redigebant; hinc factum est, ut tunc temporis magis *pulveris*, quam *corticis*, nomen obtinuerit.

scabrum, nonnihil canescentem, nec raro musco hinc inde obductum, intus, cinnamomi instar, ex flavo et rubello subfuscum seu ferrugineum, odoris debilis aromatico-mucidi, saporis amari ac modice austeri adstringentis.

§. II.

Arbor, cuius truncus ac rami celebri hoc cortice obducuntur, vulgo *Gannaperis* et *Gannaperide* audit, et maxime in regno Peruano, prope Loxam, Provinciae Quitensis oppidum, nascitur. Loca amat montana, nec adeo procera est, sed, in ramulos insigniter divaricata, ad pruni circiter altitudinem excrescit. Caudex mediocris est, et folia, quae ramos vestiunt, secundum STEPH. FRANCISCI GEOFFROY descriptionem (y), ex *Actis Academiae Regiae Scientiarum Parisinae* depromptam, simplicia sunt, opposita, ovato-oblonga, anterius cuspidata, integerrima, petiolata, tres uncias longa, duas lata, sat crassa, costa per mediam longitudinem excurrente, ex qua nervi laterales ad oras successive obliquant. Extremis ramis, e summo arboris prodeuntibus, unus vel plures innascuntur florum fasciculi, figura et colore coeruleo-cinereo, antequam aperiantur, Lavandulae floribus nonnihil similem. Communis florum pedunculus ex alis foliorum emergit, et in plures pedunculos minores divaricatur, singuli singulum florem gerentes, perianthio donatum minimo, quinquedentato, persistente, et embryoni insistente. Corolla monopetala est, regularis, infundibuliformis, hyacinthi flori aliquatenus similis magnitudine et figura, tubo oblongo, (9. circiter lineas), limbo patulo, quinque- et ali-

(y) In *Mat. med. Tom. II. p. m. 180.*

aliquando sexfido, laciniis acutis, margine attentius inspicienti leviter ferratis. Corolla intus colore est miniato, circa medium vividiori, ad oras pallidiori, extus vero rubore squalido cum lanugine albicante. Stamina quinque pallide lutea, intra corollam recondita, stylum circumdant albidum, filiformem, stigmatē simplici, viridi et oblongo instructum, embryoni insidentem, tubum non excedentem. Embryo autem abit in capsulam olivaeformem, ab apice ad basin dehiscentem in duo loculamenta, septo intermedio distincta, in quibus semina continentur parva, compressa, margine cincta membranaceo pellucido. Capsula vi elastica rumpi solet et semina spargere. Valvae arescendo breviores fiunt et latiores etc.

§. III.

Pro loci natalis diversitate corticis bonitas differt. Optimus iudicatur ab arboribus detractus, in declivi ac media montium parte nascentibus, deterior vero, qui ab arboribus, in montium cacumine adolescentibus, deglubitur, et vilissimus, quem arbores, in locis humilioribus circa radices montium crescentes, largiuntur. Intuitu proprietatum sensibilibum autem notae melioris censetur, qui rufescens est, vel rubens seu cinnamomi colorem visui referens, sapore aromatico amaro ac leniter adstringente, odore quasi mucido, dentibus attritus friabilis, non viscidus ac glutinosus, non ligneus, non effoetus et annosus, non insipidus nec nimium etiam stypticus, nec adulteratus quocunque alio cortice, succo aloes intincto (z). Alii sub bonitatis diiudicatione ad crassitiem duntaxat et saporem respi-

Ll 2

ciunt,

(z) Vid. GEOFFROY, *L. cit.*

ciunt, et tenuiorem, magisque amarum, quam stypticum, eligunt, crassiorum ex aduerso et maiori stypticitate, quam amaritie, donatum, reiiciunt.

§. IV.

Gentiles regni Peruani incolae medicamentum hoc, quod diu pridem ante *Christophori Columbi* adventum contra febres aliosque morbos adhibuerant frequentissime, olim ex ingenti erga Hispanos odio studiosissime celabant; hinc prima quoque eius notitia demum circa annum millesimum, sexcentesium et quadragesimum ad Europaeos pervenit, posteaque fama eius, praesertim anno 1649. et 1650. magis magisque percrebuit. Quomodo autem magnum hoc febri-fugum primo Hispanis, caeterisque postmodum Europaeis patefactum fuerit, fusius *RICHARDVS MORTONVS* retulit (a): „Nimirum forte „fortuito, sic eius verba sonant, in civitate *Limensi*, „quae est metropolis Regni *Peruviani*, Uxor „*Proregis*, qui tum temporis erat *Comes del Cinchon*, Febre tertiana saevissima (qualis illic locis „epidemia esse solet) correpta, funeste decumbere videbatur. Rumor (ut semper de magnatibus) per urbem divulgatus, tandem per finitima loca ad *Loxam* usque pervenit. Hispanus, illius loci tunc temporis praefectus, per literas *Proregem* monebat, in Arcanis sibi esse „remedium, cuius auxilio *Proreginam* illico revalituram spondebat: Lubentissime annuens „*Proregina*, corticem praeparatum sumpsit. „Quid sit? Stupentibus omnibus, dicto citius „convaleuit. Hinc fama huius arcani, titulo *Pulveris Comitissae* insigniti, ubique per civitatem „*Limensem*, totamque Americam, Hispanicae „ditio-

(a) In *Operib.* Tom. II. pag. 68.

„ditioni subiectam, brevi multum inclaruit. Dis-
 „cedente autem *Prorege ex India*, ubi in Hispa-
 „niam reversus est, illico percrebuit ubique ru-
 „mor de novo hoc *febrifugo*, quod post experi-
 „menta frequenter facta, votis aegrorum sem-
 „per et ubique respondebat. Circa annum salu-
 „tis 1649. famam suam in dies magis magisque
 „provexit, non tantum per *Hispaniam*, verum
 „etiam *Italiam*, *Romam* usque, conatibus im-
 „primis *Iohannis Cardinalis de Lugo Soc. Iesu*, et
 „caeterorum *Collegii Iesuitarum Romae Patrum*,
 „qui eum gratis religiosis et pauperibus largie-
 „bantur etc.,

§. V.

Praeter copiosas partes terreas, paucas martia-
 les, et valde activam substantiam fixam gummeo-
 resinosam, nullum amplius principium, conside-
 ratione dignum, analysi chemica in cortice Peru-
 viano detegitur. Aromatico-mucidus quidem
 odor, tritura imprimis accedente perceptibilis,
 partium quoque volatilium praesentiam prodit;
 ast hae ipsae paucissimae, valde debiles, et pro
 mea igitur sententia nullius sub virium explicatio-
 ne momenti sunt. Oleum essentiale prorsus defi-
 cit: Nam quicquid igne sicco ac violento expelli-
 tur, non essentiale, sed empyrevmaticum est, et
 ex destructa demum substantia fixa resinosa, inter-
 veniente magna partium metamorphosi, produ-
 citur. Libra corticis integra, observante NEV-
 MANNO (b), binas solummodo drachmas huius
 olei, et tres circiter uncias liquidi spirituosi
 aqueo-aciduli fundit. Caput mortuum, si ulte-
 rius in vase aperto calcinatur, et aqua postmo-
 dum elixiviat, vix drachmam unam, immo

L 1 3

saepe

(b) *Prælect. chemico-pharmaceut. pag. 813.*

saepe binos duntaxat scrupulos salis fixi alcalici suppeditat. *Clarissimus Dominus* MODELIVS in cineribus hisce etiam particulas ferreas invenit, indeque eduxit, in folis extractis autem nullum prorsus earum vestigium deprehendit (c); unde ob hanc quoque rationem corticem crudum, in pulvere exhibitum, medica virtute multum extracta superare, aliqui arbitrantur. Non contradicam illis in hac parte, sed ferreas particulas, ab acido ventriculi in vitriolum tenerius converfas, tonicam huius remedii virtutem notabiliter omnino intendere posse, credo.

§. VI.

Substantia fixa resinosa intime arctissimeque cum gummea cohaeret; hinc neutra primae extractionis ope perfecte pura obtinetur, sed resinosae semper molecule gummeae, et hisce resinosae mixtae inveniuntur. Infusum aquosum primum aurantii coloris est, odoris debilis et quodammodo nauseosi, saporis amari et subadstringentis. Post blandam evaporationem extractum largitur flavofuscum, odore ferme destitutum, maiori autem amaritie, quam solutio liquida, praeditum. Tinctura spirituosae prima colore subfusco - rubente, sapore austero - amaricante, odore autem nullo evidenti gaudet. Huic spissata massa rubro - fusca indole maximam quidem partem respondet, linguae tamen longe fortio rem saporem austerum stypticum, naribusque debilem iterum odorem nauseoso - balsamicum imprimit. *Excell. Dominus* PHILIPPVS ADOL-

(c) Vid. Eius *Erstes Schreiben an einen Freund, die Bestuckeffsche oder sogenannte Lamottische Nerven-Tinctur betreffend*. Edit. 2. 1762. pag. 38. sequ.

ADOLPHVS BOEHMER ex uncia corticis una
duas ferme drachmas extracti aquosi primi, et
drachmam unam extracti spirituosi primi sese im-
petrasse refert (d): Ast tantam extracti utrius-
que, praesertim gummosi, quantitatem neque
NEVMANNVS accepit, neque ipse, licet exami-
na bis susceperim, colligere potui. Ille enim
ex indicata corticis quantitate solummodo grana
triginta et octo cum dimidio extracti spirituosi
primi, grana viginti duo cum dimidio aquosi se-
cundi, drachmam dimidiam et grana duo cum
semisse aquosi primi, et grana viginti duo cum
dimidio spirituosi secundi obtinuit; ego autem
scrupulos duo ac grana duodecim extracti spiri-
tuosi primi et grana triginta septem aquosi pri-
mi impetravi. Notabilis haec quantitatis discre-
pantia sine dubio a diversa corticis bonitate, et
adhuc magis a differenti procedendi modo de-
pendet. Nam laudatus BOEHMERVS corticem,
cum primum aqua infunderet, non tantum di-
gestionem, sed etiam ipsi coctioni subiecit, adeo-
que substantiam gummeam ac resinofam uno actu
penitus extraxit; unde non adeo mirandum vide-
tur, quod tantam extracti aquosi primi copiam
acceperit.

§. VII.

Discimus ex institutis examinibus, 1) partem
resinofam minori quantitate, quam gummeam,
naturalem corticis Peruviani mixtionem ingredi,
et hanc magis amari, illam magis styptici auste-
ri saporis rationem in se continere; 2) substan-
tiam gummeam praecipue abstergendo ac mi-
tius roborando, resinofam autem validius ad-
stringendo in corpore operari, et priori igitur

L 1 4

gene-

(d) In *Dissertat. de Cort. Cascarillae*, pag. 30.

generatim potentiozem exiftere, et 3) decantiffimam virtutem corticis febrifugam non ignoto quodam fundamento, uti multi opinantur, fed unice memorata abfterfione ac valida imprimis partium folidarum adftrictione niti (e), immo reliquas etiam vires eius ex eodem operandi modo explicandas eſſe.

§. VIII.

(e) Caecos virium ſpecificarum aeftimatores ac rudioris empiriae patronos mecum hoc loco nequaquam conſenſuros praevideo. Si ſola, interrogabunt, virtus Quinquinae abſterſorio - adſtrictoria, ab amaro - aſtero principio derivanda, profligandis rebellibus febribus intermittentibus ſufficit, nec ſpecifica prorfus nobisque quoad operandi modum ignota, ſubefit, cur alia amara ſimul aſtera ſimilem effectum heroicum in febribus edere nequeunt? Reſpondeo: Poſſunt omnino alia quoque aſtero - amara et amaro - aſtera motus febriles aequè feliciter, ac cortex Peruvianus, fiſtere, dummodo iuſto tempore, et maiori, ut apud Quinquinam moris eſt, quantitate exhibeantur. Pulvis radicis tormentillae v. g. cum extracto trifolii fibrini, centaurii minoris, aut alio amaro, obſervata tamen decenti ſub miſcela proportione, in formam pilularem redactus, parem virtutem febrifugam, quod ipſe aliquoties et alii pariter experti ſunt, certiffime exerit, nec dubitandum eſt, quin plura huius commatis, deſcripto aut ſimili modo in uſum vocata, idem praefitura ſint. Nec ſilentio etiam praetermittendum eſt, ſola haud raro ſtyptica aſtera febres intermittentes profligare: Referente enim Celeb. *Domino Profeſſ.* PETRO KALMIO, incolae Penſylvaniae, Novae Ierſellae, pluriumque Americae ſeptentrionalis provinciae.

§. VIII.

Multos hoc medicamentum fautores multosque etiam osores habet. Hi illud plerisque aegrotantibus, febre intermittente laborantibus, plerumque plus nocuisse, quam profuisse, nec raro, proxime aut remote, varios morbos, febre graviores, tumorem nempe et refractariam obstructionem hepatis, lienis, vasorum ac glandularum mesenterii, uteri etc. hydropem porro, icterum, spasmum ventriculi dirissimum, asthma, phthisin, vertiginem, apoplexiam, caecitatem etc. provocasse, perhibent: Illi ex adverso idem summis extollunt laudibus, et febres, praesertim tertianas et quartanas, non tuto solum atque certissime fugare, sed in multis quoque aliis aegritudinum speciebus, hydropse v. g. dysuria, phthisi pulmonali, haemoptysi, debilitate generis nervosi, paralyti, cachexia, leucophlegmatia, oedemate membrorum, imbecillitate ventriculi, passione hypochondriaca et hysterica, rheumatismis, arthritide, scorbuto, sudoribus colliquativis, gangraena, sphacelo etc. egregium persaepe effectum exeruisse, multiplici observatione probare sustinent.

Ll 5

§. IX.

vinciarum, ut plurimum contra febres intermittentes, in regionibus memoratis frequentes admodum ac valde pariter refractarias, decoctum stypticum *corticis flavescens Arboris Malorum Persicorum*, decoctum *corticis radice Corni floridae* LINNAEI, aquam itemque vitrolicam, in ferri foidinis promanantem, aliaque adstringentia potentiora interne adhibent, et idem ab illis, quin maius persaepe, quam ab ipso cortice Peruviano, auxilium experiuntur. *Reise nach America*, II. Theil, pag. 517. sequ.

§. IV.

Sub tanto scriptorum dissensu circa virtutes dijudicandas medium tenere, mihi tutissimum videtur. Facile enim favor nimius et odium nimium eo homines impellit, ut laudando aut vituperando, quod hic quoque a Medicis fieri et factum fuisse arbitror, veritatis limites transgrediantur. Credo, immo expertus scio, corticem Peruvianum non tantum in gangraena, sphacelo et morbis plerisque a nervorum caeterarumque partium solidarum atonia potissimum oriundis, insigne prorsus auxilium ferre, sed sedandis quoque motibus febrilibus aptissimum esse: Ast scio etiam, eundem, praemature in febribus intermittentibus aut incongrue usurpatum, magnum corpori detrimentum adferre, et aegrotantes saepe in morbos, sublato febrili longe deteriores, praecipitare posse. Tota sane iuvandi ratio, uti antea pridem monui, ad abstersionem et adstrictionem redit, et rationalis itaque Practicus facile perspicere potest, quid expectandum sit, quando, primis viis nondum expurgatis, vasisque, meatibus atque visceribus adhuc obstructis, vel mucida etiam saburra (quod in intermittentibus sanguineo-lymphaticis observamus) per universam sanguinis ac lymphae massam diffusa, largiori et iterata dosi exhibetur.

§. X.

Pro mea igitur sententia ob nullam aliam rationem in febribus intermittentibus usurpandus est, quam ut tonum primae culinae ac viscerum, in intermittentibus vulgaribus valde ut plurimum labefactatum, roborando ac constringendo reducat, adeoque, velocius restituta chymificationis
et

et chylicationis integritate, prohibeat, quominus sub quacunque alimentorum adsumptione protinus novae cruditates, naturam postea, perenni quasi adfluxu suo ad sanguinem, ac pristino insequente stimulo, ad iterandos motus febriles conquassatorio - depuratorios incitantes, generentur. Medicorum multi vulgo quidem naturam ita tandem motibus febrilibus assuescere, ut citra causam illos denuo suscitet, adeoque eos vi quoque cohibendos esse, existimant. Verum, qualem sibi hic conceptum forment, non cognosco: Si natura enim, secundum *Organicorum* dogmata, anima rationalis est, ridiculum sane, immo absurdum, foret, si in domicilio suo toties absque ullo fine ludere quasi, ac statotempore frustraneum, molestum et nocivum strepitum febrilem concitare vellet; sin natura vero corporis, quod sic dicti *Mechanici*, certiori fundamento nixi, statuunt, in structura mechanica seu artificiosissimo compositionis modo consistit, multo adhuc minus video, quomodo motus febriles, post paroxysmum plene planeque cessantes, citra causam irritantem materiales, vel praeviam aut praesentem patheticam, sponte iterum oriri possint.

§. XI.

Praescribitur hic cortex in pulvere a scrupulo uno ad duo, immo drachmam integram, in decocto autem aquoso et infuso vinoso a drachma una ad duas et ultra. Saepissime praeterea cum adpropriatis in pilularum, morsulorum, boli et electuarii formam redigitur, vel sola tinctura eius, aut extractum, vino aut spiritu vini modice saltem rectificato paratum, exhibetur. Notari tamen oportet, remedium hoc, in pulvere

vere adsumtum, vires eminentiores exerere, et in febribus quoque operationem eius, addito rhabarbaro, ut plurimum praestantiorum aequae ac tutiorem existere. Nonnulli apud infantes aliosque, febre correptos, qui pharmacum hoc interne adsumere recusant, decoctum inde aqua parare, idemque, prius tamen percolatum, vulgaris clysmatis instar, intestinis iniicere suadent. Ad enema hoc quatuor plerumque aut quinque corticis unciae recipiuntur, et apud adultos libra decocti una, eaque medica, apud infantes saltem dimidia, vel minor etiam quantitas, ad quatuor duntaxat aut quinque uncias pondere adscendens, una vice in intestina immittitur.

§. XII.

Quo usus huius pharmaci in febribus intermittentibus, praesertim vulgaribus seu stomachalibus, (in sanguineo-lymphaticis enim, autumnalibus ut plurimum et epidemicis, rarius illud admittendum censeo) securior evadat, sequentes cautelae observandae erunt:

I. Ante corticis usum saburra febrilis, in prima culina stabulans, praevia tamen decenti praeparatione, emetici, cathartici aut laxantis ope, eliminanda, et viscerum quoque obstructions, si adesse symptomata quaedam monstrant, nonnihil referandae sunt.

II. Interdum, praesente nimirum plethora, corticis exhibitioni apud adultos venaesectio praemittenda, et deficiens forsitan alvi libertas restituenda est.

III. Nunquam brevi ante paroxysmum, multo minus in ipso paroxysmo febrili, sed diebus

diebus solummodo intercalaribus, bis, ter, quaterve quovis die ad drachmam dimidiam aut scrupulos duo exhibendus et usus tamdiu continuandus est, donec febris cesset; nisi novae forsan et singulares quaedam circumstantiae, febre etiam nondum sublata, inducias, aut plenariam abstinentiam praecipiant.

IV. Febre cessante, exhibitio per intervalla adhuc aliquoties repetenda, nullum vero per aliquot hebdomades insequentēs catharticum aut aliud evacuans, nisi necessitas urgeat, adsumendum est, ne febris, quod alias plerumque fieri solet, recurrat.

V. Diaeta bona et nonnihil tenuis, non tantum sub usu, sed aliquamdiu etiam post usum corticis, praescribenda, ne, concessa ingerendi libertate, esculentorum copia aut qualitas crassa novam ventriculo materiam ingeneret, et facilem ideo recidivae occasionem praebeat.

CAP. XXIX.

De Ligno Nephritico.

§. I.

LIGNVM NEPHRITICVM OFFIC. *Gries-Holz*, in frustis maioribus consideratum, ex duplici substantia constareprehenditur. Altera videlicet, eaque exterior, colore pallide flavescente, altera, interior nempe ac medullaris, subfusco, nunc ad obscure rubellum, nunc ad nigricantem, aut gryseum nonnihil vergente, pollet. Odor substantiae utriusque, si cultro radiatur,

tur, debilis balsamicus est, sapor autem amaricans, subacris ac paullulum aromaticus. Arbor, quae hoc lignum largitur, in Malabaria, Ceylona et regno novi Orbis Mexicano, pyri aut pruni magnitudine, crescit, et BURMANNO *Moringha Ceylonica*, foliorum pinnis pinnatis, LINNAEO autem *Guilandina inermis*, foliolis triplicato-pinnatis: foliolis infimis ternatis, dicitur.

§. II.

Quando tenuiora huius ligni segmenta per horae dimidium aqua simplici pura ac frigida infunduntur, colorem illi flavum et coeruleum conciliant, ita tamen, ut pro diversa oculi oppositione, diversaque luminis admissione, modo flavus, modo coeruleus color in conspectum veniat. Vitro enim, tinctura hac repleto, inter oculum et lumen constituto, liquor colore flavo tinctus cernitur; oculo autem inter lumen ac vitrum existente, coeruleus adparet. Monendum tamen, colorem coeruleum, etsi lignum genuinum sit, et satis diu in aqua relictum, interdum adeo debilem esse pallidumque, ut vix aut ne vix, nisi radii solares vitrum quodammodo a latere collustrent, conspici posse.

§. III.

Circa principia constitutiva apud Scriptores quamplurimos altum silentium est, vel falsa omnino ac parum demonstrata adducuntur. LEMERY v. g. multum olei, multumque salis essentialis huic ligno tribuit, et PAULVS HERMANNVS de sale blando alcalico loquitur. Sed ubinam memorata haereant, haecenus nondum detegere potui. Posterior suam quidem sententiam praedicto infusi aquosi colore coeruleo, quem acida extin-

extinguunt, alcalia reducunt, corroborare annifus est; at parum hoc loco vel nihil argumentum istud probare arbitror. Acida enim et alcalia colores corporum, sive sal acidum, sive alcalicum, sive neutrum in mixtione sua reconditum gerant, facillime mutant, et facile pariter alcalia colores, ab acidis destructos, reducunt, et vice versa; adeoque solida, me sentiente, ad huius vel illius salis inhaesionem conclusio non semper inde formari potest. Allegatum HERMANNI argumentum eiusdem pene valoris esse videtur, ac si dicerem: Salia acida sanguinem et lac animantium coagulant, alcalia fixa autem utrique fluiditatem reddunt, ergo in lactis et sanguinis mixtione naturali sal alcali fixum delitescit. Non dico caeteroquin, acidorum et alcalium miscelam principiis corporum detegendis plane ineptam esse, sed hoc loco duntaxat nego, experimentum laudatum, ob sinistram adplicationem, ad confirmandam HERMANNI hypothesin quicquam conferre.

§. IV.

Secundum mea examina hoc lignum largiori *substantia resinosa*, quam *gummea*, instructum est, *olei essentialis aetherei* autem valde parum continet. Virtus medica utrique quidem principio fixo, magis tamen gummeo, quam resinoso, tribuenda est. Infusum aquosum primum, colore fusco, sapore amaro, ac paullulum aromatico, et odore, mixti piperis ac croci odorem quodammodo aemulante, gaudet. Extractum, post blandam evaporationem relictum, ex una ligni uncia binos circiter scrupulos pendet, et brunnei pariter coloris est, ad nigrum nonnihil vergentis, odoris debilis balsamici, saporis amari et subadstringentis. Tinctura spirituosissima prima, colo-

colore rubro-nigricante praedita, odorem, instar radicis levistici, balsamicum quidem, ast longe debiliorem ac paullulum nauseosum, spirat, et amaricantem, subacrem, ac blande balsamicum saporem obtinet. Extractum spissatum nigro colore est, et debilissimum duntaxat odorem balsamicum naribus, debilemque saporem amarum, balsamico et subadstringente mixtum, linguae imprimit. Valde praeterea, picis propemodum aut cerae flavae instar, tenax est, et ex uncia ligni integra ad unam circiter atque dimidiam drachmam pondere adscendit. Residuum siccatum, secunda vice cum aqua simplici digestum, tincturam quidem fusco-flavescentem suppeditat, insipidam tamen, inodoram, et nullius amplius virtutis. Eiusdem quoque conditionis massa condensata est, licet gravitate sua adhuc drachmam semissem superet.

§. V.

Operationem suam hoc lignum in corpore partim abstergendo leniterque stimulando, partim subadstringendo absolvit, et laxantibus ideo, aperitivis ac diureticis accensendum est. Conducit maxime in hydrope ascite, suppressione urinae, nephritide sabuloso-pituitosa et calculo, immo usus eius internus ad scorbutum quoque curandum et vermes intestinorum necandos extendi potest. Vulgo in infuso aquoso aut vinoso praescribitur, prius tamen solummodo urinam pellit, posterius vero, teneriori simul substantia resinosa impraegnatum, praeter diuresin, blandam pariter catharsin excitat. Dosis pro subiectorum ac scopi diversitate quidem variat, apud adultos tamen plerumque a drachma una ad unciam semissem adscendit.

CAP. XXX.

De Ligno Santalo rubro.

§. I.

LIGNVM SANTALVM RVBRVM OFF. grave est, compactum, insipidum fere et odoris plane expers, colore foris obfcure rubro, ac nigrum subinde inclinante, intus rubro dilutiori vel intense etiam rubro. Arbor, cuius medullium esse dicitur, in Golconda, Coromandeliam, aliisque Indiae Orientalis tractibus crescit, et incolis *Pantoga* nuncupatur. Flores papilionaceos fructusque siliquosos ferre traditur, quoad reliquum vero crescendi modum ac formam parum adhuc nota est.

§. II.

Constat ex *partibus terreis, resinosis ac gummeis*. Moleculae terreae maximam eius partem constituunt, et sex ferme drachmas in una ligni uncia pondere suo aequant. Hisce, tum quantitatis, tum virtutis intuitu, primum resinosae, deinde gummeae, succedunt. Ex uncia enim una circiter drachmae duae extracti primi spirituosius, et totidem solummodo scrupuli, aut integra etiam drachma extracti primi aquosi colliguntur. Infusum aquosum colore quidem rubro obscuro tinctum cernitur, nullum tamen odorem, nullumque saporem singularem obtinet. Massa spissata rubro-nigricans parum quoque activa est debilem tamen saporem falso-subadstringentem linguae imprimit. Tinctura spirituosius prima, saturato pariter et obscuro colore rubro donata, lenissimam atque obtusam

adstrictionem sub degustatione in lingua excitat, et eiusdem quoque conditionis extractum post evaporationem relinquit. GEOFFROY huic ligno *sal essentielle acidum, oleum spissum, aqua gravius, exiguum satis volatilis portionem et multam terram* tribuit (f). Circa terrae copiam facile consentio, reliqua autem principia, quae in naturali mixtione nunquam demonstrari poterunt, simpliciter nego. Confundit hic ligni santalini species, et lignum santalum rubrum minus recte cum santalo citrino, quod longe alia principia continet, eodem loco collocat.

§. III.

Scriptores rerum medicarum huic ligno ut plurimum vires refrigerantes et adstrictorias adscribunt, et usum eius in febre hectica aliisque morbis, ad cohibendos sudores colliquativos, refrenandumque humorum orgasmum commendant. Sed nescio fane, an, praeter virtutem subadstringentem, ulla alia eidem competat, et cum haec quoque non adeo magni momenti sit, nihil omnino, vel valde parum ab interna eius exhibitione in memoratis similibusque adfectibus sperandum erit. Praescribitur in decocto, infuso vinoso, et subinde pariter, quanquam satis inepte, in pulvere, nec raro praeterea ad tinturas colorandas adhibetur. Externe rasura, citra ullam tamen utilitatem, epithemata sicca temperantia et anodyna, fronti in febribus ardentibus adplicanda, ingreditur.

CAP.

(f) In *Mat. med.* Tom. II. pag. 242.

CAP. XXXI.

De Sanguine Draconis et Succo Acaciae.

§. I.

SANGVIS DRACONIS OFF. *Drachenblut*, est concretum resinofum, ficcum, durum, friabile, ad ignem facile liquefcens, inflammabile, obscure rubrum, faporis et odoris nullius fingularis. Varias eius venduntur fpecies, quarum plurimae vel fpuriae, vel valde tamen ignobiles funt; quare illa fpecies femper ad ufum medicum eligenda eft, quae, in pulverem trita, fanguineam rubedinem oftendit, nullasque, vel fal- tim pauciffimas, quifquillas lignofo - corticales continet; reiiciendae autem, quae contritae bo- lum Armeniae, aut lateres contufos colore re- ferunt.

§. II.

In variis regionibus et ex diverfis quoque ar- boribus fanguis draconis colligitur; prae reli- quis tamen quatuor fequentes illum foenerari dicuntur. Prima, in Infulis Canarienfibus, la- maica, et Madagafcar luxurians, a CLVSIO et C. BAVHINO *Draco arbor*, a COMMELINO *Pal- ma prunifera foliis Iuccae* live *Tuccae* dicitur: fe- cunda, quae in Amboina aliisque Indiae orien- talis tractibus reperitur, KAEMPFFERO *Arundo farcta*, feu *Palma conifera fpinofa* (g), aliis *Pal- ma pinus*, *Palma Amboinensis*, Indis Rottani *Dfje- renang* audit: Tertia in Infula Iava crefcit, et a COMMELINO *Draco arbor filiquofa*, populi fo- lio, *Angfana* vel *Angfava Iavanenfibus* dicta, ap- pellatur, et quarta denique, Novae Hispaniae

M m 2

inco-

(g) In *Amoenit. exot.* pag. 552. et 554.

incola, ab HERNANDEZIO (h), *sanguinis arbor*, ab Americanis *Ezquahuitl* vocatur.

§. III.

Medicamentum admodum debile est, nullasque vires, nisi subadstringentes ac leniter incrasfantes, possidet. Quando per se in pulvere exhibetur, ad sanguinem transire nequit, sed actionem suam solummodo in prima culina exercet, quoniam solo spiritu vini, minime autem aqueis menstruis, solvitur. Et inde etiam facile patet, quod virtus adstrictoria et travmatica, quam illi, in substantia oblato, plerique in ulceribus viscerum, gonorrhoea, haemoptysi, aliisque haemorrhagiis tribuunt, prorsus imaginaria sit. De tinctura spirituosam paullo aliter sentio, licet huic etiam non adeo singularis activitas tribuenda veniat. Additur pulvis pilulis quoque et electuariis. Dosis a granis aliquot ad scrupulum unum, quin drachmam semissem, adscendit. Externe emplastra styptica ac vulneraria, contra hernias, fracturas ossium etc. usurpanda, nec minus pulveres dentifricios similisque fere usus electuaria ingreditur.

§. IV.

SVCCVS ACACIAE OFF. sive *Acaciae verae* r. b. est inspissata massa mere gummea, dura, compacta, in ore lentescens, colore foris fusco aut nigricante, intus rufescente aut subrufo-nigricante, sapore primum subdulci, postea austriusculo adstringente, odore nullo. Ex Aegypto et Arabia adfertur, ibidemque ex siliquis immaturis *Acaciae memoratae*, sive *Acaciae folio* scor-

(h) In Plantarum, Animalium etc. Mexicanorum Historia.

scorpiodis leguminosae C. B. exprimitur. Spiritus vini illi nihil eripit, nisi paucissimas saltim particulas tingentes, in aqua vero, accedente blanda digestionem, prompta atque totalis solutio eius contingit. Militat inter medicamenta incrassantia ac modice adstringentia, et contra vomitum itaque, imbecillitatem ventriculi, profluvia alvina, diabetem, gonorrhoeam benignam, haemorrhagias etc. subinde praescribitur. Datur a granis aliquot ad drachmam semissem sub forma varia, optime tamen inter pilulas recipitur. Externe emplastrorum glutinantium ac consolidantium ingredientia auget.

CAP. XXXII.

De Granis Chermes et Coccionella.

§. I.

GRANA CHERMES sive KERMES OFF. *Kermes- oder Scharlach-Beeren*, alias etiam *Grana tinctoria*, *Grana insectoria*, *Cocca Baphica* etc. nuncupata, folliculi sunt rotundi, membranacei, pisi magnitudine, laeves, splendentes, minutissimis atque rubentibus ovulis vel animalculis, sensim in vetustioribus in materiam pulverulentam fatiscentibus, repleti, coloris rubro-fusci, odoris debilis non ingrati, saporis subacris, amaricantis et in recessu paullulum quoque adstringentis.

§. II.

Adferuntur ex Italia, Hispania, Lusitania et maxime ex Gallia Narbonensi, ubi hinc inde, praesertim circa Monspelium, Nemausum et Avionem, uberius eorum proventus observatur.

Foliis et surculis tenerioribus pumilae cuiusdam arbusculae, quam C. BAVHINVS *Ilicem aculeatam cocciglandiferam*, alii *Ilicem cocciferam*, *coccigeram*, *aquifoliam*, appellant, adnata cernuntur; non fructus tamen ilicis sunt, neque naturales aut praeternaturales excrescentiae, sed singularia potius animalcula, quae firmiter adhaerent, et, praevia notabili formae mutatione, ovulisque depositis, tandem moriuntur et exsiccantur (i).

Colle-

- (i) Placet prolixiorem horum animalculorum descriptionem ac paullatinae accretionis rationem, quam GEOFFROY ex *Dn. de REAUMVR Historia Insectorum* defumfit, et in *Materia medica*, Tom. II. pag. 783. communicavit, hoc loco subnectere. „Sagacissimus, *inquit*, naturae arcanorum scrutator D. de REAUMVR, quo diligentiore accuratioresque reperire est neminem „detexit tandem Coccum infectorium infecti quoddam esse genus illorum ex familia, quae Gallo- „insecta (vulgo Gall-insects) ipsi dicuntur. In „huius cocci accremento tria cum Emerico Aquise- „xientiensi Medico tempora distinguit. Ineunte „Martio animalculum quoddam femine Milii mi- „nus, Millepedarum forma oblongo-ovata, ver- „sus caudam paullo acutiore, parte supina con- „vexum, rubrum, punctulis plurimis aureis in- „cantibus insignitum, et rugis aliquot transversis „distinctum, sex donatum pedibus, duabus an- „tennis, facile mobilibus, et totius corporis lon- „gitudinem fere aequantibus, oculis nigris et du- „plici cauda immobili eiusdem cum corpore lon- „gitudinis, ilicis trunco, ramis et foliis adhaeret, „ibique torpidum et immobile fit, et sensim intus „mescit. Si tunc temporis in ilice ope microscopii

„pii

Collectio mensibus Maio et Iunio, ante solis ortum, instituitur, annisque calidioribus largior longe, quam frigidioribus, deprehenditur. Postquam provide detracta sunt, aceto consperguntur, ne inhaerentium animalculorum iactura fiat, posteaque soli, ut sicca evadant, aliquamdiu exponuntur.

M m 4

§. III.

„pii animalculi corpus observetur, dum intumescit, coccineum apparet punctulis aureis nitens, tomento quodam involutum albicante, quod in quibusdam dorsi locis, sub ventre et circa ventrem in floccos erigitur, ac nidi speciem repraesentat. Dorsum in haemisphaerium multum intumescit rugosum, et in anteriore corporis parte capitis vice protuberantiae tres percipiuntur, media crassior subrotunda, duae laterales exiliores et versus mediam incurvatae. Alterum accretionis tempus est circa mensem Aprilem; tunc animal prorsus mutatum Pisi figuram et magnitudinem aequat. Eius membrana seu cutis firmior est, et tomentum, quod initio fasciatim tantum in eius cutim nascatur, totam grani superficiem pulvisculi ad instar tegit; tuncque non amplius animalculum, sed folliculus videtur sanguine pallido et seroso repletus. Circa Maii medium vel finem, tertium occurrit tempus, quo in interiore folliculi parte sub animalculi ventre tenuissima reperiuntur granulata ovata, seminibus Papaveris albi dimidio circiter minora, colore pallide rubentia et punctulis aureis distincta. Constant ex membrana tenui, candida, pellucida et liquore pallide rubente. Duo millia circiter in singulis folliculis continentur. Prioris animalculi ovula sunt, ex quibus

§. III.

Copiosam haec grana ac valde activam *substantiam fixam*, tam *resinosam*, quam *gummeam*, *tenerrimis particulis volatilibus odoratis salino-inflammabilibus* praegnantem, in mixtione foveant; resinosa tamen virtute gummeam nonnihil antecellit. Infusum aquosum primum, eleganti ac saturato colore rubro tinctum, odorem nauseosum et specificè balsamicum emittit, ac satis amarum, paullulumque in recessu adstringentem, saporem obtinet. Evaporando spissatum massam largitur inodoram, rubro-nigricantem, quae infusum amaritiae et adstringendi facultate superat, ac binas circiter drachmas, totidemque scrupulos ex uncia una pendet. Tinctura spiritiuosa prima, odore nauseoso, et balsamico-amaricante atque austeriusculo sapore donata, sese pulchra pariter rubedine commendat. Odor specificus ac plane singularis sub evaporatione intenditur,

„quibus excussis prodeunt eiusdem generis animal-
 „cula prorsus similia, quae per ilicis ramos ac fo-
 „lia vagantur, donec Vere sequenti ad trunci ra-
 „morumque divisiones sedem figant suos foetus
 „editura. Dum hoc animalculum seu Kerimes ad
 „debitam magnitudinem intumescit, tunc ventris
 „cutis seu corporis pars prona intus circa dorsum
 „convellitur, et vacuum quoddam spatium inter
 „ventrem et tomentum, cui insidebat, relinquit:
 „sicque Millepedae semiconvolutae similis fit.
 „Hoc in spatio vacuo ovula sua deponit: quo
 „facto animal moritur et exsiccat. Excussis ovu-
 „lis, aliquamdiu sub matris cadavere delitescunt:
 „deinde in lucem prodeunt, pabulum in foliis
 „quaesitura, non rodendo, ut erucæ, sed illorum
 „succum proboscide sugendo etc.,

ditur, et magis successive magisque gratus evadit, ita tamen, ut specificum suum genium, quem verbis describere nequeo, retineat. Massa spissata saturate rubra gratum odorem balsamicum, quasi melleum, spirat, et balsamico-amaro simulque austero, fortius adstringente, sapore pollet. Quantitate praecedenti extracto aquoso primo parum cedit, duasque circiter drachmas et semissem pondere attingit.

§. IV.

Principium *salinum*, quod in mixtione hospitatur, duplicis generis est, alterum nempe *acidum*, alterum *urinofum*. Hoc substantiam gummeam ingreditur, et animalis prosapiae est, illud vero ad formandam substantiam resinofam concurrat, suamque originem e regno vegetabili trahere videtur. Acidi, cum substantia oleoso-inflammabili et terra arctius combinati, praesentiam non tantum sapor austerus, sed color quoque atramentosus prodit, qui subito nascitur, quando grana Kermes cum solutione vitrioli martis aquosa coquuntur; urinofi vero inhaesionem destillatio eorum sicca quodammodo manifestam reddit. Ex libra enim una granorum recentium, uti GEOFFROY, experientia sua edoctus, refert (k), praeter phlegma copiosum, oleumque, primo citrinum atque fluidius, postea spissius, butyrosus, rufescens, magis empyreumaticum, quae nullas salis acidi notas praebent, drachmae sex salis concreti, sive sicci urinofi prodeunt, ex massa relicta vero, seu capite mortuo nigro nihil prorsus salis fixi lixiviosi, (vel, secundum MARSILII observationem, triginta circiter grana) aqua extrahi possunt. Me

M m 5

qui-

(k) L. cit. pag. 788.

quidem non latet, aliquam, eamque potiore, salis urinosi partem ignis sicci ac violenti progeniem esse, ast totam eius molem sub destillatione demum generari, vero parum simile videtur. Corpora enim, quae unice ex terra, oleo, et sale acido componuntur, longe minorem ordinario salis sicci urinosi, noviter producti, quantitatem largiuntur, et in reliquis eductis aliqua ut plurimum acidi vestigia supersunt. Non credendum praeterea est, laudatum sal urinosum quoad omnes particulas intimam arctissimamque cum terra et oleo unionem subire, sed, multum adhuc explicitum et gummeo-resinosi moleculis solummodo interiectum esse, singularis infusi et extracti, tam aquosi, quam spirituosi odor urinoso-balsamicus, nec minus peculiaris stimulandi virtus probant.

§. V.

Partim abstergendo, resolvendo et discutiendo, partim stimulando et subadstringendo haec grana in corpore operantur, suumque ideo locum, quem haecenus inter nervina, cephalica, cardiaca, stomachalia, diuretica et aphrodisiaca occuparunt, egregie tuentur. Vsus eorum specialis ad varios morbos extendi potest, frequentius tamen contra melancholiam et epilepsiam idiopathicam, vertiginem, lipothymiam, palpitationem cordis, vomitum, obstructionem urinae, fluxus menstrui et lochialis, cachexiam, oedema membrorum, lenteriam, coeliacam etc., nec minus ad memoriam confortandam et abortum praecavendum, sub forma pulveris, a granis aliquot ad scrupulum unum, sub forma infusi vinosi autem a drachma dimidia ad integram, exhibentur. Frequentissime etiam pulverisata pilulas,

lulas, bolos et electuaria ingrediuntur. Ex recentibus, praevia contusione in mortario marmoreo, succus exprimitur, et defaecatus cum aequali vel tripla sacchari albi quantitate ad syrupi consistentiam redigitur. Hic ipso pulvere non gravior solum, sed etiam praestantior iudicatur, quoniam minori pollet stypticitate, quae in folliculis membranaceis praecipue residet, et magis ex adverso volatilibus particulis urinoso-balsamicis, praesertim si nullus ignis sub inspissatione, sed simplex tantum cum saccharo miscela accesserit, impraegnatus reperitur.

§. VI.

Cum granis infectoriis maioribus GRANA TINCTORIA MINORA AMERICANA sive GRANA COCCINEA INDICA, vulgo *Coccionella*, *Cochinilla*, *Cocciniglia* etc. appellata, ad eundem censum referri merentur. Asportantur haec animalcula exsiccata, ad cimum species revocanda, ex Peru, Mexico, Brasilia, insulis Antillanis, pluribusque Americae calidioris regionibus, ubi maxime in *Opuntiae* foliis, quam SLOANE *Opuntiam maximam, folio oblongo rotundo, maiore, spinulis obtusis, mollibus et innocentibus obsito, flore striis rubris variegato* (1), Americani autem *Tunam* et *Nopal* vocant, victum quaerunt. Secundum GEOFFROY descriptionem (m), insecta ovata sunt, pisi exigui magnitudine, vivipara, hexapoda, proboscide, qua succum plantarum exsugunt, instructa. Plantis, ubi semel sedem fixerunt, immobilia adhaerent, nec ulli mutationi obnoxia reperiuntur. Post collectionem et exsiccationem non insecta amplius, sed grana irregu-

(1) In *Hist. nat. Iamaicae*.

(m) *L. cit. p. 791.*

gularis figurae, hic convexa, alibi compressa aut concava, striis transversis quasi rugosa, coloris intus ad purpureum inclinantis, foris atro-rufi, aut leucophaeo-cinerei, obscure rubro paullulum permixti, referunt, situmque redolent, et linguae saporem mucido-acriusculo-amaricantem et sub adstringentem imprimunt.

§. VII.

Salivam tepidamque aquam haec grana atropurpureo, spiritum vini saturate rubro amoenissimo colore tingunt; manifesto documento, *mucilagineas* non minus, quam *resinosas* adesse moleculas, ita tamen invicem mixtas, ut menstruo utroque potissimam partem extrahi possint. Vncia enim dimidia drachmas tres extracti aquosi primi, et drachmas duas ac quinquaginta circiter grana extracti spirituosi primi largitur. Infusum aquosum, quod sapore amaricante lenissimeque adstringente est, situmque redolet, valde crassum mucilagineum deprehenditur; hinc quoad aliquam duntaxat partem chartam bibulam transit, reliquum vero per linteum blande exprimendum est. Massa spissata purpureo nigricans rob sambuci odore aemulatur, et mucilagineo-amaricantem saporem obtinet. Tinctura spirituosissima prima colore saturate atque elegantissime rubro, et singulari sapore subacri atque balsamico-amaricante gaudet, odore autem solum fere vini spiritum prodit. Extractum condensatum sanguinea rubedine tinctum cernitur, odorem singularem, eumque ingratum balsamicum, spirat, et balsamico-amarum ac modice adstringentem saporem possidet.

§. VIII.

§. VIII.

Commendantur contra eosdem fere morbos, in quibus grana Kermes prodesse dicta fuerunt; hisce tamen virtute adstrictoria longe inferiora, stimulantem autem superiora sunt, quare urinae etiam fluxum potentius cient, sabulumque renum atque vesicae validius pellunt. Per se, rarius tamen, a granis aliquot ad scrupulum semissem, exhibentur, et saepius adhuc aliis medicamentis, pulveribus nempe, pilulis, electuariis, immo subinde infusis vinosis modica quantitate adduntur. Apud gravidas, quibus, abortu imminente, grana Kermes, provide usurpata, ob mediocrem virtutem adstrictoriam, subinde auxilium ferunt, a coccionellae usu penitus abstinere praestat, quoniam eminentior stimulandi facultas magis, quam apud grana chermes, suspecta est.

CAP. XXXIII.

De Millepedis et Lumbricis terrestribus.

§. I.

MILLEPEDAE, alias etiam *Millepedes*, *Aselli*, *Porcelli*, *Centipedes*, appellati, *Keller-Würmer*, *Keller-Esel*, *Keller-Schaben*, insecta terrestria sunt, exangia, non alata, vix digitum transversum longa, et semidigitum circiter crassa. In capite parvae antennae prominent, corpus in superna parte subrotundum et in marginis peripheria serrae instar dentatum, in inferna autem planum est, ac pedibus utrinque septem instructum reperitur. Cutis, quae in ventre albicantem, in dorso variegatum, lividum nempe, cinerum, ac nigricantem colorem obtinet, duriuscula

cula ac quasi lamellosa est, et ex novem articulis inaequalibus, quibus sese in orbem contrahere possunt, constat. Vivunt communiter in cellis subterraneis aliisque locis humidiusculis atque uliginosis, inter rimas itemque parietum, sub lapidibus, vasis aquariis, in medullis arborum exesis etc., ibidemque solo humore putridulo vitam suam sustentare videntur. Captae et ab omni immunditie purgatae, vino albo humectantur, ac leniter siccatae ad usum servantur.

§. II.

Praeter partes terreas, substantiam resinoso-mucilagineam, fixiori sale salso et subtili pariter atque volatili acriusculo modice impraegnata, in mixtione sua continent. Sal fixum, pro diverso habitationis atque capturae loco, *nitro*, nunc *emprionato*, nunc *murario*, et quoad partem quoque *sali culinari* analogum esse videtur, volatile acriusculum autem *urinosae indolis* est. Infusum eorum aquosum, quod semper turbidum manet, ac pallide luteo colore est, odore suo ingrato decoctum tepidum rasurae cornu cervi, vel potius aquam saponaceam lotricum aemulatur, et saporem nauseosum mucilagineum, lenissimo ac vix sensibili acriusculo remixtum, possidet. Nunquam totum per chartam bibulam sponte transit, sed tertia ad minimum pars eius vi aliqua exprimenda est. Massa, post absolutam aquae evaporationem superstes, colore subflavo-brunneo, odore nauseoso ac sapore subsalfo-amaricante gaudet et ex duabus millepedum drachmis quinquaginta circiter grana pendet. Infusum spirituosum pellucidum ac pallide aureo colore tinctum cernitur, odorem spirat solius spiritus vini, et degustatum quoque eodem non-nihil

nihil tantum acrius deprehenditur. Extractum, blanda evaporatione et inspissatione inde paratum, pallide ac sordide viridiusculum est, et saporem nauseosum mucilagineum atque subsalsum, cui initio lenissima quaedam amarities, deinde autem subtilis acredo iuncta sentitur, obtinet. Ex drachmis millepedum duabus octodecim circiter grana impetravi. Circa volatile caeteroquin principium salinum acriusculum paucis adhuc notandum venit, in millepedis vivis et recentius occisis multo istud copiosius, quam in siccatis, praesertim vetustioribus, hospitari, adeoque plus etiam auxilii a vivis, in mortario confusis et confestim vino Rhenano infusis, posteaque per linteum expressis, quam ab exsiccatis ac pulverifatis, expectandum esse.

§. III.

A plerisque Materiae medicae Scriptoribus animalculis hisce vires incidentes, resolventes, aperitivae ac diureticae tribuuntur, et pulvis itaque eorum, nec minus infusa vinosa et succus, post infusionem aut trituram cum vino expressus, in viscerum obstructionibus, atrophia mesaraica, ictero, hydrope ascite, suppressione urinae, nephritide pituitoso-sabulosa, cataracta incipiente, pluribusque morbis valde commendantur. Sed, quam inanis saepe hominum spes est! in separatim sane principiis constitutivis nullam singularem virtutem deprehendi, nec quicquam etiam ipsa observatio practica mihi suppeditavit, quod labascentem fiduciam meam rursus erigere potuisset. Relinquam interea remedium hoc patronis suis, et adhuc breviter solummodo indicabo, millepedas utplurimum in pulvere a granis aliquot ad scrupulum integrum, in infuso vinoso a drachma

ma una ad duas, et succum denique antea memoratum a drachma dimidia ad integram adultis exhiberi.

§. IV.

Cum Millepedis LUMBRICI TERRESTRES multa communia habent, et, praeter partes terreas inertes, nihil quoque activi, nisi solam substantiam mucilagineo-gelatinosam, paucò ac debili principio salino acriusculo urinosae indolis remixtam, possident. Post collectionem vino abluuntur, ac debite postmodum siccati et in pulverem redacti, contra adfectus convulsivos, arthritidem, hydropem et urinae suppressionem, a granis aliquot ad scrupulum semissem, cum aliis adpropriatis exhibentur, vel succus etiam, e vivis, in mortario contusis, expressus, a drachmis duabus ad unciam dimidiam, cum vino aut aqua quadam destillata propinatur: At iuste pariter dubito, an effectus singularis atque notabilis ab usu eorum in morbis memoratis expectandus sit? Externe digitis, panaritio correptis, adplicantur, et tam diu relinquuntur, donec emoriantur. In Officinis varia inde praeparata prostant, quae, si spiritum urinosum et eiusdem naturae sal volatile siccum exceperis, parum quoque virtutis obtinent.





SECTIO XVI.

DE SICCIS SVLPHVREIS,
MERCVRIALIBVS, SVLPHVREO-
MERCVRIALIBVS, SVLPHVREO-
REGVLINIS ET METALLICIS,
SEMIMETALLICIS AC TER-
REIS MARTIALIBVS.

CAP. I.

De Sulphure vulgari minerali.

§. I.

SVLPHVR VVLGARE five COMMVNE OFF.
est concretum minerale salino-inflammabi-
le, durum, siccum, pulverisabile, in massas
oblongas cylindraceas ordinario condensatum,
coloris subflavi, citrini, aut subviridi-flavescentis,
saporis et odoris, nisi accendatur, aut igne
liquefiat, aut fortius in mortario teratur, nul-
lius evidentis. Occurrit etiam sulphur rubel-
lum, rubrum, flavo-rubescens, ac gryseum; ast
nunquam hae species, ob partium arsenicalium
aut terrearum miscelam, usui medico serviunt.

§. II.

Vulgo a Scriptoribus, quanquam pro meo
iudicio satis incongrue, in *nativum* et *fæctitium*

dividitur. Nativum, plerumque *sulphur vivum* nuncupatum, vel *purum* omnino est, vel *impurum*. Hoc in Islandia, Italia et alibi locorum e fodinis sulphureis, vel etiam circa montes ignivomos eruitur, et variis recrementis terreis, arenosis, lapideis aliisque permixtum est, adeoque depurationem, antequam in usum trahi possit, postulat; illud vero, in Hungaria, Insula Cypro etc. subinde obvium, purum ac semidiaphanum existit, et colore citrino, aurantio, aut rubro gaudet, quae rubedo tamen sulphuri proprie non competit, sed unice ab admixta substantia arsenicali deducenda est; hinc quo intensior adest rubedo, eo maior arsenici quantitas inhaeret, ita ut sulphur saturate rubrum magis rubri arsenici, quam sulphuris, species, aestimandum sit. Sulphur factitium, quod in Pharmacopoliis nostris potissimum venale prostat, alibi, Goslariae v. g. eliquatione, alibi, in tractu v. g. Misniae montano, sublimatione, ab HENCKELIO in *Pyritologia* sua uberius descripta, e pinguibus pyritis martialibus aliisque marcasitis metallico-sulphureis separatur. De *gryseo Sulphure caballino*, cuius hinc inde etiam in libris mentio fit, nihil singulare dicendum invenio, quoniam quicquiliis terreis scatet, nec unquam ideo apud homines medico usui impenditur, sed a veterinariis subinde tantum equis, unde etiam cognomen suum accepit, exhibetur.

§. III.

E binis solummodo principiis, arctissime invicem unitis, ex *tenera* nimirum *substantia inflammabili*, et *acido minerali primo ac ponderosissimo*, quod vulgo *acidum vitriolicum* vocatur, sulphur purum

purum componitur (a). Probant dicta syncriseos non minus, quam diacriseos chemicae exempla: Ex sic dicto enim hepate sulphuris, uti alibi pridem (b) fusius retuli, pars inflammabilis, blanda, lenta et aperta calcinatione ita seiungitur, sensimque in auras expellitur, ut solum acidum remanens cum addito alcali fixo perfectum sal neutrum, tartaro vitriolato simillimum, producat, quod rursus tamen, cum adiecto carbonum pulvere liquefactum, pristinam hepatis formam et indolem recuperat. Chymicis quoque noto notius est, ex magmate terreo-resinoso nigricante, post olei et spiritus vitrioli dulcis destillationem relicto, ut et ex oleis, resinis ac pinguioribus gummatibus, cum oleo vitrioli coniun-

N n 2

iun-

(a) HOMBERGIVS sulphuri vulgari minerali, praeter phlogiston et acidum vitrioli, multum quoque terrae simplicis rudioris et pauxillum metallicaе, venereae profapiae, tribuit: Veruntamen sententiam hanc veritati repugnare, et auctorem hunc examine suo, quod in *Commentariis Academiae Scientiarum Parisinae ann. 1703.* descripsit, deceptum fuisse, pronunciare nullus dubito. Nam 1) sulphur impurum adhibuit, et 2) satis magnam olei terebinthinae copiam sulphuri superfudit. Inde quippe non suspicari solum, sed clare cognoscere licet, moleculas cupreas sulphuri impuro non tanquam principia constitutiva naturalia seu potius ordinaria ac necessaria, sed tanquam corpuscula heterogenea, inhaesisse, et nigram quoque terram, quam deinde cum borace in vitrum gryseo-fuscum fusione redegit, maximam partem, quin forsan unice, ex oleo terebinthinae, quod terra abundat, eductam ac separatam esse.

(b) *Tom. I. Sect. I. Cap. VII. §. 7.*

iunctis, ex retorta spiritus sulphurei odoris et sulphureae indolis destillari, quin, decenti adhibita encheiresi, verum sulphur, minerali analogum, sublimari posse. Plura experimenta, quae in promptu habeo, adducere nolo, sed hoc unicum duntaxat addam, acidum in sulphure adesse copiosum, partem phlogistam sive inflammabilem vero, licet sulphur facile flammam concipiat, totumque ea consumatur, exigua admodum quantitate mixtionem ingredi. Secundum satis adcuratam *Domini* BRANDT inquisitionem chemicam quantitas substantiae inflammabilis sese ad quantitatem acidi habet ut 3 ad 50 (c), et NEVMANNVS, cuius adsertum tamen mihi non probabile videtur, in integra sulphuris libra nondum duas drachmas principii inflammabilis reperiri, totamque partem reliquam sal acidum esse, perhibet (d).

§. IV.

Concentrata menstrua lixiviosa sulphur pulverisatum, si coctio fortior ac diuturnior accedat, superficialiter solvunt, aqua autem et spiritus vini nihil illi eripere valent, nisi tenerrimas quasdam particulas inflammabiles, quae in conspicuam tamen molem colligi ac condensari nequeunt. Nam infusum sulphuris tenerrime contriti spirituosum, colore quidem, sapore et odore purum duntaxat vini spiritum refert, nec quicquam etiam, visu cognoscendum, post blandam evaporationem relinquit; vacua nihilominus ac penitus exsiccata concha vitrea, in loco calido adhuc

(c) Vid. *Abhandlungen der Königl. Schwedischen Academie der Wissenschaften*, Band 18. pag. 54.

(d) In *Lect. de Sulphure*.

adhuc detenta, aliquamdiu fatis fortem odorem sulphureum emittit. Odorata eiusmodi effluvia etiam prodeunt, quando sulphur in mortario marmoreo, vel siccum, vel aqua humectatum, aliquamdiu teritur, aut in loco calido, ubi incallescere, minime tamen fluere, aut sublimari possit, collocatur.

§. V.

Clare ex memoratis, uti mihi quidem videtur, constat, minerale hoc concretum, etiamsi sublimatione aut tritura in tenerrimum pulverem redactum fuerit, a succis primae culinae nunquam quoad substantiam fixam crassiores solvi, sed exilissimas tantum atque halituosas quasdam particulas, nullius fere ponderis, nec visu igitur unquam cognoscendas, blanda caloris, liquoris gastrici et ventriculi actione separari, et has solas inhalando ad sanguinem transire, lenioresque in eo vires commoventes ac discutientes exerere posse: An inde autem singulares quoque vires obtundentes, demulcentes, diaphoreticae, sanguinemque purificantes fluant, et sulphuri ideo eiusdemque floribus, sub pulveris forma exhibitis, secundum vulgarem Medicorum traditionem, eminens auxiliandi facultas in phthisi, tussi acri falsa, asthma metallicarum, arthritide, rheumatismo, lepra, scorbuto, scabie aliisque adfectibus competat, iuste dubito. Admitto quidem aliquam demulcendi virtutem in colica saturnina, erosionem ventriculi et intestinorum, morbisque similibus, qui, ab acri materia exorti, praecipuam sedem suam in prima culina habent; quod ista autem in sanguine pariter ac lympham memoratu digna existat, et ad pulmones quoque, asperam arteriam, renes etc. extendatur, vix

memet, aut ne vix, credere posse, fateor, et quamplurima potius, quae de valido sulphuris integri in morbis prioribus effectu, nec minus de sudore, subinde post adsumptionem eius admotum corpori argentum denigrante (e), observata dicuntur, partim inveteratis opinionibus praeiudicatis, partim causae fallaciis niti, immo nonnulla ad mera nonnunquam commenta spectare, arbitror. Vfus externus in ulceribus ichorosis, intertrigine, et scabie, non adeo magni etiam momenti est, immo in morbo postremo, si sulphur cum unguinoso-oleosis, uti moris est, miscetur, et sub unguenti forma adplicatur, creberrime admodum noxius reperitur, quoniam crassa eiusmodi unguenta poros cutaneos obstruunt, et facile igitur excernendae materiae regressum procurant, vel eidem ad minimum occasionem praebent.

CAP.

(e) Sulphur minerale, subdito igne moderato, in vasculo quodam, citra ullam tamen incensionem, liquefcens, argenti politi, desuper aliquamdiu ac propius admoti, nitorem suo quidem halitu minuit, ac tenuem illi colorem nigricantem inducit, similis tamen argenti infuscatio minime accidit, quando sulphur pulverisatum et apto instrumento constanter agitatum, tantummodo in calore, naturali humani corporis calori aequali, quin istum adhuc multum superante, detinetur: Vnde concipere etiam nequeo, quomodo post sulphuris adsumptionem materia corporis halituosa argentum, cuti adplicatum, denigrare possit. Non negabo quidem observationum quarundam certitudinem; at, sulphuris adsumti exhalationes observatae nigredinis causam fuisse, simpliciter nego.

CAP. II.

De Pulvere Lycopodii.

§. I.

PVLVIS LYCOPODII est farina flavescens, subtilissima, levissima, siccissima, inflammabilis, saporis et odoris nullius. Mensibus Augusti et Septembri ex squamosis ac parvis claviculis *Musci terrestres clavati* C. B. cuius in praecedentibus pridem uberior mentio facta fuit, excutitur, et a plerisque etiam *sulphur Lycopodii*, nec minus, quamquam minus recte, *semen Lycopodii* appellatur.

§. II.

Tenerrima haec substantia pulverulenta singularis plane naturae est, et ex *terra* tantum et *subtili materia oleoso - inflammabili* componitur; quemadmodum haec observationes et experimenta subiuncta uberius docebunt:

- I. Menstrua aquea et aqueo - falsa nullum ingressum in hunc pulverem inveniunt, nihilque notatu dignum, licet fortior etiam ac diuturnior digestio accedat, inde extrahunt, sed aqua simplex, aut falsa, filtrum chartaceum limpida transit, ac tota pulveris moles sine conspicua mutatione relinquitur, interioresque chartae bibulae parietes circumquaque obducit. Si quantitate etiam sufficienti aquae frigidae inspergitur, densa molecularum aggregatione ac cohaesione pinguem quasi cuticulam in superficie format, ita, ut digitus intrusus citra humectationem ad fundum usque immergi possit.

II. Spiritus vini rectificatissimus sub blanda digestionem tenuem quidem colorem flavescen-tem consequitur, post filtrationem nihilo- minus et evaporationem plenariam, nil, nisi tenerimum duntaxat pulvisculum, cuius pondus, nisi magna pulveris lycopodii quan- titas adhibita fuerit, ob molem exiguam determinari nequit, in fundo vasis relinquit.

III. Aquae stygiae initio innatat, aut potius supernatat, deinde autem digestionem nimi- rum advocata, atque frequenti simul vitri motitatione suscepta, maximam partem ad fundum descendit, nullam singularem tamen solutionem aut extractionem patitur. Nam liquor, aqua simplici debilitatus ac postea filtratus, aquae purae limpидitate gaudet, et, instillato demum oleo tartari per deli- quium, debilem flavedinem induit, paullu- lumque turbidus redditur. Die sequenti pristina pelluciditas restituta, immo aucta, cernitur, et color dilute aureus est, in fun- do autem tenerima materia albicans salino- terrea, sensim sensimque praecipitata, in conspectum venit, quae, liquore decanta- to, exsiccata, colorem albido-flavescen-tem, debilemque saporem falsum obtinet. Sedi- mentum hoc aqua simplici quoad aliquam partem denuo solvitur, eidemque subflavum colorem conciliat, pars rudior albicans ter- rea autem in fundo indissolubilis remanet.

IV. Lixivia concentrata, ex alcali fixo pa- rata, parum quoque huic pulveri eripiunt, et pallida tantum flavedine post digestio- nem et filtrationem tincta conspiciuntur, nihil-

nihilque propemodum, instillato liquore acido, ad fundum dimittunt.

V. Nitro fluenti iniectus moderatam detonationem subit, et confestim etiam, flatu per angustam fistulam versus candelae flammam propulsus, accenditur, tantaque celeritate consumitur, ut fulguris illustrationi physicae inserviat; in carbone candente autem nunquam flammam concipit, sed partim in fumum, partim in carbonariam atque terrestrem materiam convertitur.

VI. Per se in crucibulo exustus non accenditur, sed copiosum tantummodo fumum aliquamdiu eructat, et fortem foetidumque odorem oleoso-empyrematicum, aequae ac candela sebacea imperfecte extincta, diffundit. Materia nigra, carbonaria, pulverulenta, fumo cessante, relicta, odore et sapore caret, ac dimidiam ferme pristini ponderis partem explet.

VII. Sub destillatione sicca, teste NEVMANNO (f), notabilem olei empyrematici quantitatem reddit, et copiosum pariter caput mortuum terreum in retorta relinquit.

§. III.

Collocatur vulgo inter medicamenta demulcentia, anodyna et sedativa, auxiliumque non spernendum, ab aliquot scilicet granis ad scrupulum integrum exhibitus, in epilepsia, dolore nephritico, erosione ventriculi et intestinorum, torminibus ventris et cardialgia infantum, tussi falsa et scorbuto ferre creditur: An memoratae autem virtutes rationi respondeant, nec ne,

N n 5

atten-

(f) In *Praelect. chemico-pharmaceut.* pag. 913.

attentos ex praemissis experimentis facillime cognituros, spero. Ego sane lubentius negantium, quam adfirmantium sententiae, non simpliciter tamen, sed cum aliqua limitatione, subscribam. Probabile nimirum mihi videtur, pulverem hunc demulcendo et obtundendo boni quidquam in torminibus ventris, similibusque ventriculi et intestinorum morbis praestare posse; quod in reliquis autem, quorum causa in sanguine, lymphâ, et visceribus partibusque, a prima culina remotis, latet, salutarem effectum edere valeat, adserere nolo, quoniam nulla eius in ventriculo solutio, nec singularis quoque extractio contingit, et parum itaque vel nihil activi ad humores circulantes penetrat. Potestas demulcendi sub ad- et inspersione externa certior est, et usum eius in intertrigine igitur et ulceribus ichorosis praecipue suadendum esse, arbitror.

§. IV.

Eiusdem naturae atque virtutis etiam *Pulvis ille flavescens* est, qui in IVLIS CORYLORVM, ALNORVM etc. nec minus in STROBILIS TENELLIS PINI et ABIETIS reperitur; prae reliquis tamen pulvis Iulorum coryli aestimatur, et in epilepsia imprimis pulveri lycopodii, quamquam sine ulla ratione, praefertur.

CAP. III.

De Mercurio vivo.

§. I.

MERCVRIVS VIVVS, *Mercurius currens, Argentum vivum, Hydrargyrum*, est corpus semimetallicum, fluidum, siccum, mobilissimum, in

in igne fortiori totum volatile, post aurum ponderosissimum, et argenti instar nitens. Dividitur vulgo in *virgineum* et *vulgarem*: Hic in Hispania, Bohemia, Hungaria, Carnia, regno Americae Peruano et aliis quibusdam regionibus, partim ex cinnabari nativa, partim ex minera, dura, saxea, partim ex gleba fossili molliori, sulphureo - limosa, argillacea etc. destillationis descensoriae ope, separatur et educitur; ille autem in terrae visceribus, quamquam rarius, iam currens reperitur, et in locis, ubi sponte effluit, absque ulla opera alia colligitur.

§. II.

Vera fluidi huius Semimetalli elementa nondum satis detecta sunt, licet multi Chemici varia cum eo experimenta susceperint, ac sedulo in specificum mixtionis modum inquisiverint (g). Parum interea hoc loco referre videtur, an memorata nota sint, nec ne: Mercurius vivus enim in animantium corporibus nunquam radicaliter, hoc est, in partes dissimilares seu constitutivas dissolvitur, sed, in minutissimos tantum globulos homogeneos divisus, vasa corporis intrat ac permeat, tandemque, servata prorsus mixtione pristina, iterum per patula ostiola cutis, glandularum etc. exit.

§. III.

(g) Multum imprimis operae huic scrutinio BOERHAAVIVS impendit, et suscepta examina deinde illustri Societati Regiae Scientiarum Anglicanae communicavit, quae ea *Transactionibus suis* No. 430. Art. 1. No. 143. Art. 9. et No. 444. Art. 2. inferenda curavit. Extat etiam horum experimentorum descriptio in *Promptuario rerum memorabilium Hamburgensi*, Tom. IV. pag. 437. et 510. nec non Tom. V. pag. 69. sequ.

§. III.

Ore adsumtus e ventriculo et intestinis, etiam si fluidum sit mobilissimum, nunquam in vasa lactea ac bibula venosa reliqua transit, sed de novo per alvum, citra ullam formae mutationem et citra ponderis decrementum, excluditur. Per poros cutis autem, seu rectius, per patula orificia vasculorum absorbentium et inhalantium, facillime humores circulantes ingreditur, et ad intimos corporis recessus penetrat, quando forti calore in effluvia resolvitur, vel cum pinguedine, prius in unguentum redactus, tritu aliquamdiu continuato impellitur; quemadmodum prius apud aurifabros, aliosque, qui argentum vivum in igne tractant, posterius apud aegros venereos, inunctione mercuriali curandos, creberrime observare licet.

§. IV.

Salia acida promte recipit, et in corpore proinde impuro non tantum, propter eminentem ponderositatem suam, valide premendo, verum etiam absorbendo, et postea pariter, quamprimum per adhaerentes et arctius unitas partes acidas moleculis globosis magna acredo, quin corrosiva nonnunquam indoles, conciliatur, fortissime stimulando, pungendo et incidendo operationem suam exercet: Vnde ratio quoque facile cognoscitur, cur, hoc vel illo modo usurpatus, in rebelli passione iliaca, lue venerea, eiusdemque prodromis ac symptomatibus, affectibus scabiosis malignioribus, tumoribus glandularum frigidis, cancro occulto, gangliis, tophis, fungis etc. notabile plerumque auxilium ferat, immo in nonnullis, v. g. lue venerea et scabie, specificè prorsus conducat. De virtute anthel-

thelmintica, quam plerique illi tribuunt, multa addere supersedeo, quia satis incerta est. Nam licet mercurius dulcis vermibus valde quidem infestus reperiatur, ab illo tamen nulla ad vivum conclusio valet.

CAP. IV.

De Cinnabari nativa.

§. I.

CINNABARIS, *Zinnober*, est siccum ac ponderosum concretum sulphureo-mercuriale, elegantissima quidem post depurationem et perfectam trituram rubedine, nullo autem odore, nullo sapore praeditum.

§. II.

Triplex cinnabaris species, *nativa* videlicet, *factitia vulgaris*, et *factitia antimonialis*, civitatis pharmaceuticae iura successive adepta est. Triplici huic cinnabaris speciei Chemicorum aliqui adhuc quartam quidem, nimirum *lunae cinnabarim*, addunt, quid? quod, concretum tale cinnabarinum ex omnibus metallis, eadem methodo, mutatis tamen pro metallorum diversitate mutandis, praeparari posse, perhibent: Verum enim vero, haec et reliquae, ex mercurio vivo et putatio metallorum sulphure parandae, cinnabaris species veris concretis cinnabarinis haudquaquam accensendae sunt. Metalla pura enim nullum sulphur perfectum, cum vulgari comparandum, sed longe duntaxat subtiliorem ac simpliciorum substantiam phlogistam in mixtione sua fovant, quae cum mercurio corrente in veram cinnabarim combinari nequit. Memo-

rata igitur producta nihil sane aliud sistunt, nisi mercurium, post solutionem ac praecipitationem igne fortissimo sublimatum, ideoque rubedinem suam et habitum externum cinnabarinum minime unito sulphuri metallico, sed unice acidis spiritus nitri particulis, cum mercurii globulis simul in sublime evectis, iisdemque firmiter adhaerentibus, debent; quemadmodum haec ANDREAS HERMANNVS, *Medicinae Doctor et Practicus Neusoliensis* in Hungaria, experimentis variis abunde demonstravit (h).

§. III.

Cinnabaris nativa, quae hoc loco praecipuum tractationis obiectum constituit, in Carinthia, Styria, Carniola, Bohemia, Andalusia et Biscaia, binis Hispaniae provinciis, nec minus in Hungaria et regno novi Orbis Peruano e terrae visceribus eruitur, vel frustra maiora, minora, puriora, impuriora, aquarum subterranearum impetu avulsa, semelque ad telluris superficiem abrepta, e rivulorum ac fluminum sabulo colliguntur, posteaque, a partibus heterogeneis lotura debite purgata, venduntur. Prope *Sclanum* v. g. superioris Hungariae pagum, ditissimae minerae mercuriales et cinnabarinae reperiuntur, e quibus magna mercurii quantitas quotannis eruitur. Minera effossa terram unctuosam et lapidem varii coloris forma externa refert, et ideo etiam minera mercurii unctuosa, miniata, rubra, grysea, lutea etc. vocatur. Contunditur illa sub peculiaris molendini pistillis, et inde resultans materia unguinoso-sabulosa in focis planis, modice inclinatis et linteo obductis

(auf

(h) Vid. *Annales physico-medici Wratislavienses*, Ann. 1720. pag. 120.

(auf den Plan-Heerde) lavatur, ut aqua, placide per planum foci inclinatum decurrens, terram inertem, aliasque partes leviores heterogeneas secum abducatur, molecule cinnabarinae autem, ob ponderositatem suam inter lintei fibrillas relictæ, colligi et ulteriori postmodum lotura in alveolis depurari queant. Haec cinnabaris nativæ species dicitur *Cinnabaris lota*, ac multum ex ea mercurii, destillationis descensoriae ope, resuscitatur. Multum præterea cinnabaris ibi locorum ab hominibus plebeiis ex rivulis, minerae memoratae vicinis, sabulum extractum in alveolis lavando, colligitur. Occurrunt frusta maiora et minora, sabam persaepe magnitudine superantia, purissima, et rubini instar pellucida, quæ ideo etiam optimam ac pretiosiores cinnabarim nativam constituunt. Rusticorum alii prope rivulorum ripas faciunt foveas, et loturae beneficio ex terra limosa mixta cinnabaris frustula separant, immo sunt, qui grana ac satis magna subinde frusta, hinc inde in nidis latitantia, ex agris eruunt, ac, penitus a sordibus liberata, vendunt (i).

§. IV.

Quoad elementa seu partes constitutivas nihil plane discriminis cinnabaris verae species intercedit, sed cinnabaris nativa pura aequæ, ac cinnabaris antimonii, et factitia vulgaris, ex solo *mercurio corrente* et *sulphure vulgari* ea proportionem composita est, ut cum septem circiter vel octo mercurii vivi partibus unica saltem sulphuris pars firmam cohaesionem subeat. MEYDERVS circa proportionem principiorum valde quidem dissen-

(i) Vid. BRÜCKMANNI *Magnalia Dei in locis subterraneis*, P. I. pag. 201.

dissentit, et quantitatem sulphuris sese ad quantitatem mercurii ut 1 ad 30 habere, perhibet (k): Attamen assensum illi in hac parte praebere nequeo. Vix enim concipere licet, quomodo tam exigua, trigesima scilicet, sulphuris pars tantam mercurii currentis molem ligare et in massam solidam redigere valeat. Nonnulli multa etiam de sulphure solari, quin ipsis auri moleculis tenerrimis in cinnabari nativa Hungarica, non procul ab auri mineris effossa, itemque de sulphure puriori et anadyno vitrioli in antimonii cinnabari narrant; at hae opiniones merito ad fabulas aniles et alchemicorum somnia relegandae sunt. Provoco in hoc passu ad Chemicorum recentiorum examina, immo ad propriam provocare possum experientiam. Maxima sane circumspeditione cinnabaris, tam nativae, quam factitiae utriusque, resuscitationem institui, nihil peregrini tamen, nihil diversi circa separata principia observare mihi contigit, sed forma, colore, caeterisque proprietatibus sibi invicem erant similima. Idem FRIDERICUS HOFFMANNVS testatur, quando ita de sulphuris vulgaris et antimonialis similitudine scribit (l): „Sulphur itaque, ex antimonio hoc modo extractum, quoad omnes proprietates sulphuri vulgari simile est; siquidem illud, cum sale tartari si liquatur, transit in massam rubicundam, ex qua, affuso rectificatissimo spiritu, tinctura, quae a tinctura sulphuris non differt, extrahitur rubicunda. Pariter si hepar solvitur in aqua, et solutioni acetum instillatur, lac sulphuris praecipitatur; cum argento vivo si miscetur, in cinnabarim sublimatur etc.,

§. V.

(k) In *Analyse Antimonii physico-chymica* rat. p. 16.

(l) In *Observat. physico-chymicis select.* pag. 248.

§. V.

Partes sulphureae mercurii interiecti globulos disiungunt, eosdemque, ceu cortex nucleum, ambiunt, et hi sulphuri, tanquam mel cellulis favorum ceraceis, immersi haerent, ut ideo in unam molem coire nesciant, nec quicquam ab extra illos adgredi, corrodere, aut alio modo solvere valeat, nisi, fracto prius atque remoto cortice sulphureo, viam sibi paraverit. Valde igitur cum LEMERIO (m) errare videntur, qui partes sulphuris acidas, relicta parte phlogista, mercurii globulis firmiter adhaerescere credunt. Si id enim fieret, aliqua etiam mercurii corrosio contingere, et cinnabaris necessario saporem aliquem, nec non indolem quodammodo corrosivam nancisci deberet; quod nunquam tamen observatum fuit, sed cinnabaris insipida prorsus et omnis acredinis expers deprehenditur. Cingunt solummodo, uti dictum, integrae sulphuris partes divisos mercurii globulos, et interpolatione sua collectionem eorum in unam molem, nec minus dissipationem halituosam et secessum solitarium in igne fortiori impediunt. Eiusmodi quippe virtus non tantum sulphuri minerali, verum etiam substantiis quibusvis aliis resinosis, pinguibus, unguinosiis etc. propria invenitur, et unicuique notum est, mercurii currentis fluorem tolli per miscelam atque trituram cum unguento pomato, terebinthina et similibus.

§. VI.

Cinnabaris, ut ut in pulverem redacta subtilissimum, neque cum aqua frigida et tepida, neque cum falsis, lixiviosis, acidis et spirituoso inflamm-

(m) *Cours de Chymie*, pag. 270.

Cartb. Mat. M. II. Tom.

O o

flammabilibus liquoribus, licet centies, leni etiam filtri succussione in auxilium vocata, reasfundantur, chartam bibulam transit, sed citra ponderis decrementum, citra ullam coloris, formae atque indolis mutationem, in ea remanet. Obsequium quoque ob refractariam suam indolem, menstruis aqueis, falsis, spirituosis inflammabilibus, quid? quod, acidis corrosivis fortissimis denegat, neque in partes similes, neque dissimiles, etsi iniecta diu in illis relinquitur, dissolvitur. Non speranda pariter singularis solutio in lixiviis aqueo-alcalicis, nisi ea valde concentrata sint, et ipsa coctio, ad satis notabile tempus protracta, accedat. Inieci aliquando concentratae salis tartari solutioni cinnabaris subtilissime pulverisatae portionem, et vitrum digestionis calidae, naturalem et in animantium ventriculis possibilem caloris gradum superanti, commisi, visurus, an in hoc menstruo cinnabaris solutio insequi vellet. Protracta per aliquot dies digestionem, liquor levissima flavedine tinctus adparebat, etsi caeteroquin tota iniectae cinnabaris moles, citra coloris mutationem, in fundo adhuc integra iaceret. Liquori, a cinnabari decantato ac filtrato, praecipitandi fine acetum destillatum instillavi; at ille, pristinam pelluciditatem retinens, nihil ad fundum dimittere videbatur, die tamen sequente fundus tenerrimo pulvisculo albido-flavescente paullulum obductus erat, qui neutiquam tamen, ob nimis exiguum quantitatem et insignem teneritudinem, colligi poterat, et dubio procul ex minutissimis sulphuris moleculis, per menstruum abrasis et solutis, posteaque praecipitatis, constabat. Sed caveant cinnabaris patroni, ne novum inde ad demonstrandam eiusdem activitatem medicam, argumen-

tum petant. In corpore enim humano nullum lixivium alcalicum, multo minus concentratum, reperitur, nulla fit digestio huic gradu comparanda, et tam exigua praeterea sulphuris quantitas diuturna digestionem solvitur, ut nulla eius ratio medica haberi possit. Ad ipsam quoque coctionem, cuius ope paullo maior partis sulphureae in cinnabari solutio obtinetur, haud quemquam provocaturum spero, quoniam in corpore neque fit, neque citra momentaneam vitae iacturam fieri potest. Tanta praeterea solutio memorata non reperitur, quanta vulgo creditur: Nam cum cinnabaris portionem in saturato lixivio alcalico per integram horam ebullire permitterem, perfecta cinnabaris dissolutio nequaquam insecuta est, sed, absque ulla mercurii resuscitatione, liquorem solummodo alcalico-sulphureum obtinui, qui, durante coctione, ingratis odorem sulphureum eructabat, et post filtrationem eleganti colore dilute aureo et sapore sulphureo - alcalico praeditus erat. Aceto, per aquae fortis additionem potentiori reddito, sensim instillato, odor ingratus sulphureus iterum increfcebat, et color dilute aureus in pallidum mutabatur, at nihil sulphurei sub instillatione acidi ad fundum secedebat, sed die sequenti fundus vitri tenerrimo duntaxat pulvisculo flavescens, aequae, ac in priori praecipitatione, conspersus erat, manifesto documento, etiam coctione satis diuturna ac forti parum cinnabari eripi.

§. VII.

Nullas denique particulas, olfactu percipiendas, cinnabaris, per se in mortario lapideo trita, emittit, igne autem in halitus quidem resolvitur,

vitur, at Vulcani tortura intensior, quae gradum, ad aquae ebullitionem necessarium, longe superat, requiritur, nec a blando proinde calore talis resolutio halituosa unquam exspectanda est. Quae igitur cum ita sint, quis amplius a cinnabari activitatem medicam in corpore humano sperabit? quis amplius eidem vires anodynas, antispasmodicas, antepilepticas, cephalicas, cardiacas, aliasque excellentiores tribuere audebit? Profecto, quicquid, post adsumptionem, singularem ac vere medicum effectum in corpore edere, et ad humorum circulantium massam transferri debet, vel antea, uti alibi pridem retuli (n), in ventriculo et intestinis solvi, vel in halitus tenuerrimos mutari, adeoque vel filtrationis vel inhalationis ope vasa lactea aliaque bibula venosa intrare ac permeare debet. Cinnabaris autem, uti ex praecedentibus luculentissime constat, neque a menstruis aqueis, falsis, acidis etc. solvitur, neque in halitus calore blando mutatur, adeoque nulla etiam in prima culina a temperato liquore gastrico eiusdem solutio, nulla per humidum mitissimumque corporis calorem resolutio halituosa, nulla per consequens ad sanguinem translatio, nulla denique in partibus remotissimis salutaris actio exspectanda est. Nonnulli quidem integras cinnabaris subtilissime pulverifatae moleculas, absque praevia solutione aut resolutione vaporosa, tubulos absorbentes lymphatico-venosos intrare, permeare, et sic absque ambagibus, vel per vasa lactea et ductum thoracicum ad sanguinem devolvi posse, existimant: Attamen opinionem hanc verisimilitudine prorsus destitui, prudentiores confestim cognituros spero. Nam cinnabaris moleculae,

ut

(n) *P. I. Sect. I. Cap. III. §. 1.*

ut ut exilissimae, chartae bibulae poros, quod antecedentia pariter docuerunt, neque cum aqua pura, neque liquoribus aliis transeunt, et vascula memorata praeterea tubuli capillares sunt, qui nil, nisi fluida subtiliora et ipsis tubulorum tunicis specificè leviora, recipiunt atque transmittunt. Hisce accedit, quod gravissimae huius pulveris particulae, sub motu peristaltico tunicae nervoso-musculosae contractione propulsae, recta per longe ampliorem intestinorum canalem, ubi minimam inveniunt resistantiam, multo facilius progredi, quam, penitus deficiente filtratione et inhalatione, exilissimos ac laterales hosce tubulos intrare valeant.

§. VIII.

Aborbendi denique seu antacida virtute, quae ipsi, in primis viis latitanti, superesse videtur, prorsum destituitur cinnabaris. Corpora enim, quae acidum absorbent, vel tota, vel ex parte, corroduntur, et levissimam superficiei arrosionem maior protinus aut minor eiusdem, quoad formam et colorem, alteratio sequitur. Verum, nihil horum observatur in cinnabari pulverisata, diutissime etiam in concentratis liquoribus acidis relicta, immo splendentes moleculae grandiores, iisdem iniectae, metallici sui nitoris ne minimam iacturam faciunt. Ex hisce igitur et praemissis reliquis concludere tandem atque pronunciare audeo, cinnabarim concretum plane iners ac fatuum esse, nec ullum ideo locum inter medicamenta vera amplius tueri posse (o).

O o 3

§. IX.

(o) Subiungere placet, quae *Celeb. Dominus Doctor*
 TRALLESIVS in *Examine Absorbentium rigoro-*
sa,

§. IX.

Cum cinnabari, quod ultimo addendum duco, AETHIOPS MINERALIS in eadem classe collocari meretur. Convenit quippe cum illa quoad elementa et inertiam medicam, praeterquam, quod plus sulphuris, cum mercurio paullo laxius cohaerentis, in mixtione foveat, et proinde aliqua fortassis, quamquam valde exigua,

roso, p. 87. de inertibus pulveribus terreis et cinnabarinis iocose proposuit: „Adeste, inquit, vos „pulveres insipidi bezoardici, atque rigidius paulisper examen sustinete. Video aliquos vestrum „auri quisquiliis condecoratos, sed fatuus splendor nil nobis praestantiae adfert, nec est, ut „speretis, me iudicem severum atque iustissimum „auro mansuescere, absit illud longissime. Acceditis, ut observo, plurimi candidissima veste „conspicui, vultisque forte, ut innocentiam vestram inde arguens, vos absolvam statim atque „dimittam; imo vero hanc sententiam vobis expectandam esse declaro, eritis pulveres innocentissimi, manebitisque, vestris fautoribus nec „nocere, nec prodesse cupientibus. Atque quid „sibi volunt rubicunda illa integumenta cinnabarrino pigmento exornata quibus aliquos vestrum „indutos adspicio, fallor! aut rubore suffundimini, quod nihil boni unquam praestiteritis, quod „opprobrium sitis Medicorum, quod aegrorum „languentium fiduciam toties destitueritis. Vah „improbum facinus! ita omnium criminum expertes declarari poteritis, si forte interdum sordidia Practicorum factum est, ut vobis demandatum fuerit munus, quod aliis generosioribus „praesidiis demandari desiderabat vis morbi, vitaeque ad finem properantis periculum etc.”

gua, virtute anthelmintica gaudeat. Suffragatur mihi BOERHAAVIUS, quando in *Chemiae, T. II. p. m. 431.* scribit: „Aethiops mercurii, datus intra corpus. non valet vasa absorbentia venosa, vel chyliifera, vel lymphatica ingredi, sed recta tantum per fistulam intestinalempulsus, si fortunato operatur, vermibus forte necatis, exit. Decipiuntur, qui alios inde effectus sperant, quos inde natos nunquam videre potui. Incautos vereor, qui tanta copia infantibus, puellis et tenerioribus, exhibent alienam, naturae indomitam, massam fossilem; tanto suspectiorem sane, quo pigriori inertia diutius restat. Salivationem non ciet; quia venire nequit ad sanguinem. Quis vero scit effectus a materie, quae composita quamdiu manet, non videtur actuosior quacunque ponderosa infusa terra? etc.,

CAP. V.

De Antimonio crudo.

§. I.

STIBIVM sive ANTIMONIUM CRVDM OFF. *Spießglas*, est corpus minerale sulphureo-regulinum sive sulphureo-semimetallicum, durum, ponderosum, fragile, obscurum, nitentibus tamen striis distinctum. Excoquitur, vel rectius, fusione separatur e propria sua minera, quae in Saxonia, Bohemia, Hungaria, Transylvania, Suecia, Gallia, aliisque regionibus e terrae visceribus eruitur. Minera haec alibi purior, copiosior, ac magis solitaria occurrit, alibi mineris metallicis aliisque mineralibus valde permixta est. Antimonium Hungaricum vulgo

praestantius iudicatur, et Germanico praefertur, quoniam strias maiores nitidioresque obtinet, et sulphure, simul nobiliori solari mixto, donatum esse, falso creditur.

§. II.

Constat ex sulphure vulgari minerali et substantia regulina semimetallica, quae iterum ex terra vitrescibili, materia arsenicali et subtili inflammabili componitur (p). Pars regulina, ob intimam arctissimamque principii arsenicalis miscelam, per se caustica est, drastica, emetica, virulenta; pars sulphurea autem acredine destituitur, et praecedentem regulinam unione sua ita temperat, ut, durante mixtionis integritate, nullum in corpore humano effectum violentum edere possit. De duplici antimonii sulphure, altero nimirum rudiori, sylvestri, vulgari, altero excellentiori, solari, anodyno, multa proponere taedet, quoniam nobilius solare ens imaginarium est, ac tota sulphuris moles in antimonio crudo unam eandemque naturam habet, nec ullo plane modo a sulphure vulgari minerali distincta reperitur.

§. III.

Quondam antimonium crudum venenorum catalogo simpliciter inferebatur, nostro autem aevo, postquam KVNCKELIVS et experientia contrarium docuerunt, erronea haec opinio maximam

(p) Memorata antimonii elementa facile a Chemicis demonstrari possunt experimentis variis, quae hoc tamen loco adducere supersedeo, quoniam in plerisque libris chemico-pharmaceuticis, maxime autem in NEVMANNI *Lectiōe de Antimonio*, fusi⁹ pridem descripta sunt.

ximam partem exspiravit, et concretum hoc a plerisque inter bona, tuta et activa pharmaca refertur. Saliva quidem et simillimus liquor gastricus simpliciter illud atque perfecte solvere nequeunt, in partem regulinam nihilominus, non obstante sociati sulphuris copia, aliquem ingressum inveniunt, et pauxillum solvunt, quod valide postmodum stimulat, resolvit, alvum laxat, sudorem et urinam pellit, immo, largiori antimonii quantitate adsumta, blandam emesin provocat. Valet itaque ad sanguinem caeterosque humores purificandos, et in scabie imprimis, tam benigna, quam maligna, adfectibus arthriticis, rhevmaticis et scorbuticis, nec minus in gonorrhoea virulenta et ipsa lue venerea, fluore albo, obstructione mensium chronica aliisque huius commatis morbis utilissimum deprehenditur.

§. IV.

Nonnulli specificam quoque virtutem illi in colica saturnina tribuunt, eamque a sulphuris facultate obtundendi ac demulcendi derivant: An haec autem satis certa et rationi consentanea sit, aliis diiudicandum relinquo. Ego ad minimum valde dubito, quoniam liquor gastricus, uti dictum, magis partem regulinam stimulantem, quam obtundentem sulphuream aggreditur, et adgredi valet. Recipitur inter pulveres, morsulos, rotulas, bolos et electuaria, ac dosis eius a granis aliquot ad scrupulum integrum et ultra adscendit. Subinde etiam, in petia ligatum, decoctis sub ebullitione immergitur, ut virtutem eorum sudoriferam augeat, ast sine emolumento, quoniam aqua simplex parum inde, vel rectius nihil activi extrahere valet.

O o 5

CAP.

(q) Conf. Cap. praecedens, §. III.

CAP. VI.

*De Ferro, Lapide Haematite, Rubrica fabrilis
et Terris belaribus aliisque martialibus.*

§. I.

FERRVM est metallum comparative ignobilius, in aggregato durissimum, minus prae reliquis ductile ac fusile, ex *specifica terra vitrescibili metallica et tenera substantia inflammabili* compositum. Pars terrea in igne fixissima est, principium inflammabile autem igne violentiori facile destruitur, immo sub corrosione et solutione partim acidis potentioribus, praesertim sic dicto vitriolico, adhaerescit, partim praecipitatur, vel etiam e vasis apertis quoad partem in auras avolat. Nigricans enim sedimentum illud, quod sub artificiali vitrioli ex limatura ferri et oleo vitrioli, aqua debilitato, confectione colligitur, post elutriationem verum sulphur, ex coalescente acido vitriolico et principio ferri inflammabili genitum, exhibet, et cum mercurio corrente, certa adhibita encheiresi, in cinnabarin sublimari potest: Vt nihil dicam de inflammabili vapore, qui post aquae simplicis frigidae, olei vitrioli, et limaturae martis miscelam in cucurbitula vitrea adsurgit, et avulsis quoque particulis ferri sulphureis originem debet.

§. II.

Ferrum, in limaturam subtiliorem redactum, et adsumtum, per se nihil in corpore efficit ac prorsus ad agendum existit ineptum, nisi acidum in prima culina offendat, quod corrodere illud, solvere et unione sua in tenerum vitriolum

lum mutare possit. Laudata vero superveniente metamorphosi, vitriolum debile operatione sua aemulatur, et fibras, membranas ac tunicas laxas ad-et constringit (r); unde fit, ut viscera obstructa, pro causarum discrepantia, nunc aperiat, nunc vero, si spasmi nimirum oppilationum causae existant, magis occludat. Ex eodem quoque fundamento haemorrhagias immodicas et praeternaturales fluxiones ferosas, ab erosione, ruptura, dilatatione nimia, aut eminenti flacciditate vasorum pendentes, sistit, ac magnum subinde auxilium in cachexia, leucophlegmatia, refractaria febre, passione hypochondriaca et morbis similibus, qui, praemissis resolventibus, evacuantibus aliisque congruis remediis, potentiora tandem roborantia et adstringentia postulant, adferre consuevit.

§. III.

LAPIS HAEMATITES, *Blutstein*, qui in Hassia, Bohemia, Suecia, Norwegia, Hispania, et alibi effoditur, ferrum mineralisatum est, sive corpus minerale, durum, ponderosum, radiato-striatum, e *particulis ferri perfecti et imperfecti* concretum, coloris rubri, ad nitentem gryseum tamen, aut fuscum, aut nigrum magis minusve incli-

(r) Eadem ratio etiam apud *Crocos martiales* valet. Hi nunquam enim tota sua mole, quae maximam partem iners est, nec acidis amplius solvitur, medicam in corpore operationem exercent, sed virtus eorum unice integris adhuc et parcius aut largius immixtis particulis ferreis, quae solvi ab acidis et in vitriolum tenerius transformari possunt, adscribenda est; sicuti haec omnia in *Disert. de Crocis martialibus, anno 1759. habita*, fusius monstravi ac demonstravi.

inclinantis. Partes ferri imperfecti seu martiales terreae, quibus solum principium inflammabile ad metalli perfectionem deficit, maximam molis ponderisque partem constituunt, corpuscula ferri integri autem exigua duntaxat quantitate prioribus interiecta sunt, et totam nihilominus virtutis medicae rationem in se continent. Adsumto enim hoc lapide pulverisato, acidum, in ventriculo ut plurimum praesens, ferri integri moleculas adgreditur, et, sicuti dudum in antecedente paragrapho retuli, vitriolum tenerum arctiori sua copula format, quod fibras postea valide constringendo et humores paullulum simul incrasando haemorrhagias immodicas aliasque fluxiones sanguinis ac lymphae praeternaturales sistit. De virtute haemostatica, quam integra huius lapidis frusta, in manu saltim detenta aut collo appensa, exerere traduntur, multa hoc loco subiungere taedet, quoniam pleraque, passim de ea in scriptis Medicorum relata, penitus fabulosa sunt. Aliter rursus de lapide praeparato ulceribusque nimium manantibus insperso, sentiendum duco; quippe qui siccando aliquid omnino boni praestare valet.

§. IV.

Ad medicamentorum martialium censum RUBRICA FABRILIS pariter, nec non TERRAE BOLARES et SIGILLATAE, colore flavo, rubente, fusco aut rubro-brunneo donatae, *Bolus v. g. vulgaris et Armena, Terra sigillata Lemnia rubra, Laubacensis, Goldbergensis, Strigonienfis sublutea* etc. referendae sunt, quoniam, praeter terram subtilem argillaceam, eamque nunc macroiorem, nunc minerali pinguedine ditiolem, ochram quoque sive terram martialem et paucas
ferri

ferri perfecti moleculas in mixtione sua foment. Ista ceteroquin iudicantur optimae, quae puriores, teneriores, contactu laeves pinguesque sunt, et linguae tenacius adhaerent. Virtutem quoque adstringentem et incrassantem, aequae ac Haematites, possident, et sub pulveris igitur forma exhibitae in illis morbis, in quibus leniora, huius commatis remedia desiderantur, aliquam subinde opem ferre poterunt; quod terrae sigillatae autem diaphoreticis simul ac bezoardicis viribus, uti quondam Medicorum plerique crediderunt, et nonnulli adhuc hodie credunt, instructae sint, simpliciter nego, omnesque tutius generatim acturos arbitror, si ab usu earum interno penitus abstineant, quia in liquore gastrico, etiamsi ille acidis particulis largius nonnunquam remixtus existat, maximam partem indissolubiles sunt, et ventriculum ideo, praesertim frequentius et copia maiori adsumtae, valde gravant, simulque in massam rudem crassamque cum mucositate coeunt, et facile hac ratione ostiola vasorum absorbentium et excernentium obstruunt,

§. V.

Quo ista, quae haecenus de principiis ac viribus medicis martialium huiusmodi medicamentorum proposui, clariora non minus, quam certiora evadant, experimenta nonnulla chemica, quae cum iis suscepi, adhuc enarrabo:


- I. Spiritus vitrioli vulgaris, licet larga quantitate *Lapidi haematitae, Rubricae fabrilis, Bolo Armenae et Terrae sigillatae Lemniae rubrae* superfundatur, et calida quoque digestio, per plures dies noctesque protrahatur, in auxilium vocetur, parum solvit, paulo mai-

maiores tamen ingressum in terram Lemniam et rubricam fabrilem habere, adeoque illis plus, quam bolo Armenae et lapidi haematitae, eripere videtur. Maxima enim utriusque portio in filtro remanet, et id, quod postea circa pondus pristinum deficit, tria circiter grana ex integra drachma soluta esse, ostendit. Terra Lemnia et Rubrica fabrilis paullo plus, uti dictum, amittunt, et materiae solutae pondus, indicata scilicet quantitate supposita, ad quatuor vel quinque grana adscendit.

II. Filtrata lapidis haematitae solutio perfecta pelluciditate gaudet, et colorem viridiusculum, vel subinde etiam solummodo subviridi-flavescentem, saporemque acido-causticum, in recessu lenissime simul stypticum, obtinet. Quando instillato liquore alcalico praecipitatur, pauca saltem atque tenerrima materia subluteo-albicans, sensim ad fundum vitri descendens, in conspectum venit. Simillima propemodum apud bolum Armenam observantur. Solutiones rubricae fabrilis et terrae sigillatae Lemniae non-nihil a praecedentibus discrepant: Colorem enim, praesertim ex terra Lemnia, flavescentem possident, et copiosiores materiam teneram lutosam post praecipitationem ad fundum deponunt; hinc, alcali liquido instillato, longe etiam turbidiores redduntur, et filtratae maiorem terrae fusco-luteae quantitatem in charta bibula relinquunt.

III. Solutio lapidis haematitae, cum spiritu vitrioli, calidae et aliquamdiu protractae digestionis adminiculo, parata, et aqua simplici postmodum sufficienter diluta, iniecto gallarum pulvere, confestim post vitri agitationem colorem coeruleo-nigricantem acquirit, qui aliquot tamen horis elapsis, quin multo ut plurimum citius, magnopere rursus mutatur, ac sensim in obscure viridiusculum degenerat. Similis nigredo, mixto gallarum pulvere, in flavescente pariter solutione boli rubri vulgaris, cum praedicto spiritu facta et aqua diluta, nascitur, immo color atramentosus in ea adhuc saturatior, quam in praecedente, evadit, et longe diutius etiam absque notabili mutatione perdurat. Monendum caeteroquin, aquae miscelam paullo largiorem ante aut post immissionem pulveris gallarum absolute necessariam esse, et ea igitur neglecta nullum plane colorem nigrum exsurgere, sed solutionem, ob refractariam menstrui praepotentis cum solutis particulis martialibus cohaesionem, pristinam pelluciditatem, pristinumque colorem retinere. Non diffiteor, memet ipsum, cum olim experimentum hoc prima vice instituerem, cautelam memoratam neglexisse, et inde igitur evenisse, ut postea, ferri integri inhaesionem negando, aliquem circa determinanda martialium horum corporum principia errorem commiserim.





SECTIO XVII.

DE AQVA SIMPLICI, AQVA MARINA ET AQVIS SOTERIIS MINE- RALIBVS, TAM CALIDEIS, QVAM FRIGIDIS.

CAP. I.

*De Natura, Proprietatibus ac Viribus medicis
Aquae simplicis.*

§. I.

DE AQVAE SIMPLICIS natura, proprietati-
bus et amplissima virtute medica prolixam
hoc loco tractationem adornare possem ac
vellem, nisi compertum haberem, multa praete-
ritis pridem temporibus, maxime autem prae-
senti, quo vivimus, seculo, de hoc argumento
in lucem prodiisse, opuscula (a), et hanc ideo
materiam sufficienter, immo propemodum ad
nauseam usque, pertractatam esse. Ne eandem
tamen sicco prorsus pede praeteriisse videar,
nonnulla saltem, eaque generaliora, de illa hic
proponere placet.

§. II.

(a) Legi imprimis merentur *Dissertationes et Tracta-
tus varii*, quos Doct. SCHWERDTNERVS col-
legit, et e latina aliisque linguis in vernaculam
nostram transtulit.

§. II.

AQVA est fluidum humectans, admodum mobile atque porosum, quod sese plerisque corporibus solidis, itemque fluidis inspissatis ac plus postmodum minusve induratis, insinuat, priora lubricat, humectat atque emollit, posteriora resolvit, attenuat, ac saepe etiam, nisi nimium pridem induruerint, ad pristinum fluorem reducit. Promte praeterea salia quaecunque solvit et in poros suos recipit; citius tamen atque vegetius horum singula succedunt sub certo caloris gradu, magis scilicet hac ratione agitatis particulis eius, quin ipsis ex parte in vaporem resolutis. Virtus humectans enim et emolliens maior in aqua tepida longe, minor vero, quin posterior, habita nimirum certorum corporum ratione, plane nulla, in intense frigida observatur; facultas ex adverso salia, gelatinas et mucilagines solvendi maior in fervida, minor in tepida, et minima in frigida existit.

§. III.

Aqua simplex fontana, putealis ac fluvialis, nunquam in globo terraqueo perfecte pura reperitur, sed varia plerumque corpuscula heterogenea, terrea, lapidea, salina, alteriusque generis in sinu foveat. Optima caeteroquin censetur, quae levissima est, crystalli instar pellucida, coloris, odoris et saporis plane expers, quae cito calefit et cito iterum refrigeratur, quaeque post aliquam in vase mundo quietem nullas impuritates ad fundum et latera deponit, saponem facile solvit, fructus leguminosos sub coctione probe emollit, et, instillato liquore alcalico, aut solutione argenti, cum aqua forti facta, nec albescit, nec praecipitationem patitur, sed pristinam pelluciditatem retinet.

§. IV.

Gravitas aquae optime igitur per hydrometra, puritas, uti antea pridem dictum, per coctionem, tum solitariam, tum etiam cum leguminibus institutam, itemque per instillationem olei tartari per deliquium et solutionis lunae, dissolutionem saponis etc. exploratur. Si instillata enim solutione argenti, cum aqua stygia facta, praecipitatio quaedam contingit, et candida filamenta, vel exiguae saltem molecule albicantes, quae nihil aliud sunt, nisi praecipitatae particulae argenti soluti, in conspectum veniunt, sal commune culinare in aqua hospitari, iudicare licet. Chymicis quippe notissimum est, argentum confestim ex aqua forti ad fundum deturbari, si pauxillum salis sicci culinaris, vel solutio eius aquosa in solutionem argenti, aqua nonnihil debilitatam, immittitur, quoniam acidum nitri specificè gravius aliquam acidì levioris partem e sale culinari expellit, quod non solum miscella sua menstruo aquae regiae debilioris naturam conciliat, sed soluti etiam metalli moleculis, ob maiorem affinitatem adhaerescit, et unione sua formam earum ac gravitatem valde mutat. Ratio, a praecedente nonnihil distincta, alleganda est, quando in aqua examinanda, post instillationem olei tartari p. d. nubecula albida nascitur, aut integra aquae massa paullulum opaca, turbida et tenuiter lactescens evadit. Inde nimirum cognoscimus, illam plus minusve partibus terreis, tophaceis, calcariis etc. refertam esse, quae paucò antea acido subtilissimo, ex aëre et terrae visceribus sensim aquae poros intrante, solutae erant, accedente autem sale alcalico, quod subtile acidum solvens avellit, amplius in aqua sustineri nequeunt, sed praecipitatae aquam turbidam

dam reddunt, nubeculam albicantem aggregatione sua formant, tandemque ad fundum et latera vasorum secedunt. Non dubito denique, eiusdem fere commatis rationem in aquis pariter subesse, minus debite, forti etiam accedente conquassatione, cum sapone spumescentibus. Nam observatio chemica docet, partes pingues saponis, qui ordinario ex alcali fixo et pinguedine animali, aut oleo olivarum componitur, illico societatem salis alcalici deferere, et seorsim sub molecularum forma ad superficiem adsurgere, quamprimum acidum quoddam, v. g. vitriolicum, aquae saponis probe spumidae instillatur, et, sal alcali abripiendo, partibus pinguibus secedendi libertatem procurat.

§. V.

Aqua simplex pura animantibus non tantum saluberrimum praebet potulentum, sed etiam medicinam pene universalem. Decenti enim quantitate hausta, humores crassos diluit, mucum attenuat, salia acria solvit, eluit, distrahit, ac secum per vias urinarias et poros cutis educit, aestum sanguinis praeternaturalem ac bilis fervorem temperat, solida humectat, simul tamen si frigida, roborat, sin vero tepida, emollit; adeoque generali hoc respectu egregii usus est in morbis quamplurimis, praesertim iis, qui ab orgasmo, acrimonia, aut viscositate humorum, penuria feri, siccitate nimia solidorum etc. praecipue derivandi sunt, uti v. g. febres continuae ardentes, inflammationes, spasmi et convulsiones epilepticae, haemorrhagiae exorbitantes, adfectus rheumatici, arthritici, et scorbutici, obstructions viscerum, calculus, mania idiopathica et sic porro.

§. VI.

Non solus usus aquae simplicis internus in praxi medica amplissimus reperitur, sed tepida etiam aut frigida lavamenta ac balnea in morbis multis ac variis multiplex atque eximium auxilium praestant. Aqua tepida enim impuritates cutis terreo-salino-mucidas solvit, abstergit atque eluit, obstructos tubulos in- et exhalantes aperit, transpirationem periphericam liberiores rursus largioremque reddit, et humectando ac modice relaxando partibus solidis, solito siccioribus ac strictioribus, iustam mollitiem atque flexitatem restituit; aqua frigida autem, sub balnei forma usurpata, universam corporis superficiem, ob eminentiorem gravitatem suam, magis premit ac comprimit, nec fibras, ut aqua calida relaxat, sed promte potius ac valide constringit, et texturae intuitu compactiores reddit, adeoque tunicas pariter canalium caeterasque partes solidas, e fibris flexilibus contextas, egregie roborat, et tensionis, oscillationis ac contractionis vigorem tantopere intendit, ut sanguinem et quoscunque alios humores, si iusto lentius progrediantur, aut penitus in vasculis suis quiescant, et contumaces horum oppilationes efficiant, aucta pressione, aucto pulsu, dissolvere rursus, attenuare, vegetius propellere, obstructions referare, ac postea plus quoque minusve ad meliorem se- et excretionum successum conferre valeant. Accidit quidem sub horum balneorum usu sanguinis et totius corporis refrigeratio aliqua, at sentientem haec ipsa reficit, et in morbis quibusdam utilis ac necessaria reperitur, nec diu etiam perdurat, sed calor naturalis, paullo post, ob velociorem sanguinis circuitum fortiolemque globulorum affricum, magis rur-

rursum increfcens, per corpus univerfum aequabilius atque vividius diffunditur, et cutanea pariter exhalatio, praecedente frigoris actione non-nihil imminuta, iterum largior evadit.

§. VII.

Propter laudatam incitandi ac roborandi virtutem frigida haec balnea, ficuti IO. SIGMVNDVS HAHN (b), IO. FLOYERVS (c), ANTONIVS COCHI (d), pluresve alii commentatione uberiori, faufti fuccellus exemplis paffim corroborata atque fuffulta, evictum dederunt, non tantum inter praeflantiora praematurae imbecillitatis, hydrophobiae et variarum aegritudinum aliarum prophylactica militant, fed fubinde etiam in contabefcentia corporis incipiente, rheumatifmis calidis, rhachitide, coryza iufto diuturniori, epilepfia, melancholia, rabie canina, mania, aliisque infaniae speciebus opem haud fpernendam ferunt, immo, fi viscera adhuc integritate fruuntur, in pluribus morbis, ex fystematis nervofi debilitate potiffimum derivandis, cum magno aegrotantium emolumento adhiberi poffunt.

CAP. II.

De Natura ac Viribus medicis Aquae marinae.

§. I.

Quamvis AQVA MARINA nullum hominibus potulentum ordinarium, fiti reftinguendae aptum, praebeat, nec etiam, ob ingentem ac

P p 3

valde

(b) *Unterricht von der Kraft und Wirkung des frifchen Waffers in die Leiber der Menfchen.*

(c) *Psychrolufia, oder Verfuch zu beweifen, daff kaltes Baden gefund und nützlich fey.*

(d) *Allgemeines Magazin, P. IV. pag. 241.*

valde ingratam falsedinem suam amaricantem, praebere possit, ad efficacium tamen pharmacorum censum iure meritoque referenda est. Non purum enim, simplex et homogeneous liquidum existit, sed, praeter *sal falsum vulgare*, singulare quoque *sal neutrum amarum*, nec non *tenerius quoddam nitrosum et subtilem substantiam unguinoso-bituminosam*, quae corpusculis salinis tenacius adhaerescit, in poris suis recondita foveat.

§. II.

Quantitas salis falsi vulgaris, propter discrepantem caloris solaris gradum indeque pendentem maiorem aut minorem aquae dulcis evaporationem, in aqua hac nec ubivis locorum, nec quocunque anni tempore eadem est; plerumque tamen in Lusitania et Hispania, ubi in locis variis, littori Oceani occidentalis et maris mediterranei adiacentibus, quotannis ingens salis copia ex aqua marina, in magnas latiusque patentes foveas deducta, simplici evaporatione, solius aestus solaris actione suscitanda ac perficienda, separatur, una aquae libra civilis unciam salis unam et semissem, vel unciam ad minimum unam et drachmas duas continet. Alibi, sub climatibus scilicet frigidioribus, illud minori quantitate in ea hospitatur, ac pondere suo in libra aquae circiter ad unciam unam adscendit. Non differt hoc sal falsum marinum, si post primam separationem et coagulationem nova solutione in aqua dulci, filtratae solutionis evaporatione et spontanea postmodum crystallisatione, ab adhaerentibus sordibus terrestribus et parcius admixtis principiis aquae marinae reliquis liberatum et ad perfectam nitidamque puritatem redactum fuerit, a vulgari sale falso fontano, sed aequae, ac istud, ex *acido minerali*
tertio

tertio et minerali pariter sale fixo alcalico componitur, eidemque etiam quoad figuram crystallorum cubicam, quoad saporem et quoad proprietatum reliquarum singulas simillimum est. Id saltem tacitus praeterire nequeo, sal marinum vulgari fontano non tantum paullo acrius deprehendi, sed sub destillatione etiam, cum consuetis additamentis suscepta, plus spiritus acidi, cuius quantitas, ex una libra civili prolecta, plerumque ad decem unciarum pondus adscendit, reddere. Nec ignorari quoque oportet, acidum hunc spiritum, ex sale marino rudiori ac nondum depurato expulsum, aurum solvere et specifica igitur qualitate sua aquam regiam aemulari; manifesto documento, vulgari sali falso marino tennerrimum et difficiliter separabile nitrum embryonatum, quamquam parcissime saltem, admixtum esse. Quoad partem istud, uti mihi quidem probabile videtur, in aquae marinae superficie ex vagabundo acido atmosphaerae primigenio et pinguibus particulis urinosis, sub extinctorum animalium pelagianorum aliorumque corporum putrefactione genitis, simplici interveniente coactu, nascitur, quoad partem reliquam vero passim in superficie telluris ex iisdem elementis et eodem pariter modo generatur, ac inde, a confluyente aqua pluviali identidem solutum, ad flumina et cum hisce tandem in mare defertur.

§. III.

Sal neutrum amarum longe minori quidem copia, quam sal falsum vulgare, aquae marinae inhaeret, intuitu nihilominus virium medicarum praecipuam considerationem meretur, et sequenti modo separatur: Maior pro lubitu aut minor aquae marinae quantitas in apto vase, su-

per ignem collocato, blandaevaporationi subiicitur, sic initio, post sufficientem tamen phlegmatis solventis ablationem, sensim sensimque in lixivio adhuc calente diversae magnitudinis crystalli cubicae, saporis falsi purioris, in refrigerato autem subrotundae, vel cubicae tamen imperfectae, sapore falso-amaricante praeditae, nascuntur, et residuum lixivium amarum evadit, ac pallidam flavedinem consequitur. Hoc provide a praedictis crystallis decantatur, et iterum iterumque evaporando concentratur, donec omne sal amarum, quod continet, in crystallos oblongo-quadratas, parvis columellis haud dissimiles, concreverit. Citius totum separationis negotium absolvitur, quando muria illa, quae in foveis, in quibus sal falsum marinum vulgare solius caloris solaris ope coagulatum fuit, loco recentis atque integrae aquae marinae recipitur. Libra una aquae marinae unum circiter scrupulum, vel quindecim aut sedecim ad minimum grana huius salis amari continet, totam tamen quantitatem eius nequaquam in crystallos, ulteriori etiam evaporatione suscepta, abire, sed partem exiguan in superstitite nec amplius crystallisabili muria acri atque rubella relinqui, sapor huius amaricans abunde testatur.

S. IV.

Post primam separationem ex aqua marina activum hoc sal amarum nondum purum, simplex, et perfecte homogeneous reperitur, sed secundum adcurata BOVLDVCCII iunioris examina (e) ex sale falso vulgari et sale nativo Glauberiano mixtum, adeoque sali Epsoniensi simillimum

(e) *Memoires de l'Academie Royale des Sciences de Paris, ann. 1731.*

munum existit: fin penitus vero notiffima metho-
do, femel nimirum repetita folutione in aqua
dulci, lenta evaporatione et cryftallifatione, a
falif culinaris focietate feiunctum fuit, perfectum
fal mirabile Glauberianum nativum, faftitio hu-
ius nominis quoad partes conftitutivas, proprie-
tates ac vires maxime analogum, exhibet. Nam
eodem, ficuti antea pridem dictum fuit, fapore,
amaro videlicet ac paullulum refrigerante, gau-
det, poft iuftam quoque folutionis evaporatione-
nem in fimillimas cryftallos concrefcit, in aqua
cito ac magna copia folvitur, crucibulo candenti
aut prunae impositum facile liquefcit, ac fine ulla
decrepitatione nonnihil tantum ebullit, cum car-
bonum pulvere in crucibulo liquefactum, hepar
fulphuris producit, et, monftrantibus denique ac
confirmantibus aliis experimentis chemicis, ali-
bi (f) pridem adductis, ex *acido vitriolico*, et *fale*
alcalico minerali componitur.

§. V.

Quartum aquae marinae principium, tenera
nempe fubftantia unguinofo-bituminofa, ob par-
ticiorem mifcelam fuam et refractariam ad- et in-
haefionem, non tam facile quidem fecerni, nec
tam clare igitur, quam elementa reliqua, demon-
ftrari poteft; fuppetunt nihilominus argumenta
varia, a chemica imprimis experientia defumta,
quae pro meo iudicio praefentiam eius fufficien-
ter evincunt. Praetermittam documenta dubia
et minoris momenti, ac folam duntaxat muriam,
rubellam, pinguem, nec amplius cryftallifabilem,
falfo-terreo-alcalinam, quae poft falium medio-
rum cryftallifationem remanet, et intuitu falis al-
calici absque ullo dubio partiali falis falis vulga-

P P 5

ris

(f) Tom. I. Sect. VII. Cap. V.

ris sub lenta evaporatione destructioni ac dissolutioni radicali originem suam praecipue debet, probandi fine adducam. Haec ipsa enim sub protracta sensimque ad finem tendente exhalatione sua, immo coagulata tandem penitusque exsiccata, et prunis aut ferro candenti imposita, non tantum odorem sulphureo-bituminosum emittit, sed inde etiam adfusi spiritus vini rectificatissimi ope exigua veri bituminis liquidi portio extrahi et ita a massa alcalico-terrea, cui antea arctiori copula unita fuit, seiungi potest, ut lixivio concentrato quoad partem subtiliorem sub olei fluidi forma ac consistentia guttatim supernatet, quoad partem crassiore vero hinc inde lateribus vasis adhaerescat. Proxime hoc liquidum oleosum indole sua ad naphtham sive petroleum accedit, ac passim in fundo ac prope littora e terrae visceribus emanare, sensimque cum aqua marina misceri et salinis imprimis corpusculis adhaerere videtur.

§. VI.

Cognitio principiorum aquae marinae viam confestim ad operationem eius viresque medicas cognoscendas pandit. Demonstrata enim atque descripta salia neutra, quibus haec aqua satis liberaliter impraegnata est, in solidas aequae ac fluidas corporis partes actionem suam exercent, et priores moderate stimulo ad celeriores ac fortiores tensiones, oscillationes et contractiones incitant, posteriores vero, si iusto crassiores aut plane coagulatae ac congrumatae existant, incidendo attenuant, et quascunque praeterea impuritates, mucidas, viscidas, tenaces, in ventriculo, intestinis aliisque cavitatibus et amplioribus non minus, quam angustioribus canalibus delitescences, dissolvunt atque abstergunt, et hac
igitur

igitur ratione non tantum ciborum appetentiam ac digestionem intendunt, sed alvum pariter blande laxant, urinam pellunt, transpirationem cutaneam caeterasque se- et excretiones promoven-
 vent, et obstructions viscerum atque meatuum, a subsistente, coacervata et refractarie inhaerente impuritate oriundas, valide referant. Vt nihil de virtute antiputredinosa dicam, quae satis quoque eximia reperitur, nec solis salibus neutris, sed subtili etiam principio bituminoso-balsamico adscribenda est.

§. VII.

Propter memoratas vires generaliores, usus huius aquae internus a Medicis quibusdam, praesertim in Anglia, ad variarum aegritudinum chronicarum curationem transfertur, et magno-
 pere imprimis contra obstructions glandularum, tam internarum, quam externarum, refractarias, indeque saepe saepius nascentes tumores scrophulosos (g), eosque recentes tamen ac nondum scirrhosos, nec inflammatione etiam aut exulceratione dudum correptos, commendatur. Conducit quoque in infarctibus hepatis, lienis, et pancreatis, hydrope ascite incipiente, leucophlegmatia,

(g) Dominus RICCARVS RVSSEL, Medicus Anglicanus, anno 1750. *de Tabe dorsali sive de Usu aquae marinae in morbis glandularum* peculiarem Dissertationem, quam videre tamen mihi haecenus nondum contigit, in lucem emisit, in qua, sicuti Cel. Dn. RVDOLPH. AVGVSTINVS VOGEL in *Bibliotheca sua medica*, P. I. Vol. VI. p. 486. refert, eximiam huius medicamenti virtutem in tumoribus glandularum, iisdemque in Anglia creberrime succedente corporis contabescencia, exemplis specialibus confirmavit.

matia, nephritide pituitoso - sabulosa, rebelli febre quartana aliisque intermittentibus, suppressione fluxus menstrui inveterata, hysteralgia insolentiori, passione hypochondriaca, et ictero, ab obstruente bile admodum viscida atque inerti, vel molliusculo etiam calculo felleo potissimum exorto; immo in Anglia, teste infra allegato RUSSELIO, in rhachitide pariter, atrophia mensesaraica, ozaena inveterata, ophthalmia humida diuturna, scorbuto et refractaria scabie leprosa multum subinde auxilii praestitit. Paucis caeteroquin adhuc monendum duco, dictorum nonnulla non simpliciter, sed circumspiciente et cum aliqua distinctione admittenda esse. Pro meo enim iudicio haec aqua, propter virtutem suam resolventem, abstergentem, diureticam et leniorem catharticam, in recentioribus adfectibus scorbuticis morbisque analogis, a salino-pituitosa humorum dyscrasia praecipue pendentibus, haud contemnendam omnino opem adfert, in inveteratis ex adverso, in quibus humores, praesertim hinc inde in canalibus suis pertinaciter dudum quiescentes, putridam pridem corruptelam et magnam acrimoniam alcalico - urinosam contraxerunt, cautius cum usu eius mercandum erit, quoniam virtus antiputredinosa, qua simul donata reperitur, nequaquam tanta est, ut sub memorata humorum qualitate irritantium ac morsificantium salium actioni praepollere possit.

§. VIII.

Diu et per integrum subinde annum, si aegrorum nempe aegritudinumque conditio ita postulet, huius aquae potatio secure protrahi potest. Dosis quotidiana apud adultos ordinario quidem ad unam libram medicam aut civilem adscendit, pro

pro circumstantiarum tamen diversitate eandem nonnihil interdum minuere praestat. Hauritur tempore matutino, ieiuno ventriculo, vel indicata etiam quantitas in duas partes aequales dividitur, et harum altera matutino tempore, altera circa quartam circiter aut quintam horam pomeridianam adsumitur. Non opus quoque est, ut tota quantitas adsumenda uno quasi haustu ingeratur, sed successive illam, instar aquae cuiusdam foteriae mineralis, bibere licet. Egregie caeteroquin vires huius aquae, praesertim diureticae atque catharticae, exaltari possunt, quando modica adhuc salis Epsoniensis aut faëticii Glauberiani quantitas in ea solvitur.

§. IX.

Praeter usum medicum internum, aqua marina olim quoque externum habuit, et nostra pariter aetate in locis maritimis adhuc obtinet. Veteres enim Medici, quos recentiorum plerique secuti sunt, natationem in ea, immersionem, quin ipsam, eamque aliquoties repetitam, submersionem ad varias aegritudines chronicas, immo acutarum nonnullas, maxime autem ad hydrophobiam, maniam refractariam, aliasque insaniae species curandas saepe saepius suadebant, et eorum pariter quamplurimi praecipuam auxilii, identidem observati, rationem ad falsedinem huius aquae et eminentiorem inde gravitatem specificam referebant. Quod me attinet, opitulandi facultatem, aquae marinae frigidae in morbis allegatis aliisque adscriptam, haudquaquam negabo, credo nihilominus, apud maniacos et hydrophobos perfecta ac penitus propemodum suffocatoria submersione, quam vulgo medentes imperant, rarissime vel nunquam opus esse, sed solam corporis

ris immersionem temporariam ad collum usque effectum aeque felicem validumque praestare: Credo quoque, salutarium effectuum causam in memoratis pluribusque morborum speciebus magis ad frigus aquae constringens ac roborans, quam ad falsedinem eius et eminentiorem gravitatem specificam redire, et dulcem ideo aquam frigidam fontanam ac fluviam marinam in hoc passu minime cedere, immo fontanam, ob maiorem plerumque frigiditatem suam, ista nonnunquam praestantior esse (h).

CAP. III.

De Aquis soteriis mineralibus.

§. I.

AQVAE SOTERIAE MINERALES, quae hinc inde in plerisque regionibus, et magna imprimis copia in Germania nostra, e telluris visceribus prorumpunt, vel *calidae*, vel *frigidae* sunt. Illae *Thermae* vocantur, hae autem, ob naturae et principiorum varietatem, in *Aquas acidulas*, *martiales*, *sulfo-amaras*, *sulfo-alcalicas* et *sulphureas* dividi merentur. Nec ignorari quoque debet, aquas calidas non eiusdem indolis esse, sed earum alias activis principiis mineralibus magis minusve praegnantibus existere, alias ex adverso penitus illis carere, suamque ideo energiam medicam simplici tantum aquae atque calori debere.

§. II.

Aquae soteriae acidulae, propter saporem suum acidulo-vitriolatum ita dictae, varia principia mineralia

(h) Conf. RICHARDI MEAD *Oper. med. T. II. Tent. 2. pag. 127.*

neralia, experimentis chemicis aliisque observationibus facile demonstranda (i), *particular* videlicet *terreas*, calcarias, seleniticas, aut margaceas, tophaceas etc. nec non *salsas vulgares*, aut *salso-amaricantes*, sali mirabili Glauberiano analogas, *fixum* itemque *sal alcalicum*, *vitriolum martiale tenerrimum*, in calore et aëre libero facillime rursus dissolubile, et *spiritum quendam subtilissimum sulphureo-acidulum* in sinu suo recondita fovent. Spiritus laudatus cum spiritu sulphuris volatili STAHLII convenit, et praecipuam aquis hisce activitatem largitur; hinc illae etiam, perditio spirituofo hoc elemento, vires suas excellentiores amittunt, evadunt turbidae, et varias mutationes alias patiuntur.

§. III.

Memorata principia mineralia, quae in aquis praediſtis hospitantur, ab aqua simplici, varia strata subterranea, *terrea*, *lapidea*, *salina*, ac *metallico- et semimetallico-sulphurea* permeante, passim quidem abripiuntur, avelluntur, ac solvuntur, maiorem tamen prae reliquis considerationem *pyritae martiales* merentur; quippe qui sufficienter humectati, vel citra incalescentiam, vel alibi etiam, ubi sulphure ditiores sunt, cum maiori aut minori incalescentia, dissolvuntur, et aquae, cumulos eorum pervadenti, transeunti, prae-

(i) Observationes hae et chemica experimenta in multis pridem Scriptis, ab Auctoribus variis de aquis foteriis mineralibus recentiori aëvo exaratis et in lucem emissis, distincte atque prolixè recensita fuerunt, et ego ipse pariter in *Specimine Amoenitatum naturae et artis*, quondam lingua vernacula edito, eorum potiora uberius exposui; quare illa huc transferre ac denuo enarrare mihi displicet.

praeterfluenti, activum spiritum sulphureo-acidulum et vitriolum tenerrimum communicant (k). Notari tamen adhuc oportet, subtile vitriolum non minus, quam amaricans sal medium, mirabili Glauberiano analogum, hinc inde in aqua demum, vel totum, vel ex parte, a spiritu acidulo, in nidis stratisque pyritarum, intestini motus beneficio, ab inflammabili sulphuris parte seiuncto et cum sale fixo alcalico minerali ac ferreis moleculis, in aqua dudum praesentibus, unionem subeunte, generari: Immo, silentio minime praetermittendum erit, in aquis hisce salis falsi amaricantis quantitatem magis minusve augeri, quin istud novissime prorsus seu primum et quoad totam suam molem in earum nonnullis, aëri libero expositis, nasci, quando, vitrioli subtilis mixtione destructa, particulae ferreae sub ochrae forma praecipitantur et acidum, ab iis avulsum, rursus cum sale fixo alcalico coniungitur.

§. IV.

Aquae hae acidulae, quibus *Pyrmontanae* v. g. *Egranae*, *Schwalbacenses*, *Spadanae*, *Clivenses*, *Veteraquenses* etc. accensentur, vires in genere resolventes, aperitivas, purificantes ac roborantes possident. Aqua simplex enim humores crassos, viscidos, mucidos, coagulatos diluit, salia acria cuiuscunque indolis distrahit, solvit, eluit, et secum postea per varia emissaria e corpore educit, et partes solidas praeterea, siccas nimium, duras, rigidas humectat, adeoque naturalem illis flexibilita-

(k) Conf. IO. PHILIP. SEIPPI *Beschreibung der Pyrmontischen Stahlbrunnen*, Cap. 4. It. FRID. HOFFMANNI *Dissertat. de Thermarum et Acidularum convenientia*, et plura alia eiusdem argumenti opuscula, ab hoc Auctore edita.

litatem restituit. Spiritus subtilis mobilissimus-
 que sulphureo-acidulus, qui uti antea pridem
 dixi, princeps harum aquarum elementum con-
 stituit, maiores, minores, minutissimosque uni-
 versi corporis canales promte permeat, crassa,
 condensata et coagulata, penetrando ac com-
 movendo, attenuat, infarctus et obstructiones
 vasorum, glandularum, viscerum etc. recludit,
 cessantem partium solidarum oscillationem et
 contractionem rursus suscitatur, torpidamque ve-
 getiorem reddit, et diaphoresin quoque auget,
 quin, iusto regimine externo observato, perfe-
 ctum haud raro sudorem movet. Sal fixum alca-
 licum saburram acidam et acido-pituitosam, in
 prima culina, et humoribus circulantibus adcu-
 mulatam, invertendo destruit, et impuritates mu-
 cidas, saponis fere instar, resolvit atque abstergit.
 Sal neutrum cruorem, lympham caeterosque hu-
 mores, crassitie ac viscositate laborantes, inci-
 dendo ad fluiditatem maiorem reducit, vasa ob-
 structa aperit, excretionumque naturalium singu-
 las, maxime autem alvinam et urinariam, egre-
 gie promovet, et tenerrimum denique vitriolum
 martiale leni, quam praestat, ad- et constrictione
 partes solidas roborat, earumque actionem in
 fluida magis hac ratione minusve intendit: Vn-
 de, supposito vario hoc operandi modo, suppo-
 sitisque indicatis viribus generalibus, clare, uti
 ego quidem opinor, adparebit, usum harum
 aquarum amplissimum esse, et cum insigni impri-
 mis fructu ad curandos morbos chronicos atque
 rebelles, ex atonia partium solidarum, crassitie,
 viscositate et acrimonia humorum, obstructione
 viscerum refractaria etc. potissimum oriundos,
 transferri posse.

§. V.

A descriptis aquis acidulis *Aquae martiales* sive *ferratae*, *strictius sic dictae*, paullulum quoad elementa mineralia recedunt, et duplicis rursus generis inveniuntur. Aliae enim nihil, nisi solum *vitriolum martiale* et inertes quasdam *partes terreas tophaceo-* aut *margaceo-alcalinas*, vel etiam *lutosas* continent; in aliis vero, praeter ingredientia memorata, *spiritus quoque mineralis sulphureo-acidulus* largius aut parcius reperitur. Generatim hae aquae ferratae, quarum species *Freyenwaldenses* in Marchia Brandenburgica et *Lauchstadienses* in Ducatu Martisburgico sistunt, operationem suam medicam unice propemodum adstringendo ac roborando partes solidas absolunt, et propter indolem igitur comparative ignobiliorem rarius interne, saepius post calefactionem externe, sub balnei forma, contra affectus paralyticos aliosque morbos, a partium solidarum atonia praecipue pendentes, in usum trahuntur (1).

§. VI.

De *Aquis amaris*, quae passim in Anglia, Gallia, Hispania, Bohemia, Germania etc. e telluris gremio erumpunt, ac solum *sal mirabile Glauberianum nativum*, vel hoc etiam et simul pauxillum *salis culinaris* in sinu suo foveant, multa hoc loco dicere supersedeo, quoniam hic, virium medicarum intuitu, singula pariter locum inveniunt, quae

- (1) Plura de virtutibus et usu harum aquarum in FRID. HOFFMANNI *Dissertat. de fontibus medicatis Lauchstadiensibus* et IO. DAN. GOHLII *Tractatu Germanico*, cui titulus: *Instruction von der Tugend und Gebrauch des Freyenwalder Gesund-Brunnens* videri possunt.

quae alibi pridem (m) de sale mirabili Glauberiano nativo et Epsoniensi adducta fuerunt. Id saltim tacitus praeterire nequeo, aquas hasce, praesertim Sedlicenses ac Seidschüzenses, in obstructionibus viscerum, passione hypochondriaca et hydrope ascite recentiori plerasque soterias reliquas, quin ipsum sal amarum, ab aqua evaporationis beneficio seiunctum, virtute superare, et in allegato morbo postremo, minori etiam copia haustas, liquida extravasata potentissime per alvum et urinae vias expellere.

§. VII.

Aquae frigidae soteriae alcalicae vel homogeneae sunt, ac solo duntaxat sale fixo alcalico minerali, quod integrum post lenem evaporationem remanet, modice impraegnatae inveniuntur, ut aqua Bilinensis in Bohemia, vel, praeter salino-alcalicum hoc elementum, terram quoque alcalinam et sal commune, ut aqua Selterana, vel praedictorum singula et tenerimum simul mobilissimumque spiritum acidulum, ut aqua Antoniana sive Toensteinensis, in poris suis continent. Priorae, alcalicae nimirum homogeneae, acidum in corpore destruunt, mucum abstergunt, humores crassos viscidosque attenuant, sanguinem ac lympham acriorem edulcorant, diuresin promovent, et in variis ideo morbis, ex humorum lentore et acido abundante potissimum nascentibus, sese valde commendant. Posteriores eadem quidem praestant, praecedentibus tamen, ob salis medii societatem, resolvente et aperitiva virtute, adhuc superiores sunt, immo istae, in quibus mobile simul elementum acido-spirituosum hospitatur, diaphoresin quoque augent.

Qq 2

§. VIII.

(m) Tom. I. Sect. VII. Cap. 5.

§. VIII.

Differentiam, praedicta adhuc maiorem, apud *Aquas sulphureas*prehendimus, dum non solum elementum earum praecipuum, *sulphureum* nempe, sed iuncta pariter principia mineralia reliqua indole atque virtute magis minusve discrepant. *Principium sulphureum* vel *subtile*, *volatile vaporosum* est, vel *comparative fixius* et vulgari sulphuri minerali quoad naturam ac proprietates simillimum: Hoc, si perfecte purum existat, flavescent, tenerum ac, florum sulphuris instar, pulverulentum reperitur, accensum cum flamma coerulea flagrat, fumumque acidum suffocantem eructat, et cum salibus fixis alcalicis, fusionis aut saltim humidae solutionis atque inspissationis beneficio, hepar sulphuris producit; illud vero, sub invisibilium duntaxat halituum forma in aquae poris hospitans, in aëre libero et calore avolat, adeoque praesentia eius odore tantum, sapore et effectibus quibusdam detegitur. Ingredientia mineralia reliqua in calidis ac frigidis huius commatis aquis non eandem, sed, uti antea pridem dixi, diversam naturam obtinent: Elemento sulphureo vaporoso enim in aliis *sal culinare* ac *terra alcalina*, in aliis *mera terra selenitica*, vel iunctim *alcali fixum*, *sal mirabile Glauberianum nativum* et *terra alcalina*, sulphuri relative fixiori ac magis substantiali autem vel sola *terra alcalina*, vel *alcali fixum*, vel hoc et simul *terra alcalina* ac *sal amarum* sociata inveniuntur, immo in quibusdam cum sulphure fixiori *substantia bituminosa* maiori aut minori quantitate mixta est (n).

§. IX.

(n) Vberius de variis hisce aquis sulphureis FRID. AVGVST. CARTHEVSE in *Rudimentis Hydro-*

§. IX.

Propter indicatam maiorem minoremve elementorum mineralium discrepantiam sulphureae hae aquae nonnihil quidem virium medicarum intuitu inter se invicem differunt, generatim tamen commovendo ac discutiendo, et nonnullae simul abstergendo ac resolvendo, operationem suam absolvunt, adeoque iure ad activa medicamenta aperitiva, diaphoretica et sanguinem lymphamque purificantia referenda sunt: Immo illae, quae, uti *Aquisgranenses* v. g. *Porcetanae inferiores*, *Austriaco-Baadenfes*, *Landeccenses* etc., calidae sunt, et externe sub balnei forma vel unice prorsus, vel tamen potissimum, usurpantur, sese valde imprimis in adfectibus scabiosis, tam benignis, quam malignis, eminenti efficacitate sua commendant.

§. X.

Cum aquis mineralibus frigidis, praesertim acidulis, sic dictae *Thermæ* seu *Aquae calidae*, tum fervidae prorsus, tam saltim tepidae, multa quoad originem communia habent, et martialibus quoque pyritis, iisque sulphure ditioribus, ac passim in strata latiora, aut cumulos nidosque grandiores congestis, praecipuos suos natales debent. Laudati pyritae enim, aqua sufficienter humectati, magis minusve, sicuti supra pridem obiter indicavi, incalescunt, immo interdum, liberi nimirum aëre per antra atque hiatus tel-

Qq 3

luris

drologiae systematicae, p. 67-78. egit, et dictorum veritatem speciali etiam huiusmodi scaturiginum recensione confirmavit. Solidioris quoque ac magis distinctae notitiae causa libri illi atque libelli, in quibus aquae foteriae minerales calidae et frigidae ab Auctoribus variis speciatim descriptae sunt, legi possunt ac debent.

luris patientiores accedente, penitus incenduntur, et hac igitur ratione quoad partem dissoluti, permeantibus, transfluentibus, aut saltem alluentibus rivulis aquae subterraneis calorem et plerumque etiam principia quaedam activa mineralia largiuntur (o). Me quidem non latet, Scriptorum nonnullos a plerisque reliquis fontium mineralium scrutatoribus nonnihil circa caloris ortum dissentire, eumque in aquis hisce a forti nequaquam pinguium pyritarum excandescencia seu calefactione intestina, sed ab acido tantum sulphureo seu vitriolico, sub memorata fortiori, vel etiam leniori duntaxat et vix sensibili, pyritarum incalescentia a parte sulphuris inflammabili avulso et aquas praeterlabentes inhalationis beneficio largius intrante, deducere (p): Verum enim vero, quum unius rei plures esse possint causae, nec allegatae etiam hypotheses diversae sese mutuo evertant, dissensum hunc non adeo magni momenti existere, et alibi causam priorem, quamquam longe rarius; posteriorem locum invenire, arbitror.

§. XI.

Habita ratione naturae atque principiorum, duplicis hae aquae generis inveniuntur: Aliae nimirum, ut *Favorienses* v. g. sive *Piperinae* in Helvetia, *meram aquam simplicem, insipidam odoris expertem et crystallinam* sistunt, ac, praeter inertes quasdam *partes terreas*, nulla alia corpuscula

(o) Conf. BERGERI *Comment. de Thermis Carolinis*, nec non HOFFMANNI *Dissertat. de Acidularum et Thermarum convenientia*, SEIPPII *Beschreibung der Pyrmontischen Stahlbrunnen* etc.

(p) DIEDERICH WESSEL LINDENS *Anmerkungen über Doct. SCHÜTTENS Nachricht vom Ursprunge der mineralischen Wasser.*

cula mineralia continent; aliae ex adverso, quibus *thermae Carolinae, Toeplicenses, Aquisgranenses, Wisbadenses, Emsenses*, nec non *Baadenses* et *Altenburgenses* in Austria, *Landeccenses* in comitatu Glacensi, et caeterarum quamplurimae adnumerandae sunt, vel solum *sal alcali fixum minerale* et paucas partes terreas, vel *alcali fixum* et *ochram* seu principium terreo-martiale, vel iunctim *sal alcalicum*, *sal neutrum amarum* aut *amaricans*, *ochram* et *terram margaceam*, *calcariam* etc., vel *elementum sulphureum vaporosum* et *terram alcalinam* aut *seleniticam*, vel haec etiam principia et simul pauxillum *salis salis communis* aut *bituminis*, vel *sulphur fixius substantiale*, *sal alcali* et *terram alcalinam*, vel horum singula et aliquam insuper *salis amari*, aut *ochrae* quantitatem in sinu suo gerunt. Verosimillimum quoque est, in plerisque initio subtile atque integrum vitriolum martiale, ut et mobilissimum spiritum sulphureo-acidulum adfuisse, prius tamen, sub ulteriori aquae per terrae cuniculos progressu, caloris actione rursus destructum, posteriorem vero partim evaporando consumtum, partim cum alcali fixo in sal medium amarum aut amaricans combinatum esse.

§. XII.

Thermae hae, quarum aliae, et quidem quamplurimae, solummodo externe, aliae, activis nempe principiis mineralibus largius impraegnatae, interne et externe usurpantur, aquis fotereis frigidis nec virium praestantia, nec usus amplitudine cedunt. Externe enim, sub balnei forma, adhibitae, sordes cutis salino-mucidas abstergunt, poros tubulosque in- et exhalantes aperiunt, ideoque transpirationem augent, quin ipsum sudorem movent, sanguinem praeterea et

feroso-lymphaticos humores, ob crassitiem suam in tubulis minoribus minimisque, praesertim cutaneis et subcutaneis, stagnantes, resolvunt et circuitum eorum liberiores rursus vegetioresque reddunt, rigiditatem porro ac siccitatem nimiam fibrarum humectando corrigunt, et illae etiam, quae simul principium sulphureum, aut martiale, aut utrumque continent, partes solidas roborant, eximiamque proinde virtutem apud aegros rheumaticos, arthriticos, paralyticos et scorbuticos exerunt. Vsus earum internus, ob iusto parciores in plerisque principiorum mineralium praesentiam, non tam late quidem, quam externus, patet, sua tamen laude haudquaquam defraudandus est. Nam, si istae aquae calidae, quae alcalicis, falso-amaricantibus, aliisque potentibus mineralis prosapiae corpusculis sufficienter instructae sunt, aliquamdiu, aequae, ac frigidae acidulae, hauriuntur, acidum hostile in toto corpore extinguunt, humores crassos viscidosque attenuant, quin ipsa concrementa calculosa, tum molliora adhuc, tum paullulum pridem indurata, dissolvunt (q), viscerum ac glandularum obstructions referant, urinam et sudorem pellunt, ac solidis pariter, si simul scilicet, uti antea dixi, martialis atque sulphureae indolis existant, robur maius conciliant, adeoque in morbis chronicis quamplurimis egregium auxilium ferunt.

(q) Conferri hoc loco merentur, quae in *Promptuario rerum memorabilium Hamburgens.* P. XXII. Vol. I. pag. 18. de virtute lithonriptica aquarum Carolinarum prolixè relata fuerunt.





I N D E X

TOMI VTRIVSQUE SPECIALIOR.

A	A.	Amaricantia, T. II. pag.	417
Abrotanum, T. II. p. 123		Amaro - auctera, II.	ibid.
Abfinthium Ponti-		Ambra liquida, II.	315
cum, I. - - -	519	solida, II. -	411
vulgare, I.	520	Amomum, II. -	360
Acetosa, I. -	256. 257	Amuleta medica, I.	42
Acetofella, I. -	256	Amygdalae amarae, I.	207
Acetum simplex, I.	260	dulces, I.	203
scilliticum, I.	461	Anagallis, II. -	504
Acida et Acidula, I.	241	Animal moschiferum, II.	377
Acidum formicarum, I.	241	zibethicum, II.	380
Acidulo - dulcia, I.	254	Anisum stellatum, II.	323
Acria alterantia, I.	443	Antimonium crudum, II.	583
Acria et - amara purgan-		Aqua calcis ostrearum, I.	101
tia, I. -	531	vivae vulgaris, I.	137
Acriuscula. II. -	417	marina, II. -	597
Adstringentia, I.	380	simplex, II. -	592
Affion Indorum, II.	11	Aquae foteriae minera-	
Agallochum, II.	161	les, II. -	606
Agaricus, I. -	585	Aracus aromaticus, II.	368
Ageratum, II.	137. 138	Areca, I. -	397
Agrimonia, II. -	500	Argentum vivum, II.	570
Albumen ovorum, I.	190	Armoracia, I. -	468
Alcanna spuria, II.	427	Arnica, I. -	486
vera, II.	429	Aromatica, II. -	41
Alchimilla, II. -	497	Artemisia, II. -	488
Aleis ungula, I. -	143	Afa dulcis, II.	276
Alcohol vini, I. -	63	foetida, II. -	258
Alhandal. I. -	600	Asphaltum, II. -	406
Aloe, I. -	589	Avellana Mexicana, I.	216
ciusdemque species,	590	Auctera, I. -	380
Alumen vulgare, I.	404	Austeriuscula et Austerius-	
scissile, I.	408	culo - amaricantia, II.	417
Amara, I. -	503	Qq 5	Axun-

Axungia, Tom. I.	pag. 196	Caricae, Tom. I.	pag. 425
Axungia castorina, II.	376	Cassia alba, II.	210
B.		caryophyllata, II.	194
Baccae iuniperi, II.	345	cinnamomea f. Ceyla-	
lauri, II.	344	nica, II.	182
myrti, I.	395	fistula five purga-	
Balanus Myrepfica, I.	214	trix, I.	423
Balaustia, I.	395	lignea, II.	190
Balsamica, II.	41	Castoreum, II.	370
Balsami liquidi natura-		Cathartica, I.	531
les, II.	51. 311	Catus zibethicus, II.	380
Balsamum de Copaiva, II.	300	Causae morborum genera-	
de Mecha, II.	310	les, I.	36
Peruvianum, II.	304	Cerasa, I.	272
Rackasiri, II.	ibid.	Cera, I.	226
terebinthi Persicae, II.	298	Ceratonia, I.	422
Tolutanum, II.	308	Chalcanthum, I.	399
Basilicum, II.	104	Chamaedrys, II.	471
Bdellium, II.	254	Chamaepitys, II.	473
Benzoe, II.	276	Chamomilla vulgaris, II.	140
Betele, II.	397	Romana, II.	ib.
Betonica, II.	467	Chenopodium Ambrosioi-	
Bitumen Iudaicum, II.	406	des, II.	132
Borax, I.	369	China china, II.	529
Botrys ambrosioides, II.	132. 136	Choccolata, I.	222
Branca ursina, II.	494	Cinerum metallicorum et	
Butyrum vulgare, I.	240	femimetallicorum redu-	
Cacao, I.	220	ctio, I.	59
C.		Cinnabaris antimonii, II.	575
Cacao, I.	216	facticia vulgaris, II.	ibid.
Calcanthum, I.	399	nativa, II.	573. 574
Calcium terrearum diversi-		Cinnamomum, II.	182
tas, I.	77	Clyster tabacinus, II.	28
Calx viva, I.	128	Cocca infectoria maiora, II.	549
Camphora, II.	214	tinctoria minor, II.	555
Canella alba, II.	210	Cochinilla, II.	ibid.
Cananna, II.	264	Cochlearia, I.	472
Cardamindum, I.	475	Colchici autumnalis ra-	
Cardamomum, II.	362	dix, I.	43
Carpobalsamum, II.	312	Colocynthis, I.	600
		Colophonium, II.	293
		Conchae fluviatiles et lacu-	
		stres, I.	100
		Con-	

- Contrayerva, T. II. pag. 430
 Corallia rubra et alba, I. 109
 Cornu cervi, I. 147
 Corpora primigenia five
 mixta prima, I. 53
 Cortex aurantiorum, II. 175
 caryophylloides Am-
 boinensis, II. 196
 Cascarillae, II. 177
 Chinae chinae, II. 529
 Citri, II. 174
 ligni Guaiaci, II. 159
 ligni Sassafras, II. 155
 limoniorum, II. 176
 mali granati, I. 394
 Peruvianus, II. 529
 pomi Punici, I. 394
 pomorum Sinensium,
 II. 176
 simarouba, I. 522
 thymiamatis, II. 180
 Winteranus spurius,
 II. 210
 verus, II. 206
 Costus Arabicus, II. 210
 Cranium humanum, I. 146
 Cremor tartari, I. 266
 Crocus orientalis, II. 29
 Cubebae, II. 358
 Curationes morborum ma-
 gneticae et sympatheti-
 cae, I. 35
D.
 Dactyli, I. 425
 Decoctum avenaceum, I. 178
 hordeaceum, I. ibid.
 Dentes Apri, I. 150
 Castoris, I. ibid.
 elephantorum, I. 149
 hippopotami, I. 150
 rosmari, I. ibid.
 Diagrydium glycyrrhiza-
 tum; Tom. I. pag. 596
 rosatum, - ibid.
 sulphuratum, - ibid.
 Dulcia, I. 409
E.
 Ebur, I. 149
 Electrum, II. 407
 Elementa corporum physica
 et chymica, I. 44
 Emetica, I. 531
 Erysimum, I. 474
 Eupatorium Mesuae, II. 138
F.
 Faecula radices ari, I. 465
 radices paeoniae, II. 422
 Ferrum, II. 586
 Ficus, I. 425
 Flores arnicae, I. 487
 benzoes, II. 277
 boraginis, II. 522
 Calendulae, II. 151
 chamomillae vulgaris,
 II. 140
 Romanae, II. ib.
 cheiri, II. 153
 consolidae regalis f.
 calcatrippae, II. 518
 cyani, II. 519
 lavendulae, II. 149
 liliorum alborum, I. 168
 convallium, II. 507
 mali Punicae, I. 395
 matricariae, II. 124
 meliloti, II. 168
 papaveris erratici, II. 521
 persicorum, II. 511
 rosmarini, II. 105
 paeoniae, II. 514
 primulae veris, II. ibid.

Flores rosarum albarum et
rubrarum, T. II.
pag. 515. 518

salviae, II. - 108

sambuci, II. - 29

tanacetii, II. - 137

tiliae, II. - 513

tunicae hortensis, II. 516

Folia althaeae, I. - 168

betele, I. 397 II. 12

cardui benedicti, I. 520

malvae, I. - 168

fennae, I. - 582

Folium Indum, II. 100

Fructus chamaemori Nor-
wagicae et vulga-
ris, I. - 272

grossulariae non spino-
sae, I. - ibid.

mori, I. - ibid.

Fungus laricis, I. - 585

quercuum, I. - 586

G.

Gelatinosa, I. - 162

Gerania Africana acida, I. 257

Gialappa, I. - 560

Gramma cherines, II. 549

paradisi, II. - 367

Gummi acaiu, I. - 184

ammoniacum, II. 250

anime, II. - 267

Arabicum, I. - 180

bdellium, II. - 254

benzoe, II. - 276

ceraforum, I. - 184

de Caopia, I. - 599

elemi, II. - 268

euphorbium, I. 494

galbanum, II. 252

guaiacum, II. 157

gutta, I. - 597

hederae, II. - 266

Gummi iuniperi, T. II. p. 272

lacea, II. - 279

ladanum, II. - 262

pomorum Armeniaco-
rum et Persic. I. 184

olampi, I. - ibid.

sagapenum, II. 257

senega, I. - 181

tacamahaca, II. 275

H.

Hedera terrestris, II. 468

Hepar sulphuris, I. 61

Herba Nicotiana, II. 21

Hermodactylus, I. - 573

Hordeum, I. - 178

Horminum, II. - 112

Hydrargyrum, II. 570

Hyoscyamus Peruvianus, II. 21

Hyssopus, II. - 119

I.

Ialappa, I. - 560

Ichtyocolla, I. - 189

Inebriantia, II. - 1

Ipecacoanha, I. - 556

Iuiubae, I. - 425

K.

Kaminoie-maslo, I. 408

L.

Lac animalium, I. 231

lunae, I. - 122

Lapides calcarii, I. 128

carpionum, I. 150

percarum, I. - ibid.

Lapis bezoar Coromande-

liensis, I. - 161

occidentalis, I. 154

orientalis, I. 152

Bononiensis, I. 135

haematites, II. 587

Lapis

Lapis hystricinus, T. II. p. 161	Meconium, Tom. II. pag. 36
Levcoium luteum, II. 153	Medicamentorum causae
Lichen cinereus terrestris, II. - - 457	impellentes, I. - 12
Lignum aloes, II. 161	diversa apud animantia
cedrinum, II. 169	operatio, I. - 13
colubrinum, I. 526	diversae actionis ratio, I. 9
guaiacum, II. 156	divisio generalis, I. 16.
iuniperi, II. - 170	23. 24
lentisci, II. - 172	effectus, I. - 8
nephriticum, II. 541	externorum actio diver-
rhodium, II. - 167	sa, I. - 19
santalum album, II. 165	resolutio in ventriculo,
flavum, II. ibid.	I. - 17
rubrum, II. 545	translatio ad sanguinem,
sanctum, II. - 161	I. - ibid.
sassafras, II. - 154	Mel apum, I. - 440
Limaces, I. - 190	Melegetta, II. - 367
Liquidambarum, II. 315	Melissa Canariensis, II. 103
Lumbrici terrestres, II. 560	citraria, II. - 101
Lycopodium, II. - 464	Turcica, II. - 103
	Mentha crispa, II. - 121
	Romana, II. - 103
M.	Mercurius vivus, II. 570
Macer, I. - 523	Millefolium, II. - 145
Macis, II. - 351	Millepedes, II. - 557
Maiorana, II. - 111	Milium, I. - 179
Malabathrum, II. - 100	Mixta prima, I. - 53
Malicorium, I. - 394	Monades, I. - 44
Maltha, II. - 402	Moschus, II. - 377
Mandibulae lupi piscis, I. 150	Moxa, II. - 589
Manna, I. - 438	Moxiburium, II. - 590
Margaritae, I. - 103	Mucilaginea, I. - 162
Marga saxatilis, I. - 122	Mumia mineralis Persica, II.
Marrubium album, II. 501	403
Martialia, II. - 586	Musculus terrestris clavatus,
Marum verum, I. 484	II. - 464
Masang de vacca, I. 161	Myrrha, II. - 234
Maslach Turcarum, II. 11	Myrti baccae, I. - 395
Mastiche, II. - 271	
Mater perlarum, I. 108	N.
Materiae medicae divisio, I. 1	Naphtha chymica, II. 395
Matricaria, II. - 124	mineralis, II. 382
Mechoacanna alba, I. 563	Nardus Celtica, II. - 98
	Nardus

- Nardus Indica**, T. II. p. 96
Nasturtium hortense et aqua-
 ticum, I. - 474
 Indicum, I. - 475
Narum Aegyptiacum, I. 278. 315
Naturae definitio, I. 325
 differentia, I. - 13
Nepenthe Persarum, II. 12
Nitrum embryonatum, I. 316
 modernum, I. 315
 nativum, I. - ibid.
Nuces pini et pistaciae, I. 205
Nuclei Armeniacorum, I. 207
 ceraforum, I. - ibid.
 Persicorum, I. - ibid.
Nux Areca, I. - 397
 been, I. - 214
 moschata, II. - 348

O.
Offa Helmontii, I. 287
Olea aetherea, II. 43 sequ.
 unguinosa, I. 192
Oleofo-unguinosa, I. - ibid.
Oleum amygdalarum dul-
 cium, I. - 204
 baccarum iuniperi,
 II. 346
 lauri, II. 344
 balsami de Copaiva, II. 302
 Peruviani, II. 306
 benzoinum, II. 278
 cacao, I. - 218
 caieput, II. - 366
 canellae albae, II. 212
 cardamomi medii et
 minoris, II. 365
 cedrinum, II. 170
 chamomillae, II. 141
 chenopodii Ambrosioi
 dis, II. - 133
Oleum cinnamomi, T. II. p. 187
 cochleariae, I. 473
 cort. cascarillae, II. 179
 citri, II. - 174
 culilawan, II. 201
 Winterani veri, II. 207
 formicarum, I. 241
 lavendulae, II. 149
 ligni aloes, II. 163
 rhodini, II. 168
 santali flavi, II. 166
 sassafras, II. 155
 maioranae, II. 112
 mari veri, I. 485
 menthae, II. 121
 millefolii, II. 146
 myrrhae, II. 238
 nucum been, I. 215
 nucis moschatae, II. 350
 iuglandium, II. 2
 olivarum, I. - 213
 petrae, II. - 382
 pini, II. - 283
 piperis, II. - 356
 rosarum, II. 517
 rosmarini, II. 106
 sabinae, II. - 130
 salviae, II. - 109
 satureiae, II. - 126
 feminiis anisi, II. 322
 carvi, II. - 340
 foeniculi, II. 319
 fesami, I. - 211
 succini, II. - 409
 terebinthinae, II. 292
 thymi, II. - 115
Olibanum, II. - 269
Olivae, I. - 212
Opium, II. - 33
Opobalsamum, II. 305. 310
Opopanax, II. - 256
Origanum, II. - 119
Os sepiac, I. - 108
Offa

Osse de corde cervi, T. I. p. 148	Pulvis iulorum alni et co-
Osteocolla, I. - 124	ryli, Tom. II. pag. 570
Ovorum testae, I. - 101	lycopodii, II. 567
Oxymeli scilliticum, I. 461	Purgantia, I. - 531
	Pyrophorus Hombergii, I. 135

P.

Passulae maiores, I. 424	
minores, I. 270	
Pedra bugia, I. - 161	
de porco, I. ibid.	
Perlae, I. - - 103	
Petroleum, II. - 382	
Phosphorus Balduini, I. 135	
Pinang, II. - - 12	
Pinguedines animalium, I. 196. 239	
Pinguedo castorina, II. 376	
viperina, I. 238	
Pinguia, I. - - 192	
Pineoli, I. - - 205	
Piper album rotundum, II. 353	
caudatum, II. - 358	
longum, II. - 355	
nigrum rotundum, II. 352	
odoratum Iamaicense,	
II. - - 360	
Pissasphaltum, II. - 402	
Pistacia, I. - - 205	
Pix liquida, II. - 283	
sicca navalis, II. 282	
Plaste, II. - - 235	
Principia corporum chymi-	
ca, I. - - 45	
phyfica, I. - 44	
Principium aqueum, I. 71	
inflammabile, I. 53	
salinum, I. - 67	
terreum, I. 71. 73	
Pruna Damascena, I. 424	
sebestena, I. - 425	

Q.

Quinquina, II. - 519

R.

Radix anchusae, II. 427
angelicae, II. 90
althaeae, I. - 167
apii palustris, II. 443
ari, I. - - 462
aristolochiae fabaceae,
I. - - 515
longae verae, I. 514
rotundae verae, I. 515
vulgaris, I. 516
bardanae, II. 433
bistortae, I. - 392
bryoniae, I. - 571
caa-pia, I. - 560
calami aromatici, II. 78
carlinae, II. - 94
caryophyllatae, II. 431
chinae, II. 439
cichorii, II. - 453
colchici, I. 43. 574
curcumae, II. 64
cyperi longa, II. 67
rotunda, II. ibid.
diptamni albi, I. 510
enulae, II. - 81
galangae, II. - 70
gentianae rubrae, I. 510
Ginseng, II. - 453
glycyrrhizae, I. 420
hellebori albi, I. 470
nigri, I. 566
imperatoriae, II. 88

Radix ipecacoanha, Tom. I.		Rhabarbarum Chinenſe, T. I.	
	pag. 556		pag. 549
iridis Florentinae, II.	72	monachorum, I.	555
leviftici, II.	92	Rhaponticum Thracicum, I.	553
lilii albi, I.	168	vulgare, I.	554
liquiritiae, I.	420	Rob iuniperi, II.	347
malvae, I.	168	Rosmarinus, II.	105
mechoacannae albae, I.	563	Rubrica fabrilis, II.	588
nigrae, I.	561	Ruta, II.	128
mei, II.	94	S.	
mungos, I.	512		
ninſin, II.	454	Sabina, II.	129
nymphaeae, II.	423	Saccharum lactis, I.	411
orchidis vulgaris, I.	173	vulgare, I.	411. 426
pareirae bravae, II.	436	Sagu, I.	179
paeoniae, I.	421	Sal acetofellae, I.	256
petafitidis, II.	451	amarum Epſonienſe, I.	352
petroſelini, II.	443	Gallicum, I.	351
pimpinellae albae, I.	465	Hiſpanicum, I.	ibid.
polypodii, I.	418	Hungaricum, I.	ibid.
pyrethri, I.	467	Sedlicenſe, I.	349.
raphani ruſtici, I.	468	Seidſchützenſe, I.	ib.
rubiae tinctorum, II.	425	Sibiricum, I.	352
ſalab, I.	170	Suecicum, I.	351
ſaponariae, II.	447	ammoniacale ſanguiniſ, I.	284
ſarſaparillae, II.	439	ammoniacum factitium, I.	360. 362
ſcillae marinae, I.	454	nativum, I.	360
ſcorzonerae, II.	445	commune fontanum, I.	338
ſcrophulariae, I.	517	foſſile, I.	ibid.
ſenega five ſeneka, I.	576	gemmae, I.	ibid.
ſerpentariae Virginiae, II.	83	Glauberianum nativum, I.	341
ſymphyti, I.	169	marinum, II.	598
taraxaci, II.	433	petrae, I.	315
tormentillae, I.	390	primigenium, I.	67
trifolii fibrini, I.	510	ſedativum, I.	375
tuffilaginis, II.	433	thermarum Carolinae, I.	358
valerianae, II.	85	Salia	
vincetoxici, II.	436		
zedoariae, II.	58		
zingiberis, II.	61		

<i>Salia alcalia fixa five lixivio-</i>		<i>Semen petroselini, Tom. II.</i>	
<i>sa, Tom. I.</i>	pag. 273		pag. 337
<i>volatilia five urino-</i>		<i>psyllii, I.</i>	174
<i>sa, I.</i>	287	<i>rutae, II.</i>	336
<i>media five neutra, I.</i>	305	<i>santonicum, II.</i>	327
<i>Salina acida, I.</i>	241	<i>sesami, I.</i>	210
<i>Salvia hortenſis, II.</i>	108	<i>ſinapi, I.</i>	490
<i>ſylveſtris, II.</i>	111	<i>tanaceti, II.</i>	336
<i>Sandaracha Arabum, II.</i>	272	<i>zedoariae, II.</i>	327
<i>Sanguis draconis, II.</i>	547	<i>Semina quatuor frigida ma-</i>	
<i>Satureia, II.</i>	126	<i>iora, I.</i>	208
<i>Scammonium, I.</i>	593	<i>minora, I.</i>	209
<i>Schoenanthum, II.</i>	99	<i>Seneka five Senega, I.</i>	576
<i>Scordium, I.</i>	519	<i>Senna, I.</i>	582
<i>Semen ammeos, II.</i>	341	<i>Serpillum, II.</i>	119
<i>anethi, II.</i>	343	<i>Serum lactis, I.</i>	267
<i>anifi, II.</i>	321. 323	<i>Seva animalium, I.</i>	196
<i>apii, II.</i>	336	<i>Siliqua dulcis, I.</i>	422
<i>cannabis, I.</i>	211	<i>Simarouba, I.</i>	522
<i>cardui benedicti, I.</i>	529	<i>Sperma ceti, I.</i>	235
<i>mariae, I.</i>	ibid.	<i>Spica Celtica, II.</i>	98
<i>Carvi, II.</i>	339	<i>Indica, II.</i>	96
<i>Coriandri, II.</i>	324	<i>Staete, II.</i>	235
<i>cucumeris, I.</i>	208	<i>Stibium, II.</i>	583
<i>cucurbitae, I.</i>	ibid.	<i>Stincus marinus, I.</i>	188
<i>cumini, II.</i>	340	<i>Styrax liquidus, II.</i>	317
<i>cydoniorum, I.</i>	175	<i>ſolidus, II.</i>	273
<i>dauci Cretici, II.</i>	337	<i>Subadstringentia, II.</i>	417
<i>vulgaris, II.</i>	ibid.	<i>Succinum, II.</i>	407
<i>erucac, I.</i>	490	<i>Succus acaciae, II.</i>	548
<i>foeniculi Romani, II.</i>		<i>citri et limoniorum, I.</i>	
	319		258
<i>vulgaris, II.</i>	ibid.	<i>ſedi vulgaris, I.</i>	296
<i>foeni Graeci, I.</i>	176	<i>Sulphurea, ſulphureo-mer-</i>	
<i>leviſtici, II.</i>	343	<i>curialia et ſulphureo-re-</i>	
<i>lini, I.</i>	212	<i>gulina, II.</i>	561
<i>melonum, I.</i>	208	<i>Sulphur lycopodii, II.</i>	567
<i>nasturtii, I.</i>	493	<i>minerale, II.</i>	561
<i>nigellae Romanae, II.</i>		<i>Summitates centaurii mino-</i>	
	326	<i>ris, I.</i>	521
<i>papaveris hortenſis, I.</i>		<i>ſummariae, I.</i>	522
	210		

T.

Tabacum, Tom. II.	pag. 21
Tamarindi, l.	269
Tanacetum, II.	137
Tartarus vini, l.	266
Terebinthina, II.	289
Terra Iaponica, l.	396
Terrae bolares, II.	588
figillatae albae, l.	122
figillatae ac figillandae flavae, fuscae, ru- brae, II.	588
Terrea alcalina, l.	76
Terreo-gelatinosa, l.	87
Testae ostrearum, l.	101
Teucrium verum, II.	483
Thea orientalis, II.	474
Thermae, II.	613
Thus, II.	269
Thymus, II.	114
Tincal five Tincar, l.	369. 376
Tragacantha, l.	183
Trifolium fibrinum, l.	520
Turpethum vegetabile, l.	569

U.

Vaniglia, II.	368
Vaporosa, II.	1

Vasa absorbentia, bibula, inhalantia, exhalantia, l.	26
Venenum viperæ, l.	21
Veratrum nigrum, l.	567
Veronica vulgaris, II.	465
Vipera, l.	184
Vis vitæ, l.	13
Viscum, II.	523
Vitriolum, l.	399
Ultramarinum, l.	386
Unguinoso-oleosa, l.	192
Unguentum ophthalmicum, l.	238
Ungula alcis, l.	143
Unicørnu verum, l.	149
Vomitoria, l.	531
Uvae passae, l.	424
Uva ursi, II.	485

X.

Xylobalsamum, II.	311
Xylocassia, II.	190

Z.

Zibethum, II.	380
Zingiber flavum, II.	64
vulgare, II.	61
Zizyphi, l.	425





ADDITAMENTA

AC

PRAETERMISSA.

Ad Caput de Spermate Ceti.

Secundum recentiorum quorundam testimonia sperma ceti non tantum ex valde oleoso ceti dentati cerebro, sed ex simili etiam ac facile coagulabili liquore, quem vasa peculiariora, per universum ceti corpus distributa, continent, paratur. Truncus horum vasorum e capite piscis educitur, et tam amplus est, ut crus virile crassitudine sua aequet, paullatim tamen in minores atque maiores ramos dividitur, qui liquidum oleosum ad cunctas corporis partes, e quibus per alia vasa ad cranii concamerationes reducitur, vehunt. *Conf. DAVID CRANZ Historie von Groenland, erster Theil, p. 149. 150. Item IO. ANDERSON Nachrichten von Island, Groenland und der Strasse Davis.*

Ad Caput de Rhabarbaro. — Rhabarbarum verum orientale e Sinensium regione partim navibus in Europam evehitur, partim terrestri itinere a mercatoribus in Persiam, Buchariam et Russiam, et inde postmodum ad alias quoque gentes transfertur. Rhabarbarum, quod ex Russia ad nostra pharmacopolia pervenit, isto, quod navibus asportatur, ob va-



rias rationes, praestantius censetur; sicuti hoc
 ex relatione *illustr. Domini* IO. BERNHARDI
de FISCHER, quam celeberrimus Dominus
Professor R. A. VOGEL in sua *Historia Materiae*
medicae, pag. 207. verbis sequentibus commu-
 nicavit, uberius constat. „Quod (*rhabarba-*
 „*rum nempe*) itinere terrestri ex China affer-
 „tur, illi praevallet, quod longo maritimo iti-
 „nere in Europam venit, et aëre in navibus
 „incluso, et abs variarum mercium ac impri-
 „mis aromatum effluviis, Solisque ardore vi-
 „tium contrahit. Terrestri autem via ex Chi-
 „na rhabarbarum advehunt Russi, Buchari et
 „Persae, et quidem hi mediantibus camelis,
 „ubi antea illud gossypio involvunt, ne aestu-
 „ante Sole compacta radix corrumpatur, et
 „una corrupta reliquas inficiat, sicque Turcis
 „illud vendunt, venale ultimo in emporiis
 „orientalibus maris mediterranei. Russi vero
 „maxime hyberno tempore a finibus, quos
 „cum Chinensibus communes habent, super
 „nive Moscuam et Petroburgum illud trans-
 „ferunt. Habetque illud rhabarbarum, nunc
 „*Moscowiticum* dictum, magnam praeterea in-
 „de praerogativam, quod singularem circum-
 „spectionem Russi in ipsis Chinensis imperii
 „finibus sub coemtione, ex mandato Impera-
 „triciis, et eorum, quibus curam rei medicae
 „Imperatrix imposuit, directione, adhibent.
 „Mittitur enim Pharmacopoeus iussu Impera-
 „triciis ad fines imperii, una cum mandatario,
 „quem Commissarium vocant, cui demanda-
 „tur, ut omne, quod a Chinensibus aliisque
 „mercatoribus vicinis offeratur rhabarbarum,
 „bonum malumve, coëmat, et Pharmacopoei
 „curae tradat, qui speciatim in mandatis ha-
 „bet,

„bet, ut illud omne statim in ultima Russici
 „imperii statione Kiachta sub tecto servet, et
 „abs pluviae Solisque accessu probe defendat,
 „sic tamen, ut undique aër perflare possit, se-
 „gregando deinde vilissimum a meliori, et ha-
 „bita post paucos dies studiosa perlustratione,
 „prius illud omne igne concremando, ne in
 „manus avaras, lucelli cupidas, incidat, reli-
 „quum autem bonum, si opus foret, ab hu-
 „miditate ulterius liberioris aëris perflatu libe-
 „ret, tandemque bene exsiccatum, et a cor-
 „tice, si quis forte adhuc superstes est, ligno-
 „so, squalido, et excrescentiis omnibus, ipsis-
 „que rhaponticis repurgatum, Moscuam et
 „Metropolin mittat. Simulac rhabarbarum
 „ibidem advenit, rursus Pharmacopoei mani-
 „bus traditur, ut, quod forsan minus curiose
 „mundatum erat, de integro mundetur, tam
 „ratione fibrosae corticalis substantiae, quam
 „excrescentiarum. Atque sic nitidissimum
 „rhabarbarum in alias regiones mittitur. Haec
 „omnia nullibi librorum de materia medica
 „adhuc prodita, fide pono *III. IO. BERN. de*
 „*FISCHER*, qui tanquam testis oculatus, et
 „cuius consilio olim coëmtio rhabarbari dire-
 „cta fuit, ea inferi curavit in *A. N. C. Vol. X.*
 „*Observat. 20.* Confirmat alter testis oculatus
 „*GMELIN Dissertat. cit. §. 19.*

Ad Caput de Borace. — Dominus D. FRANCIS-
CVS ANTONIVS OBERMAYR Sal sedativum
 vario examini chemico subiecit, et experi-
 mentis atque observationibus, in *Dissertatione*
sua inaugurali, anno praeterito Vindobonae
 de hoc sale habita, prolixè descriptis, suffi-
 cienter, uti mihi quidem videtur, probavit,



boracem inter salia media iure collocandam esse, et sal sedativum quoque, a parte alcalica separatum, acidae indolis existere: Putat tamen, hoc posterius ab acido vitrioli, nitri et salis communis distinctissimum, adeoque acidum sui generis esse.

Tom. II. Sect. de Balsamicis et Aromaticis totum Caput de Caryophyllis et Anthophyllis, quod Nucis moschatae ac Macis descriptionem sequi debuisset, praetermissum est; quare istud hoc loco, ne plane deficiat, subiungere cogor:

§. I. CARYOPHYLLI sive CARYOPHYLLA AROMATICA OFF. *Würz-Nägelein, Würz-Nelken*, neque immaturi arboris caryophylliferae fructus sunt, uti plerique hactenus crediderunt, neque initia fructuum, sed potius calyces florum, exsiccati, oblongi, angulosi, nonnihil rugosi, forma clavum obtusum quodammodo referentes, in altera, eaque superiori, extremitate quatuor apiculis sive cuspidulis, stellatim decussatis, globulumque insidentem sive capitulum intermedium circumquaque fulcientibus, instructi, coloris extrinsecus fusci, subfusci aut rubiginosi, intus subluteo rufescentis, odoris fragrantissimi, saporis grati, acris, aromatici ac valde urentis.

§. II. Globulus memoratus futuri floris rudimentum est, aut rectius, oculus floris, e quatuor complicatus pelliculis, quae sese, quamprimum calyces, antea subvirides, rubescere incipiunt, sensim pandunt, floremque involutum in conspectum prodire permittunt. Valde hi flores syaveolentes sunt, et ex quatuor

tuor petalis, primo candidis, postea virescentibus, multisque praeterea staminulis albis, pistillum tenue et acutum, ex quadrato umbilico sive alveolo prominens, ubique cingentibus, componuntur. Incipiente praedicta coloris mutatione, floribusque nondum evolutis, caryophylli decerpuntur, et ad Solem postea exsiccantur, donec consuetum colorem fuscum aut rubiginosum acquisiverint.

§. III. Quando diutius in arbore relinquuntur, ut efflorescere sensimque ad fructus maturi perfectionem pervenire possint, quadruplo ferme maiores crassioresque evadunt, et eodem fere modo, quo calyces rosarum sylvestrium, in baccas oblonge-rotundas, in parte superiori aliquantulum umbilicatas, sub cortice crassiori rubiginoso nucleum, durum, oblongum, solidum prorsus ac simplicem, vel subinde etiam bifidum, includentes, sive in sic dictos ANTOPHYLLOS, *Mutter-Nelken*, transformantur. Ex arbore hi ipsi, ceu fructus perfecti atque maturi, partim sponte decidunt, partim flagellis etc. decutiuntur, et eodem quidem, quo caryophylli, odore et sapore, longe tamen debiliori, gaudent. Superstes praeterea virtus, quod addendum duco, praecipue in cortice residet, in nucleo autem parum amplius saporis et odoris sentitur.

§. IV. Arbor, quam C. BAVHINVS *Caryophyllum aromaticum fructu oblongo*, PLVKENETVS *Caryophyllum aromaticum fructu clavato monopyreno*, vocat, folia habet, laurinis non dissimilia, angustiora tamen, et plerumque ad pyri altitudinem excrefcere, vel quocunque



tamen lauro celsior esse dicitur. Quondam in singulis propemodum insulis Moluccanis uberimus harum arborum proventus erat, nostra vero aetate, postquam Batavi illas in locis plerisque exstirpare, funditusque delere allaborarunt, sola Amboina numerosiores alit.

§. V. Caryophylli aromatici adhuc integri, hoc est, recentiores et praestantiori suo principio activo a fraudulentis hominibus nondum orbati (a), *oleo essentiali aethereo* valde scatent, et satis copiosa etiam *substantia fixa gummeo-resinosa* instructi sunt. Acredo urens neque in solo ac puro oleo essentiali, neque in sola ac pura substantia fixa resinosa residet, sed ab utriusque miscela dependet, ita tamen, ut pars resinosa, quae, per se considerata, acrior, quam purum oleum est, plus ad producendum sa-
apo-

(a) In Batavia destillatores fraudulentis caryophylla destillationi integra subiiciunt, oleo prolecto, denuo siccant, et recentibus ad lucrum augendum miscent, uti hoc ipse testatur BOERHAAVIUS, quando in *Chemiae Tom. II. p. m. 100.* scribit: „Ipsa vero corpora a destillatione hac residua pristinam formam coloremque ita referunt, ut incautus quisque semisiccatos pro integris verisque haberet Caryophyllis. Quin etiam, si sinceris, oleoque suo adhuc integro praegnantibus permiscetur, imbuuntur iterum odore, sapore, ipsoque oleo inde attracto, ut quidem a genuinis postea discerni nequeant. Qua ratione etiam adulterari solent ab Aromatopolis nonnullis, qui turpe inde lucrum petunt. Conf. FRID. HOFFMANN. in *Observ. physico-chym.* p. 14.

saporem urentem conferat. Oleum aethereum, praemissa caryophyllorum maceratione temporaria in aqua falsa, ex vesica humiliori, substrato igne moderatiori, proportionato tamen seu adaequato, destillatum, satis tenue est, albicans, aqua specificè gravius (si modicam portionem exceperis, quae aquae in principio innatat), odoratissimum et acredine aromatica quidem, tam fervente tamen, qua vulgo Hollandicum (b), vel iusto fortiori etiam igne expulsum, pollet, neutiquam donatum. Color albidus, si aër saepius in vitrum admittitur, successive in flavescentem, tandemque flavo-rubescensem, degenerat, et fluiditas quoque aliquantulum minuitur. Libra una, si caryophylli bonae notae fuerint, plerumque uncias duas, totidemque drachmas, immo maiorem adhuc quantitatem reddit, si destillatio, aqua abstracta rursus superfusa, semel vel bis repetatur: „Ultimo, „FRID. HOFFMANNVS in *Observat. physico-chymicis* p. 15. scribit, illud attendi meretur, Rr 5 „quod

(b) Oleum caryophyllorum, quod ex Hollandia adfertur et in Officinis nostris praecipue venale prostat, nunquam purum est, sed semper oleo quodam expresso, quin ipso caryophyllorum extracto plus minusve remixtum, hinc plerumque etiam genuino spissius est, et colorem fusco-rubicundum, saporem urentem atque acerrimum possidet. De hoc igitur solummodo valent, quae vix allegatus BOERHAAVIUS l. c. de summa huius olei acredine fervida proposuit, neutiquam vero de genuino, quod Hollandico, uti expertus testari possum, longe remissius existit.



„quod si omne ex caryophyllis oleum proli-
 „cere velimus, opus sit reiterare bis destilla-
 „tionem, superfundendo denuo aquam, a qua
 „oleum separatum fuit. Ita in destillatione
 „secunda saepius adhuc unciam et semiunciam,
 „in tertia dimidium unciae acquirimus. Vbi
 „notandum, quod oleum prodiens in ultima
 „destillatione crassius et ponderosius sit eo,
 „quod prima destillatio concedit.,,

§. VI. Post oleum essenziale fixa pariter
 principia, praesertim potentius resinofum,
 aliquam considerationem merentur. Infusum
 spirituosum primum odorem caryophyllorum
 specificum, debiliorem tamen, quam ipsi ca-
 ryophylli, spirat, et colore subfusco - rubi-
 cundo, sapore acri, urente, aromatico est.
 Evaporando inspissatum extractum suppeditat
 rubro-fuscum, odoratum, et valde acri, uren-
 te, aromatico, et in recessu nonnihil adstrin-
 gente sapore donatum. Quando aqua sim-
 plex aliquoties ab eo abstrahitur destillando,
 adeoque oleum adhuc inhaerens hac ratione
 penitus aufertur, odorem et acredinem suam
 maximam partem amittit, ac valde debile eva-
 dit; manifesto documento, oleum unicam fra-
 grantiae causam esse, fervidamque acredinem,
 quod antea pridem dictum, ab olei et resino-
 sae substantiae miscela dependere. Infusum
 aquosum rubro-fuscum fortius quidem, quam
 spirituosum, caryophyllos redolet, longe de-
 biliori tamen sapore, eoque subacri saltem ac
 paullulum aromatico, gaudet. Massa spissata
 parum vel nihil differt, praeterquam, quod
 colorem fusco-nigricantem et debiliorem ad-
 huc acredinem obtineat. Ex uncia una tres
 prope-

propemodum drachmas extracti spirituosi primi, ac paullo maiorem quantitatem extracti primi aquosi impetravi.

§. VII. Caryophylli aromatici, qui iure inter aromata calidissima collocari merentur, forti vellicatione et singulari quodam ardore, quem tunicis ac fibris nervoso - musculofo-membranaceis imprimunt, solida quaevis ad fortiores celerioresque contractiones impellunt, humores commovent, calorem, partes sanguinis oleoso-inflammabiles expandendo, intendunt, pituitam attenuant, et exsiccante igitur, roborante ac stomachali virtute sese potissimum commendant. Magnam tamen sub usu interno circumspeditionem postulant, et in iis duntaxat morbis, qui lentorem lymphae, abundantiam feri praeternaturalem, flacciditatem partium solidarum, viscidasque primae culinae cruditates causas agnoscunt praecipuas, tuto exhibentur. Praescribuntur in infuso vinoso a scrupulo dimidio ad integrum, et variis quoque compositionibus officinalibus, maxime autem sic dictis speciebus miscentur, nec infimum denique locum inter ciborum condimenta occupant. Tinctura spirituosa ipsos caryophyllos calida indole superat, et multo adhuc cautius, etiam in refractariis morbis chronicis, cachexia v. g. oedemate membrorum, febre quartana rebeli, cruditatibus ventriculi pituitosis etc. quam caryophylli, usurpanda est. Externe caryophylli, grossiuscule pulverisati, cucuphas, pulveres cephalicos, capillis inspergendos, sacculos nervinos, nec minus unguenta et emplastra, quorum pharmacorum alia imbecilli-



cillitati capitis, hemicrania diuturnae, catarhis refractariis etc. alia tumoribus oedematosis, adfectibus paralyticis etc. medelam adferunt, persaepe ingrediuntur, et laudata quoque tinctura magnam in sphacelo et ossium carie efficaciam monstrat, si cum aliis adpropriatis decenti quantitate miscetur.

§. VIII. ANTHOPHYLLI, quod ex debili odore et sapore confestim cognoscere licet, caryophyllis longe remissiores sunt, iisdemque proinde in morbis, qui mitiora ad sui curationem postulant, substituuntur. Nonnulli fructus hosce in adfectibus uteri specificè prodesse, perhibent; attamen specificae huius virtutis nullam singularem rationem invenio. Hodie rarius in usum trahuntur, et pro meo etiam iudicio, citra ullum aegrorum detrimentum, ex Officinis pharmaceuticis exulare possent.



E R R A T A.

T O M. I.

Pag. 45 lin. 5 post invisibilia adde mobilissima, actu indivisibilia. P. 62 lin. 17 lege constet. P. 77 l. 16 post rudiori adde, in aliis teneriori. P. 89 l. 19 l. cartilagineae. P. 98 l. 19 l. perfectius. P. 124 l. 2 et 3 vocabula Osteolithus et Osteites absque ulla ratione litteris maioribus impressa sunt. P. 129 l. 18 pro calce viva l. lapide hoc, et l. 21 pro calcarii l. memorati. P. 137 l. 7 ante aquosum pone sed. P. 138 l. 5 post destituta sit pone punctum, et deinde pro R., lin. 23 l. aequae. P. 144 l. 29 l. lapidibus. P. 146 l. 16 l. potuerit. P. 162 l. 7 l. Mucilagineorum. P. 187 l. 14 l. spiritu. P. 213 l. 5 pro oblongum l. oblonge rotundum. P. 216 l. 23 pro parte l. superficie. P. 217 l. 8 l. obtectos. P. 227 l. 14 l. ceraceam, et l. 29 l. refrigerata. P. 236 l. 27 l. singularem. P. 242 l. 27 l. captas. P. 278 l. 6 l. HELLWIGIO. P. 280 l. 27 post bistortae adde etc., ex incineratis porro. P. 285 l. 32 l. experientia, eodem. P. 286 l. 2 l. accendunt. P. 292 l. 19 dele commata. P. 294 l. 3 post in, pone oleum. P. 298 l. 4 et 13 dele cominata. P. 303 l. 1 l. susurro. Pag. eadem infra textum sequens allegatum: *Conf. BOERHAAVII Chym. T. II. Proc. 106*, deficit, et eius loco, haud levi typothetae errore, §. 5. Nota quaedam subiecta est, quae diversam salium mediorum solubilitatem concernit, ac demum p. 307 §. 3. subiungi debuisset. P. 306 l. 17 l. calelescere. P. 307 l. 14 post retinet pro cominate pone punctum. P. 312 l. 16 l. affectionibus. P. 317 l. 14 post verbum tenentur adde, quod sequenti etiam modo fieri solet: Parant nimirum primo lixivium nitrosum. P. 328 l. 17 l. obstructa. P. 334 l. 28 post ideo adde hoc. P. 340. l. 12 et 13 dele cominata. P. 346 l. 23 l. tantam. P. 361 l. 9 post crystallinum adde est. P. 370 unciculi, verbis primoribus praepositi, a lin. 27 usque ad finem delendi sunt,. P. 376 Nota subiuncta ad paginam sequentem transferenda fuisset. P. 386 l. 21 post solutione adde massae, et l. 22 l. resinoso-gumineae et l. 24 l. paratae. P. 391 l. 5 l. herbaceum. P. 393 l. 20 post et adde eas. P. 395 l. 12 l. videtur. P. 403 l. 1 post ochraceae adde seu. P. 407 l. 20 l. iussit. P. 409 l. 6 pro aliis

aliis l. aliorum. P. 412 l. 27 pro saccharo l. illo. P. 462 l. 14 l. exhiberi. P. 475 l. 26 pro interna l. inferna, et l. 27 pro suprema l. superna. P. 521 l. 28 post nempe adde refinosa. P. 523 l. 19 l. *μάκερ, μάκειρ*. P. 543 unciculi praepositi a lin. 27 usque ad finem Paragraphi delendi sunt. P. 544 l. 21 l. cribrum. P. 564 l. 10 l. MARCGRAVIVS. P. 569 l. 19 pro drachmam l. unciam. P. 596 l. 6 hypercatharsin. P. 600 l. 16 l. *κολοκυνθίς*.

T O M. II.

Pag. 9. loco Notae subiunctae, quae demum ad §. X., ubi de Opii correctione per aromata etc. sermo est, pertinet, omissa sequentia: *Vid eius Observ physico-chym. p. 106.* ponenda sunt. P. 11 l. 29 pro Inde l. Indi. P. 32 l. 15 l. utilissimus. P. 47 l. 6 post duabus adde partibus. P. 51 l. 20. 21. 22 l. separata, cominata et animata. P. 62 l. 27 l. HELLWIGIVS. P. 77 l. 24 l. curandae. P. 138 l. 21 pro Flores et folia l. Folia et flores. P. 149 l. 3 l. LAVANDV-LAE. P. 167 l. 28 l. Rhodixylon. P. 201 l. 20 post quantitate adde innatat. P. 210 l. 13 post etiam adde Canella alba. P. 221 l. 7 l. patefcunt. P. 273 l. 24 l. adepta. P. 283 l. 21 pro ope l. initio. P. 291 l. 3 dele (k). P. 308 l. 7 post spadicei adde vel. P. 338 l. 1 post Dioscoridis c. B. adde, nec non SEMINA DAVCI CRETICI. P. 392 l. 11 l. spissior. P. 400 l. 22 l. trahatur. P. 404 l. 18 l. quaedam. P. 413 l. 25 l. KAEMPFER. P. 419 l. 31 l. amaritiem. P. 421 l. 2 et 3, ut et p. 424 l. 23 et p. 425 l. 6 l. Paeoniae. P. 428 l. 4 l. substantia. P. 455 l. 15 l. nec etiam, alios id fecisse. P. 456 l. 4 l. virtutum, et lin. 27 morbos. P. 459 l. 30 post sua l. et. P. 465 l. 15 l. praedita. P. 509 l. 21 post retinet, l. et. P. 519 l. 31 l. CYANI. P. 536 l. 15 l. ignota. P. 542 l. 23 l. possit. P. 545 l. 5. pro ac l. ad. P. 557 l. 22 l. exanguia. P. 558 l. 16 l. embryonato. P. 574 l. 19 l. sensimque. P. 585 l. 26 post valet add. (q). P. 587 l. 13 post febre add. quartana.

Reliqua, sub lustratione non observata forsan, aut indicatis leviora, nec minus commata et parva linearum segmenta, alibi deficientia, alibi verbis incongruè interposita, Lector benevolus ipse emendabit.



